



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

### Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.



We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

### About Google Book Search


Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>















Life of Wyttenbach. Complete.  
(The 1<sup>st</sup> vol. in a Series of Lives  
of Celebrated Scholars)

750  
100

**V I T A**  
**DANIELIS WYTTENBACHII;**  
**LITERARUM HUMANIORUM**  
**NUPERRIME**

IN

**ACADEMIA LUGDUNO-BATAVA**  
**PROFESSORIS.**

AUCTORE

**GUILLIELMO LEONARDO MAHNE.**

---

**D E N U O E D I D I T**

ATQUE

**APPENDICIS LOCO**

**EIUSDEM MAHNII EPICRISES CENSURARUM**  
**BIBLIOTHECAE CRITICAE AMSTELODAMENSIS**

ET

**DAN. WYTTENBACHII EPISTOLAS ALIQUOT INEDITAS**  
**CUM E BIBLIOTHECA GUELPERBYTANA TUM ALIUNDE DEPROMTAS**

ADIECIT

**FRID. TRAU. G. FRIEDEMANN.**

---

**BRUNSWIGAE, 1825.**

**SUMTUS FECIT ET VENUMDAT L. LUCIUS.**

742

W997

M21

---

*Μὴ προβῆκε κατορύττειν ἅμα τοῖς σώμασι  
τῶν εὐεργετῶν καὶ τὴν μνήμην τῶν ἔργων. ]*

DION. HAL. L. IV. p. 214.  
edit. Sylb.

---

# AEQUO LECTORI

G. D.

FRIDER. TRAUG. FRIEDEMANN.

---

Verissime Plinius (Panegy. c. 45.) ait: „*Melius homines exemplis docentur; quae in primis hoc in se boni habent, quod approbant, quae praecipunt, fieri posse.*“ Quo fit, ut juvenes, qui frigent ad voces et praecepta magistri quamvis utilia et gravia, vita ac factis ipsius multo facilius confirmantur et incalescant. In primis vero iidem vitis magnorum hominum legendis non delectantur solum mirifice, verum etiam ad summa quaeque suscipienda citius rapiuntur. Magna enim ad commovendum vis inest in illustribus exemplis, cum ob nominis existimationem atque auctoritatem, tum quod res omnes ita ante oculos ponuntur, ut non tam similitudo veri, quam veritas ipsa, repraesentari videatur. Ac saepe numero latentes in adolescentibus virtutum scintillas videmus uno clarorum virorum casu, una afflictatione, uno sapienti consilio, uno vel fortiter facto vel graviter dicto repente inflammatas exardescere ad acerrimam studiorum morumque imitationem. Quae



quanquam imprudentes et tardiores nonnunquam eo abducit, *ut aut ea, quae facilia, aut etiam illa, quae insignia ac paene vitiosa, consectentur* (Cic. de Orat. II, 22.): tamen muniri facile possunt, si mature, quid in quoque genere optimum sit, investigare, idque unice probare, velle, amare consuecant. Nam caeteri quidem, qui imbecillitatis suae conscientia absteriti desperant, optime levantur ejusdem Ciceronis (Orat. ad Brut. c. 1.) saluberrimo solatio: „*Par est, omnes omnia experiri, qui res magnas et magno opere expetendas concupiverunt. Quodsi quem aut natura sua, aut illa praestantis ingenii vis forte deficiet, aut minus instructus erit magnarum artium disciplinis, teneat tamen eum cursum, quem poterit: prima enim sequentem honestum est in secundis tertiisque consistere. — Quare non est, quod eorum spes infringatur, aut languescat industria. Nam neque illud ipsum, quod est optimum, desperandum est, et in praestantibus rebus magna sunt ea, quae sunt optimis proxima.*“

Quare non dubito, quin operae pretium facturus sim, institute hoc vitarum hominum quocunque litterarum genere eruditissimorum delectu, his praesertim temporibus, ubi in maximis, quae ubicunque terrarum vigent, adolescentum studiis multi tamen, aut, mediocritate quadam contenti, laboris fuga languori se dant et superstitioni, neque assurgunt

ultra viles vitae sustentandae necessitates, aut, nescio quo saeculi nostri vitio abrepti, somniando res publicas ordinare, quam strenue discendo illis garentis idoneos sese reddere, et juvenes patriae opem dubiam nolenti obtrudere, quam viri facti certum auxilium ferre poscenti malunt. Neque tamen desunt, id quod laetabundi fateamur necesse est, qui in virtute atque humanitate, qui in omnibus bonarum artium disciplinis cognoscendis et tractandis omne suum studium tempusque collocent. Hos ego his cohortationibus atque his vivendi exemplis regendos et incitandos esse puto, ut id ipsum, quod in assidua optimarum rerum contemplatione et liberalissimis occupationibus versantur, facere possint laetius et alacrius. Spero etiam fore, ut viri, sive qui et ipsi juventutem erudiunt, sive qui nondum omnem humanitatis amorem deposuerunt, hanc vitarum collectionem non sine multiplici delectatione perlustrent, et, si nihil aliud, suavissimam saltem adolescentiae suae memoriam repetant.

Et quo certius id, quod volebam, assequerem, non in praeteritorum saeculorum longinquitatem abeundum, sed in hujus nostri luce, quantum fieri posset, subsistendum mihi esse putavi: ut ne diversa miscendo juvenum animos turbarem, sed potius rerum publicarum privatarumque similitudine, hominum propinquitate et ipsarum terrarum vicinia eos invitarem ac detinerem. Quam rem ut bonis omni-

bus anspicarer, nihil mihi visum est aptius *Danielis Wytttenbachii* vita a *Mahnio* nuperrime scripta, quae in maturam adultiorum virorum aetatem incideret, et ineuntem quoque attingeret puerorum. Neque ab hoc consilio deterrere me potuerunt minaces et acerbae voces, quas jactat *Mahnus* in familiarem meum, *Frid. Lindemannum*, nunc gymnasii Zittaviensis praefectum, et si quis alius ausus fuerit ipsius libellum denuo edere. Primum enim tanto pretio venundatur (Lipsiae apud Weigelium 2 Thl. 8 Gr.), ut vix aliquot viros litteratos eosdemque bene nummatis, non scholarum magistros, quorum curta solet esse supellex, nedum adolescentes litterarum studiosos adhuc emisse aut emuros esse sciens affirmem, quippe quorum desideriis *Hemsterhusii* et *Ruhnkenii* vitae, non magno parabiles illae, satisfacere posse videantur. Atque omnes omnino Britannorum et Batavorum libri philologici immansi fere sumtu nobis sunt coëmendi, ut in incredibilibus hominum nostrorum studiis vix unus et alter reperiatur, qui, non sine rei familiaris periculo, externas opes concupiscere audeat, plerique cautius abstineant. Ita eorum repetendorum artificium exteros non privat justo fructu, qui in his terris aut nullus aut exiguus est, sed rerum peregrinarum desiderium, quod summum apud nos esse solet, quodammodo sublevat.

Deinde totum hoc negotium, quidquid est, non

amore lucri, sed bene merendi cupiditate, suscepisse mihi ita conscius sum, ut gravissimas contumelias non solum moderate, salvoque honore et pudore, ferre posse mihi videar, sed etiam solidam et magnam gratiam initurum me sperem apud *Mahnium*, virum doctissimum, quod me potissimum auctore nomen ipsius, nonnisi paucissimis nostratium auditum, ad communem omnium notitiam sit perventurum. Porro quod Batavis parum placere dicitur, quam vocat, aliis sua surripiendi aviditatem, non satis verum esse ipse in me expertus sum: quod et longum est narrare, et piget etiam, posteaquam, quae dicenda esse videbantur, protuli in *Seebodii* bibliotheca critica rei scholasticae a. 1824. Vol. VI. P. 4. p. 387 sqq.

Denique libellus meus propriam quandam, quae se commendet, dotem habet, lectoribus longe jucundissimam futuram. Atque hic primum mihi commemoranda est *Eberti*, viri amicissimi mihi quae multis nominibus cari, egregia voluntas, quae *Wytttenbachii* et *Santenii* epistolas ad decessorem suum datas non solum sponte obtulit, sed praefatione quoque ac brevi annotatione ornavit. Tum *A. Matthiae*, vir clarissimus, duas mihi roganti benevole misit epistolas a *Wytttenbachio* ad se datas, quarum alteram, quae *Ruhnkenii* annotata ad ipsius epistolas criticas continet, novae potius, quam paro, *Ruhnkenianorum* opusculorum editioni inserendam esse censi. Se-

quitur, ut *Huschki*, viri clarissimi, animum facillimum promptissimumque praedicem. Qui, quum ex multis, quas habet, *Wytenbachii* epistolis unam tantummodo in lucem commode edi posse mihi confirmasset, eam ipsam ad me misit, praeterea pollicitus *specimen scholarum de historia litterarum a Wytenbachio habitatum* simul cum sua de *Heraclito* commentatione. Quod promissum exoptatissimum irritum factum esse balneorum Dobberanorum necessario usum cum ipsius, tum sua causa lectores mecum vehementer dolebunt: confido tamen fore, ut *Miscellaneis Criticis* brevi omnia inseri possint. Praeterea gratias agam *Heerenio*, viro clarissimo, qui ex socii haereditate duas epistolas mihi tradidit eadem, quam antea in Ruhnkeniano negotio expertus sum, voluntatis humanitate. Denique *Fr. Jacobsius* amantissime mihi suppeditavit fragmentum epistolae a Wytenbachio de clade urbis Leidae ad amicum nescio quem scriptae. Quae res etsi satis exposita videri potest in epistola ad Sanctocrucium data, (conf. p. 155 sq. huj. ed.) nolui tamen committere, ut quidquam premeretur, quod ad perspicuum Wytenbachii animum, tam gravi casu perculsum, facere posset. Atque etiam *Creuzerus* et *Eichstaedti*, viri clarissimi, sua mihi libenter aperuissent scrinia, nisi illum viduae Wytenbachii aliqua, opinor, dubitatio, hunc morbus gravissimus et longinquior a domo discessus impediissent. F.

*A. Wolfium* quum antea justae quaedam causae, quas ignorare me noluit, retinissent, quin proferret epistolas ad se datas, tum vero incidit iter ad balnea Galliae Italiaeque susceptum, unde tristissimus jamjam affertur nuntius de repentino ejus obitu, quem Gratiae Veneresque cum Musis omnibus diu lugebunt. M. O. C. — Quodsi forte et haec, quas dixi, et aliae epistolae postea mecum fuerint communicatae, nullam moram interponam, quin in *Miscellaneis Criticis* locum et commodum et tanti viri manibus, opinor, non indignum iis concedam.

De ipsa *Wytttenbachii* vita a *Mahnio* scripta quid statuam, difficile est dictu: cavendum est enim, ne meas ego merces ipse laudare videar, ac, si quid improbaverim, ne *Mahnii*, qui ex irritabili genere esse videtur, bilem in me commoveam animumque magis etiam exacerbem. Nihilominus aggrediar, fretus cum recti conscientia, tum veritatis studio. Ac primum quidem, quin eam inter praestantiores hujus aetatis scriptiones ponam, nemo potest dubitare ob repetitam ejus editionem. Et sane haec laus nullo modo ei deroganda est, non solum ob amplissimam magistri famam et pietatem discipuli singularem, verum etiam quod res scitu dignissimae recte accommodataeque exponuntur, et sanum ubique elucet de rebus humanis divinisque judicium et artium ingenuarum juvandarum admirabile studium. Neque orationi deest color Romanus et, quam nunc fere

homines aspernantur, nativa simplicitas ac facilitas  
 quaequam multa reperire mihi videor, quae abhor-  
 rent a latina dicendi consuetudine et subtiliori ser-  
 monis romani pervestigatione. Quae quominus in  
 singulis vocabulis et dictionibus notare, obstitit  
 justus minutiarum metus, quem exprobrare solent  
 quidam altiora scilicet petentes. Etsi enim illustra  
 habeo exempla, quibus, si opus esset, tueri me pos-  
 sem; tamen, quia etiam summi viri, et qui in hoc  
 genere regnare dicuntur, *Muretus*, *Ernestius*, *Ruhn-  
 kenius*, naevos suos habent, quamvis raros, et *Wy-  
 ttenbachius* ipse nonnumquam plus, quam decet, sibi  
 indulget, nolui ego in discipulo, ubi plura nitent,  
 paucis offendi maculis. Paulo iniquius fere statuit  
*Mahnii* censor in *Ephemer. Litt. Halens.* a. 1824  
 m. Aug. Nro. 194. 195. p. 713-726.

Addendam coronidis loco putavi ejusdem *Mahnii*  
*Epicrisin Censurarum Bibliothecae Criticae* Voll.  
 III. P. III. quae prodit Trajecti ad Rhenum ex ty-  
 pographico Io. Altheer, a. 1808. Quae licet verbo-  
 sitate quadam laboret et saepe adversarii causa ad-  
 minutissimas res descendere cogatur, multa habet,  
 quae cum ad *Wytenbachii* vitam spectant, tam ad  
 latine scribendi facultatem: atque ita nostrates etiam  
 habebunt, unde Batavorum disceptandi genus cogno-  
 scant. Nam *Epistolae Sodalium Socraticorum Phi-  
 lomathiae cum praefatione et appendicibus a*  
*Mahnio* editas Zuericae a. 1813. pp. 419. non ma-

gnopere desiderabunt, utpote plenas rixantem, qualem est etiam *Defensio Batavorum contra Tittmannum*, academiae Lipsiensis profess., inserta libro III. *Philomathiae* a *Wytenbachio* editae. Si reputasset Batavi, a nostratibus *Ernestium* non attolli supra saeculi sui captum, neque unquam comparari a quoquam in graecis litteris cum *Hemsterhusio*, *Valckenario*, *Ruhnkenio*, imo vel in ejus editione Cicero-  
nis plura a nostris hominibus, quam a Batavis, nunc requiri ac corrigi; profecto nec modum in *Ernestio* laudando nos excedere dixissent, nec, quod unus nostrum peccavit, ad omnes nullo facto discrimine transtulissent. *Ernestii* vero latinitatem, qua unus omnium maxime excellit; non cum stupore, sed cum judicio nos admirari, testimonio esse possunt cum alia multa, tum praecipue annotationes *A. Matthiae* ad *Eloquentiae Latinae Exempla* Lipsiae a. 1824. edita. Neque in ipso *Callimacheo* negotio adeo aversi sumus a veritate, ut popularem nostrum ab omni suspitione sive erroris sive culpa liberare, et in externos conjicere cupiamus. Conf. *Eberti* judicium in *Lexico Bibliograph.* T. I. p. 268. prolatum, et illustratum in *Sesbodii* *Bibl. Crit.* a. 1820. Vol. II. p. 425 sq.; ut silentio praeteream, quae olim *Reiskius* in vita sua (Lips. a. 1783.) acerbius conquirebatur. Atque omnino externos a nobis liberalissime honorificentissimeque haberi, vel abjecta diuturnae possessionis gloria, documento esse possunt,



quas idem *Ebertus* in *H. A. Niemayeri* itineribus T. III. de inventa arte typographica breviter dissecuit, mox pluribus persecuturus in libro menstruo, qui inscribitur: *Hermes*. Haec ὁς ἐν καπέδῳ. Sed quoniam in istorum *Sodalium Epistolis* multa commodè monentur de latini sermonis proprietate, non patiar nostrates ea diutius ignorare. Optimis vero et praeceptis et exemplis abundat *Mahnii Crito* s. *Dialogus de literarum, inprimis latinarum, studio recte colendo*, Zierizeae a. 1816. editus, quem, non discipulis solum, sed magis etiam magistris ipsis commendabilem, propediàm denuo typis describendum curabo.

Verba ipsa et *Mahnii* et *Wytttenbachii* summa, qua par erat, fide reddidi, retenta etiam, flagitante *Huschkio*, interpungendi et pingendi ratione in epistola ad ipsum data; paginas Batavae editionis ubique hoc signo [ ] inclusas addidi. Tabulam, qua manus *Wytttenbachii* ipsa repraesentatur, litteris chalcographiae ope effictis, omisi, quippe quod aliter senex, aliter vir soleret scribere, et ibi nonnisi tremuli ductus ostenderentur. Ac praeterea silentio non transmittenda est praeclara et benevola opera, qua duo collegae conjunctissimi, *J. L. Elster* et *G. H. Th. Hartwig*, in summis suis occupationibus juvare me non dubitarunt, ille in indicibus conficiendis, quibus editio Batava prorsus caret, hic in typothetis regendis, qua in re, quod diutius ignorari non de-

het. summam suam curam ostendit in stereotypis editionibus *Phaedri, Eutropii, Nepotis*, quas hic excudit *Reichardus*, diligentissime emendatissimeque factis. Quanquam vero Batavae editionis errores ubicunque correxisse dici possumus, casu tamen iniquo unum, quod sciam, novum inveximus in fine vitae *W.* p. 210. *visus* pro *vivus*, quod beneyole excusabunt ii lectores, qui his quoque rebus facile, et jure quidem suo in libris juventuti erudiendae editis, offendi solent.

Secundum volumen *theologorum, jureconsultorum, medicorum, historicorum, aliorum* continebit aliquot vitas emendatius scriptas; nam diversis juvenum studiis diversa quaerenda sunt exempla, neque haerendum in una philologorum natione, quamvis fictrice, et quasi parente et procreatrice, reliquarum artium omnium. Exhibebo igitur, non invitis auctoribus ipsis, quod apud alios facillime impetravi, apud alios impetraturum me spero, *S. F. N. Mori* memoriam a *Beckio, Griesbachii* et *C. G. de Voigt* ab *Eichstaedio, Heynii* a *Mitscherlichio, J. Mülleri* a *Schützio, Gensleri* ab *Heinrichio, Tiedemannii* a *Creuzero, G. L. Spaldingii* a *Walchio, J. C. Wernsdorfii* a *Wideburgio* scriptam, et si quid est praeterea, quod memoratu dignum videri possit.

Tertium volumen altius descendet et repetet memoriam *J. D. Michaelis, Heumanni, Gattereri,*

*Meinersii*, *Gmelini*, *Kaestneri* ab *Heyno*, *J. J. Bodmeri* ab *Hottingero*, *J. M. Gesneri* a *Niclasio*, *J. L. Moshemii* ab eodem *Gesnero*, *Godschedii*, *Gellerti*, *Joecheri*, *Mascovii* aliorumque ab *I. A. Ernestio* relictam. Abstinebo vero ab *Hemsterhusii* vita, quanquam ita a *Ruhnkenio* scripta, ut, quae iterum iterumque describatur, sit dignissima; neque manum admovebo *Gesneri* vitae ab *Ernestio* scriptae. Utraque enim ita est comparata, ut omittere ejus lectionem nemo juvenum possit, qui ultra tenuitatem pergere cupiat; sed parabilis utraque *Lindemanni* et *Matthiae* Beneficio, quorum alter duumvirorum summorum *Hemsterhusii* et *Ruhnkenii* vitas Lipsiae a. 1822 edidit, alter inter eloquentiae Latinae exempla supra memorata posuit. Reliqua volumina lectores ordine reducent in ultima renatarum litterarum tempora.

Quodsi quis inceptum meum sive consilio sive ope benigne juvare, et latitantes saepius praestantiores hujusmodi scriptiones sive indicare sive transmittere voluerit, pergratum et mihi faciet et adolescentibus nostris; simul vero et hoc, quaeso, meminerit, non solum rerum tractatarum, sed etiam scribendi generis, quod non debet abhorreere ab omni elegantia, rationem mihi habendam esse.

Scr. Brunovici, ips. Cal. Septemb. anno 1824.

---

VIRIS CLARISSIMIS,

IOH. MELCH. KEMPERO

ET

DAV. IAC. LENNEPIO,

ACADEMIAE LUGDUNO BATAVAE

ATQUE

ILLUSTRIS ATHENAEI AMSTELODAMENSIS

PROFESSORIBUS,

S. P. D.

GUILIELMUS LEONARDUS MAHNE.

---

*Dictu incredibile est, Viri Clarissimi, quam gravem et acerbum dolorem mihi ante hos tres annos nuntius de obitu optimi Wyttenbachii nostri attulerit, et quanto illius viri desiderio me adhuc moveri sentiam. Licet enim omnium magistrorum meorum, qui mihi a primâ inde pueritiâ satis multi obtigerunt, de me merita semper gratissimo pectore agnovi, et quavis occasione praedicavi; licet debitum honorem ipsorum piis manibus nunquam non habui: me tamen uni Wyttenbachio plura debere, quam reliquis omnibus, ultro fateor. Et quidni fatear? Partim enim reditus meus in*

)

patriam e Germaniâ, ubi per duodecim fere annos optimorum magistrorum scholis interfueram, partim aliae causae, inque his primum juvenilis, ut fit, incogitantia et levitas, tum vero etiam ex bellorum deinceps gestorum diuturnitate exorta epistolarum commercii difficultas, me sensim paulatimque ab illis praestantissimis doctoribus, ut ita dicam, penitus abalienarunt. Quod profecto factum nollem. Sed nimis sero est. Omnes illi enim jam in locum communem ad plures abierunt. Sit igitur ipsis terra levis! — Porro autem, Mi tres venerabiles quondam Academiae Rheno-Trajectinae senes, Saxius, Segarius et Bondamius, qui mihi in ipsorum Academia aliquamdiu degenti, ac quotidie ad ipsorum scholas venienti, certissima suae erga me benevolentiae documenta dederunt, nec parum mihi profuerunt: sed illi tunc temporis in Literarum Humaniorum studio excellentissimi viri, atque splendidissima Academiae Rheno-Trajectinae ornamenta, haud ita multo post diem supremum deinceps obierunt. Quo factum est, ut cum his senibus mihi juveni tanta necessitudo ac familiaritas intercedere non potuerit, quanta quidem mihi postea cum Wytenbachio fuit, quem Diu diutius nobis servarunt.

Ab anno enim superioris seculi octogesimo nono (quo anno in optimi viri disciplinam veni) ipsum doctorem habui et principem cum ad recte suscipiendam et ingrediendam, tum ad strenue persequendam rationem illorum studiorum, quae

juventutem ac virilem aetatem meam abierunt, atque hoc ipso tempore, in amissione tam cari ac dilecti capitis, mihi has schedas scribenti cum maxime solatio fuerunt, nec unquam, quod spero et opto, me deserent.

Neque Wyttenbachium tantummodo doctorem habui, (quamvis id jam in praecipuo felicitatis meae parte pono) verum ipse etiam per omnem reliquam vitam suam mihi perpetuo benevolus fautor, sincerus amicus, optimus patronus fuit. Mutuus inter nos amor per triginta annos literarum studii communione adeo crevit, ut ego Wyttenbachium veluti alterum parentem coluerim ac veneratus sim, ille vero me tamquam filium dilexerit, et quam plurima bona in me conferre numquam desierit. Quid multa? Equidem sane Wyttenbachio maximam partem debeo; quod mihi, ut ille ait, vita vitalis per multos annos fuerit. Haec prae me ferre et affirmare numquam desinam.

Haec autem, et plura hujus generis alia, post mortem optimi viri mecum denuo reputans, pietatis officia id a me inprimis postulare videbantur, ut literis mandarem, quaecumque ad meam notitiam pervenerint de vita et rebus illius viri, qui per quinquaginta fere annos aut scholis habendis, aut libris scribundis, aut epistolarum commercio, aut alio quovis modo, quam plurimis prodesse studuerit.

Verum enimvero, Viri Clarissimi, quum neutri Vestrūm ignotum sit, quis et quantus vir

Wyttenbachius noster fuerit; quum Vos ambo una mecum ipsius disciplinâ et amicitia usi sitis: atque summi Viri in rem literariam egregia merita semper maximi aestimaveritis; quum praeterea re et factis ostenderitis, Vos mihi favere ac bene velle: profecto non opus est, ut multis et e longinquo petitis argumentorum rationibus explicem, cur Vos potissimum patronos hujus opusculi mihi sumserim, in quo communis magistri nostri memoriam integre conservare, ac posteritati incorrupte tradere volui. Sive enim Wyttenbachii, sive mei ipsius rationem habeam, cui hoc, quidquid est muneris, majori jure dedicem, quam quidem utrique Vestrum, neminem alium sane video. Atque idcirco a Vobis peto, Viri Amicissimi, ut hoc munusculum tamquam grati erga Vos animi mei pignus accipiat, et mihi meisque honestis studiis ac laboribus ita favere pergatis, quemadmodum hucusque Vos fecisse lubens, laetus, gratus meritoque fateor.

Scripsi Gandavi,  
MDCCCXXIII.

---

# LITERARUM HUMANIORUM STUDIOSO LECTORI

S.

---

Tandem ergo prodit ille libellus, quem ante hos duodeviginti menses, quo tempore typographus Gandavensis vix aliquot paginas excudere coeperat, jam FRIDERICUS LINDEMANNUS, *Professor Misenensis*, se unâ cum *Elogio Hemsterhusii et Vita Ruhnkenii* denuo editurum promisit, quemque reapse etiam statim prelo subjici curasset, ut scilicet mihi ac librariis meis quantocys gratum faceret, modo mea nimis magna tarditas optimum virum et in aliorum scriptis repetendis admirabilem hominem non praeter expectationem frustrata esset. Intellexi hoc partim e Lipsiensi librorum Catalogo, potissimum vero ex istâ superiori anno Lipsiae ab ipso editâ sylloge horum trium opusculorum, *Elogii Hemsterhusii, Vitae Ruhnkenii et Elogii I. Meermannii*. In praefatione enim ad istum librum haec legimus: „Quae ante hos duo et viginti annos minori pretio parabilis harum vitarum editio Lipsiae prodierat, distractis jam exemplis, ejus repetendae curam roganti honestissimae librariae ego receperam.



*Ut nova quaedam accederet libello commendatio, et notas quasdam addere, et Wyttenbachii nuper defuncti vitam, quam audieram a Mahnio conscriptam mox in Batavia prodituram, adjungere decreveram. Illud quidem consilium quo perficerem, in me positum erat. Hoc vero irritum fecit delusa adhuc de editione Mahniana scriptiois spes, quam erat quod opinarer certissimam. Igitur deficiente alio, quod novum accederet, Meermannii elogium a Constantino Craso conscriptum, quod ante hos quinque annos me in Batavia summa cum voluptate legisse memineram, adficere destinabam, idque feci. Tametsi enim Crasiana commentatio duarum priorum praestantiam neque generis similitudine, neque sententiarum gravitate, neque scriptiois elegantia aequat; tamen et ipsa suas habet virtutes, et, quod praecipuum, ita est comparata, ut juvenes ad meliora evitantes et literarum studia penitus amplecti cupientes instigare, naviterque progredientes confirmare possit; quippe nihil tantopere animum juvenilem ad summa quaeque consecranda erigit, quam commentationum de vita illustrium virorum conscriptarum lectio. Unde sperabam, fore, ut lectoribus haec talis mantissa non ingrata accideret."*

Quid exteri de istiusmodi aliis sua surripiendi aviditate statuant, nescio: Batavis istam parum placere, non sine causâ credo. Mihi sane, ut sententiam meam libere aperiam, tale studium (nisi potius flagitium appelles) non modo per se inhonestum, et infra liberaliter instituti hominis dignitatem positum,

sed in *Lindemanno* plane sordidum, ingratum, nec ferendum omnino videtur. Numnam isti homini, quum *Leidae* esset, Batavi propterea *thesaurorum suorum scrinia aperuerunt, et scribendi materiam prae-buerunt*, ut ad suos reversus pro acceptis beneficiis hanc gratiam Batavis referret, ut continuo in Batavorum scripta tamquam in vacuam possessionem involaret, legitimosque possessores lucrandi studio abreptus nisi bonis suis omnino spoliaret, certe inhonesto opificio damnum inferret? Pudeat pigeatque hominem tam turpis mercatus, lucripetis tam illiberale negotium relinquat, ipseque ad sanio-rem mentem redeat!

Continet vero hic libellus non nisi nudam ac simplicem rerum *Wytenbachii* praecipuarum enar-rationem. In qua ut recte et ordine procederem, primum *Wytenbachii* scripta denuo relegi, quaeque ad propositum meum pertinere intellexi, maximam diligentiam ex illis excerpsi, et huic scriptioni subinde addidi in gratiam studiosorum juvenum *Wytenbachii* scriptis carentium. Deinde, quae ex ore ipsius *Wytenbachii* audieram, quoad potui, in memoriam mihi revocare studui. Denique, non modo honestissimam magistri viduam, ipsiusque plenum fidei fratrem subinde consului, verum etiam ex aliorum ad *Wytenbachium* epistolis nonnulla scitu haud injucunda petii. Ex his puris et limpidis fontibus mea hansi. Atque idcirco haud facile quemquam aliquid in hoc libello reperturum esse, quod a veritate alienum sit, prae me ferre audeo.

Interim tamen probe scio, quam arduum ac difficile opus susceperim. Neque me fugiunt illa ipsius *Wytttenbachii* verba, *magnum virum nisi a magno viro rite laudari non posse*. Verum quum neque *Wytttenbachii* vila laude et praeconio meo indigeat, neque ego adeo vanus sim, qui me pro meritis **SUMMUM VIRUM** laudare posse putem; tam benevolos et indulgentes lectores me habiturum spero, qui mihi ob honestum studium meum, quo nihil aliud mihi proposui, nisi ut disciplinae necessitudini ac pietati aliquâ saltem ex parte satisfacerem, potius favere, quam ob virium mearum mediocritatem me carpere malint. Quinetiam, si fortasse hoc aliter mihi eveniat, et nonnulli reperiantur, qui vel majoribus ingenii sui viribus ac dicendi facultate ampliori confidentes, vel invidiâ et partium studio abrepti, dictitent, hanc scriptionem meam vix meliorem sortem mereri, nisi ut deferatur

*In vicum vendentem thus et odores,*

*Et piper, et quicquid chartis amicitur ineptis;*

tamen illa animi mei firma persuasio mihi haud levi solatio erit, me ut *vivi WYTTTENBACHII* amicitiam semper maximi aestimaverim, sic *mortui* memoriam pie ac religiose usurpare et nunc voluisse, et semper usurpaturum esse.

Scripsi Gandavi,

**MDCCCXXIII.**

# V I T A

## DANIELIS WYTTENBACHII.

---

Scimus quidem ex annalium monumentis; gentem Wytttenbachiorum admodum nobilem et antiquam esse; sed nobilitatis illius auctorem ignoramus. Ipse Wytttenbachius noster, de majoribus suis aliquando, data opportunitate, loquens, nihil aliud de iis dixit, nisi "*Literatos duos habui, utrumque Theologiae Professore; patrem proxime, et saeculo decimo sexto in-  
eunte Thomam Wytttenbachium, Basileae docentem, cujus e disciplina clarissimi Helvetiae reformatores, qui dicuntur, prodierunt, tum princeps Zwinglius.*" Verum licet hic Thomas Wytttenbachius eruditionis suae famam quam plurimum ad gentis nobilitatem extol-  
lendam et amplificandam contulerit, tamen jam ante ipsum gestis muneribus clari viri in hac gente fuisse omnino videntur. Quis enim fuit hicce Thomas Wytttenbachius? Biennensium consulis, Ulmanni Wytttenbachii, filius. Sed quum de superioribus illis nihil ad nostram notitiam pervenerit, [2] pauca de hoc Thomâ Wytttenbachio referam. Hic Biennae anno 1472 natus, primum Basileae, deinde Tubingae, studiis theologicis

---

[Scimus quidem] Haec sumsi e *Mausolâ Bernensi*, libro Germanice scripto, Bernae 1740.

[Literatos duos] Philom. lib. 1. p. 3.

operam navavit, et tantâ humanitatis eruditionisque laude ac famâ floruit, ut Tubingenses ipsum per excellentiam *Helvetium* cognominasse dicantur. Finito studiorum Academicorum curriculo, brevi post Basileae magnâ cum intelligentium virorum laude, plausu et approbatione Theologiam usque ad annum 1522. docuit, et multos eruditione praestantes discipulos habuit: e quibus prae caeteris *Ulricus Zwinglius* et *Leo Judas* excelluerunt. Deinde vero, quum docendi munere sese suo abdicasset, in patriam rediit, ibique in otio literato privatus quadriennium transegit, et anno 1526, aetatis quinquagesimo quarto, mortuus est.

Mox post Thomae Wyttenbachii aetatem nonnulli ex ipsius nepotibus sedem fortunarum suarum Biennâ Bernam transtulerunt, inque illâ urbe domicilium sibi fixerunt. Et quum hi posterî majorum suorum vestigia premerent, vitae ac morum honestate probitateque conspicui essent, ac sic veram gentis suae nobilitatem atque gloriam sibi integram et illibatam servarent; facile intelligitur ratio, quâ factum sit, ut Wyttenbachii postea in utrâque civitate, tam Biennensi quam Bernensi, summis honoribus functi sint, et adhuc fungantur. Operae pretium duco, quaedam ex BANGII *Elogio Danielis Wyttenbachii, patris*, [3] huc spectantia prodere: "*Est gens Wyttenbachiorum, inquit scriptor, si non nobilissima, at nobilis tamen valde, siquidem honores semper magistratusque ad eam sunt a multis retro temporibus delati, hodieque ex patriciis est, quibus patet et curia et aditus ad rempublicam.*" Sed quid plura? Apparet omnino in hac Wyttenbachiorum gente, verissimum esse illud Ciceronis, *gloriam virtutis et rerum gestarum esse optimam et*

omni patrimonio praestantiorē hereditatem, quas a parentibus tradi liberis queat. Quilibet enim e posteris in majorum suorum vitas, tanquam in speculum, inspexisse, et rerum ab ipsis gestarum diuturnā recollectione et contemplatione ad imitandi et non nisi egregia faciendi studium incensus fuisse videtur. Certe uterque *Daniel Wyttenbachius*, tam pater quam filius, exemplo suo nobis ostendit, hanc esse maximam et praecipuam utilitatem, quam quis ex generis sui nobilitate percipere queat, si in id incumbat, ut a majorum virtute non degeneret. Quis ignorat illud Euripidis?

καὶ οὐ γὰρ κλέος τόδε

κἀλλίστον, ὅστις ἐκ πατρὸς χρηστοῦ γεγώς,  
ἐς ταῦτόν ἦλθε τοῖς τεκοῦσι τοὺς τρόπους.

De parente autem non est, quod multa scribam. Qui enim illum virum propius noscere velint, *BANGII Elogium* legant, in quo accurate ostenditur, quibus initiis et gradibus a primā inde aetate animus viri ad virtutum [4] studium conformatus, et ingenium doctrinis excultum sit, et quid quantumque in quoque laudum genere secutus assecutusve sit. Fuit vero primum in Bernensi, deinde in Marburgensi Academiae Theologiae Professor. Atque Bernae anno 1743 uxorem duxit nobilem virginem, *Rosinam Lombach*, ex qua undecim quidem liberos suscepit, sed e quibus, patre Marburgi anno 1779 diem supremum obeunte, non nisi quinque amplius superstites erant.

Horum ordine tertius fuit *Daniel* noster, natus Bernae die 7 Aug. 1746. — A piā et benignā matre

*Euripidis*] Hal. vs. 941.

quibus initiis] Bibl. crit. P. VI. p. 139.

*Daniel*] In *Elogio* BANGII p. 41. simpliciter *Daniel* nominatur; et vero in *Memoria* Danielis Wyttenbachii, patris, a M. C. CURTIO scripta, *Daniel Albertus* vocatur. Ergo quaeritur, cur posts-

4

anpitrus, et summâ curâ ac sollicitudine educatus, non modo in spem parentum laete puerulus succrescebat, verum etiam mature jam, partim in gremio matris, maximam vitae suavitatem ac voluptatem in liberorum bonâ ac prudente educatione ponentis, partim domestici magistri operâ ac studio, simul cum duabus sororibus natu majoribus, legendi et scribendi artem discebat.

Hac elementariâ institutionis disciplinâ probabiliter imbutus, anno aetatis octavo in scholam Bernensensem publicam a parentibus mittebatur, ut ibi Literarum, imprimis Latinarum, rudimenta disceret. Primum scholae pensum in ediscendis et describendis declinationibus et conjugationibus positum erat. Hoc peraeto, puer quotidie e Cellarii vocabulario certum numerum vocabulorum memoriter recitare, et Erasmi colloquia interpretari debebat. Quae omnia satis feliciter ipsi succedebant. Nam [5] neque ingenii docilitas, neque memoriae bonitas puero deerant. Sed studii assiduitas non dum aderat. Quemadmodum plerique omnes pueri scholastici, prosperâ valetudine, ut plurimum, fruenter, ac vividè, ad ludendum procliviores sunt, quam ad studendum, et lubentius puerilia, quam seria, tractant; ita quoque Danieli nostro magis commilitonum alacritas, quam magistri severitas, illorum exercitationes, quam hujus praeceptiones arridebant et placebant. Pueri v. c. Bernenses pulchrum, honestum et decorum ducebant inter se proeliari. Igitur, in cohortes divisi, eligebant sibi suos ductores, et certis temporibus bacillis armati

---

riori praenomine numquam usus sit. Quod neminem certo scire opinor. Memini ipsum mihi aliquando in familiari colloquio narrare: *duo habui praenomina*, alterum *biblicum* DANIELIS, alterum *barbarum* ALBERTI. Prius retinui, posterius rejeci: idque eo magis, quod mihi vocabulo Germanico *albern* (*stolidus*), qualis nec esse, nec haberi volebam, nimis affine videbatur. At quis non videt, haec ab ipso *per jocum* dicta fuisse?

pugnas satis atroces inibant. Hoc ludorum genus, ut justum, parentes liberis concedere videbantur. Et quum illud etiam, ut fit, Danieli minime displiceret, reliquorum puerorum exemplo omne studium suum et solertiam eo conducebat, ut cohorti, cui nomen dederat, quam maxime utilis esset. Nihil ipsi suavius et jucundius, quam partes exploratoris, aut nuntii, aut subsidiarii agere. His in muneribus aliquando accidebat, ut speculatum hostilem puerorum cohortem in summum culmen tecti paterni escenderet, atque inde ad suos clamaret saltans, *En pueri, quam in alto sim!* His ipsis, sed magis etiam aliis, qui forte advenerant, senioribus, ad puerum oculos convertentibus, \*

*frigidus horror*

*Membra quatit, gelidusque coit formidine sanguis.*  
[6] Ingemiscebant et hortabantur eum, ut sub tectum rediret. Ille ridens et sine metu sensim se introrsum insinuabat, et ad suam se cohortem recipiebat. Facinus vero istud tentitarius mox ad parentum notitiam perferebatur, et ab utroque diverse ac suo more animadvertebatur. Pater cum solitâ sibi ironiâ et admodum Laconice, *Audio, inquit, te jam in tecto saltare posse.* Filiolus statim intelligens, quòrsum id spectaret, veniam rogabat, et cum lacrymis pollicebatur, se nunquam tale quid denuo perpetraturum esse,

Verum ille, *atqui, ait, prius in solo, quam in tecto, saltare discendum est: age nunc salta in solo.* Interim alterâ manu puerum, alterâ baculum tenens, aliquoties eum circumagebat verberans. Mater, ignara paternae animadversionis, postero die filium ita fere alloquebatur: *Mi fili! Mi fili! ideone te oblitum esse mei, amantissimae tui matris, ut eam te filio orbare*



*auderes, teque ipse in praesentissimum mortis periculum dares: in quo tu omnino periisses, nisi te tutati essent sanctissimi angeli omnipotentis Dei, quem ego dies noctesque precor, ut te mihi incolumem servet. Qui si decidisses, quibus te manibus sustulissem? quo te animo sepelivissem? Mihi crede, mi fili, breve tibi tempus superfuissem, mox ipsa moerore confecta, te ad mortem secuta essem. Hancine mihi gratiam, hancine mercedem, refers, pro tot tantisque curis et sollicitudinibus, quas per tui amorem exantlavi!* Haec a piâ matre et vero [7] animi affectu, ut pleraeque in talibus rebus solent, prodita, et naturali vocis dulcedine pronunciata, ita filioli animum movebant, ut totus in lacrymas effunderetur: nec illas mox exarescentes, sed diu manantes, et postea subinde ad hujus sermonis recordationem redeuntes. Atque ipse narrare solebat, se in posterum magis horum matris benignae verborum, quam istorum patris severi verberum cogitatione ab agendi et audendi temeritate revocatum esse. — Sed redeamus, unde digressi sumus.

Hucusque ergo pensum a magistro sibi datum probabiliter absolverat, et boni docilisque discipuli nomine atque honore fruebatur. Verum quum mox ad themata componenda accederet; in illo negotio misere laborabat et desudabat: idque partim quidem ignorance constructionis, praecipue vero ob puerili captui accommodatorum librorum defectum, et perversam docendi rationem, quam sequebatur ludimagister. Iste enim bonus homo non magnopere animadvertibat, praeceptorem debere ad discipulorum intellectum descendere, et ipsorum infirmitatem minime onerare nimis gravi labore, ut ne studia odio habere incipiant, antequam illorum dulcedinem et utilitatem aliquo modo percipere didicerint. Discipulis istiusmodi themata dictabat, quae plane supra

captum puerilis aetatis erant, et ad deterrendos potius, quam ad alliciendos discipulorum animos composita ab ipso videbantur. [8] Puer itaque multum quidem movebat, sed parum promovebat. Forte autem fortunâ aliunde veniebat impulsio, quae ipsum promoveret aliquantum, ac bonâ spe augetet. Pater quodam die intrabat museum domesticum, in quo liberi interdum sedere solebant: filiumque et multis et varii generis libris, veluti Lexicis, Grammaticis, Phraseologiis, Florilegiis, et nescio quibus in subsidium suntis operibus cinctum videns, interrogabat eum, quid ageret? et an illos libros omnes singul ediscere vellet? Quum bonus puer respondisset, se illis libris ad themata componenda omnino indigere; pater oculos conjiciebat in chartam ante puerum positam, et quot verba, tot fere vitia in schedâ quam plurimis lituris commaculatâ offendens, inter abeundum dicebat: *Ego te propediem themata componere docebo!*

Habebat pater duo praedia: alterum montanum, alterum campestre. In utrumque solebat studiis operatum excurrere. In illud, quod procul ab urbe, per aestatem. In hoc, quod propius erat, ad tertiam circiter horam, per reliquas tempestates. FERIAE instabant brumales. Has in praedio transigere, et filium eo secum ducere constituerat. Mater, mariti sobrietatem et consuetam vivendi duritiem haud ignorans, quum tempus rusticando constitutum adesset, querebatur, filiolum ad algendum et esuriendum in apertam perniciem tam gelidâ tempestate trahi. At pater id agens, ut matris exemplo sese amabilem puero redderet, [9] *quin tu mecum rus vadis*, inquit, *ubi ego te non tantum themata componere docebo, ut domum reversus condiscipulos superes, verum etiam aucupii socios habebis villici pueros.* Parentem igitur filiolus haud invitus sequeba-

tar, partim quia ipsum jam antea ruri, quam in urbe, indulgentiorem expertus erat, partim ut themata componere disceret, atque aucupari sibi liceret.

Jam statim in viâ parens filium de rebus quibusque obviis interrogabat, quae Latina earum essent nomina. Tum illa nomina in sententias et dictiones redigebat, et Latine ad puerum loquebatur: veluti, *haec domus major est, quam illa: en equitem festinantem! haec via declivis est, illa altera vero acclivis est: haec villa plus habet agri, quam vineae.* Sensim longiora dicta proferebat. Quae puer facile intelligens, et intelligere se mirans, alacrior ad discendum reddebatur. Et pater, in praedio, dicebat, *faciemus themata: et pro unoquoque themate, quod feceris, dabo tibi sestertium: et jam pro eo, quantum in viâ didicisti, en tibi sestertium!* Tum puer prorsus cupiditate proficiendi incendebatur, accedente praesertim ad discendi studium etiam lucelli suavitate. Atque sic inter Latine loquendum in villam perveniebant.

Postero die horae a patre accurate dividebantur. Aliae aucupio et aliis oblectationibus cum villici pueris concedebantur: aliae thematibus faciendis et studendo destinatae erant. [10] Filiolus, ut patri gratum faceret, atque ipse disceret, ac nummos auferret, quotidie horâ constitutâ praesto erat, et magnâ cum diligentia pensum suum absolvebat. — Et haec quidem rusticatio trium fere hebdomadum fuit, ac puero multum profuit. —

Feriis finitis, ambo domum revertebantur. Mater et sorores expectabant ipsos, et salvos rediisse gaudebant. Imprimis vero pia mater, quae filio timuerat, ipsum tanquam e naufragio servatum excipiebat, amplexabatur, osculabatur, et inter lacrymas prae laetitia fusas exclamabat: *Mi fili, tandemna ergo nobis bene volens et hilaris rediisti?* Tum vero pater, solitâ sibi

severitate, non modo, inquit, *hilaris et sanus, ut videretis, rediit, verum strenue discendo etiam doctus et dives simul factus est.* Ad quae patris verba filiolus statim matri ac sororibus, gaudio exsultans, themata sua et marsupiolum numis plenum ostentabat.

At vero, etsi multum profecerat, etsi ex aucupio, traharum vecturâ et aliis oblectamentis magnam rurâ jucunditatem perceperat, et pater praeter consuetudinem suam revera indulgentior fuerat; tamen eadem ista rusticatio duas, a matre jam praevisas, injucunditates habuerat. Harum alterâ ad victum, altera ad cultum pertinuerat. Pater nimirum homo sobrius, durus, adstrictus erat, *et qui, ut in aliis frugalitatem et temperantiam laudabat, sic etiam ipse retinebat, cum non abstemius tantum esset summe, sed ne thermoposid quidem [11] ex orientalium genere delectaretur ullâ.* Quum solus itaque ruri esset, cibus, quo fruebatur, quamvis copiâ abundans, tamen simplex modo, nec varius erat. Coenam, quam vocant, dubiam nullo modo ferre poterat. Mane ac vesperi, nihil nisi coctum cum pane lac. Prandium, poma sicca in aquâ cocta, aut alia olera, et nescio quid pultis: tum panis cum caseo et butyro: caeterum nec ova, nec carnes, nedum aliae dapes, aut bellaria. Quam parum haec vivendi sobrietas paterna filio, in vitâ urbanâ sub matre benignâ largiter haberi solito, placuerit, intellectu non admodum difficile est. Pater quidem jam primo rusticationis die viderat, filiolo appositos cibos sapore parum gratos esse, eumque illorum bonitatem primum gustu explorare, et tum veluti cum fastidio pauca tantum delibare, nec tantum edere, quantum domi soleret: sed id se non animadvertisse simulabat. A consuetâ vivendi simplicitate in gratiam filii non recedebat. Hinc altero et item tertio die idem prandium, eadem coena, idem appara-

tus. Quum interim filiolo fames magis magisque obreperet, et tandem ejus vi coactus cum voluptate edere inciperet, pater cum Latine alloquebatur, et narrabat ei historiolum de Ptolemaeo, cui Aegyptum peragranti nihil jucundius visum esset, quam panis cibarius, qui ipsi, comitibus non consecutis, in casâ pauperis hominis datus sit: deinde hæc addebat: *Ova et carnes bilem et succos stagnantes faciunt: [12] bellaria hominem pituitosum reddunt: vinum perniciosum est, quippe sanguinem aestu et fervore incendens: naturalis homini cibus est lac, mel, panis, caseus, butyrum, poma, olera. Si igitur prosperâ sanitate fruis, naturæ convenienter vivere debes, nec vivere, ut edas, sed edere, ut vivas.* Hæc quum pater Latine narraret, filiulus ipsi credebat: quum eadem vero linguâ vernaculâ repeteret, ille vera esse rursus dubitabat.

Porro autem de frigoris utilitate, quam pater prædicabat, filio vel Latine narrans neutiquam persuadebat. Hoc enim diurnum et nocturnum instabat. Interdiu pauca in camino ligna lucebant magis, quam ardebant. Calor ad indicium thermometri regebatur, nec magno-pere supra gradum gelationis augebatur, ut scilicet lac, aqua et atramentum fluida manerent. *Hic, dicebat, est caloris modus corpori humano congruens: tibi si parum est, motu et ambulatione eum auge: i et redi aliquoties hinc ad villae portam, interea tecum ediscens thema modo conscriptum: quum edidiceris, mihi memoriter recita, et rursus alium sestertium habebis.* Filius id faciebat, frigus consolans sestertiis: quorum cum numero ipsi cupiditas crescebat. Subinde tamen, clam patre, in villici habitaculum, ingentis furni ardore fervidum, se induebat lulum cum pueris. Noctis vero tristius erat negotium. Frigido in conclavi,

numquam ignem experto, communis cum patre lectus: culcita et pulvinaria [13] non ut apud matrem domi plumis, aut aliâ molliori materiâ, verum paleis facta: tegumenta non pro anni tempestate multiplicata, aut villosa, sed aestiva et lintea, superinjectis vestimentis corpori detractis, quorum *vitalis tepor*, ut pater agebat, *sanissimum lecto fomentum adderet*. Misellus puer, tam durae vitae rationi non adsuetus, per frigora et tarde obdormiscebat, et mane somno excitabatur. Unde ambulatum surgere se simulans, ad furnum villicis sese recipere solebat, cujus uxor sortem herilis filii commiserans, ipsum omni modo fovere et recreare studebat.

Interim tamen istas paucas incommoditates sub rigido patre ruri perpassas lenierant non modo jam magnâ ex parte accepti sestertii, verum multiplex fructus, in scholâ mox conspicuus, haud ita multo post oblivioni illas omnino tradebat. In examinibus enim, quae dicebantur et habebantur *pro loco*, Wytttenbachius superiores discipulos vincebat, et in principum numerum veniebat. Commilitones ipsius sortem beatam praedicabant, quod patrem haberet, qui ipsum non modo profectibus auxisset, sed etiam praemio profectuum, nummis, cumulasset. Et ipse mihi saepius testatus est, se postea subinde hujus temporis recordatum esse, ac notum illud in suam causam convertisse,

*Proveniant tales sic mihi saepe dies.*

Attamen, quominus tales rusticandi dies Wytttenbachio redirent, in causâ fuit magna illa [14] et inexpectata loci mutatio, quae familiae anno 1756 supervenit, atque hoc loco pluribus verbis explicanda videtur, quam a *Bangio* factum video, quod in studiis Wytttenbachii regundis haud exigui momenti fuit.

*Proveniant*] Ovid. Amor. I. el. V. 26.

In Germaniae dynastiis nimirum, prudens ac liberalis doctrinarumque fautor, prae caeteris *Guzlielmus VIII. Hasso-Cassellanus*, Marburgensem Academiam, et antea veteri famâ celebratam, et postremo *Okristiani Wolfii*, philosophorum tunc temporis coryphaei, luce ac splendore illustratam, sed eadem jam sextum et decimum, ni fallor, annum orbatam, in pristinum florem restituere, professoresque in suo quosque doctrinae genere celeberrimos, propositis luculentis salariis, arcessore instituens,

*is senem per epistolas*

*Pellexit, modo non montes auri pollicans.*

*Bangius* de hac invitatione in *Elogio* suo agens, haec refert: „*Quam theologiae dogmaticae et moralis provinciam cum decimum jam obtineret annum, ornaretque tum scholarum frequentia et bonitate, tum scriptis ejusmodi edendis inprimis egregie, ut non domi solum intelligentium laude floreret et gratia, sed etiam foris jam prope non minus famâ celebraretur, accidit anno 1756, ut Marburgum ad profitendam theologiam primarii loco invitaretur, cui insuper dos quaereretur et commendatio quaedam e consiliarii in Consistorio et Inspectoris Ecclesiarum dignitate.*“

[15] Pater in utramque partem deliberabat et ipse secum, et cum amicis. Hi plerique omnes dissuadebant ei relinquere patriam, cognatos, affines, amicos, praecoptare novos et sibi ignotos homines, liberos secum in exilium ducere, eosque in patriâ honestis in conditionibus et fortunis collocandi spem repudiare. Ipse magis in alteram partem inclinabat: non se patriae

---

*is senem*] Ter. in Phorm. I. 2. 17.

*Quam theologiae*] Bang. Elog. p. 51.

duntaxat et suis, verum generi humano, et vera theologiae, natum judicans, omnes lucem in maiore Academia latius spargere posset. Verissime profecto scripsit *Bangius*: „*Hic in deliberando consilioque captivitate non stipendii magnitudo tantum voluit, neque caeterae huiusmodi, quae ostentabantur, opportunitates, quibus capi non posset vir, et a rebus domesticis bene constitutus, et a studio habendi atque ambitione, si quis alius, remotus, quantum causa longe gravior, longeque dignior. In theatrum enim paulo majus, in mediam fere Germaniam produci videbatur, unde doctrinae seminum esset latius spargendum, potestas, eaque ipsa re de plurimum bene merendi studiis, quae adeo ei spes, cum vana minime esset, fuit pro voce divina, cui parendum esse didicerat.*“ Praeterea suberat et vetus amor erga Marburgensem Academiam, ubi *Wolffium* suum oracula fundentem quondam per annum audierat. Atque huc cum jam sponte propensum impulit insuper solertia Collegae, cui ipsius discessu aditus amplioris honorarii aperiabatur. Ea scilicet [16] apud Bernatos erat lex ordinis ecclesiastici et literati, ut per aetatis gradus deinceps in laetiores conditiones succederetur. Iste igitur callidus et ratiocinandi peritus collega et caeteras rationes confirmabat, et aliam crepabat, salarii Marburgensis modum, propter vilitatem annonae illius duplum esse pro caritate annonae Bernensis.

*Cum vero jam decedendi esset venia petenda, sunt verba Bangii, ea non nisi aegre est ab amplissimo Senatu impetrata, considerante, quantum in eo et decoris patriae universae esset, et utilitatis juven-*

---

*Hic in deliberando]* Bang. l. l.

*Cum vero jam]* Bang. p. 32.



*tutū theologiae studia aemulanti constitutum. Cum tamen ad conditionem tam lautam dimittendum esse decrevisset principes, ut, quantopere ipsis per omne tempus operam probavisset, relinquerent testatum, non sine corollario, aureo grandi nummo, decedere eum de statione voluerunt.*

Ergo abiit pater cum uxore et liberis Marburgum. Atque principio quidem laeto ac prospero sibi uti visus, mox spe suā se frustratum deprehendit. Quod tamen non dynastae culpā, sed locorum diversitate ac temporum commutatione accidit. Alter enim annus bellum afferebat, quod illam Germaniae partem per sexennium vastatione agrorum, direptione et oppugnatione urbium et oppidorum, incendiis, fame et omni calamitate afflixit. Ad quae quum accederet salariorum intermissio, professores insignem rei familiaris jacturam subierunt.

[17.] Sed hoc incommodam Wytttenbachii nostri parens, utpote homo admodum liberalis, tanti non aestimabat, ut ipsum ideo adventū sui in Germaniam poenitnisset. Nam quum restitutā pace et expeditis difficultatibus, non modo damnum perpesum resarcire, verum etiam opes suas, redditibus acceptis, augere posset, id facere noluit. Satis habens eum ad modum restituisse patrimonium, quo illud ex patriā venienti facrat, reliquum pauperibus urbis et agri Marburgensis largitus est. Verum longe alia aderant, quae ipsi valde displicerent. Recens advena, [primum quidem novitate hominum se colentium et observantium, studiaque sua et officia ei offerentium delectatus, mox tamen paulatim animadvertit, ejusmodi hoc esset, atque quantum statio stationi, vetus novae, praestaret. Venerat ille quidem ex minore in majorem Academiā, sed ex urbe majore in minorem. Major autem haec Academiā

dicebatur, quod haberet facultatem creandi doctores, jurisdictionem suam, plures Professores, studiosos literarum plures. At major erat illa urbs, unde venerat, utpote quae afflueret copiis ad vitae commoditatem, saavitatem, prosperitatem: magis abunderet familia locupletibus et lautis: frequentior esset negotiis publicis ac forensibus, ludis ac festis populari laetitiae destinatis: denique sinu ipsa sua ac domicilio totius reipublicae Senatum contineret: quarum rerum materia fere civium studia [18] advertit et occupat, nec ad onerosam minutamque invicem privatim speculandi sedulitatem et famigerationis maledicam temeritatem prolabi sinit. Haec in nova statione secus erant. In qua quidem, quod ad copiam et delectationem deerat, homo frangi et parvus non admodum desiderabat: sed minore in urbe, minori libertate sese frui, id vero aegre ferebat. Vix enim aliquando, suo more, ambulando, equitando, venando in agrum excurrerat, quin continuo hominum sermonibus differretur: ut ab amico etiam admoneretur, haec studia non convenire praesentis muneris dignitati. Scilicet haec tractaverat, nemine mirante, apud cives suos Helvetios, homines rectos ac simplices, quidlibet suo nomine appellantes. In Helvetiâ porro nude et simpliciter *Professor* audiverat, et, si forte, additâ honoris praefatione, *reverendus*: nunc vero in Germaniâ erat et *Professor summe reverendus*, et *Primarius*, et *Consiliarius ecclesiasticus*, et *Inspector ecclesiarum principatus superioris*. Et hos titulos, quantumvis honorificos, libertatis jacturâ redimeret! Ille vero vulgi opiniones olim spernere doctus, suum sibi iudicium sequi pergebat: et nomina retinebat, dum iis re satisfacere posset. Munus *Consiliarii* et *Inspectoris* aetate proventus deposuit. Re-

ctoris Academiae provinciam semper recusavit, haud invitis collegis, in honoris et emolumentum vices succedentibus: idque tum aliis de causis, tum quoque ut collegarum [19] invidiae occurreret, quos magnitudo salarii ipsius urebat. — Sed ne longius a proposito abeamus, ad Wyttenbachium nostrum redibo, cuius causa potissimum haec scriptio suscepta est.

Hic igitur *decem* annos natus cum parentibus et reliqua familia Marburgum venit. Pater ipsum statim scholae publicae tradebat. Commilitonum suae classis natu minimus erat. Pensum quotidianum discipulorum illius ordinis constabat interpretatione *Nepotis*, *Cometarii* Orbis picti, *Kremayeri* Colloquiis, et *Thematum* compositione. Quum aliquamdiu illius scholae alumnus fuisset, atque patri, aliis negotiis admodum occupato, non satis otii superesset ad liberos erudiendos; hic ipsis, quemadmodum antea Bernae fecerat, alium privatim magistrum adhibuit.

Is vero fuit *Jacobus Jaegerus*, qui in Academia Rintelensi Professor Mathematicarum Artium, sub finem superioris saeculi; si recte memini, fato functus est. Tunc vero erat adolescens et doctrinae elegantia, et vitae integritate spectabilis. Hic quotidie veniebat ad Wyttenbachium, et sua comitate, affabilitate atque instituendi disciplinam puerum adeo capiebat, ut hic eum valde amaret, ac penitus ei adhaereret. Itaque puer non contentus hac privata institutione, mox ad matrem se convertit, rogans eam, ut patri persuaderet, *Jaegerum* in contubernium recipere, ac sibi domesticum praeceptorem adjungere. Fecit mater: fecit [20] pater: et quadriennium *Jaegerus* in aedibus Wyttenbachii liberorum magister fuit.

Et profecto ille doctus vir juvenis tunc primus animum recentem ac tenerum discipuli sui novo et adhuc ignoto pulchri et venusti sensu imbuunt: scientiae amorem ardore incendit, ad assiduitatem, laborisque tum capessendi studium, tum ferundi constantiam auxit et confirmavit. Hinc summa puero voluptas erat, ipsi assidere, non modo interdum studendo, sed de multâ nocte et in multam noctem lucubrando. Latinos deinceps scriptores in illo puerilis institutionis quadriennio tractavit *Nepotem, Justinum, Curtium, Phaedrum, Virgilium*. Magister unumquodque pensum interpretando praeibat discipulo, et sententiam perspicue aperiens, et dictionis elegantiam inprimis cum quodam animi motu notans. Tum discipulus secum tacitus pensum commentabatur ad eum finem, ut commentatum magistro recitaret. Interea autem hic suam sibi rem agebat, alium vel veterem, vel recentiore, plerumque tamen veterem, legens scriptorem, nonnumquam de sellâ exsiliens et exclamans, *hem! quam pulchrum! quam egregium!* Wyttenbachioque locum praelegens, singula explicans, et sic ipsum non modo ad affectum consecrandum excitans, verum etiam ad sensum pulchri ac venusti percipiendum acuens. Quae vera est docendi ratio, et quam *Boschius* quoque sequebatur, uti discimus ex Wyttenbachii ad [21] hunc scriptâ epistolâ, in quâ ipsum itâ narrantem facit: „*Vide, quomodo agam: adolescentulos studiis destinatos moneo, ut attendant, quod sit momentum studiorum; sine Literis Graecis et Latinis nullam esse in ullo genere salutem: ostendo exempla, homines qui hac viâ ad summam gloriam venerunt, et rursus, qui, neglectâ eâdem viâ, inglorii et contemti*

---

*Vide, quomodo agam]* Bibl. Crit. P. XI. p. XVII.

*manserunt: fidem et auctoritatem mihi facio apud audientes: credunt: tunc pulchrum aliquem poëtae locum iis praelego, ut moveantur et attenti reddantur: hunc iis locum interpretor, verborum vim aperio: constructionem necto, sententias declaro, manifeste ac significanter: ecce, illud, quam venustum! en hoc, quam sublime! viden' hanc imaginem, quasi picturam oculis subjectam! Sentisne? Locum ita pertractatum denuo iis praelego: et plerumque ita afficiuntur, ut cum poëta in altum evolent, nec relinquere eum velint, donec perlegerint."* Quid vero ipse Wyttenbachius de ejusmodi cum judicii sanitate et justâ verborum interpretatione conjunctis acclamationibus, utpote ad discipulorum animos excitandos et acuendos admodum idoneis, statuerit, at inanem contra et nudam magistelli exclamationem, veluti *docte! eleganter! magnifice!* quomodo despexerit, haec ipsius verba certissimo nobis indicio sunt: „*Sic se res habet: ut intelligentiae materia sint verum et falsum, eaque doceri rationibus possint: sensûs autem materia sit pulchrum et turpe, gratum et ingratum, omnino quidquid [22] placet aut displicet; quod nisi sponte et ultro ad sensum accidat, tum demum percipitur, quum ad intelligentiam usus et exercitatio accesserit. Nisi forte quis putet, sensum ita esse excitandum in discipulis, ut magister suo judicio acclamet, ecce! quam venustum! Admonitio adsit, quae valeat ad observationem, rationem, et usum. Acclamatio desit, facillimum negotium; quod, ab imperitis magistris ad dissimulandam ignorantiam factitatum, similes illis fert discipulos, rerum ac doctrinae inanes, vanâ sapientiae opinione plenos."*

---

*Sic se res habet]* Praefat. ad Plat. Phaed. p. VI.

Aliud porro, quod ex hac disciplinâ domesticâ manavit bonum, magnum profecto, et ad omnis doctrinae rationem fructuosum, cognitio *Geographiae* et *Historiae* fuit. Quis enim est, qui se, non dico doctum, sed humanitatis participem profiteri audeat, si expers sit ejus cognitionis, quae pars est sensûs communis, quâ civium et populorum communio continetur, quam vulgares etiam homines non ignorant, et sine quâ ne publicae quidem novarum rerum ephemerides intelligi possunt? Ad hanc igitur *Geographiae* cognitionem, a patre dudum jam Bernae inchoatam, magnum profectum *Jaegerus* Wyttenbachio ipsiusque duabus sororibus attulit: non solum ut distributionem orbis terrarum in suas partes, et partium majorum in minores rursus partes, sed etiam dominos terrarum, urbes, oppida, montes, flumina, maria, insulas tenerent, ad lectionemque aliorum librorum, imprimis [23] ephemeridum, in promptu haberent. Porro autem magister, *Historiae* Universali percipiendae idoneum libellum *Hilmaris Curae* adhibuit, qui sane tam puerum, quam puellas, suâ brevitate ac facilitate valde capiebat. Et quemadmodum Wyttenbachius subinde nonnulla de se ipse scripsit, ita quoque harum scholarum his verbis mentionem fecit: „*Omnino fraterni amoris multae sunt causae, quas enumerare omnes longum sit: prima quidem et necessaria, iisdem parentibus nasci: tum plures, aliae aliis ita majores, ut majorem animorum conciliationem habeant: undè vivere, nutriri, educari, a parentibus pariter amari et curari: lusum et seria, laeta et tristia, communia habere: invicem ridentibus arridere, flentibus adflere: majus etiam vinculum adfert societas insti-*

tutionis puerilis: longe autem maximum communio juvenilis disciplinae, et cognitionis elegantiorum literarum, quæ et ingenium ad veri pulchrique iudicium, et animus ad virtutem, excolitur; unde existit morum, sensuum, studiorum similitudo, et ipsa amicitia, alterum ut se ipsum amans, sine quâ verus fraternus amor esse nequit. — Sed ejusmodi, qualem dixi, æqualitatis et condiscipulatus necessitudo mihi intercessit cum sororibus duabus me paulo majoribus. Et in artibus quidem juventuti utriusque sexus necessariis valde nos mutuo conciliabant Historia et Geographia: quas ita et ad eum modum perdiscebamus, ut quamcunque earum partem invicem interrogantes [24] et interrogati memoriter redderemus: nec tantummodo ex nostris compendiis, sed etiam extra hæc in rebus novissimis, veluti belli septennis, quod in illam aetatem incidit, gesta et vicissitudines assidue in novellis, quæ dicuntur, ephemeridibus politicis, legentes, sic tenebamus, ut ea postea semper secundum ordinem temporis, quamvis subito, referre possemus. Inde utriusque linguae, id est Francicae et Germanicae, præcipuos poëtas et scriptores, qui ad mores formandos ingeniumque expoliendum valerent, legimus, et stilum exercuimus, vertendis insignibus illorum locis ex alterâ in alteram linguam, scribendis epistolis ad exemplum Sevigniae et Gellerti, pingendis characteribus ad imitationem Bruterii."

Verum etsi hæc institutio jam magnopere Wyttenbachium ad progrediendum incitabat, delectatum reperiundis ad sua tempora locaque alligatis factis, adhuc non nisi sparsim e Nepote, aut aliunde, ipsi cognitis; tamen mox majus etiam incrementum huic studio historico casus quidam afferebat. Nam accide-

bat aliquando, ut forte fortunâ veniret ad sodalem cum fratre habitantem majore ac profectiore, qui tunc temporis ex *Hübneri Historia Universali* partem de rebus Romanis, notandis Sectionum Capitulique argumentis et Caesarum nominibus annisque, in epitomen redigeret, eamque munde ac nitide perscriberet. Ut optimus et proficiendi cupidus puer hanc scriptiorem videbat, illius specie [25] mirum in modum percussus, similem totius libri epitomen facere sibi proponebat, nec prius desinebat, donec propositum suum ad finem perduxerat. Quâ epitome confectâ et memoriae traditâ, librum ipsum saepius relegebat, nec ejus lectione satiari poterat.

Altero illius domesticae institutionis anno ad Literas Latinas et aliarum doctrinarum disciplinas accedebat *Graecae* linguae studium. *Jaegerus* discipulo grammatica rudimenta ediscenda dabat. In declinationibus res satis bene ibat. Verbum *τύπτω* item celeriter memoriae inhaerebat. Sed simplex illa discendi ratio, quâ Wytttenbachius usus erat, magistro juveni non satisfaciebat. Nam voluerat, ut ille simul formationis Temporum rationem disceret. Atque ut laboranti auxilium ferret, ipsum adducebat ad tabulam nigram in pariete suspensam, eique inscribebat *τύπτω*. Tum vero, *Dic*, inquit, *futurum*. Wytttenbachius promte respondebat, *τύψω, τύψεις, τύψεται caet.* Ille, quomodo formatur futurum? W. *Nescio*. Ille, *Nescis?* *En τύπτω! Sed proprie est τύπτω: jam accedit ante ω character futuri ε, hinc fit τύψεω seu τύψω. Viden?* W. *Video*. Ille porro: *Dic mihi*, ait, *Aoristum Primum!* W. statim fideliter numeros et personas recitabat *ἐνύψα, ἐνύψας, ἐνύψε caet.* At ille: *Unde formatur hic Aoristus Primus?* W. *Nescio*. Ille: *Quid? nescis iterum?* Nonne vides, eum a futuro



*formari? eo mutatur in α, et praepositur simplex*  
 [26] *augmentum ε: ita oritur ex τυφω, τυφα: nonne*  
*vides? W. video. — Quum sic reliqua tempora et*  
*modos Activi, quae bonus puer simpliciter e libro*  
*didicerat, magister suo more recensuisset, Nunc vero,*  
*inquit, ipse Passivum et Medium secundum hanc*  
*formulam disce, et fac, ut mihi formationis Tem-*  
*porum rationem reddere queas.*

Hoc autem pensum non modo Wyttenbachium vehementer retardabat, sed tantum adeo ad ipsius animum valebat, ut, quoties ad discendum accedere vellet, toties recordatione prioris taedii a discendo rejiceretur, et nescio ad quam officinam opificio fastidando detrudi propemodum maluisset, quam conjugationibus Graecis amplius operam dare. Atque profecto non video, cur magister viam brevem ac facilem istâ formatione occupandâ longam ac difficilem reddiderit. Illa mihi in magis opportunum tempus rejicienda semper visa est, quo nimirum pueri conjugationum omnia exempla memoriter recitare didicerint.

Interjectis aliquot diebus, Wyttenbachius patri enarrabat, quid sibi acciderit, et qua ratione sibi, jussu magistri, in discendis conjugationibus progrediendum sit. Ad quae parens: *En, inquit, rursus*  
*nugas, quas in Helvetiâ ignoramus: quin tu simpli-*  
*citer, ut ego quoque feci, tuo more progredere, et*  
*plane ut Latina verba, sic nunc Graeca, sine istis*  
*ambagibus, disce. De illâ formatione Temporum*  
 [27] *postea videbimus.* Wyttenbachius hâc paternâ admonitione recreatus, denuo omnes vires intendebat. Postero enim die ante lucem surgens, et ad lychnum apud magistrum assidens, verbum Passivum et Medium commentabatur, et sub vesperam magistro totum τυφω deinceps recitabat. Deinde reliqua verba eodem modo

memoriae infigebat, et, peracto illo labore, ad verborum analysin faciendam accedebat. Fabulas autem Aesopicas tractabat, adjutus editione Hensingerianâ, et diligentissimo ejus Indice verborum grammatico.

Tertius deinde annus novum pensum, *Hebraicum*, afferbat. Magister illius linguae elementa ex *Altingii* libro tradebat, Cognitio nominum propter paucitatem formarum, et minorem, quam in Graecis, varietatem, discipulo facilis, nec verborum difficilis accidebat, quamquam in his septenae sunt species, quae in Graecis non nisi ternae exstant, activa, passiva, media. Parens cupiebat, ut filius sua vestigia premeret, ac non modo operam daret Latinis et Graecis literis, verum etiam Hebraïcis, utpote futuro Theologo admodum necessariis, atque quantocyus ad interpretationem Geneseos accederet. *Jaegerus* igitur mox aliquot versus interpretando pracibat, et discipulum jubebat hos solum secum commentari, analysin cujusque nominis et verbi conscribere, et intra certum tempus pensum exhibere. Wyttenbachius hujus [28] laboris novitate, ut fit, delectatus, magnâ cum alacritate datum sibi pensum absolvebat, et sibi admodum placebat, putans, se suam rem perquam diligenter ac strenne peregissee. Verum bonus puer magno in errore versabatur. Quamvis enim interpretationem et analysin nominum magistro probasset, tamen verborum analysin eidem neutiquam probare poterat. In his enim magister rursus illam partium formationem, quam in Graecis, sed multo eam longiorem ac difficiliorem, exigebat. Neque eo contentus erat, ut notarentur pars, radix, et praefixae affixaeque litterae, sed volebat, ut simplex quaeque pars, quomodo ex praeterito formaretur, citatis etiam de cujusvis litterae et vocalis accessione paragraphis Altingianae Grammaticae accu-

rate indicaretur. Hoc ipse facere debuerat, et idcirco etiam a discipulo hoc ita fieri volebat. Sed Wyttenbachius, qui noverat, talia patri minime placere, statim ad ipsum se convertebat, et ipsi enarrabat, in quam miseram conditionem iterum incidisset, quantum temporis in tribus versibus explicandis insumsisset, et quam parum ipsius analysis magistro placuisset. Pater, commoto capite, *Ergone*, inquit, *numquam istae ambages desinent: fac, ut in Latinis et Graecis facis, ut ego item puer feci*. Filius laeto animo obsequabatur parentis praecepto, et Psalmos XII priores, suo more, cum magistro conficiebat.

Quarto denique anno non tantum eadem [29] de novo tractabantur, Geographia, Historia, et triplicis generis literae, Latinae, Graecae et Hebraicae, verum etiam plane novus labor eo accedebat. Magister scilicet Latinos versus facere poterat, et idem illud artificium etiam discipulum docere volebat. Igitur ipsi *Prosodiam* Mauriti, Hassiac quondam Principis, ideoque illis in scholis lege ac more usurpatam, dabat ediscendam. Novae hujus exercitationis futurae primum pensum erant syllabae longae, breves, ancipites, earumque causae, origines, regulae, exceptiones. Has puer ediscere debebat. Constituto mox tempore Wyttenbachius, memoriae bonitate valens, quae didicerat, sine ullâ haesitatione coram magistro quidem decantabat, sed ad istam regularum subtilitatem percipiendam, ut videtur, nondum idoneus, nihil fere intelligebat. Hoc praeceptoris valde mirum videbatur. Ergo rursus ad tabulam nigram discipulum vocabat. Statim tabulae inscribebat signa pedum, dactylorum, spondeorum, trochaeorum, et nescio quorum. Tum regulas prosodiae ad illorum pedum mensuram accommodabat, easque ipse pedibus manibusque puero velati

incoleare studebat. Verum quo magis tumultuabatur magister, eo minus intelligebat discipulus. Istum stuporem *Jaegerus* fictum putans, et potius pertidaciae, quam intelligentiae defectui tribuens, *Domi manebis*, inquit, *donec illa didiceris*. Puer tristis abibat, nec tamen discebat.

[30] Horae pomeridianae dierum Mercurii et Saturni ambulando et ludendo cum sodalibus concessae erant. Quamvis igitur dies exeundi adesset, et sodales Wytttenbachium ante ostium stantes exspectarent, tamen exire non audebat, sed domi manebat. Pater ipsum forte videns, *Cur non existi?* inquit. Ille multis cum lacrymis respondebat, *Magister noluit*: et causam narrabat. Ergo, inquit pater, *nunc quidem domi mane: in posterum autem non opus erit ista ex libro illo discere, quae per Scriptorum et Lexicorum usus facilius discuntur*. Quibus auditis, filius non modo tunc isto æ onere liberatum gauderat, verum etiam postea istud artificium magistro non invidebat.

Sed nonne *Jaegerus* Wytttenbachium illius scientiae facultate multo facilius imbuere potuisset, si v. c. Virgilii, quem tunc Wytttenbachius super omnes scriptores Latinos amabat, et quasi imbibebat, aliquot versus metro solutos ipsi dedisset religandos, syllabae cuiusque quantitatem, pedum formam et numerum ostendisset, ac versum scandere docuisset? At vero, his omissis, praeceptor rem a simplicibus initiis repetebat, mathematicâ fortasse methodo deceptus, quae illo tempore in Germaniâ omnibus fere in disciplinis artibusque tradendis adhibebatur. Nam ad captum quidem puerilem et vulgarem accommodatior est institutio, quae initium ducit ab aliquo composito ac toto, idque dividendo ad simplicia et partes progreditur. [31] Veluti in Grammaticâ, si statim proponas

enuntiationem, in quâ omnes contineantur orationis partes, nomen, verbum, substantivum, adjectivum, participium, articulus, pronomen, praepositio, conjunctio, tunc singulas explices, earumque partes ostendas: in Architecturâ, si totam domum oculis objicias, ejusque partes deinceps demonstres. Sed alii aliter de his rebus sentiunt. Et habent imprimis hoc magistri ingeniosi, ut suo ipsi ingenio in erudiendis aliis decipiantur: ut rationes reddant, ubi non opus est, et eas, quas discipuli non capiant: ut non attendant, ad quas disciplinas percipiendas maturae sint alumnorum facultates: ut postulent cunctos item facere, ut ipsi fecerunt: ut cito eos docendi patientia deficiat, et facile irascantur. Scite dicit Cicero, *Quo quisque est solertior et ingeniosior, hoc docet iracundius et laboriosius. Quod enim ipse celeriter arripuit, id cum tarde percipi videt, discruciat.*

Verum etsi *Jaegerus*, tunc temporis vix viginti annos natus, quibusdam in rebus frustra fuerat, tamen multis magnisque benefactis hoc compensaverat et cumulaverat. Et idcirco etiam postea *Wyttenbaehius* numquam destitit felicem se praedicare, qui, in tantâ bonorum magistrorum paucitâ, illum juvenem nactus fuerit puerilis institutionis praeceptorem, praesertim quum discendi perfectorem haberet patrem, qui ambos errantes in viam reduceret.

[32] Quatuordecim annos natus erat, quum pater cum idoneum judicaret, qui, relictâ puerili disciplinâ, civium Academicorum ordini adscriberetur. Proximum igitur fuit quadriennium, quo professorum scholis operam navavit. Hae scholae, morè in Germaniac Academiis usitato, circumscriptae erant semestribus

*Quo quisque*] Cic. pro Roscio Com. c. XI.

*Quatuordecim annos*] Cf. Praef. ad Sel. Princ. Hist. p. XXXV.

spatiis, aestivis et hibernis. Quae spatia vulgò *Cursus* vel *Curricula* appellari solent.

Primum spatium fuit hibernum, anno 1760 et 1761. Primum pensum autem sibi, suadente patre, summisit *Mathesin* et *Logicam*. Hanc *Coingius* docebat singulari perspicuitatis et suavitatis laude: quae ei veniebat cum ab exemplorum frequentia, opportunitate, lumine, tum a quadam oris commendatione et orationis volubilitate. *Mathesin* tradebat *Spangenbergius*, magnâ item cum perspicuitate, nec minore gravitate et pietate, frequens in Dei laudationem digrediens, qui summus ipso mathematicus omnia numero, mensurâ, pondere fecisset: soluto problemate, caput placide movens, leniterque subridens, quasi veritatis divinitate perfusus, modo ad figuram tabulae inscriptam, modo ad auditores respiciens, hos eodem sensu afficiebat. Sed, illarum scholarum fructum magnam partem Wyttenbachio auferbat gravis morbus, non sine vitae periculo corpus affligens.

Ergo altero semestri spatio easdem scholas denuo audivit, iisque adjecit *Philologiam*, *Historiam Imperii Germanici*, *Institutionemque* [33] *Stili Latini*. Hora septima matutina hisce institutionibus habendis destinata erat. Parens, somni et quietis parcissimus, ac prope modum ad exemplum Plinii majoris omne tempus, quod studiis non impenderetur, pro amisso fere habens, semperque usurpans tritum illud, *Aurora Musis amica*, non modo ipso, quamvis in multam noctem vigilans, e stratis mane surgebat, verum etiam curabat, ut filius bene mane e lecto excitaretur. Dabat

---

*Coingius*] De *Joh. Franc. Coingio*, *Christoph. Frid. Geigero*, et *Joh. Conrado Spangenbergio* aliisque Professoribus Academiae Marburgensis operae pretium est legere *STRIEDER's Hessische Gelehrten-geschichte*.

nimirum ei Judaeum magistrum, qui horâ sextâ ad ipsum veniret, ac quocum codicem hebraeum legeret.

*Philologia* autem dicebatur tractatio linguae Hebraeae et Graecae. Utriusque et aliarum linguarum Orientalium, illâ aetate, in multis Germaniae Academiae unus Professor esse solebat. Marburgi erat *Schroederus*, frater τοῦ πατρὸς *Nicolai Guilielmi*, Groningani, ejusque vestigia magno intervallo subsequens, auditor idem Schultensii et Hemsterhusii. Ipsa autem tractatio sic fiebat, ut discipulus quisque libri versum, advertente magistro, interpretaretur. In Graecis argumentum duplex proponebatur, Novum Testamentum et paucae paginae Scriptoris vel Poëtae, ex Sylloge Selectorum quondam a patre Jo. Joachimo *Schroedero* editâ.

*Historiam* et *Stilum* tradebat *Geigerus*, homo nec aliorum judicio stultus, et suo admodum sapiens. In jure publico et omni Historiâ sine dubio perdoctus erat. Sed quomodo [34] tractabat hic Historiam? Profitebatur se ipsam tractare *pragmatice*, h. e. accommodatâ ad vitam prudenter agendam, et rempublicam recte gerendam. Versatus erat in aulis Principum, et non modo sermonis Latini peritissimus, verum etiam praecipuarum recentioris aevi linguarum, Gallicae, Britannicae, Italicae callidus et disertus habebatur. Verum eo minime contentus, indignabatur se non in altiore loco positum esse, veluti ministri principalis, praefecti provinciae, legatîve, idque palam profiteri solebat, suam facultatem et multiplicem rerum scientiam praedicans, dynastasque reprehendens, qui eam aut non agnoscerent, aut agnoscentes non honorarent,

---

*Philologia*] Vita Ruhnk. p. 12.

nec aliorum judicio] Cic. de Or. I. c. 39.

nallam rationem civilis doctrinae haberent, nulli magnopere alii rei, nisi militiae, studerent, subditos suos in cohortes cogerent, hasque regibus lucri turpis captandi causâ venderent. Atque istiusmodi digressionibus festivisque narratiunculis iste parrhesiastes scholas conspergebat suas, saepe etiam consumebat, ajens, et auditoribus multis persuadens, se eas pragmaticas reddere. Sed quamvis cives Academici ipsum libenter audirent, et saepius narratiunculis ejus delectarentur, tamen ipsum non amabant. Neque enim auditoribus suis parcebat, quippe quos subinde irrisione et convicio corripere soleret. Caeterum vero illam ipsam historiae partem ita tractabat, ut magis auctores recenseret, quam facta narraret, quamvis ipse jucundus narrator.

[35] *Stilum*, quem vocant, duce Heineccio, docebat. Hujus libro praelegendo saepe totam horam consumebat, raro ipse quid adjiciens. Porro in periodorum ratione explicandâ videbatur abuti operâ: siquidem earum confectio et cognitio ex eo est genere, quod magis usu et exemplis, quam praeceptis et ratione continetur. Praeterea exemplo Heineccii (cujus *Fundamenta stili cultioris*, illâ aetate, classicam omnino auctoritatem in scholis nacta erant, quaeque tunc temporis docti pariter atque semidocti veluti in sinu gestabant), omnia fere ad *elegantiam* referebat. Sed vel sic tamen hae scholae utilitate non carebant. Illarum initio utilem *Geigerus* operam navabat, dictans brevem notitiâ Auctorum Classicorum. Praeterea interpretando ac scribendo auditores suos exercebat. *Interpretandi* materia duplex erat. Primum quaedam Elegiae Ovidianae ex libris Tristium seligebantur, et auditoribus explicandae proponebantur. Quae disciplinae pars snâ facilitate ac suavitate juvenum captui



atque sensui apta omnino censenda est. Deinde vero his accedebat non classicae opus prosae, sed *ipsius* Oratio funebris in obitum GUILIELMI VIII., *Hassiae* principis. Videtur nimirum Geigerus amore sui et laude sibi in ephemeridibus tributâ deceptus fuisse. Non enim simplici orationis interpretatione contentus erat, verum, ut auditores non ignorarent, quanti pretii librum tractarent, uni ex illis, incredibile dictu! illarum ephemeridum [36] recensiones in scholâ praelegendas dabat. — *Scribendi* denique exercitium item duplex instituebatur. Vel argumentum chriae proponebat magister, quod auditores ipsi conscriberent, vel dabat illis thema Germanice conscriptum, quod Latine verterent. Quae posterior ratio magis scholasticae disciplinae, quam quidem Academiarum scholis convenire mihi videtur. Sed quoniam de Latine scribendi officio satis multa alio tempore et loco dixi, nec eadem denuo repetere necessarium est; pauca tantum de hoc argumento e scholis Wyttenbachii nunc afferam, quae tunc, utpote a consilio meo aliena, silentio praeterii. „*Ita se, inquit Wyttenbachius, res habet, ut totum illud ex patrio sermone Latine vertere utile ac necessarium sit primis in scholâ initiis, progressui ad facultatem bene pureque scribendi obsit, si quidem scribere conantem occupat cogitatione et formâ dictionis patriae, nec Latine scribere possit, nisi qui Latine cogitet. Latine autem cogitare nemo potest, nisi qui prius accuratâ et diligente optimorum Scriptorum lectione ingenium suum exercuerit, et hac studii assiduitate memoriam multis vocabulorum millibus locupletaverit.*“

Quid vero de duobus sequentibus spatiis semestribus nunc jam dicam? Hic annus Wyttenbachio, quantum ad Literarum studia, prorsus periit. Hucus-

que scilicet adolescentulus fuerat *φιλομαθέστατος*, et non modo in scholâ suas partes laudabiliter egerat, sibique [37] suo discendi studio parentum ac magistrorum amorem et favorem conciliaverat, verum etiam extra scholam *εὐόμιλος*, *φιλοπροσήγορος*, *ἐπίχαρις* fuerat. Condiscipuli hucusque libenter cum eo versati erant, et ipse vicissim haud invitus seria pariter atque ludicra cum illis tractaverat. At vero scholarum hujus anni initio summâ animi anxietate affectus, et dirâ quâdam aegritudine correptus, intra exiguum unius mensis spatium ita mutabatur, ut omnino *ἀνόμιλος*, *ἀπροσήγορος*, *ἄχαρις* fieret, nec aliis, nec sibi ipse amplius placeret. Qui antea ex Literarum studio summam animi voluptatem perceperat, ille nunc Literas pro re nullius fere pretii habebat. Cui antea vita vitalis fuerat, illi nunc vita prorsus in moerore jacebat. Quem antea aliorum colloquia et familiaritas delectaverant, is nunc eorumdem sermones atque congressus quovis modo effugere studebat. Quemadmodum hydrophobus, quamvis sitiens, bibere tamen nec audet, nec potest; ita Wyttenbachius, licet alloquio et consolatione imprimis indigeret, nemini tamen se totum aperire audebat, nec aegritudinis causam sciscitantes ferre poterat. Vitae ipsum suae pudebat, poenitebat, taedebat, utpote sentientem, vel potius se sentire opinantem, quod ineptus omnino redditus sit ad illud naturae munus, quod, ut Cicero ait, *homines conciliat ad orationis et vitae societatem, impellitque, ut hominum coetus a se obiri velint*.

[38] At vero, quaerat fortasse quis, quae fuit hujus tam subitae morum mutationis causa? undenam haec animi abjectio? quae haec insania mentis? Lu-

bens profecto hanc nec relatu mihi valde jucundam, nec lectu aliis fortasse admodum gratam vitae particulam silentio praeterirem, nisi opinarer, ex ipsis, quamvis breviori, enarratione parentes, magistros et alios, quibus sui cari sint, discere posse, quanti referat, non modo puerorum facultates, sed etiam debilitates ac proclivitates animadvertere, ut ne, quod nonnunquam fieri videmus, serius aut citius insanabiles ex istiusmodi neglectu calamitates exoriantur. — Quare, quoad potero, rem exponam.

Ut Wytttenbachius omnis historiae cupidus erat, ita cupidissimus ejus, quam facillime intelligeret, id est patrio sermone conscriptae. Quum igitur omnes libros, quorum copia ipsi erat, etiam Veteris Testamenti historicos, aliquoties legisset, alios quaerenti, et forte matris libros perlustranti in manus incidebat famosa ista Jo. BUNIANI *peregrinatio Christiani ad aeternam beatitudinem*. Hic liber adolescentulum continuo advertibat, capiebat, tenebat, legentemque adeo delectabat, ut istum veluti in sinu gestaret, atque aegre de manibus deponeret. Natura scilicet hanc Wytttenbachio humanitatis sive imbecillitatem, sive mollitudinem tribuerat, ut specie vel verâ vel falsâ (modo evidens et vivida esset) pulchri [39] et turpis, decori et indecori, generosi et ignavi incredibiliter in utramque partem moveretur, et ita quodque verum aut falsum esse putaret, prouti illam speciem prae se ferret. Quocirca minus mirandum, quomodo iste libellus, qui neminem alium in totâ domo Wytttenbachianâ moverat, totam suam vim in bonum et mollioris naturae adolescentulum exercere, ipsiusque animum dirâ superstitione percutere potuerit. Absolutâ enim istius *peregrinationis* lectione, Wytttenbachius subinde ad se respiciens, et secum reputans, quo ipse hujus

itineris loco esset, miserum in modum torquebatur, metuens nempe, ne forte rectam viam reliquisset, atque in tale peccati praecipitium incidisset, ubi inexpiabile, nec nisi aeternâ poenâ luendum scelus suscipisset. Hae et aliae plures ejusmodi cogitationes ipsum cum iaterdiu, tum potissimum noctu, quum solus esset, admodum angebant et cruciabant. Nihil nisi spectra videre sibi videbatur. Ob peccata sua a diabolo ejusque satellitibus, malis daemonibus, sese in omnem aeternitatem exagitatum iri arbitrabatur. Et licet nosset, se a parentibus valde amari, tamen non audebat ipsis, causam tristitiae et moeroris sui requirere, illam omnino narrare. Quinetiam eo devenerat, ut parentes, magistros et amicos, quamvis religiosos, in istis interioribus sacris nihil sapere, ac quasi profanos censeret. Ipse secum solus ac tacitus suum dolorem concoquebat. Modo [40] divinae voluntatis indicia captans, codicem sacrum aperiēbat subito, et in quem versum forte incidisset, illum pro omine accipiebat. Modo, sole oriente aut occidente, coelum intuebatur, et observabat, utrum sibi gratiae divinae, an irae coelestis signa ostentarentur.

In his autem terroribus et animi abiectione quum novem fere menses misere traduxisset, ac corporis ejus vires adeo imminutae ac debilitatae essent, ut haud procul a mortis periculo abesse videretur; tandem evenit, ut filius, dilectae matris precibus victus, cum ipsâ secretum et morbi causam communicaret.

Pia scilicet mater, quum rursus tristem noctem insomnis peregiasset, mane e lecto surgens filium adibat, eumque solitâ sibi blandiloquentiâ et humanitate ita fere alloquebatur: „*Mi fili, dies noctesque Deum omnipotentem precor, ut meos liberos, pro singulari sua bonitate, incolumes mihi servet, ut paterno*

*amore suo vos amplectatur, et per sanctissimos angelos suos tueatur, nobisque omnibus peccata nostra benigne condonet. Atque hanc nocte rursus flagrantissime oravi, ut te inprimis a morbo tuo, qui nunc jam te tamdiu oppressum tenuit, tamquam a malo pro sua omnipotentia liberaret. Quid et quantum tua causa patiar, tibi non ignotum est. Quomodo in dies dolore magis magisque tabescam, vides. Sed pro omnibus hisce curis ac sollicitudinibus meis nullam aliam remunerationem postulo, nullamque aliam gratiam repeto, nisi ut mihi aegritudinis [41] et tristitiae tuae causam aperte indices. Cur, quaeso, pectus tuum matri non vis aperire? Estne alius quis in toto terrarum orbe, quocum tua secreta liberius, quam cum matre tua amantissima, communicare queas? Dolorem, quem ex tuo misero animi statu et inexpugnabili reticentia percipio, diutius ferre non possum. Per Deum omnipotentem, carissime, te oro et obtestor, ut os mihi tuum aphasias! Effunde omnem, quae te cruciat, anxietatem libere in sinum meum, antequam ultima vitae meae hora advenerit, quam haud procul, mihi crede, abesse sentio, et tu, mi Daniel, praecipua causa mortis meae fuisse dicaris!*"

Haec ab optimâ et sibi carissimâ matre amoris et commiserationis sincerissimo affectu prodita adhortatio, et insuper metus, ne matrem pertinaciâ et silentio suo occidisae aliquando diceretur, adeo pueri animum percellabant, ipsumque tantopere concutiebant, ut, effusissime flens, matremque amplexans et osculans, exclamaret: *o Utinam natus non essem, aut istum librum numquam legissem!* Pia mater ad haec filii verba, *Quemnam, ait, librum numquam legisses?* Filius respondet, *Istum, quem in lecto invenies.*

Tum illa statim quaerens, et *Bunianum* sub pulvinari positum videns, *Quid, ait, iste liber tantam et tam diuturnum tibi melancholiam creavit? Istenè adeo ingentem animo tuo timorem injecit? non video, quòd hoc fieri potuerit.* Filius plorans dicebat, *Et hoc ita tamen esse, tibi sancte* [42] *et per Deum affirmo.* His dictis, mater, quae longe alia, eaque graviora, timuerat, veluti magno onere levata et liberata, ad maritum currebat, et librum ipsi ostendens, addebat, *En tristitiae et aegritudinis fundum!* Maritus, quum librum inspexisset, conjugii breviter quidem, at significanter, reponebat: *Ita fit, si non recte vivitur.* Quod responsum quid sibi vellet, quum optima conjux non satis perspiceret, tristis ac tacita abibat, putans, omnem consolandi suavitatem ac facultatem in animo mariti plane exaruisse.

At vero interim secum reputans, quâ ratione istam gravem tristitiam, quae jam adeo altas radices in animo filii egisset, ex illo sensim paulatimque rursus pelleret, atque intelligens, sibi hac in re amicis et adiutoribus imprimis opus esse, continuo epistolium mittebat ad *Spangenbergium*, quem virum sanctum, et cum ratione religiosum, a filio multum amari sciebat, ipsumque rogabat, ut sub vesperam Danielelem inviseret, qui diuturni angoris sui causam, tandem secum communicasset.

Spangenbergius, cui nihil magis cordi erat, quam aliorum commodis inservire, et amicis officiâ humanitatis praestare posse, horâ constitutâ sese venturum pollicebatur. Quo nuntio accepto, mater utrumque, et filium et maritum, de vespertinâ Spangenbergii salutatione certiore faciebat. Maritus, *Optime*, inquit: *Verum, carissima, dic tu interea* [43] *Danieli, ut domi maneat, nec ambulatum eat. Cum ipso nobis*

*agendum erit. Coram vobis puero dicam, quae sit mea sententia de isto morbo, quem sibi mala sedulitate ac reticentiae suae pertinacia contraxit, et qui ipsius animum anili superstitione infecisse videtur.* Filio autem nihil hoc ipso tempore magis gratum erat, quam Spangenbergium praesentem videre. Quoniam enim numquam ausus erat aperte atque effuse cum patre agere, aut secreti quidquam communicare, atque nunc imprimis paternam animadversionem timebat, in Spangenbergio, cujus animi moderationem noverat, sibi plus praesidii atque auxilii, quam in matre, licet sui amantissimâ, fore sperabat.

Deinde sub vesperam, quum Spangenbergius adesset, ac parens primum cum ipso de rebus aliis, potissimum Academicis, egisset, tum vero, occasione oblata, multum questus esset de multorum juvenum perversâ studendi ratione, utpote qui potius multa, quam multum, legerent, atque, uti rapaces vultures in praedam, sic ipsi in quaelibet scriptorum opera, nullo prorsus habito delectu, temere involarent; tandem ad filium se convertit, et cum eo sermonem habuit, quem ita referam, ut ipsos quasi colloquentes inducam, et colloquium coram nobis habitum omnino videatur.

P. Audistine, Daniel, quae modo de malesanâ multorum juvenum studendi ratione dixi? D. Audivi, pater. P. Ergo nunc etiam [44] audias sequentia. Istis librorum quasi helluonibus tu quoque annumerandus es. Non contentus illis libris, quos ego tibi legendos dederam, aut quos magistri tui in scholis tibi commendaverant, alios, ut video, anquisivisti et reperisti. Istorum lectio te diu, ni fallor, occupatum tenuit, et solus tibi sapere visus es. Nonne? D. Al-

terum nescio, alterum verum esse confiteor. P. Utrum verum esse confiteris? D. Me alios praeterea libros anquisivisse et legisse. P. An etiam inter illos BUNIANI haec *peregrinatio* fuit? D. Unus e praecipuis fuit. P. Quantum igitur boni ex hoc libro percepisti, aut in quantum propius ad metam tibi propositam pervenisti? D. Nescio. P. Quonam igitur consilio istum librum legisti? D. Ut ejus lectione nisi melior, certe doctior, fierem. P. Hujusce voti tui participemne te factum putas, nec ne? D. Me doctiorem redditum esse, affirmare non audeo: verum me pejorem non factum spero. P. Nemo est, qui se pejorem fieri speret. Verum, uter tibi in culpâ esse videtur, quod consilium tuum non assecutus sis, nec doctior evaseris, tunc, an libri tui auctor? D. Fortasse uterque nostrum. P. Quare uterque, ac non potius alteruter? D. Quia subinde in loca incidi adeo difficilia intellectu et obscura, ut ex iis me expedire non potuerim, atque nonnumquam etiam alia offendi, quae, quod mihi vera, aut certe verisimilia, non esse videbantur, memoriae [45] mandare nolui. P. Cur autem, quum legendo, ut ais, doctior fieri cuperes, nec me, nec alium quemvis rogasti, ut hunc illumve locum non intellectum explicaremus, aut de dubitationibus tuis dissereremus tecum, et sic argumentis in utramque partem ponderatis verum exquireremus? Tali certe modo fructum e lectione tuâ percipere, ac doctior fieri potuisses. D. Non ausus sum id facere. P. Quasi tu adeo timidus sis. D. Est, ut dico, pater. P. Undenam igitur ista timiditas? D. Verebar, ne librum illum mihi ademturus, et sic me magnâ voluptate privaturus esses. P. Optime. Sed nonne vides, ô bone, te hac confessione tuâ ipsum ostendere, istius libri lectionem tibi jam ab initio illicitam visam esse? D. Id non



video. P. Anne igitur ego tibi unquam bonorum librorum lectionem interdixi, aut te<sup>4</sup>utilibus et studio tuo accommodatis libris privavi? D. Numquam sane. P. Cur ergo nunc metuebas, ne id facturus essem? D. An cum ratione metuerim, nescio: at me vera loqui, id certum est. P. Credo. Sed visne ut ego verum tibi dicam? Metuisti, quoniam intelligebas et sentiebas te perverse agere, nec verâ et sincerâ, sed falsâ ac fucatâ voluptate frui, tibi que non licere tempus legendis a proposito tuo alienis libris perdere. Quid mihi respondes? D. Nihil habeo, quod respondeam, nisi hoc unum, me facti poenitere. P. Vide nunc jam porro, quo deveneris. Ego tibi Literarum, Matheseos et [46] Logices studium commendaveram, ut antea res humanas disceres, quam animum ad divinas adverteres. Tu contra, quasi major tibi rerum usus et intelligentia esset, rationi magis consentaneum duxisti praepestere agere. *Bunianum* ergo viae ducem tibi elegisti, parentem et reliquos magistros superbe repudiasti. Cum isto igitur peregrinatore tuo, quamvis alarum remigio adhuc destitutus, per altos nubium tractus volare, et coelestia perscrutari maluisti, quam nobiscum prius in rebus humanis omne studium collocare, et deinde demum, his bene perceptis, altiora petere. Verum temeritatis tuae justas poenas dedisti. Quum enim ad talem peregrinationem suscipiendam nondum necessariis subsidiis instructus, neque ad illius molestias exantlandas adhuc satis virium haberes, ducem tuum aequis passibus sequi non potuisti, teque solum in peregrinis et ignotis regionibus tibi derelictum videns, primum metuere, tum labare et vertigine laborare coepisti, atque haud diu post, amisso aequilibrio, ex illo altitudinis gradu, in quem vix escenderas, in hanc profunditatem incidisti, in quâ

nunc jaces. At ita fit, si parentum praeceptis non obsequimur, nec recte vivitur. D. Mi pater, si peccavi, quod intelligere mihi videor, quin etiam confiteor, non voluntarius, sed inscius peccavi. Malus error, non peccandi libido, me abstulit. Quare hoc unum a te peto, ut mihi errorem meum [47] condones. Quo minus enim tale quid rursus accidat, omni studio atque operâ cavebo. P. Quomodo tu, qui nondum sedecim annos natus es, vir stare poteris, quum nunc ita jaceas? Quid tibi animi erit munus suscipere ac tueri coacto? Quibus oculis intueberis publicam lucem, tu qui nunc privatos aliorum congressus ac sermones fûgis? Precare Deum, ut tibi errores et peccata tua condonet, teque erigat, ut ad intermissa studia rursus redire queas. Ubi te Literarum et Philosophiae cognitione satîs imbutum intellexero, tunc ego tibi jam indicabo viam, quâ ad vitam beatam et beatorum sedes pervenias, et istiusmodi itinerariô tunc hand aegre carebis.

Spangenbergius hucusque tacuerat, ne patrem interpellaret. Sed, finitâ adhortatione, ut matris timori pro salute filii succurreret, atque patri, cujus calorem noverat, occasionem ulterius progrediendi, et filium vehementius etiam carpendi, adimeret, *Noli*, inquit, *credere, Clar. Collega, me Danielis patrocinium suscipere velle. Miseret me quidem boni pueri, at nihilo secius tamen fateor, ipsum imprudenter egisse, ac male sibi consuluisse. Quia vero etiam alii similem in juventute sua errorem commiserunt, et tamen postea amicorum ope et naturae suae bonitate viri probi ac probati evaserunt, item omnia bona de Daniele nostro speremus et expectemus. Sinatis, quaeso, ipsum cras ad me venire. Tum ad Danielelem conversus, Ibimus, ait, ambulatum extra*

urbis [48] *pomoeria*, ut *liberiori auro fruamur*, nec a molestis *interpellatoribus*, aut *vulgo profano*, impediamur, quominus aperte nobiscum invicem animi nostri cogitata communicemus. Parentes humaniter annuebant, et Daniel sese venturum statim pollicebatur.

Postero igitur die veniebat Wyffenbachius, quemadmodum promiserat, ad Spangenbergium, et eo quidem consilio, ut tandem cum ipso communicaret, quae domi proferre non ausus fuerat. Quum vero portâ egressi, et inter confabulandum de rebus obviis aliquantum progressi essent, Spangenbergius, simulans se mirari, quod Wyffenbachium tamdiu non vidisset, sermonem cum eo habere coepit, cujus praecipuam partem, majoris perspicuitatis causâ, eodem modo nunc referam, quo priorem cum patre habitum.

Sp. Verum per hos fere septem menses domi meae non fuisti, qui tamen antea me saepius invisere solebas. Num fortasse putasti, me mutatum esse, nec te amplius ut unum ex optimis discipulis amare ac diligere? W. Minime id quidem credidi. Sp. Quid igitur illo tempore potissimum egisti? quibus studiis animum tuum oblectasti? W. Maximam illius temporis partem legendâ illâ *BUNIANI peregrinatione* consumi. Ille liber me adeo cepit, ut ejus lectione satiari non potuerim. Sp. An ergo illum librum totum perlegisti? W. Aliquoties eum perlegi. Sp. Jam itaque velim, ut mihi dicas, quid tibi in [49] illo libro inprimis memorabile visum sit. W. Id nequeo dicere: nam omnia fere nova, mira et memorabilia mihi visa sunt. Sp. Attamen heri dixisti, te nonnulla non intellexisse, et quaedam praeterea tibi non vera, certe non verisimilia, visa esse. W. Ita omnino est: sed loquor nunc potissimum de iis, quae legi ac probavi. Sp. An tu igitur omnia, quae in isto libro tuo legisti,

atque, ut ais, probasti, omnino vera esse credis?

W. Quidni credam? Nonne auctor fide dignus est?

Sp. Utrum auctor fide dignus sit, nec ne, non quaero.

W. Quid igitur quaeris? Sp. An tibi certis de causis persuasum sit, et satis superque constet, quae legeris, non nisi vera esse posse, hoc imprimis illud est, quod quaero, et scire cupio. W. Hoc prorsus affirmare non ausim.

Sp. Nonne igitur res a scriptore relatas prius justâ examinis lance ponderasti, quam eas probares? W. Id quidem non feci.

Sp. Quomodo igitur in legendo versatus es? W. Quae mihi probabilia videbantur, vera esse credidi, et de auctoris fide dubitare numquam mihi in mentem venit.

Sp. Ergo plane contrarium fecisti ejus, o bone, quod in scholis Mathematicis et Logicis fieri et doceri solet. W. Quî,

quaeso, hoc? Sp. Quid? hoccine tu non vides? tene a rectâ viâ aberrasse non intelligis? W. Nondum illud video, neque intelligo.

Sp. Audias igitur. Anne ego unquam aliquod problema proposui in scholâ, cui neque solutionem subjecerim, [50] neque demonstrationem adjecerim? W. Numquam profecto.

Sp. Erantne vero inter illa problemata omnino nullâ adeo probabilia et verisimilia, ut demonstratione haud magno opere indigere viderentur? W. Fuêrunt sane quaedam.

Sp. Jam igitur vix dubitem; quin ego in scholâ, addendis istis solutionibus atque demonstrationibus, actum agere, aut tempus perdere, nonnumquam visus tibi sim. W. Tantum absit, ut hoc ita esse putes, ut

contrarium verum esse potius tibi persuadeas. Sp.

Quî, quaeso, hoc? illud enim non capio. W. Te verba mea mihi reddere quidem audio, sed nihilo

secius tamen ita est, ut dico. Sp. Cui igitur bono haec opera mea fuit? W. Ita agens mihi non modo

ostendisti rationem, quâ id, quod propositum erat,

effici posset, verum me etiam docuisti, solutionem problematis eo modo fieri posse, quo dixeras. Sp. Nonne vero ex his verbis tuis apparet, demonstratione praecipue effici, ut ex rebus perceptis, sive certo cognitis, ad illa adducamur, quae antea nondum percipiebamus? W. Nihil mihi verius esse videtur. Sp. Ergo etiam necessario mihi concedere debes, hanc esse vim et auctoritatem demonstrationis, ut, non nisi illâ accurate adhibitâ, in animo nostro veritatis certa cognitio exoriatur, et incognita pro cognitis habere desinamus. W. Hoc lubens tibi concedo. Sp. Nonne porro in scholis Logicis audivisti, quinam libri potissimum studioso Literarum juveni [51] legendi sint, et quâ ratione in illo officio versari debeat? W. Magister, si recte memini, hoc argumentum tractavit, quum nobis explicaret illa Quintiliani, *praestat legere multum, quam multa*. Sp. Nonne praeterea didicisti, probabilitatis varios esse gradus, ejusque pretium secundum varietatem horum graduum aestimari debere? W. Haec quoque mihi tradita esse recordor. Sp. Et vel sic tamen illorum omnium, quae didicisse te fateris, ne minimam quidem rationem habuisti. Primo enim delectum librorum omnino nullum adhibuisti, sed proximum quemque cupide ac temere arripuisti, cursim et properanter pervolvisti. Ex hac lectione vagâ et temerariâ nullos fructus solidos percipere potuisti. Deinde, quum in *Bunianum* incidisses, eique penitus adhaereres, pejus etiam egisti. Simulatque nimirum quaedam narratio modo aliquam probabilitatis speciem prae se ferre tibi videbatur, tu eam continuo pro verâ habuisti, et tantum fidei auctori tuo tribuisti, ut de investigandae et cognoscendae veritatis

studio et officio ne per somnium quidem cogitaveris. Judicium tuum adhibere desiisti: Buniano te veluti in servitutem addixisti: et in isto statu, amissâ libera cogitandi, recte ratiocinandi, aut bene argumentandi facultate, in errores incidisti turpes, et incogitantiae tuae graves poenas dedisti. W. Est omnino, ut ais. Graviter peccavi: sed gravius etiam me punitum sentio. Quoniam autem [52] nihil ardentius cupio, quam errores meos quantocyns corrigere, et nihil magis desidero, quam in pristinam viam, a me imprudenter relictam, redire posse; te etiam atque etiam oro rogoque, ut me jacentem erigas, et a metu, quo tamdiu jam misere crucior, quantum queas, liberares. Sp. Id facere conabor, modo tu omnia mihi candide et aperte enarres, nec quidquam omnino reticeas. Novi enim istum librum: scio quid aliis, isto lecto, acciderit: neque dubito, quin tu eodem morbo labores, quo illos afflictos vidi.

His dictis, adolescentulus se totum magistro aperiebat, diversas metûs sui causas cum ipso communicabat, et, praeter alia multa, inprimis commemorabat illum terrorem inexpiabilis peccati contra Spiritum Sanctum, quo se dies noctesque torqueri et miserrime angî dicebat. Spangenbergius, quâ erat humanitate, ad singula loca breviter quidem, at prudenter, responderebat, et de gravioribus argumentis aliquanto fusius, verum semper tamen ad juvenis captum accommodatè disserebat, omnique modo ipsius animum tranquillare studebat. Sic v. g. (nam multa referre non lubet) quum pervenisset ad locum de peccatis contra Spiritum Sanctum commissis, more suo placide ignuens, *Noli*, inquit, *o bone, vano terrore agitari, quem hominum indoctorum error peperit, qui non viderunt, illud non ignoscendum peccatum adversus Spiritum San-*

*ctum non nisi ad tempora Christi et Apostolorum [53] pertinuisse, eique peccato obnoxios non alios esse intelligendos, nisi eos, qui tunc illorum miracula tamquam dona Spiritus Sancti contempsissent. Atqui, ut in communi vita, quod Horatius ait,*

*Nemo adeo ferus est, ut non mitescere possit,  
Si modo culturae patientem commodet aurem :*

*sia in civitate Dei, cujus suprema lex est salus ci-  
pium, nemo sponte est malus, nemo tam perditus,  
ut eum Deus servare aut nequeat, aut nolit. Ita  
enim Deus humanum genus amavit, ut ei servando  
filium suum mitteret, et hodieque suos angelos mit-  
tat. Unda enim fit, ut plerisque hominibus temere  
viventibus, et in vitae pericula se conjicientibus,  
non plures pereant, nisi quod angeli eos tuentur?  
Unde fit, ut homines saepe cogitationes supra hu-  
manum captum egregias concipiant, nisi eas ex  
occulto inderent inspirarentque angeli?*

*Quibus verbis quum juvenis animum commovisse  
videretur, mox ita fere pergebat: „Ratio nuno postu-  
lat, carissime, ut ex animi debilitate tua te quam-  
primum erigas, ista superstitionis vincula disrumpas,  
quibus constrictus teneris, et contra istam belluam,  
tamquam contra hostem omnes occasiones captan-  
tem, quovis modo tibi caveas et prospicias, atque  
sic te rursus in libertatem vindices. Atque ista  
clades, quam per hosce aliquot menses expertus es,  
quum externam tibi facultatem labefactaverit, tu  
nunc jam internam alas et augeas. Ac si forte  
istud detrimentum [54] te apud iniquos iudices de-  
primat, tu eo magis operam des, ut istorum prae-*

---

*Nemo adeo] Hor. I. Ep. I. 19.*

*judicium apud aequos et intelligentes rerum aestimatores doctrinae abundantia refellas et obruas, Ad quod efficiendum nihil Literarum Humaniorum et Philosophiae studio efficacius esse scias. Harum indefessâ et assidua tractatione tuas mentis animique facultates excolere denuo incipias, ut ne, si quando, quod fore non negaverim, spectra et alia id genus terribilamenta fortasse redeant, et vim in te suam iterum exercere velint, tu istis muliebriter rursus succumbas, verum ut, valido philosophiae praesidio munitus, omnem impetum istorum viriliter repellere queas."*

Sic fere disserebat humanissimus Spangenbergius, atque juveni persuadebat, cui ad amabilem Dei speciem a magistro informatam illud Virgilianum occurrebatur:

*Olli subridens hominum sator atque Deorum  
Vultu, quo coelum tempestatesque serenat,  
Oscula libavit natae.*

Atque plura etiam referre possem, nisi vereretur, ne nimis longus in tractando isto argumento forem. Satis itaque sit monuisse, Wyttenbachium praeceptis et admonitionibus Spangenbergii obsecutum, ac partim bonorum sodalium familiaritate exhilaratum, potissime vero naturae bonitate suae adjutum, sensim paulatimque ad se rediisse. Vetus literarum amor ac studium non modo revertentes subinde terrores tandem penitus dispellebant, [55] verum etiam ipsius animum recreabant, et Wyttenbachium, perspectâ mox scientiae ad laudem vi atque necessitate, in dies magis magisque ad discendum impellebant. Et quum mihi aliquando



Erat autem Wyttenbachius illo tempore catechamenus, et mox sacrae coenae mysterio initiandus. Studium igitur Metaphysicae multum valuit apud ipsum ad confirmandam religionem Christianam, characteribus patefactionis, sive revelationis, uti vulgo dicitur, divinae significandis, auctore ipso Wolfio: cujus argumentis Coingius, quemadmodum ex ejus dictatis intellexi, alia addere solebat, quibus efficeretur, ad sapientiam et vitam beatam non satis esse praesidii atque momenti in solis ingenii humani viribus, sed [58] extraordinarium insuper desiderari ac divinum lumen et auxilium, idque unice in religione Christianâ positum esse, siquidem Metaphysicae modo sit monere, Theologiae vero demonstrare. Atque eâdem de causâ Coingius etiam aliis in locis Wolfii sententiam deserebat. Sic *v. g.* praeter alia dictitare solebat, *Wolfii doctrinâ omnibus in partibus admittendâ* Regnum gratiae omnino tolli. Ita autem vocabatur illa pars divinae gubernationis, quâ Deus eorum hominum, quibus praeceteris propitius esset, animos suâ ipse actione et instinctu moveret: quod non tantum antiquitus fecisset, sed adhuc quotidie faceret. Praeterea idem Coingius in Psychologia monebat, non omnia, quae de spectris narrarentur, ad fictas fabulas ableganda esse: nam et in libris sacris, et hodieque multa memorari, quibus fides omnino haberi deberet. Verum haec, aut alia hujus generis, pluribus persequi, nec libet, nec hujus loci est.

*Sextum* spatium Academicum quatuor habuit pensa, *Ethicam* atque *Metaphysicam* iterum, *Historiam Statuum Europae* et *Historiam Ecclesiasticam* primum. In scholis Ethicis minus placebat Coingius et satisfaciebât discipulo suo, certiores requirenti fontes, aptiorem partium consequentiam, uberiorem praecepto-

rum copiam et explicationem: quae quum certe exemplis historicorum poëtarumque illustranda esset, Coingius [59] unâ alterâque narratione, e medio sumtâ, contentus erat. Sed vel sic tamen veniebat Wytttenbachius assidue in ipsius scholas, atque interim domi doctrinam ipsam lectione optimorum librorum et meditatione commentabatur. Ut vero majores certioresque in rebus metaphysicis cognoscendis progressus faceret, e re suâ esse arbitrabatur audire quoque alterum professorem, *Pideritium*, qui doctrinam illam Coingio magis proprie et metaphysice, id est methodo analyticâ tradere dicebatur. Verum eventus expectationi non respondebat. Nam magister, *Wolffii* compendium se interpretari professus, *Carumuelem Lobkovitzium* summum Metaphysicum celebrans, atque recentiorum Platoniorum more ad mysticas se contemplationes dans, in illas intelligibiles regiones ita vagabatur, ut Wytttenbachius eum amplius nec sequi posset, nec audire vellet. Quid igitur? Hoc ipse sibi domesticum fecit pensum, ut in hujus doctrinae commentationem totâ mente incumberet, si forte ejus tamquam Homericæ illius *ῥαυτὴν αἰσῶς κοιλῆστις κτενῆος* a divino principio ac supremo genere *τὸν ἄρῶν* usque ad postremam speciem omnes annales apte nexos cognoscere, aut ubi in compendio nexus vel omissus, vel temere obscureve significatus esset, eum reperiret, ac diserte declararet. Et non modo ipse reperiebat tunc complures rationes, quas nec postea provectione usu et ætate improbareret, [60] sed et docens discipulis probaret, verum etiam a patre, quoties ipsi aqua, ut ajunt, hærebat, in hoc studio adjuvabatur. — Denique scholis historicis quoque haud exiguum partem studii domestici tribuebat. Quod, tamen ipsi, utpote institutionis disciplinâ Jaegeri jam Historiæ Univer-

salis cognitione, hand leviter imbuto, non admodum difficile negotium erat.

Interim vero quaerebat adolescens majus quoddam spatium, in quo excurreret, atque magis certam ac perpetuam studii materiam, de qua ipse mox aliquid conscriberet. Pater suadebat ei, ut Xenophontem vel Zosimum legeret, quos nimirum ipse juvenis legisset. Zosimum sumxit Wyttenbachius, ut minoris operae lectionem, eumque, duce parente, perlegit. At vero illa lectione non contentus, et plura scire cupiens, fecit quod in promptu erat, rursusque in professorum scholas se contulit: quas hoc septimo spatio semestri quatuor sibi delegit, *Juris Naturae, Physicae, Antiquitatum Hebraearum, et Historiae Statuum Europae* iterum. Sed quamvis illas scholas non quidem nullo cum fructu tractaverit, tamen non eo cum studio iis intentus fuit, ut earum una prae cacteris colenda egregiam sibi laudem quaerendam duceret. Minus etiam ipsi placebant *Antiquitates Hebraeae*: magis placebat ipsius *Codicis* lectio, quam hoc fere tempore, Judaeo magistro adjutore, ad finem perduxit.

[61] Jam autem patri tempus adesse videbatur, ut filius rationem ejus studii ingrederetur, quod ad certum vitae genus sequendum, ejusque subsidia adipiscenda pertineret: quae studia vulgo sunt *Theologiae, Juris prudentiae, Medicinae*; siquidem Literae Humaniores ac Philosophiae ad horum subsidiorum copiam, non satis frequentes ac locupletes habentur. Pater dudum Theologiam conseruat: et filius, etsi ab omni publico munere capessendo, et magis etiam a Theologia, fastidanda abhorreret, nec tamen patri repugnare vellet, assentiebatur, intelligens rem aliter teneri non posse, atque illud Comici repintans, *Interca fiet aliquid, spero.*

*Octavo* itaque spatio, eoque ultimo, quod in Academia Marburgensi transegit, patrem ipsiusque collegam, dogmata religionis Christianae tradentes, audire coepit. Verum, ut fit, quae inviti facere epacti sumus, ea lubentes et volentes omni modo subterfugere solemus. Atque hinc quoque Wyttenbachius rarissime in scholas theologorum veniebat, nec eodem discendi studio illis intererat, quo antea in philosophorum scholas ventitaverat. Parens hoc quidem animadvertibat, sed erat hac in parte indulgens, quod filius hanc negligentiam utilibus studiis diligenter compensaret: in quibus erat lectio dialogorum Aeschini Socratici, quos aliquoties repetitos, singulorum verborum indice confecto, totos Latine vertebat: Latine scilicet, ut poterat, [62] quod parum illud Latinitatis, quod per institutionem puerilem et scholas *Stili* collegerat, per alias scholas et lectiones inquinasset potius, quam auxisset. Caeterum vero collegam patris non probabat, ut tralatitiae auctoritati servientem. Hic v. c. institutionis suae initio divinitatem religionis Christianae demonstraturus, illud inprimis facere conabatur allatis verbis ex epistola Pauli Apostoli ad Timotheum II. c. 3. 16, ubi legimus: *Πάντα γραφὴ θεόπνευστος καὶ ὠφέλιμος πρὸς διδασκαλίαν, πρὸς ἔλεγχον, πρὸς ἐπανόρθωσιν, πρὸς παιδείαν τὴν ἐν δικαιοσύνῃ*. Ex his verbis diversus existit sensus, retentâ aut omissâ particula *καὶ*, quae in plerisque adest libris, in haud paucis abest. Nam retentâ, vertendum, *tota scriptura divinitus est inspirata et utilis ad doctrinam, ad redarguendum, ad correctionem, ad institutionem, quae est in justitiâ*: ut fere Beza fecit. Omissâ vero, reddendum, interprete Erasmo, *omnis scriptura divinitus inspirata utilis est ad docendum, ad redarguendum, ad corrigendum, ad erudiendum in ju-*

stitid. Atque hoc posteriori sensu non scripturae *θεοπνευμία*, verum *θεοπνευμίας* utilitas asseritur. Utroque autem modo *πᾶσα γραφή*, iudice ipso Bezà, non ad Novum, sed ad Vetus Testamentum pertinet. Sed hoc minus curabat Wytttenbachius. Scripturam, uti professor volebat, pro utroque Testamento accipiebat, ut sensus esset: *et Vetus et Novum Testamentum* [63] *divinitus esse inspiratum*. At vero illud ipsi, non dicam in Logicis versato, sed vel communem sensum sequenti, mirum accidebat, utrumque adeo in Theologiâ migrari, ut ei, de quò judicetur, in suâ ipsius causâ, et de se ipso, testimonii dictiò tribuatur. Ipsius parens hoc in loco aliter versabatur. Humanâ religione ex Metaphysicis repetitâ, huiusmodi argumentatione ad Christianam progredi solebat: „*Quam humana religio non satis valeat ad poenas malefactorum divinas effugiendas vitamque beatam comparandam, opus est divinâ religione: quam humano generi datam esse a Deo, huius virtutes nos dubitare non sinunt, quippe creatoris, ut omnium rerum, ita hominum, et eos amantis, et summe benigni: et quandoquidem multae feruntur apud multos populos religiones divinae, harum unam necesse est veram esse, quae habeat in se notas divinae originis et officia religionis, id est characteres et requisita revelationis, ut in scholis loquuntur. Atqui hae notae et officia sunt octo, et in sola revelatione Christianâ manifestò exstant. Ergo revelatio Christiana et vera et sola vera est.*“ In hac argumentatione certe ratio et via apparebat: singulae propositiones et assumptiones si quid haberent reprehensionis, hoc probabiliter in scholâ diluebatur: characteres divinae originis et religionis copiose explicabantur: illud porro scitum ac plausibile accedebat, quod dubitationes de

miraculis ab historia et philosophia [64] profectae, quasi a priori, ad vivum resecabantur: tota demonstratio denique absolvebatur ad audientium approbationem et persuasionem. Quam filius, dum non erat, qui oppugnaret, mente perceptam firmiter tenebat.

Mox *Emanuel Salohlius*, juvenis ingeniosus et eleganter doctus, ex literatâ peregrinatione per Germaniam, Bataviam, Britanniam et Galliam factâ, Marburgum veniebat, et in paternâ Wyttenbachii domo aliquot menses divertebat. Pater ipsius, Professor Theologiae in Academiâ Bernensi, patris Wyttenbachii nostri nuper collega fuerat. Juvenis vero hicco erat fervidus et inquietus: eorum, quae probaret, effusus admirator; quae improbaret, acerbus irrisor: disertus sermocinator, jucundus narrator, acer disputator, audax pronunciator: talis nimirum tunc erat: recens a cognitione multorum hominum, novarum rerum plenus, eas apud amicos exprimebat, et libenter audiebatur. Ille, praeter alia, etiam narrabat, se doctorum virorum, gravissima religionis naturalis capita acriter reprehendentium, colloquiis interfuisse, quibus se metaphysicas rationes opponentem risu confutatum esse: atque, *equidem*, inquit, *unam bonam poëtae sententiam pluris aestimo, quam totam metaphysicam*. Vix potuisset ille adolescens alio dicto in majorem parentis Wyttenbachii offensionem incurrere: qui indignans, et filium [65] intuens, *Istud*, ait, *adeo temere effutitum vel tu confutare pates*. Ad quae filius, *immo*, dixit, *se ipsum confutat*. Quum itaque ille talia non amplius, praesente patre, movere auderet, seorsum ad filium, *Pater tuus*, inquit, *aegre tulit, quod de Metaphysicâ dixi: et tamen vera dixi*. Tum Wyttenbachius, *enimvero, si vel maxime verum esset, intempestivum dictu fuit: nunc vero*

*etiam falsissimum est.* Ille contra, *Agedum*, ait, *cum tu Metaphysicâ, responde ad hocce argumentum, responde ad illud:* atque ita deinceps alias ex aliis reprehensiones religionis et philosophiae, tum contemplativae, tum activae, a recentioribus adversariis, Cherburio, Tolando, Tyndalio, Wollastono et aliis multis celebratas, proponebat. Ad has respondebat Wyttenbachius, ut poterat: et ubi non posse videbatur, ibi illud semper et mordicus tenebat, singularem religionis vel philosophiae partem, quamvis reprehensam, tamen stare et manere, etiam tunc, quum reprehensoris crimina dilui non possent; propterea quod pars toto contineretur, neque cadere posset, nisi totâ doctrinâ cadente: atqui religionis fundamentum esse philosophiam, sed philosophiae metaphysicam, eique immotam et inconcussam firmitatem constare, a supremo genere entis ad notitias mundi, Dei, animi pertinentem uno et continuo vinculo aptam et nexam. In hanc vero rationem multas cautiones habentem incidere per similitudinem illius modo [66] memorati argumenti a priori ducti ad probandam auctoritatem divinam religionis Christianae. Mox Salchlius rationibus Wyttenbachii alias rationes, exempla, comparationes et historica argumenta quidem opponebat, sed hic non cedebat illis, licet ad verum quaerendum sese excitatum sentiret. Ac quum ejusmodi disputationes ipsis saepius fuissent, illo domum redeunte, ita discesserunt, quasi suam uterque retineret opinionem; si quidem neuter animadverterat, se ad alterius rationem paulo inclinationem factum esse. Quod tamen postea utrique apparuit. Wyttenbachio enim deinde secum cogitanti argumenta illius minus falsa videbantur, quam antea refellenti, ipsumque in eam viam sensim converterunt, quâ ex isto opinato scientiae vinculo ali-

quantum remitteret: atque Salchlius aptior dialecticae diligentiae, firmaeque scientiae studiosior, Marburgo ad suos rediisse postea sibi visus est.

Interea autem scholarum habendarum tempus praeterierat, nec Wytttenbachius magnopere quidquam in rebus Theologicis profecerat. Maximam diei partem isto semestri spatio domi occupatus fuerat cum in retractandis disciplinis, quas in professorum scholis antea percipere coeperat, tum vero etiam in legendis et Latine vertendis quorundam Graecorum scriptorum libris. Quod quum ad notitiam condiscipulorum atque aliorum amicorum pervenisset, nonnulli ex iis, qui sese [67] bonos consultores putarent, ut ipsum ab hujus studii intentione abducerent, et ad graviores disciplinas adducerent, partim aliis quidem rationibus utebantur, partim vero etiam istis, ut dicerent, aliam aetatem postulare alios mores et alia studia, antiquasque literas cum in verbis, non in rebus occupentur, pueris quidem esse decoras, viris non item, nec eas animo certum et permansurum scientiae fructum, sed tantummodo inanem ac brevissimi temporis delectationem afferre. Quod parens, qui ipse in juventute sua literas antiquas coluerat, et de earum pretio rectius judicare solebat, neutiquam ferre poterat. Immunis ab omni praejudicata opinione, et probe sciens, nullam artem habere osorem, nisi ignorantem, longe aliter et sentiebat, et agebat. Primum istos reprehensores refellebat cum objiciendis nominibus Platonis, Ciceronis, Plutarchi, et aliorum, quorum si quis scripta bene legisset, non exiguum scientiae fructum collegisse sibi censi deberet, tum recensendis magnorum virorum exemplis, qui majorum, patrum et sua aetate hic illic antiquarum literarum studio viam sibi ad graviorum disciplinarum scientiam patefecissent. Deinde



vero, quod caput rei erat, facilem et indulgentem hac in parte filio sese praebebat. Videns scilicet, ipsum aegre et difficulter, nec nisi cum taedio, ad studium Theologicum traduci posse, atque Literarum, inprimis Graecarum, amore ferri, non modo [68] eum ad illud laudis iter strenue persequendum adhortabatur, verum etiam, quantum poterat, partim consilio, partim operâ sua adjuvabat. Verissime igitur scripsit *Bangius* de indulgentiâ patris Wyttenbachii erga liberos suos agens: „*Indulgentem adversus hos maxime fuisse, non una vincit ratio, sed est illud fere de genere hoc praecipuum. Filium natu majorem quamquam theologiae facitandae destinasset, tamen cum impetu eum cerneret majore in literas ferri elegantiores, monumentaque Graeciae, atque maximos in his facere progressus, non solum non auctoritate sua interponendâ revocavit a cursu, sed etiam ad perseverandum hortatus, consiliis adjuvit ad eam rem accommodatis.*“

Venio igitur nunc ad illud tempus (1764) quo *literata*, ut ita dicâm, Wyttenbachii vita demum reapse initium sumsisse censenda est. Nam etsi antea in cognoscendis doctrinis haud leve studium posuerat, tamen videmus ipsum modo hanc, modo illam disciplinam tractasse, neque ad unam aliquam eo consilio animum applicuisse, ut aliquando in illâ quasi vitae tabernacula collocaturus esset. A Literis ad graviores disciplinas accesserat, ut amator amatam aegre relinquens, respiciens, et omnes vel brevissimos peditus captans. Nam a pueritiâ magno Literarum, praecipue Graecarum, amore percussus, semper illarum scholarum discipulos beatos praedicaverat, magistros ut ho-

mines supra mortalem sortem evectos veneratus [69] erat, et quemvis fere librum Graecum ut templum arcano sapientiae cultu, sanctum atque religiosum, ipsi adhuc quidem occlusum, mox autem initiato recludendum, adoraverat. Qui profecto enthusiasmus multum apud ipsum valuit ad perfringenda claustra, quibus janua templi obserata erat, id est, ad superandas difficultates, quibus illo vel tempore vel loco elementorum Graecorum institutio conjuncta erat. — Quum itaque nunc optimi parentis indulgentiâ tam ingratum discidium diutius ferre ipsum non amplius oporteret, statim quoque ipse se in libertatem asseruit, et ipse se in sinum veterum deliciarum numquam postea divellendus conjecit, *alucinarique* omnino desiit. Hoc enim est *ἀλύειν*, affectus eorum, *quibus*, quod vulgo dicitur, *tempus longum fit*, h. e. qui non habent quod agant, et negotii inopiâ et otii impatientiâ torquentur, cujusmodi quid Horatius dixit, *Ut nox longa etc.* Sed hoc veluti *ἐν παρόδῳ*. Ipse, quo animi statu tunc temporis fuerit, testatus est, ubi ait: „*Duodevicesimum agebam annum: in Graecis Literis fere eo eram gradu, quo vestrum plerique estis quarto mense, postquam scholis meis interesse coepistis. Frequentaveram lectiones Professorum cum in Literis, tum in gravioribus, ut vocantur, disciplinis, nullo magnopere cum fructu; videbar aliis proficisse, mihi non item: poenitebat me operae: quae-rebam spatium, in quo altius evolarem: redibam ad disciplinas, meoque ipse studio eas retractare* [70] *instituebam; et sane aliquanto longius progrediebar, quam quo in Professorum lectionibus perveneram: sed nihil ad spem et expectationem*

*meam: discedo cum taedio: ab alia deinceps ad aliam disciplinam accedo: eadem repulsa, idem taedium. Et tamen, veluti fastidientis stomachi morbo, certum animi pabulum quaerere pergo. Venit in mentem voluptatis, quam puer in Graecis percepissem: requiro libros quondam lectos: depromo ex angulo illum, Plutarchi nomine inscriptum, de Puerorum Educatione libellum: lego et perlego: operae multum, suavitatis parum. Hinc Herodianum repeto: paulo major suavitas: nil ad explendum animum. Aliunde, idque casu, nanciscor Xenophontis, quem adhuc non nisi nomine noram, Memorabilia ex Ernesti editione: mirabile dictu, ut continuo me ceperit nescio quid suavitatis; quod, quale esset, postea magis intellexi. Hoc opus ita legi et commentatus sum, ut numquam ad sequentem accederem sectionem, nisi priore relecta: numquam ad novum caput, nisi capite priore relecto: numquam ad novum librum, nisi superiore libro iterato: denique toto libro finito, totum denuo uno tenore perlegi opus. Hic fere trium mensium fuit labor, vel sola repetitione fructuosissimus." Legitur in fine cujusdam libelli, cui inscripsit Wyttenbachius tunc temporis vocabula sibi incognita et elegantiores dicendi formulas, hocce ipsius juvenis manu scriptum: Inceptum d. 28 Jan. 1765, decies circiter lectum [71] et relectum, et ad finem perductum d. 5 Aprilis 1765. S. D. G. —*

Quà lectione igitur quum haud contemnendam Graccae orationis facultatem sibi acquisivisset, atque ex animadversionibus Ernesti aliquam quoque interpretandi rationem adeptus, et librorum notitiâ quodammodo imbutus esset; hoc sibi ipse pensum constituit, ut Graecos scriptores deinceps legeret, atque

Graecarum Literarum scientiâ uteretur tamquam fundamento, cui deinde aliarum doctrinarum tractationem superstrueret. Atque si vere iudicarunt Hemsterhusius et Ruhnkenius, *praeposterum esse puerilis institutionis ordinem, quo primum Latinis, deinde Graecis imbuamur Literis*, certe Wytttenbachius censendus est naturae bonitate et ingénii solertiâ suâ ad literarum principatum rectâ ratione contendisse, quippe qui prius Graecorum, quam Latînorum, praestantissima opera quaeque perlegerit. Sed quandoquidem hanc vitae Wytttenbachianae partem, quam in domo paternâ Marburgi legendis scriptoribus Graecis transegit, non facile quis melius et accuratius nobis describere queat, quam quidem ipse fecit; profecto haud alienum mihi videtur, hoc loco ipsius verba referre:

*„Accessi, inquit, ad Homerum, cujus puer ex primo libro Iliadis centum circiter versus didiceram: hunc librum eodem, quâ Xenophontis Memorabilia, iteratione, duobus mensibus [72] absolvi. — Progrediebar in Homeri lectione, ut necessariâ magis, quam jucundâ: nondum illam ingenii divinitatem agnoscebam: quod item plerisque adolescentibus accidisse novi. — Ergo Homero comitem adjunxi Xenophontem, ita ut in hoc multo plus temporis collocarem: hunc devorabam, quippe jam intellectu facilem: raro ad Lexicon descendere cogebar: pleraque omnia e nexu videbam: accedebat Latina versio, utile sane illi aetati negotium, scholis non item. Reliqua omnia, exceptis Memorabilibus, opera Xenophontea, quater legendo, quatuor confeci mensibus.“*

Haec autem ab optimo viro verissime scripta esse,

---

*Praeposterum*] Vita Ruhn. p. 32.

*accessi*] Praefat. ad Sel. Princ. Hist. p. XXXII.

item mihi constitit e libello quodam, quem inter chartas ipsius inveni, quique continet vocabula Graeca Xenophontis. In illo enim haec leguntur: *Cyropae-diam legere coepi die 21 Aprilis A. 1765, et, exceptis Memorabilibus, reliquorum operum lectionem finivi proximo hoc mense Augusto. Sed videamus reliqua.*

*Jam putabam, (ita pergit) nullum superesse scriptorem, quin mihi apertus pateret. Accedo ad Demosthenem: habebam exemplum sine Latina versione, cum notis item Graecis Hieronymi Wolfii: merae tenebrae! Sed didiceram non absterri in primo aditu: pergo: majores quam usque antea difficultates, cum in verbis, tum enunciationum longe ductarum ambitu: primam Olynthicam magnâ cum aerumna ad finem perduco: finitam relego semel et iterum: [73] plana et perspicua omnia: desidero tamen celebratam illam eloquentiae vim: dubito utrum ad secundam orationem progrediar, an hanc repetam: placet repetere. O salutare repetitionis consilium, nec unquam satis praedicandum! Ecce denuo relegens, novus plane et incognitus ad animum meum accidit sensus. Adhuc in aliis auctoribus intelligentia non nisi delectationis mihi voluptatem attulerat, cum ex rerum verborumque perceptione, tum ex progressuum meorum animadversione: nunc inusitatus et plus quam humanus affectus mentem permeat, et quavis lectione invalescit. Video oratorem ardere, dolere, impetu ferri: incendor et ipse, eodemque motu auferor: altior fio, nec sum qui fueram: videor mihi Demosthenes ipse esse, stans in tribunali hanc orationem*

*habere, Atheniensium concionem ad majorum virtutem et gloriam hortari: nec tacitus lego, ut inceperam, sed altâ voce; ad quam tollendam imprudens inducor, cum sententiarum evidentia et fervore, tum numeri oratorii efficacia. Ad hunc modum trimestri tempore plerasque tum legi Demosthenis orationes; indeque excitatus ad sentiendi facultatem, jam et Homero magis delectabar, quem mox finivi; et deinde in optimis quibusque auctoribus cum veriore cognitionis fructu versabar."*

Finitâ Demosthenis lectione, ad alterum Socraticae suavitatis fontem, ad Platonem, accessit, cujus studio tam *δαμνίως* capiebatur, ut illi legendo non tantum omne tempus [74] impenderet, verum animadversiones etiam in plerosque Dialogos conscriberet, quasi scholas in Platonem habere sibi proposuisset. Atque uti olim parens Xenophontis *insatiabili dulcedine captus, Leunclavianae editionis compagem solverat, quo facilius in Alpes, quotiescunque eo in paterna praedia excurreret, singula folia secum efferre posset; sic nunc jam filius, per viridaria Marburgensia obambulans, folia Platonis secum portare solebat. Suaviter omnino haec ipse descripsit in illâ amoris plenâ Epistolâ ad Clar. Heusdium: „Mihi vero, inquit, nostri sermones saepe in memoriam revocarunt adolescentiæ meae tempus, quo ille (divinitatis Platonicae) in animo meo sensus et recentior et acrior vigeat: quem nunc usus et aetas vel refrigerarunt, vel ratione coërcuerunt. Ego vix dum adolescentiam ingressus eram, quum mirificus me caperet et quasi *δαμνίως* amor Platonis: cui legendo quum*

---

Xenophontis] Bang. Elog. p. 16.

Mihi vero] Ep. Wyt. ad Heusdium in Spec. Plat. p. XXX.

*omne meum tempus impenderem, tum imprimis otia captabam, quibus per anni tempestatem in sylvas montesque excurrerem, et nunc viridi membra sub arbuto stratus, nunc ad aquae lene caput sacrae, promerem, non ut ille, veteris pocula Massici, sed librum Platonis, in ejus me lectionem conjicerem, ac penitus demitterem. Ibi tum fieri solebat, ut, quemadmodum ipse in alto editoque positus, in circumjacentia infra me loca veluti parva et humilia prospiciebam, sic Platonis genio repletus purior leviorque in coelestes regiones sublimis [75] evolare viderer,*

*Ut mihi jam summam sapientia panderet arcem,  
Unde hominum errores longe lateque per orbem  
Despicere, atque humiles possem contemnere curas."*

Sed Ruhnkenii animadversiones in Timaei Lexicon Vocum Platoniarum ad hoc studium alendum et dirigendum Wytttenbachio maximam utilitatem attulerunt. Hoc ipse, quo erat animi candore et ingenuitate, disertis verbis testatus est. Quod quale fuerit, quum haud injucundum fore opiner, ipsis Wytttenbachii verbis cognoscere; non possum facere, quin illa apponam:

*„Familiaris meus et amicus, J. M. Hassenkampius, ad me veniens libellum adfert, de cujus nec auctore nec editore adhuc vel in libris legeram, vel fando audiveram, Timaei Lexicon Vocum Platoniarum cum animadversionibus Davidis Ruhnkenii. — Ego libellum ut in manus accipio, ita evolvo: miror commentarios amplos et eruditos, quales nunquam videram: quaero voces mihi notas, et a me meis in animadversionibus tractatas, paucas inve-*

nio: sed quas invenio, eas video ejusmodi ratione expositas, et luce illustratas, qualem quantamque non cognoveram. Tum vero intelligere coepi, non solum per se ipsam fructuosam esse Platonis lectionem ad mores, animum, ingenium, orationem, disserendi elegantiam, interiorum Philosophiae et Litterarum Graecarum cognitionem: sed vero longe fructuosissimam ad omnes posteros et Graecos et [76] Latinos scriptores recte intelligendos, quippe per hos omnes et per universum antiquarum doctrinarum orbem longe lateque diffusam. Inde per complures deinceps annos Timaei Lexicon mihi fuit enchiridion, quod e manibus numquam ponerem, cujus mihi tamquam instrumento Platonis cognitionem patefacere. Nam hujus acriori in dies studio incitabar, ut eum jam non solum animi sensu amarem, sed ratione judicioque diligerem. Ruhnkenium autem et amabam, propter communem Platonis amorem, et diligebam propter doctrinae fructum ex ejus Timaeo perceptum: Ruhnkenium dies noctesque cogitabam: Ruhnkenium in oculis ferebam: Ruhnkenium, ut unicum doctorem et alterum parentem, colebam ignotus, et subinde legens ejus animadversiones, cogitationi ipse meae indulgens, coram cum eo colloqui mihi videbar, mox a mentis errore ad me rediens illud usurpabam:

*Quid natum toties, crudelis tu quoque, falsis*

*Ludis imaginibus? cur dextrae jungere dextram*

*Non datur, ac veras audire et reddere voces?"*

Platonis lectione ad finem perductâ, non solum alios principes cum ligatae, tum solutae orationis scriptores deinceps legere coepit, sed id sibi praecipue proposuit, ut primo quoque tempore ad Ruhnkenii



notitiam se proferret, quem unum in primis spectabat et cogitabat. Primo igitur sumpsit *Julianum*, mox *Plutarchum*, aliosque illius aetatis *Philosophos et Rhetores*, quos ex *Antiquis*, inprimis [77] *Platone*, emendaret, exemplo ipsius *Ruhnkenij* in *animadversionibus ad Timaeum* proposito. Quo in studio quum usque in mensem Augustum anni 1768 assidue occupatus fuisset, et saepius animadvertisset, se multis subsidiis destitutum esse, quae Marburgi omnino sibi comparare non posset; nihil magis e re suâ fore iudicabat, quam ad *Clar. Heynii* consuetudinem pervenire, eumque sibi conciliare. Itaque rogavit patrem, ut *Goettingam* proficisci, ibique ad consilium suum cum laude ac fructu perficiendam *Literis* porro operam dare sibi liceret. Hanc veniam liberalitate parentis haud difficulter impetravit. Ergo mox *Goettingam* abiit, et *Heynium* adiit. Hic autem egregius vir juvenem non modo benevole et comiter recepit, omnique librorum suppellectile instruxit, verum etiam ipsum tum consilio saepius adjuvit, tum adhortatione *Graecarum Literarum* amorem ipsius mirifice auxit, atque sumtis quasi proxenetæ partibus aditum ipsi ad *Ruhnkenium* aperuit.

Proximo itaque anno 1769, die 31 Martii, edidit *Goettingae* studiorum suorum primitias, *Epistolam Criticam* ad *Vir. Cel. Davidem Ruhnkenium*, super

---

*Julianum*] Vita Ruhn. 151.

*Epistolam Criticam*] *Clar. G. H. Schaeferus* edidit Lipsiae 1802 *Juliani* Orationem in Constantii laudem, eique non modo animadversiones *Wytttenbachii*, ex *Bibliotheca Critica* desumptas, verum etiam ejusdem *Epistolam Criticam* ad *Ruhnkenium* adjecit. Quae tamen omnia, nolente *Wytttenbachio*, edita sunt. Quod ideo dico, quia in *Annal. Acad. Lugd. Batavae* a. 1820-21, haec editio inter scripta *Wytttenbachii* refertur, cujus nullae omnino in illâ adornandâ partes fuerunt.

nonnullis locis *Juliani Imp.* cui accesserunt *Animadversiones in Eynapium et Aristænetum*. Sed audiamus potius ipsum de hac vitae suae parte suavissime narrantem:

„Goettingam veni, operaeque pretium feci, cum legendis Graecis scriptoribus. Scriptorumque editionibus iis, quibus adhuc aegre carueram, [78] tum vero etiam conciliando meis studiis Heynio: qui, quum consilium ei aperissem meum, me currentem incitavit, narrans quid ipsi officii gratiaeque cum Ruhnkenio intercederet; addens, se per literas meum ei libellum commendaturum: idque mox praestitit. Caeterum Ruhnkenius et nondum viso meo libello, ad literas meas humanissime respondit: et accepto lectoque, adeo mihi amanter scripsit, adeo ad laudem honorifica, adeo omni mea spe, opinione, merito, cumulatus, ut nil supra esse posset. Saepe in memoriam redeo ejus diei, quo die has accepti literas: ut eas legi, relegi, exosculatus sum: ut me per complures dies insolitus quidam nec stupori dissimilis, fatebor enim, placidae voluptatis affectus tenuit. Nec mirum. Diuturna quatuor annorum expectatione, subito solvebar. Neminem adhuc habueram, qui meam operam agnosceret: paucos parcosque laudatores: multos mei studii reprehensores, ut inutilis ad vitae usum: omnem spem reposituram ad illud tempus, quo meam operam Ruhnkenio, Valckenaerio, horumque simillimis viris probassem, huiusque laudis expectatione omnem et laboris mei aerumnam et imperitorum reprehensionem toleraveram. Nunc expectatum illud tempus aderat, et uberrimum laudis animique fructum afferebat.“

Jam autem, ut eo melius percipiatur, quam justa illa laetitia fuerit, quā Wytttenbachius, acceptis Ruhnkenii literis, sese perfusum fuisse testatur; operae pretium erit, hoc loco illarum literarum exemplar proferre: [79]

*„Lectus a me libellus tuus expectationem, quam de eo Heynius noster fecerat, multum superavit. Nam, ut vere dicam, vix putabam, in Germaniā esse, qui tantum in hoc genere saperet, et tantam Graecae linguae scientiam cum verā critices ratione conjungeret. Miror lumen ingenii tui, quod ex tot egregiis conjecturis elucet, sed multo magis miror rectum, in illā praesertim aetate, judicium. Ex his non fallacibus signis auguror, te, si eundem cursum tenueris, magnum aliquando Literarum nostrarum decus et praesidium futurum. Tu solus nimis demisse sentire videris de tuā in his literis facultate. Verum scias, quod Quintilianus in simili re dicebat, eum in Graecis Literis multum profecisse, cui Plato valde placeat.“ D. 11 Julii M.DCC. LXIX.*

Caeterum jam antea Wytttenbachius amabat in historiis celebratos Batavos, quippe qui item ut Helvetii se ex tyrannide in libertatem armis ac fortitudine vindicassent, itemque in paucis liberā republicā fruerentur. Sed hoc tantummodo ad animi conjunctionem valebat. Nunc vero ingenii conjunctio accedebat. E Batavis alebat Wytttenbachius institutum iter: e Batavis inchoatum opus augebat. Paulatim majorem bonorum librorum notitiam sibi colligens, meliores Veterum editiones Batavas esse videbat, et meliores eorum interpretes ab harum rerum idoneis iudicibus Batavos

---

*meliores Veterum editiones]* Wytttenbachium cognitionem meliorum librorum magnam partem Bangio debuisse, videmus ex Bibl. Crit. P. XII. p. 97.

merito censeri sentiebat. Ex his igitur latam ac rerum scientiam petebat: viros antea vix [80] fando et nomine sibi auditos ex ipsorum cognoscebat operibus, cum alios, quorum longum est nomina recensere, tum maxime cum ipsius studiis conjunctos, Scaligeros, Gronovium, Perizonium, Hemsterhusium, Dukerum, Wesselingium, et duos scholae Hemsterhusianae principes, tunc viventes ac florentes, Valckenaerium et Ruhnkenium, Horum scripta quotidie pervolvens, animadvertibat, quantis ex tenebris quantam lucem accendissent, ac quantum elegantia, ingenio et doctrina sexcentis aliis praestarent,

Quo magis vero Wytttenbachius in doctrinarum percipiendarum studio progrediebatur, et quo magis quotidie ex Batavorum libris proficiebat, eo vehementius in dies cupiebat Batavos, inprimis duumviros celeberrimos, Ruhnkenium et Valckenaerium, utpote praecipuos progressuum et incrementorum suorum autores, propius cognoscere. Hoc unum fere diurnis nocturnisque precibus ac votis ab immortali Deo precabatur, ut illos doctores vivos et praesentes aliquando videre et audire sibi concederet, saepissimeque secum tacitus usurpabat illud;

*O mihi si summam sapientia panderet arcem!*

Interim Heynius Wytttenbachii in discendo assiduitatem admirans, et doctrinae copiam ejus magni aestimans, ipsi suadebat, (praesertim quod sibi proposuisset vitae tabernacula in Literarum Humaniorum studio collocare) ut ne alteram earum dimidiam partem, [81] Literas Latinas, praetermitteret, sed illis quoque operam navaret. Nam animadvertenter vir doctissimus, Wytttenbachium cognitione harum Literarum modo leviter imbutum esse. Quod ipse Wytttenbachius septem et viginti annis post, de studiorum suorum initiis

agens, minime dissimulavit. „*Si quaeratis*, inquit, *quis mihi illo tempore modus fuerit Literarum Latinarum, in Graecis versatos pudeat profiteri. Nil habebam nisi ex puerili disciplinâ, quae mihi cum decimo quarto anno finita erat. Nil Ciceronis nisi pauca ex Officiis capita, magno cum taedio tractata; quippe non intellecta: Phaedrus, Curtius, Justinus: et quae optima operae pars erat, aliquot Nepotis vitae, Virgilii Georgica, Aeneïdis dimidium. Hoc quantulum est? et totum fore in oblivionem abierat.*“

Jam igitur, etsi erant, qui dicerent, Latinis Literis ipsi, Graecarum perito, non opus esse, tamen Heynii consilio potius obsequendum, quam istorum dictis aures praebendas statuebat. Primum ad Terentium accedit: cujus primus aditus ipsi non facilius erat, quam antea Demosthenis fuerat. Verum unius mensis pertinax studium expeditam reddebat viam. Tum pergit ad Latinorum principem Ciceronem. Quid tunc sibi evenerit, nobis his ipse verbis refert: „*Edita Epistola ad Ruhenkenium non nisi Graecos legeram scriptores, ab iisque tum recens ad Latinos et principem Ciceronem accedebam. Qui me continuo insolita quadam [82] difficultate, ut putabam, et austeritate, certe a se ad alios avertebat. Forte accidit eodem tempore, ut ex auctione nanciscerer exemplum Mureti, sordidum quidem chartâ et typis, priorum etiam dominorum usu detritum ac paene lacerum: quod ego ut accipio, ita inspecio; et primae statim orationis, in quam casu incidebam, exordio sic et moveor et teneor, ut eam nisi perlectam*

[*Si quaeratis*] Praefat. ad Sel. Princ. Hist. p. XXXV.

[*Edita Epistola*] Phil. I. p. 208.

de manibus non deponerem. Quod in lectione me-  
mini mihi plane idem accidisse; quod antea in De-  
mosthenis mihi lectione acciderat, ut incatescerem  
et impetu orationis auferretur ad eam inter legendum  
altè voce recitandam. Deinceps; omnia hujus scri-  
pta legens, paulatim cum Cicerone in gratiam redeo;  
qui mihi jam nihil nisi suavitatem et lucem offere-  
bat; ad eam quasi magnæ mysteriæ percipiendam,  
parvis Mureti mysteriis præparatæ. — Cum hoc  
autem locum conferri meretur aliis, ubi de Mureto  
ipsiusque scriptis hæc loquuntur 20. Equidem sæpe  
animadverti, homines, qui primum ad Ciceronis  
lectionem accedunt, magis capi ac delectari scriptis  
Mureti et similium: non quod horum oratio minus  
Latina, ideoque facilius sit: sed quod ratio mate-  
riaque nostræ ætati nostrisque ingeniis magis aptæ  
sunt. Horum nos lectio, quasi blanda manus ad  
Veteres ducit: estque veluti *εἰσὸς*, seu gradus  
et aditus, ad Veteres, sed purus ille castusque,  
unde nil sordium ad ipsa eorum sacra afferramus.  
Certe, si quid ego ad scribendi facultatem profeci:  
quod, pro rei [83] magnitudine, exiguum esse, non  
ignoro: sed si quid profeci, hoc magnam partem  
debui lectioni operum Mureti: quæ me adolescen-  
tem miræ suavitæ deliniebat; exemplis augebat,  
et ad Ciceronem alliciebat.“

Quodsi vero quaerimus, cur Ciceronis scripta,  
imprimis philosophia, Wyttenbachio parum placuerint  
initio, ipsumque austeritate quadam suâ, uti putabat,  
a legendo primum ita absternuerint, ut non nisi post  
lecta deinceps Mureti opera cum Cicerone in gratiam  
redierit; omnino fatendum est, hujus rei causam magis

sitam fuisse in praesudicata quadam opinione, quam adolescentulus in scholis philosophorum conceperat, quam quidem in ipso Cicerone, huiusque orationis difficultate aut obscuritate. Testem rursus habeo ipsum Wyttenbachium, quo loco alios praemonet, ut sibi caveant, ne in eundem errorem temere incidant, quo ipse diu captus fuerit. Quem locum, quamvis prelixio-rem, in gratiam Literarum studiosae juventutis totum tamen hic apponam:

*„Atque hoc, inquit, loco non possumus silentio praeterire, qui nos error diu tenuerit: si forte nostrum exemplum aliis prodesse queat. Ex Ciceronianis libris omnium primi a nobis lecti sunt illi, qui sunt de officiis: consuetudine tam perverat, quam perulgata. Erasmus tum pueri: id est, ea aetate, qua horum librorum vim ac praestantiam minime perciperemus, verba verbis redderemus; nec hoc quidem sine summo taedio, [84] quod res ipsas non intelligebamus. Itaque factum est postea, ut, quo plus suavitatis caperemus legendis Poëti et Historicis, qui sine dubio magis accommodati sunt puerili ingenio, eo minus jucunda nobis accideret recordatio librorum de Officiis. Tum contentus etiamoriebatur reliquorum omnium Ciceronianorum de Philosophia librorum; qui quidem in dies augebatur hominum iudiciis, quorum apud nos multum valebat auctoritas. Huo accedebant decreta Doctorum atque Professorum, qui ex cathedra saepius Ciceronem ridebant, exagitabant, condemnabant. Hi scilicet omnia demonstrabant, ut quidem sibi et discipulis videbantur; Cicerone et veteres hanc egregiam demonstrandi artem non noverant, tantum deolama-*

verant. Coepimus tum nobis persuadere, nullo alio consilio Ciceronem nobis pueris in manus datum fuisse, quam ut Latine disceremus. Quamquam non recordabamur, nos ejus lectione quidquam ad Latinae orationis facultatem profecisse. Neo mirum: verba sine rebus tradita memoriae effluerant. Verumtamen dicebamus, alii sunt a Cicerone de Philosophia scripti libri, praeter illos de Officiis: sunt Academici, Tusculani, et de Finibus Bonorum et Malorum. Haec nomina quid sonarent, quidque sibi vellent, ne suspicabamur quidem. Sed ecce! est etiam de Natura Deorum. Erit hic sine dubio compendium vel systema Theologiae Naturalis? Age legamus! Exordium elegans et grave: sed tamen certa principia, axiomata et definitiones [85] malleamus. Pergamus! Vellejus Epicuri sententiam explicat: refellit eam Cotta. In hacine refutanda opinione totus liber consumendus erat, quam quilibet unus ex nostris philosophis uno ictu profliget? Videamus secundum librum. Balbus Divinam esse Naturam demonstrat? Immo vero vult, nec potest! Neque enim est argumentum a priori, neque etiam argumentum a posteriori se nobis offert. Itaque hunc librum non totum perlegamus; nam, quod inter nos dicere liceat, difficilis est ad intelligendum. Accedamus ad tertium! Quid? Cotta disputationem Balbi reprehendit, dicit quid ei in ea placeat, quid displiceat. Ciceroni Balbi sententia verisimilior videtur. Ubi Mathematica methodus? Nostri quidem philosophi primum axioma ponunt, tum definitionem, deinde postulatum, tum theorema, denique addunt demonstrationem. Ergo abjiciebamus tum Ciceronem, cum obcaecati hac evidentiae Mathematicae opinione, tum rudes a linguae cognitione



et ab *Academicae rationis usu*. Omnino saepius hoc postea cognovimus, hominibus etiam vacutis atque haud inductis, sed adsuētis scholasticorum compendiorum jejunitati, elegantem illam, quam Cicero sequitur, Socraticorum colloquiorum rationem placere non posse. Ceterum haec tantopere laudata, et ab hodiernis in *Metaphysicam* inducta vis *Mathematicae rationis* nescio quomodo paulatim apud nos evanescēbat, et minus minusque sensum nostrum percutiebat: illam invictam cogendi vim non amplius sentiebamus: [86] aliud semper requirebamus. At hoc quid tandem rei est? In *Mathematicis* quidem post demonstrationem nullum amplius subnascitur dubium: in *Metaphysicis* non item. Tum denique excussimus hanc fallaciam, cognovimusque hanc demonstrationem ludibrium esse ac larvam, nec magis pro *Mathematica* evidentiā habendum, quam in theatris pro vero Hercule habemus histrionem parvo et exili corpore, quamvis se in leoninā pelle et clava jactet. Postea factum est, ut in *Xenophōntem* ac *Platonem* incideremus, quorum scriptis egregia illa et divina prorsus *Socratica ratio* consignata est. Hanc deprehendimus pauca quidem affirmare; sed, quae semel affirmasset, eo certius tenere: omnino eam unā verissimamque disciplinam esse *Philosophiae*, maximeque accommodatum humano ingenio: quippe quae veri indagatōnem a simplicissimis minimeque dubiis naturae initiis duceret, et nos ipsos nobis cognoscendos daret, cuilibet sententiae suum pretium statueret, ac philosophantes erroribus et purgaret, et ab iis tutos praestaret. Itaque hujus rationis veritate subtilitateque capti, cum Cicerone in gratiam rediimus. At quam diversus, et longe alius atque antea, tum nobis

*videbatur. Omnia non tantum suaviter, sed caute, accurate, et utiliter eum scripsisse intelligebamus. Sed tamen illa praejudicata de Officiorum libris opinio, ut tenerrimâ aetate suscepta erat, ita difficillime deponebatur. Nam cum, post excussos alios adolescentiae errores, hos libros aliquoties legissemus, semper adhuc [87] aliquid ex veteri errore remanebat; ut non dubitaverimus altcubi concedere reprehensoribus istis, qui dicerent, doctrinam de Officiis non accurate et vere a Cicerone traditam esse. A quâ nunc sententiâ tantum absumus, ut nobis hi libri, cognito eorum consilio atque instituto, omnium maxime diligenter conscripti videantur.*

Perlectis mox praecipuis operibus Ciceronis, ad alios deinceps cum Poëtas, tum Historicos legendos animum appulit, et unus annus ipsi Latinas patefecit Literas, idque ita, ut, quocunque ingrederetur, *Graeca vestigia agnosceret, res, dictionem, sententias in alienum solum translatas.*

De ipsius progressibus in Literis Latinis locupletem habemus testem Ruhnkenium, qui ad ipsum circa hoc tempus haec scripsit: „*In Literis Latinis quantum proficias vel literae tuae ostendunt, quibus nego quidquam elegantius et magis Latinum scribi posse.*“

Interea enim temporis, suasore inprimis Claf. Heynio, epistolarum inierat commercium cum duumviris Batavis, quorum scripta diurnâ nocturnâque manu versabat. Praeterea sigillatim cum Ruhnkenio non tantum communicaverat, quis vitae et studiorum suorum cursus hucusque fuerit, verum etiam quam incredibili cupiditate flagraret veniendi Leidam, seque et

---

*Graeca vestigia*] Praefat. ad Sel. Princ. Hist. p. XXXVI

*In literis Latinis*] Philom. Lib. III. p. 171.

ipsi et Valckenaerio in disciplinam tradendi. Quae epistolae quam gratae et acceptae binis illis Academiae Lugduno-Batavae clarissimis doctoribus faerint, non aliunde [88] certius constare potest, quam ex utriusque datâ ad Wyttenbachium epistolâ, cujus exemplar subijciam:

PRAESTANTISSIMO VIRO JUVENI, D. WYTTENBACHIO,

S. P. D.

DAV. RUHNKENIUS.

*„Ex literis tuis vidi, idem tibi usu venisse, quod mihi adolescenti. Nam me quoque parentes Theologiae destinabant, et, quibus poterant modis, ab elegantiorum Literarum studio revocabant. Ego vero, naturam ducem secutus, iis invitis, in Belgium abii, ut me in Hemsterhusii disciplinam darem. Eventus postea docuit, me, quamvis adolescentem, plus vidisse parentibus meis, idque ipsi, cum me cathedrae Leidensi impositum viderent, magno cum gaudio fatebantur. Equidem cum non dubitem, quin pater tuus, vir doctissimus, et, quod te talem procreavit, felicissimus, aliquando simile gaudendi argumentum habiturus sit; maximo te opere moneo et hortor, ut praeclarum illud bonarum Literarum studium, posthabito Theologico, a quo te alienum esse scribis, persequaris. Praemia virtuti tuae ne desint, ego et Valckenaerius curabimus. Sed unum adhuc annum necesse est, paternâ liberalitate Leidae sustenteris, tum ut interea linguam et mores Belgarum cognoscas, tum ut aliquam ex lectionibus nostris utilitatem capias. D. V. Sept. M. DCC. LXIX.“*

[89] DOCTISSIMO ADOLESCENTI, D. WYTTENBACHIO,

S. D.

L. C. VALCKENAER.

„Valde mihi jucundae acciderunt literae, quas ad me mense Octobrī dedisti: et fortasse gratiores etiam fuissent, si titulis, in me supra modum orando, nimis ambitiosis abstinuisses. Non nescio, praestantissime juvenum, morem hac in parte te superioris Germaniae secutum: sed, qui in hac inferiore degimus, siquidem sapere didicimus, nostro nos modulo metimur. Meos etiam libellos legenti suspicor accidisse tibi, quod fieri solitum scribis in initio perdoctae tuae ad Clar. nostrum Ruhnkenium epistolae: atque adeo tuam sic, opinor, benevolentiam significatam voluisti, quam ego sane gratus agnosco talis juvenis, quem summe Reverendo Patri tuo gratulor ex animo [et Germaniae, in qua, olim Graece doctorum hominum feracissima, perpaucos hodie reperiri fateberis, qui, velut in Graecis scriptoribus legendis, certe intelligendis, exercitati nobis publice innotuerint; si claros quosdam Theologos exceperis, quos ego Nostratibus, quod ad eruditionem spectat, antepondere numquam dubito. Per Ruhnkenium arbitror intellexisse te, quum meo tibi nomine pro egregio munusculo, grates ageret, quanti epistolam tuam facerem Docti jam nunc Critici, ego, qui aliorum conamina his in literis te multo minorum prolixè collaudare soleo. — In Epistola vero tua [90] valde mihi placet docta comparatio verborum Juliani ad fontes, ex quibus hortulos Atticista suos irrigavit: eximiam hac in parte operam posuisti, et valde utilem. D. XXV. Nov. M. DCC. LXIX.“

Mox harum epistolarum apographa ad patrem mittens, ipsi desiderium suum jam inde ab aliquo tempore conceptum aperiebat, et debitâ simul verecundiâ ac pietate ab eodem petēbat, ut sibi facultatem concederet aſſeundi Leidam, ibique in scholis Valckenaeril et Ruhnkenii Literis Humanioribus ulterius operam dandi. Idem quoque filii nomine patrem rogabat Heynius, qui juvenem discendi adeo studiosum valde amabat, ipsiusque saluti nullâ ratione melius consuli posse affirmabat. Pater, qui ipse in juventute suâ novem menses in Batavorum terrâ commoratus erat, et grato semper pectore illius temporis recordabatur, haud ita multo post rescribebat, se propediem curaturum, ut honesto filii desiderio satisfaceret, siquidem non dubitaret, quin filius operam daturus esset, ut a principibus hujus aetatis literatoribus Batavis tantum disceret, quantum posset, nec commissurus, ut sibi defuisse in posterum unquam videretur. Quae sane spes et exspectatio ipsum non fefellit.

Proximo itaque anno (1770) indulgentiâ optimi parentis factum est, ut Leidam filius proficisceretur, et eo quidem consilio ac proposito, ut non antea ad patrios lares rediret, [91] quam in illorum scholâ ac disciplinâ duumvirorum diuturnam suam scientiae literarumque sitim explevisset. Quod nobis ipse his verbis significavit: *„Ab eo tempore, quo ad humaniores literas animum appuli, nulla mihi beatior regio videbatur Bataviâ, quod in eâ meae deliciae florent, colerentur, et tutâ tranquillâque pace fruerentur. In quam cum intuebar, maxime mihi occurrebat, et quasi lucebat Leida, in quâ Graecae Latinaeque Musae, post renatas Literas, sedes domi-*

---

*Ab eo tempore]* Praef. ad Plut. De S. N. V. p. XIV.

*ciliumque collocaverunt, et ex eo tempore numquam non summorum Doctorum scholis celebratae sunt, et nostrâ aetate principes ex Hemsterhusii disciplina viri antiquam gloriam tuentur, Valckenaerius et Ruhnkenius. Huc itaque mihi eundem putavi, ut et veterem sapientiam ab ipso fonte haurirem, et si quid meo studio criticae facultatis assecutus essem, id horum duumvirorum limâ acueretur atque expoliretur.*"

Jam autem, quantâ cum spe et expectatione adventum ipse suum praeceperit, ac veluti devoraverit, dictum est difficile. Goettingâ profectus, idem fecit, quod Ruhnkenium fecisse ipse testatus est: *recto ac brevissimo itinere in Bataviam tetendit, nulla diverticula captans*, et nusquam diutius commorans, quam necessarium esset. Portam vero Leidæ urbis ingrediens, ipsas Athenas et Palladis arcem sese ingressum arbitrabatur, et sacer quidam horror ipsum commovebat. Progrediens, obvium quemque, quamvis illiteratum, et forte [92] operarium, bajulum vel nautam, ut sanctum et propiore Musarum commercio dignatum suspiciebat. Quovis gradu pedem in vestigium magni viri et literarum herois ponere sese putabat. Nec domum ullam, aut officinam tabernamque fere praeteribat, quin sibi cum Musis conjuncta, aut nescio quid Attici spirare, Atticoque genio animata videretur. Memini adhuc, ipsum ad focum sedentem aliquando mihi de illo fanatico, ut ita loquar, somnio, praeter alia multa, etiam haec fere narrare: „Saepe postea, mi Mahni, cum risu istum mentis meae errorem recordatus sum, at ita tamen, ut eum semper in laetis et fortunatis vitae meae partibus numeraverim. Num-

quam enim in illâ adolescentiâ ac paene pueritiâ ullos magnopere progressus in literis nostris fecissem, si omnia in hoc studio meo sana et sedata fuissent, nec omnino quicquam ardoris, morbi, furoris adjunctum habuissent.“ —

Caeterum vero, quum hic Wyttenbachio fuerit error et affectus ad urbis, hominum aedificiorumque adspectum, quid ipsi animi fuisse putemus ad ipsorum, quos quaerebat, duumvirorum adspectum? Pulsabat fores, cogitans illud Homeri, ἢ μάλα τις θεὸς ἐνδὸν ὄψας μ' ἔχει εἰδορόωντα. Certe omnino aliquis Deorum intus: admiratio me tenet intuentem. Sed ecce ad primum obtutum, ad primam salutationem ex illâ doctrinae divinitate summa morum humanitas oboriebatur. Error igitur [93] evanuit ipsi: rediit sanitas, rediit iudicium. „Quis meus, inquit, sensus fuerit ad Ruhnkenii Valckenaerique adspectum, quos absens ut Deos colueram, dictu est difficile: difficilius etiam, quae mea fuerit admiratio, quum tantam divinitatem cum tantâ humanitate conjunctam viderem. Cognoveram antea aliis in populis Professores, qui apud discipulos et indoctiores, saepe etiam apud aequè doctos et doctiores gravitatis et reconditae cujusdam sapientiae speciem affectarent. Tales ego homines numquam ferre poteram. Sed tamen, mecum ipse cogitabam, si ferendi sunt isti mores, in solis eos feram Lugdunobatavis duumviris: his concedam; hi si faciant, sumant superbiam quaesitam meritis. At nil quidquam istiusmodi in eorum inerat moribus, nil supercilii, nil simulationis, nil nisi verum, simplex, modestum,

---

ἢ μάλα] Hom. Od. τ. 40. et Od. δ. 75.

Quis meus] Vita Ruhn. p. 152.

*nil non ad civilem et communem aequalitatem exactum, quam nemo ignorat, nemo non amplectitur, qui ex veterum scriptis verum sapientiae fructum quaerit.*"

Leidæ quamdiu esset, non modo quotidie in scholas Valekenaerii et Ruhnkenii venit, ut veram et criticam Literas antiquas docendi rationem penitus perciperet, verum insuper etiam domi occupatus fuit legendis libris nondum lectis, et conferendis Codicibus scriptis operum Plutarchi, e quibus γὰρ quarto χάρτην libram *De Serâ Numinis Vindictâ* reliquis praemittere sibi proposuerat.

Atque profecto, uti antea Hemsterhusius [94] illud imprimis egerat, ut Ruhnkenium in Bataviâ retineret, inque cathedrâ collocaret; ita nunc Valekenaerius et Ruhnkenius omni modo operam dabant, ut Wyttenbachium, cognitâ ipsius ingenii et doctrinae praestantiâ, patriae nostrae vindicarent, atque a consilio redeundi aliquando ad suos averterent. Quâ in parte fortuna ipsis omnino favit. Quum enim Societas Remonstrantium doctorem quaereret, qui in ipsorum scholâ Amstelodami Literas et Philosophiam doceret, evenit, ut non modo horum duumvirbrum commendatione illud munus Wyttenbachio offerretur, verum etiam ut hic ipsorum hortatu oblatum acciperet. Quodsi igitur Hemsterhusius suis in patriam meritis hunc adiecisse cumulum merito dicendus est, ut ei Ruhnkenium bonarum Literarum statorem formaverit ac vindicaverit, quid jam, quaeso, statuendum erit de Valckenaerio et Ruhnkenio, qui effecerunt, ut Wyttenbachius reliquis terris Bataviâ praeferret, quam eruditionis suae splendore illustraret? Equidem haud facile quernquam Literarum Humaniorum fautorem aut cultorem in patriâ nostrâ repertum iri arbitror, qui



hujus boni pretium non sentiat. Ipse Ruhakenius certe, cujus testimonium hac in re alicujus momenti esse opinor, perspicue et disertis verbis declaravit in epistolio quodam, cujus exemplar mox exhibebo, quanti illud esse statuerit, Wyttenbachium oblata ipsi honestissimâ docendi provinciâ jam arctius cum Batavia conjunxisse.

[95] Jam itaque Wyttenbachius sub finem anni 1771 Leidâ migravit Amstelodamum, ibique die 19 Novembriâ in Remonstrantium scholâ suam manus professorium solenni Oratione auspicatus est, quâ, quantum interioris Latinitatis sensu et dicendo valeret, luculentissime ostendit. Nimirum et experientiâ, et summorum dicendi magistrorum sententiâ constat, ei, qui ad dicendum se parat, difficile esse invenire cum in omni Oratione exordium, tum in multis ipsam argumentum. Hanc itaque difficultatem, in quam homines ingeniosi potius et disertis, quam rudes et indiserti, incidere solent, Wyttenbachius solerter superavit. Primum enim, quamvis brevi, tamen admodum eleganti exordia usus est. Deinde vero, ejusmodi argumentum orationis elegit, quod futuræ professioni suæ plane conveniret, atque in communi ac populari omnium intellectu positum esset. Dixit enim *De Conjunctione Philosophiæ cum Elegantioribus Literis*, et in dicendo ita versatus est, ut, quod ad ipsam materiæ tractationem spectat, illis tribus artibus oratoriarum primariis virtutibus, hoc est perspicuitati, suavitati et gravitati omnino satisfecerit, et tam docendo, quam delectando atque movendo ad persuadendum accommodata dixerit.

Hanc vero Philosophiæ et Literarum cathedram per octo deinceps annos magnâ cum laude et intelligentiam suffragatione tenuit. Vix vero annum do-

cuerat, quàm prudentiores, [96] perspectâ Wyttenbachii eruditione et docendî solertiâ, jam metuere inciperent, ne quando, famâ de ejus multiplici scientiâ latius vagante, ei majus quoddam theatrum aperiretur, et sic Remonstrantium schola tam egregio doctore privaretur. Intellexi illud ex epistolio illo, Ruhnkenii, cujus modo memini. Haec enim die 4. Febr. 1772 ad Wyttenbachium scripsit Ruhnkenius: „*Ita mihi, quae opto, contingere velim, ut, cum in mentem venit consilii, quo te primo Remonstrantibus commendari, ipse mihi met placeo, et fructum hujus rei uberrimum capio. Tu enim in honestissimi otii portum delatus, nihil eorum, quibus literati hominis felicitas censetur, requiris, et qui te juventuti erudiendae praefecerunt, non solum tanto doctore gloriantur, sed sibi jam sollicitudinem, quamquam vanam et inanem, ut spero, sed sollicitudinem struunt, ne quando, famâ latius vagante, desinas esse suus.*“

Quamprimum vero Amstelodamum venerat, Valkenaerium pariter atque Ruhnkenium non nisi vera de hujus stationis opportunitatibus sibi praedicasse continuo animadvertibat. Petrum Fonteinium, cui commendatus erat, primum adibat. Humanissime ab illo venerabili senè exceptus, audiebat adventum suum optima viro gratum esse, et consuetudinem gratam item fore. Quae prima congressio quamnam vim ad animum Wyttenbachii habuerit, ex ipsius Epistolâ ad Hieronymum Boschium satis superque intelligi potest. Ac [97] quâ pietate, et quo paterno honore idem hunc optimum senem postea semper coluerit, non aliunde melius percipi potest, quam ex ipsius verbis, quibus causas explicuit, ob quas illi Primam Bibliothecae Criticae Partem dedicandam censuerit. „*Quod vero,*

inquit, *Te, Praestantissime Fonteini, libello patronum assumsi, rationes mihi fuerunt, quarum vel numerum vel momentum nemo quisquam reprehendat. Primum, pietas erga Te mea, tuaque erga me benevolentia: quae a communi Literarum studio profectae, consuetudinem inter nos conciliarunt eam, quae multos de his Literis privatim tulit sermones mihi et jucundissimos et fructuosissimos, ut eorum publicum prodere documentum ipsa me pietas jubeat. Accedit singularis quaedam tua erga hunc libellum voluntas, cujus ut antea instituendi, ita nunc instaurandi, suasor et hortator mihi fuisti praecipuus. Jam si nullae essent inter nos tantae necessitudines, satis tamen apud me valere debebat summa illa doctrinae tuae copia: quam quidem Tu, quo minus ad scribendum, eo magis ad judicandum convertis. Quamquam sunt tuae, ut in longo usu accuratissimaeque Veterum lectione, et Animadversiones plurimae plane egregiae, et est Theophrasteus Characterum libellus auctus a Te ac mirifice expolitus: qui studii Tui fructus ne intercidant Tu providebis, si quid apud Te vel Literarum commodum vel nostrae preces valent. Sed prouti ille philosophiae parens Socrates ingenio [98] quamvis acerrimo nihil ipse pariebat, sed aliorum parturientibus ingeniis obstetricis officium adhibens eorum foetus dijudicabat, jucundaque illa ironiae festivitate reprehensionem temperans plurimos errore et opinionis vanitate liberabat, et in rectam veri bonique viam revocabat: ita Tu, Praestantissime Fonteini, et studium tenacissimum et ingenium cultissimum in legendo et judicando, non in scribendo, collocas, et illam judicii severitatem humanitate temperans plurimis nostrorum hominum et profuisti et prodes:*

quorum nemo est, paulo quidem prudentior ac modestior, quin scriptum editurus, sive illud ad Antiquas sive ad Patrias Literas, sive ad solutam sive ad ligatam referatur orationem: nemo igitur est, quin tuum expetat iudicium, et cum accedat ad Te ut ad iudicem, a quo tam sit probari honorificum, quam reprehendi salutare, cum discedat a Te, ut se tua admonitione doctiorem melioremque discedere sentiat. Quare tua, Praestantissime Fonteinii, jam octogenarii senectus est illa quidem omnibus admirationi, et jure beata iudicatur, ut corpore animoque vicens, morum facilitate constans, doctrinarum studiis exhilarata, summorum hominum familiaritate florens: quae quamquam magna sunt et mirabilia, haud scio an majus etiam sit, illud tuum bonum, cujus fructus in publicum effluit. Mihi certe in Te intuenti, nescio quomodo semper occurrit illud L. Crassi dictum, qui senis beatitatem in dando consilio posuit, ut suo jure dicere senex idem [99] possit, quod apud Ennium dicat Pyeetus Apollo: ac esse eum, unde sibi, si non populi et reges, at omnes sui cives consilium expetant,

Suarum rerum incerti: quos ego mea ope ex

Incertis certos compotesque consili

Dimitto, ut ne res temere tractent turbidas.

Plura hanc in rem dicere, quamquam et multa et verissima dicere possim, cum tua gravitas, cum meus me prohibet pudor. Illud unum intelligi volui, me non sine ratione facere, ut libellum criticum et viro inscribam, cujus et summa doctrina et diuturna vita in iudicio de his Literis, id est in Critico studio, consumpta est.

Praeter Fonteinium vero alios etiã bonos viros et Literarum cultores, maximam partem sui aequales, quorumque ipse saepius in scriptis suis honorificam mentionem fecit, continuo sub adventum suum nactus est amicos: imprimis *Hieronymum Boschium*, antiquae notae virum. Videns hunc esse optimi animi virum juvenem, studii literarum acerrimi, doctum, ingeniosum, iisdem, quibus ipse, studiis deditum, suiue amantissimum, ipsum redamare coepit, et tanto quidem ardore, quanto neminem alium hominem unquam amaverit. Atque hinc non modo primus Amstelodamensis dies quoque primus ipsorum amicitiae fuit, sed ab eo etiam inde tempore semper una fuerunt, seque invicem mutuis beneficiis coluerunt. Quinetiam, biennio [100] post, Wyttenbachium amor erga familiam Boschianam eo induxit, ut in Hieronymi contubernium concederet, atque ambo undecim propemodum annos in iisdem aedibus unã habitarent. Quanti vero alter alterum aestimaverit, uterque, diversa tempore, egregio Literarum monumento prodidit. Boschius hoc fecit in Dedicatione Carminis sui *De Aequalitate Hominum*, Wyttenbachius duodecim annis post, scriptã ad Boschium Epistolã. Et quamquam postea nescio qui exorti sunt, qui variis artibus Boschium adversus Wyttenbachium incitarent, tamen isti male seduli numquam voti sui penitus compotes fieri potuerunt. Illorum amicitia, utpote a communi Literarum amore profecta, virtute ac doctrinã tamquam vinculo continebatur. Atque habent hoc praeterea literae, ut amicis semper novae voluptatis quid pariant, nec satietati locum relinquunt. Caeterum habemus de horum duumvirorum amicitia locupletissimum testem, communem utriusque viri discipulum et amicum, Clar. Virum *Davidem Jacobum Len-*

*nepium*, cujus verba quin apponam, a me impetrare non possum, siquidem ad illa, quae modo dixi, imprimis valent. Hic igitur, *Venit Wytttenbachius*, inquit, *Amstelodamum*, anno superioris saeculi septuagesimo primo, cathedram ibi in Collegio Remonstrantium Philosophiae et Literarum ut capesseret. Eum in consuetudine versatum Valckenarii et Ruhnkenii, commendatione horum adeptum cathedram, [101] scriptorem eruditissimae ad Ruhnkenium Epistolae Criticae, quomodo BOSCHIVS non amice statim advenientem exciperet? Wytttenbachius vero in hanc urbem veniens quomodo non vicissim BOSCHII familiaritatem expeteret, hominis amplissimorum civium gratia, nobilissimorum juvenum amicitia florentis, ea vero bona consecuti bonis artibus, literarum maxime et humanitatis studiis, quorum ipse amore flagrans etiam alios incendere studeret; denique quod paucissimi tum Amstelodami facerent, Graeca pariter amplexantis ac Latina, seque ita applicantis ad poëticen, ut nec prosam orationem negligeret. Sane prima statim congressione sibi invicem conciliati sunt hi viri. Quae congressio qualis fuerit, quos habuerit de literis sermones, quam utrimque significationem animorum, quae indicia nascentis mutui amoris; ut tum orta familiaritas cito in arctam creverit necessitudinem, mox et occasionem dederit contubernio, quo per undecim annos Boschianae et domus et mensae consors fuit Wytttenbachius, atque semper et durante illo contubernio, et soluto illo incorrupta steterit gratia, dissidentium aliquando, ut fit, opinione inter se nunquam animo; haec igitur, et quae cum his con-

*muneta sunt plura; venustissime ipse Wytttenbachius exposuit in celebratissimâ illâ ad BOSCHIUM Epistolâ, jam ab seniore ad senem editâ, quae, dum Litteris Latinis suus honor erit, immortale feretur et ingenii amborum monumentum et amicitiae."*

[102] Quum autem, ipso Wytttenbachio iudice, publici doctoris officia imprimis duo sint, alterum necessarium, institutio studiosae juventutis, alterum honorarium, scriptio librorum, in quibus doctrinam ipse suam ad communem omnium usum prodat, et provectiores adeo ac seniores doceat; haud a re alienum, immo utile et necessarium mihi videtur, animum ad ea advertere, quae Wytttenbachius in utrâque hac parte per octo illos annos praestiterit, quibus in schola Remonstrantium doctor fuit.

Ipsi igitur professio Philosophiae et Literarum mandata erat. Illa scholis de Logicâ et Metaphysicâ habendis constabat. Haec in explicandis scriptoribus Graecis potissimum versabatur. Utramque hanc provinciam Wytttenbachius summâ cum fide administrabat, et ad discentium profectus unice accommodabat, miscens utile dulci. Atque ut eo plures discipuli scholis Graecis interesse, et ea majores inde fructus in rempublicam redundare possent, illas scholas non modo in usum Remonstrantium, verum etiam in gratiam alumnorum Athenaei Amstelodamensis, in quo Athenaeo tunc hae scholae prorsus vacabant, publice habuit, nec a quoquam honorarium accipere voluit. Praeterea summâ curâ ac diligentia Praecepta Artis Logicae et scholas Metaphysicas conscripsit, quas discipulis dictaret, ut haberent, quod domi relegere possent. Haec autem dictata in ipsis scholis [103] fusius explicabat, et exemplis illustrabat. Sed quoniam de his mox pluribus agam, nunc satis ait animadvertisse,

Wyttenbachium magno cum fructu discentium scholas illas habuisse philosophas, et Literarum Graecarum studium, quod tunc Amstelodami refrigerat, per ipsum rursus reviviscere coepisse.

Et quamvis hae laboris plenae occupationes quotidianae ipsum, praesertim primo anno, valde exercerent, tamen non impediabant eum, quominus cum *Hieronymo Boschio* et *Matthia Temminckio* sodalitium jungeret, Sophoclemque, Euripidem et Aristophanem legeret, aliorum amicorum coetibus subinde interesset, diurnâ nocturnâque manu solus alios scriptores antiquos utriusque sermonis cognosceret legendo et meditando, in Latine scribendo quotidianis exercitationibus proficeret, atque Plutarchi imprimis assiduâ lectione apparatus emendationis et interpretationis ad novam editionem, quam moliebatur, amplum et necessarium sibi colligeret.

Quo in studio quum quadriennium sine intermissione fere contrivisset, atque Codicum tractandorum et excerptorum gratiâ praecipuas Europae Bibliothecas deinceps adire sibi proposuisset; primum anno 1775, suadente imprimis Ruhnkenio; Parisios abiit, ibique dimidium annum moratus est. Et quum ex multis audivisset, Capperonnerium, codicum scriptorum in Bibliothecâ Regiâ custodem, erga Ruhnkenium et alios peregrinos [104] facilem ac liberalem fuisse; illius recens successorem quoque erga se talem et aeque indulgentem fore arbitrabatur, praesertim quod literas commendatitias Lestephanoni Berkenrodi, Viri Ampl., Reipublicae Batavae legati, ad Bignonum, Vir. Exc., eundemque Bibliothecae Praefectum, et aliorum ad alios, datas haberet. At mox, quum sibi codices



inspiciendi ac tractandi facultas non concederetur, scriniaque clausa manerent, illas literas suas apud Franciscum Bejotium, Capperonnerii successorem, hominem religiosum, et in concedenda librorum scriptorum usu admodum difficilem, non tantum valuisse intelligebat, quantum quidem putaverat. Tristis igitur amicorum fidem et auxilium implorabat, seque spe et expectatione suâ frustratum querebatur. Atque hinc Alëmbertus, Foncemagnus, Sanctocrucius et Villoisonus, quâ erant eximiâ singuli humanitate et erga Wytttenbachium benevolentia, id conjunctim agebant, ut Wytttenbachio aditum ad Bibliothecae thesauros aperirent. Quod quum ipsis ex voto successisset, expugnatus amicorum iteratis petitionibus Bejotius, cognita semel Wytttenbachii humanitate et doctrinâ, sese postea affabilem et ad omne officium literarium omnino promptum ac paratum praebebat. Quomodo autem Wytttenbachius hoc beneficio usus sit, non est ut copiose enarrem, siquidem vel ex eo apparet, quod intra sex mensium spatium *duodecim* Plutarchi codices contulerit.

[105] Interim tamen, etsi ista peregrinatio Parisina ad emendandum Plutarchum Wytttenbachio valde fructuosa fuit, sanitati ipsius nocuit. Parisiis enim in febrim incidit, et arte ac dexteritate peritissimi medici *Lorryi*, vix ab ea liberari potuit. Quem tristem nuntium quum Santenius, in patriam Parisiis reversus, cum Ruhnkenio communicasset, hic amici sorte dolens, has ad eum literas mense Septembri mittebat: „*Ex Santenio, feliciter reduce, Te duplici tertiana tentari cognovi. Quae res, tam adversa rationibus tuis, mihi non mediocrem molestiam afferebat. Sed tamen sollicitudinem minuebat, quod ex eodem intellexi, Te sive casu, sive aliorum consiliis medicum*

*adhibuisse Lorryum, quo, ut nostri Aesculapii judicant, Parisini non habent medicum peritiorem. Ejus igitur arte Te febre jam liberatum, aut certe levatum esse spero.*"

Quantum vero voluptatis atque utilitatis ex hoc itinere Wytttenbachius perceperit, quantâ humanitate ipsum Parisienses viri docti exceperint, quâ curâ et benevolentia Lorryus aegrotantem Wytttenbachium tractaverit, et quam religiose hic amicitiam cum Parisiensibus initam sibi servaverit, ipsorumque memoriam usurpaverit, haec omnia ex optimi viri scriptis cognosci possunt, et mihi magis etiam ex eorum mutuo literarum commercio innotuerunt. At vel sic tamen duo loca, ad hoc argumentum cum maxime spectantia, hic apponam. Alter desumptus est ex Lorryi epistola [106] quadam humanitatis plenâ, et amoris erga Wytttenbachium sui certissimâ teste. „*Quod mihi, scribit, ea contigerit felicitas, ut afflicto potuerim aliquod afferre solatium, erit semper unde mihi ipse gratuler, et certe contra edictum Hippocraticum ex tuis aerumnis immensum mihi lucrum contigit. Convaluisse vidi virum omnibus bonis charum, omni literaturae pretiosum, eumque et inter amicos numerare, et de ipso gloriari datur.*" Alter verò ab ipso Wytttenbachio in Bibliothecâ Criticâ his verbis expositus est: „*Trigesimus hic est annus, quod me in Parisiorum urbe studiorum communio compluribus doctis hominibus, inprimis Villoisono, Sancto-crucio, Larchero, ad mutuam benevolentiam conciliavit, quâe postea ad amicitiae constantiam evolvit: cum duobus illis, propter aequalitatem aetatis, quotidianâ tunc familiaritate floruit. Brant enim*

*non solum eruditissimi homines, ut sermoni materia nunquam deesset: sed et modesti et iucundi, et, quod præcipuum est, viri boni ac probi: et me amabant, et amorem multis officiis comprobabant, nec ea commemorando aut exprobrando, quæ est multorum stultitia, confutabant. Unum tamen fuit in quo gloriaretur Villoisonus, et vere gloriari posset, se mihi periculose uegrotanti vitam servasse, quod medico me commendasset, eidem et suæ artis et nostrarum literarum peritissimo, A. G. Lorryo, qui et per artem me dextere, et propter Literas amanter curaret. Ad Lorryi quidem in me [107] beneficium, ut vivente ipso testificatus sum in Bibliotheca vol. II. p. III. p. 106, ita nunc, utroque mortuo, utriusque beneficium gratus celebro. Horum igitur virorum erga me humanitatem gratiorem reddebat nativa et popularis illa urbanitas; ut et tunc, et postea, de eruditis Gallis usurparem illud, quod apud Platonem Leg. I. p. 572. C. Laedaemonius Megillus de Atheniensibus celebrari dixit, οἱ δὲ οἱ τῶν Ἀθηναίων εἰσὶν ἀγαθοί, διαπεπόρτωσ εἰσὶν τοιοῦτοι qui ex Atheniensibus sint boni, eos excellenter esse bonos. Tales erant illi viri, et in his Villoisonus, cujus tota vita constabat bene faciundo. — Omnino, qui magis officiosus, magis ad promittendum benignus, in promissis faciendis diligens et industrius fuerit, fateor me cognovisse neminem.“*

Sanus et salvus Amstelodamum reversus, amici et discipuli, qui propter istam malignam et recidivam febrem, quâ Parisiis eum laborasse andiverant, vitæ ejus timere quodammodo coeperant, ipsi de adventu ac restitutâ sanitate ex animo gratulabantur. Hac humanitate et benevolentiae significatione adeo delectabatur, ut postea saepius testaretur, sibi tunc nihil

magis gratum ac jucundum fuisse, quam quod se et ab amicis re verâ amari, et a discipulis aliquo in pretio haberi viderit.

Et quum post longam absentiam numerus tractandorum negotiorum vulgo major videri solet, quam ut singula et universa ad probabilem [108] exitum a nobis perducere posse putemus; mirum quoque nobis videri non debet, cur Wytttenbachius tunc ad Villosionem scripserit: „*Nunc obrutus negotiis, cum iis quae me exspectabant, tum novis undique ingruentibus, vix quo me vertam reperio. Et unice me sustentat ea spes, ut, expeditis illis negotiis, me ad Musas nostras tamquam in portum conferam, si modo me recipere velint.*“ Immo potius videamus, quo studio et amore Musae id fecerint; et quâ ratione Wytteubachius blandissimis ipsarum invitationibus obtemperaverit.

Primo igitur in scholis denno aperiundis praecipuam curam posuit. Nam non multo post reditum in urbem rursus pristino more suo, h. e. accurate et diligenter, docere coepit, doctrinarumque studiosae juventuti iterum prodesse studuit. Deinde ad Platarchum rediit, ut apparatus indefesso labore Parisiis collectum in ordinem redigeret. Et denique in eo quoque magnam studii sui partem collocavit, ut antea lecta et annotata diligenter retractaret, atque omnino ad criticam rationem exigeret. Nam eo non contentus, ut necessaria tantum ageret, sed de universâ civitate eruditâ bene mereri cupiens, id aptissimum e re suâ esse intelligebat, ut lectu digna et industriâ elaborata aliquando proferret, quaeque tam materiae praestantiâ, quam formae elegantia sese lectoribus commendarent.

[109] In his igitur exornandis et ad editionem instruendis quum aliquamdiu occupatus fuisset, animum

ad *Bibliothecam Criticam* conscribendam applicuit, huiusque consilii sui rationes Ruhnkenio explicuit, quem in rebus literariis, ut ita dicam, veluti terrestrem Apollinem nunquam non consulere solebat. Et hic primum quidem ei huius operis susceptionem dissuasit, verum mox, re accuratius, ut videtur, perpensa, similiter atque Fonteinus eum valde adhortatus est, ut propositum suum sine ulla intermissione persequeretur. Atque hinc prodierunt anno 1777 *duae* priores Partes illius Bibliothecae, quae propter eruditionis exquisitae copiam et varietatem, iudicii severitatem, in laudandis virtutibus veritatem, reprehendendis vitiis humanitatem, et denique ob orationis elegantiam eximiasque alias dotes tot amatores et admiratores cum in patria nostra, tum extra illam in Italia, Angliâ, Galliâ Germaniâque habuerunt, quot illis prudentes et eruditi lectores obtigerint.

Verum eodem illo anno 1777 aliud quid evenit, cuius ipse Wytttenbachius his verbis meminit: „*Tum Burmannus Secundus, abdicatâ Amstelodamensi cathedra, reliquum vitae otiaurus in Santhorstanum suum concessit. Cathedram ejus tres inprimis petebant candidati. Ipse Curatoribus commendabat Santenium: me Valckenarius, et grata quaedam civium opinio, quod per sex annos juventuti Literarum et Philosophiae institutione profuissem. Tulit* [110] *Tollius. Ruhnkenius nemini trium operam suam praestare voluit; quod peraeque ejus fuissimus discipuli.*“ Hanc repulsam amici Wytttenbachii admodum aegre ferebant, nec se ullo modo assequi posse aiebant, qui factum sit, ut Curatores tam docto et eradito, nec non de juventute tamdiu jam bene

merito viro alium praeferrent. Horum in numero inprimis etiam fuit illud Germaniae insigne decus et ornamentum, *Heynius*, qui in epistolâ ad Wyttenbachium hoc anno datâ sic de hac re scripsit: *Petrum Burmannum audio profitendarum Literarum munera se abdicasse. Estne is, qui ei successit, Tollius ullâ Literarum laude praeter alios clarus?* Ipse Wyttenbachius vero, cujus animus ab omni invidiâ alienus erat, et qui Tollio hujus contumeliæ culpam minime imputabat, id modo dolebat, quod studium suum in erudiendâ juventute Amstelodamensi tam liberaliter et ultro collocatum ab Athenaei Curatoribus nullius fere momenti habitum esse videret. Quo quum mox aliae causae ingratae accederent, et in Germaniâ ipsi honorificae stationes offerrentur, parum omnino aberat, quin subsequente anno patriam nostram relinqueret: „*Valuit tum*, sunt verba ipsius, *Ruhnkenii amor et auctoritas, ad me in Batavâ terrâ retinendum: absque eo factum esset, ut eam relinquerem. Vitae commode agenda illo, quo eram, loco difficultas: superioris anni offensio subinde animo subjiciens illud, Nil profuit pietas: oblatae [111] apud externos stationes per opportunitatem itineris ad patrem senem suscepti: haec omnia vehementer me movebant. Vellementius tamen movit Ruhnkenii et libertatis Batavae cogitatio.*“

Haec simulatque ad Boschii, Temminckii, Crassi et aliorum ejus amicorum voluntatem pervenissent, hâc istam offensionem omnino leniendam esse arbitrabantur, antequam aut Helvetii popularem suum, offerendo ei cathedram in patriâ sua, sibi vindicarent, aut Germani, quibus adeo carus esset, eum ad se allicerent,

atque sic illius abitu res Batavorum litteraria maximum nec resarciendum detrimentum caperet. Coniunctis itaque viribus id inprimis agebant, ut urbis Consulibus\* Athenæique Curatoribus persuaderent de magnâ illâ utilitate, quæ in Athenæum Amstelodamense redundatura esset, si Wyttenbachium Philosophiæ Professore crearent, atque eâ ratione in patriâ retinerent. Quo facto, Wyttenbachius hanc professionem in Illustri Athenæo Amstelodamensi die 25 Octob. 1779 auspicatus est solemnî Oratione habita *De Philosophiâ, auctore Cicerone, laudatarum artium omnium procreatrice et quasi parente*. Atque verissime videor affirmare posse, hanc quoque Orationem non modo similiter atque superiorem Philosophiæ professioni ratione argumenti congruisse, verum etiam tam apte et ingeniose elaboratam esse, ut Eloquentiæ officiis satisfecerit. Tenendum enim est, Orationum Academicarum materiam [112] hodieque angustis finibus circumscriptam esse. Potissimum enim vel in laudando clero viro, vel in commendandâ quâdam doctrinâ posita est. Horum argumentorum illud genus satis aptum est et conveniens eloquentiæ, hoc vèro non item. Atque hoc ipsum genus Veteres etiam Philosophi saepe usurparunt, qui institutionum suarum initium ducere solebant ab Adhortatione ad studium Philosophiæ. Quo in genere fuit Ciceronis liber Hortensius, et nunc etiam exstant Protrepticae Orationes Galeni, Jamblichi, et ejus, qui hunc morem ad Christianam doctrinam aecommodavit, Clementis Alexandrini. Caeterum, quum hoc inprimis sit Eloquentiæ, ut res auditoribus non solum ad intelligentiam subtiliter explicetur, sed ad animi sensum motumque etiam ornatur; anceps plerumque est periculum, ne vel subtilitati obsit ornatus, vel ornatui

subtilitas. Aliud est disserere, aliqd dicere. Qui so-  
lam sequuntur subtilitatem, hi jejunum quid ac sic-  
cum, disputationi quam orationi similis, afferre so-  
lent. Contra qui ornatui unice student, ejusmodi opus  
efficiunt, in quo non tam eloquentia quam loquacitas,  
jucunda illa forte, sed loquacitas tamen, appareat.  
Ergo prouti Pericles causas forensas eloquenter tracta-  
bat, quod iis lumen quoddam ingenii in rerum ab-  
strusarum et intelligibilium cogitatione exercitati ad-  
hiberet: ita viciissim argumentum intelligibile et ab-  
stractum, ut vulgo vocant, eloquenter tractabitur, si  
ejus partes [113] corporeis quasi imaginibus compre-  
hendantur, comparisonibus et exemplis, cum effica-  
cibus tum splendidis, e communi vitâ et naturae  
observatione ductis, illustrentur, et tamquam prae-  
sentes manifestaeque oculorum sensui subjiciantur.  
Jam autem utrique legi cum subtilitatis tum ornatûs  
omni ex parte nemo satisfacere facile possit in Ora-  
tione Academicâ, quae vulgo unius horae spatio in-  
clusa sit. Etenim quamvis ornatui satisfactum sit,  
materia quidem explicari omnis non poterit. Neque  
etiam illa confertim et pleno, ut ajunt, sacco effun-  
denda, sed modo et ratione expromenda. Neque porro  
plus ex materiae copiâ et ornatûs apparatu assumen-  
dum, quam quantum, acerbo delectu habito, ad per-  
suadendum ac commovendum cum perspicuitate expli-  
cari queat. Hac enim in re etiam valet illud Horatii,

*Ut jam nunc dicat jam nunc debentia dici:*

*Pleraque differat, et praesens in tempus omittat.*

Sed hoc illud ipsum est, quod magnâ cum judicii  
subtilitate et dictionis admirabili elegantiâ fecit Wyt-

---

*Ut jam nunc dicat] Hor. A. P. 43, 44.*



tenbachius, quem post renatas Literas unum ex paucis illis principibus viris cum maxime fuisse prae me ferre audeo, qui artis oratoriae laudem quotidianâ exercitatione cum in scholis, tum in scriptis suis et secuti et assecuti sint.

Hanc vero Philosophiae professionem usque ad annum 1785 obtinuit. Scholae ipsi eadem, [114] quae antea, habendae erant, de Logicâ et Metaphysicâ. Harum disciplinarum libros jam confecerat, nec quidquam magnopere aliud hac in parte ipsi agendum amplius supererat, nisi ut illos quotannis vel corrigendo vel supplendo meliores et auditorum captui magis etiam accommodatos redderet, atque deinde praecipua quaeque loca in scholis fusius explicaret, atque adhibitâ definiendi, argumentandi et interpretandi diligentia Logices officio satisfaceret. Quicumque his ejus lectionibus interfuerunt, ipsum tantâ curâ et religione, quantâ potuerit maximâ, in illis habendis habitisque versatum esse uno ore testantur. Sed hoc ei nondum satis esse videbatur. Alumnos suos ad interiora Musarum et Philosophiae sacra ducere, et, quid Veteres, imprimis Graeci, in Philosophiâ praestiterint, ipsis veluti digito monstrare volens, nihil utilius fore credebatur, quam scholas singulares de *Historiâ Philosophiae* habere, quippe quae non modo ad ipsam philosophiae intelligentiam plurimum conferret, verum etiam ad omnium fere reliquarum artium et doctrinarum historiam veluti januam aperiret. Omnis autem hujus materiae copia in sex partes, sive aetates, divisa erat. I. Ab initio ad Thaletem et Pythagoram; sub quibus hoc studium magis auctum est, ac Philosophiae nomine celebrari coepit. II. De duabus praecipuis Graecae Philosophiae familiis: alterâ Ionicâ, quae a Thalete fluxit usque ad Socratem: [115] altera

Italicâ, quae Pythagoram habuit auctorem. III. A Socrate, a quo variae proseminatae sunt philosophorum sectae, usque ad illud tempus, quo Graecia sub Romanorum potestatem redacta est: unde factum, ut Philosophiae studium apud Romanos et alios populos sub occidente sole jacentes effloresceret. IV. Ab initio studii philosophici apud Romanos usque ad captam a Gothis Romam, et finem Imperii Occidentalis, Anno Chr. 476, vel usque ad Justiniani imperium, A. 526. V. Ab eo inde tempore usque ad renata bonarum literarum studia Sec. XV. et expugnatam a Turcis Constantinopolim. VI. Ab eâ aetate usque ad mortem Christiani Wolffii, medio saeculo decimo octavo. — Sed quum omnino necesse sit, multas res alto silentio praeteriri, neque artium et disciplinarum incrementa, neque ingeniorum variorum, quae in quoque genere elaborarunt, vires laudesque intelligi, neque decrementorum postea exortorum causas recte percipi, quum Philosophiae historia a reliquarum rerum historia, tamquam a corpore membrum, divellatur; in qualibet aetate primum res externas et civiles attingebat, populorumque, apud quos Philosophia floruerat, statum conditionemque breviter designabat, et deinde, his expositis, ipsius Philosophiae studia et incrementa Philosophorumque vitas explicabat. Continent profecto hae scholae Wyttenbachianae, quibus auditorum animi mirum in modum [16] ad Philosophiae studium excitabantur, insignem eruditionis thesaurum, neque illas, consentiente eruditissimâ et honestissimâ magistri mei viduâ, aliquando editurum esse, admodum verisimile est.

Neque tamen intra hos solos docendi fines ejus studium et flagrans de Literis bene merendi cupiditas ipsum subsistere siverunt. Horas subsecivas et vacuas

ab officiis professorii muneris causâ agendis partim Plutarcho tribuit, qui ei quod scimus, *unum et perpetuum* opus erat, partim Bibliothecae Criticae imperavit. Hujus *tertia* pars superiori anno prodierat, quam nunc *quarta* subsequebatur. Porro quum Censitores Legati Stolpiani hanc Quaestionem publice proposuissent: „*Num solâ rationis vi, et quibus argumentis, demonstrari potest, non esse plures uno Deos? Et fueruntne unquam populi aut philosophi, qui hujus veritatis cognitionem sine revelationis divinae, ad ipsos propagatae, auxilio habuerunt?*“ Quum haec, inquam, Quaestio eruditis proposita esset, Wyttenbachius argumenti gravitate eo momento ad respondendum excitatus, illam difficilem materiam pro ipsius magnitudine et pondere tantâ cum doctrinae copiâ, judicii severitate, argumentorum gravitate, orationis perspicuitate exposuit, ut ipsius Disputatio die XIII Oct. præmiûm reportaverit.

Caeterum vero idem hic annus morte optimi parentis ei acerbum quidem, nec tamen [117] improvissum luctum attulit. Superiori enim anno quum Marburgum profectus esset, ut per opportunitatem feriarum aestivarum patrem senem viseret, statim jam sub adventum suum animadvertibat, ipsum minus bene valere, et virium vitalium lentâ diminutione laborare. Abiens igitur sic ab eo discédebat, ut ipsius vitae finem mox adfuturum non sine ratione crederet. Nunc autem, accepto mortis paternae nuntio, inprimis dolebat, sibi omnino occasionem ademtam esse, quâ patri, cui non modo τὸ εἶναι, verum etiam τὸ εὖ εἶναι deberet, publico literarum monumento ostenderet, quam grato

---

*unum et perpetuum*] Bibl. Crit. P. XI. p. II.

τὸ εἶναι] Bibl. Crit. P. XII. p. V.

pectore ipsius in se collata beneficia agnosceret, ac quantâ pietate ipsum coleret ac veneraretur. Scripsit nimirum anno 1777 Praefationem ad patrem suum, quam edendis suis *De Arte Logica Praeceptis* praemittere destinaverat. Sed quum illud opus Amstelodami non ante annum 1781 edi potuerit, et ipse interea conscribendâ Bibliothecae Criticae parte *quintâ* et *sextâ* occuparetur; illa Praefatio postea, patre mortuo, typis non excusa, et liber ipse, quo illa Logices Praecepta continebantur, Civitatis Amstelodamensis Consulibus et Illustris Athenaei Curatoribus dedicatus est. Ipsa autem illa scriptio, quum in scriniis Wyttenbachii alia quaererem, forte in manus meas incidit, et a me diligenter ab interitu servata est. Elucent autem optimi viri sinceritas animi atque pietas ex eâ tam manifeste, [118] ut illâ edendâ me de lectoribus meis optime meriturum existimem. En igitur illud probitatis et amoris erga patrem certissimum testimonium!

„Quamquam de meâ erga Te observantiâ et pietate unus omnium Tu soleas minime dubitare, eamque ego ita prae me feram, ut nec aliis possit esse obscura; tamen illud tempus venisse, quo hunc animi mei sensum publice testari, et ex paucorum conscientiâ in lucem educere possim, gaudeo, mi Pater, vehementerque laetor. Nam si lubenter amorem nostrum iis significamus, quos amamus, quosque admiramur, eorum virtutes laudare cupimus, et in magnâ felicitatis parte ponimus, iis, qui immortaliz in nos beneficia contulerunt, aliquod, quamvis leve, tamen specimen grati animi exhibere; haec igitur singula si privatim jucunda sunt, quomodo non universa, cum publice fiunt, jucundissima esse debent? Atqui si nihil a Te praeter vitam

*hano lucemque acceperissem, et haec una tantum mihi  
 Tecum intercederet necessitudo, haberet jam istam  
 vim hoc beneficium, ut proximo Te post Deum im-  
 mortalem loco amarem, colerem, venerarer. Nunc  
 quum ingenium quoque meum literis, sine quibus  
 ipsa haec vita mors est, excolueris, et ad huma-  
 nitatem conformaveris, quae tandem a me Tibi  
 satis magna significatio grati animi poterit dari?  
 Et Alexander quidem saepius dixisse fertur, pluris  
 se facere magistrum Aristotelem, quam patrem  
 Philippum; huic enim se debere, [119] quod viveret,  
 illi vero, quod bene viveret. Cujus, si vera justaque  
 fuit sententia, ut profecto fuit, quid tandem a me  
 Tibi deberi fas est, qui et pater mihi et magister  
 exstitisti, quique non tantum vitam mihi dedisti, sed  
 eam vitam, quae literarum amore regatur, studiis-  
 que exhilarata sit? Et profecto, quo longius ante  
 actae vitae tempus recorder, eo plura a Te bene-  
 ficia me percepisse reperio. Ac primum illud, quam-  
 vis tempore remotissimum, tamen recenti memoriâ  
 teneo, ut sub ipsam fere extremam infantiam uti-  
 lium narratiuncularum suavitate semina humanita-  
 tis doctrinarumque in me excitaveris atque provo-  
 caveris. Deinde vero quum me tradidisses magi-  
 stris, non ita me temere eorum curae reliquisti, ut  
 non subinde ipse adveniens eorum rationem meosque  
 profectus cognosceres. Et si intelligeres, eos eam  
 sequi viam, quae et intelligentiae difficultatem, et  
 incrementis moram objiceret, in vitâ occupatâ hunc  
 sumsisti laborem, ut me faciliori breviorique viâ,  
 quo tendebam, duceres. Quae quidem opera Tua  
 non in uno literarum genere utilis mihi et salutaris  
 fuit. Postea quum eo pervenissem aetatis, quâ ii,  
 qui vitam literatam sequuntur, vel Theologiae se*

studio, vel Juris, vel Medicae artis addicere solent; quae disciplinae vulgò graviores vocantur, non quod ad ipsam sapientiam, sed quod ad vitam sustentandam gravius in iis, quam in reliquis, momentum est: sed eo quum venissem aetatis, meque sive exemplum tuum, sive suasiones et [120] admonitiones tuae ad Sacras Literas convertissent, factum est non ita multo post, ut earum apud me amor refrigesceret, ac mox quidam ingenii impetus ad Graecas Literas me abriperet. Quam Tu studii commutationem adeo non aegre tulisti, ut me praeceptis consilioque juvares, neque eos audires, qui Te monebant, ut me errantem auctoritate et imperio in rectam scilicet viam redigeres. Quamquam eorum consiliis si obtemperare voluisses, certe habuisses rationes, quas sequereris, non inhonestas. Nam sive aliorum doctorum hominum exemplum spectasses, qui plerumque cupiunt, ut filii idem atque ipsi doctrinae genus amplectantur, quis Te jure reprehendere potuisset, si, cum ipse clarum inter Theologos nomen adeptus esses, filium voluisses Tibi domesticae laudis quasi heredem succedere? Sive communem hanc et pervulgatam opinionum perversitatem cogitamus, quod multi, qui se doctos profitentur, non dubitant crebris sermonibus usurpare, atque adeo Academicae juventuti inculcare, nihil in Graecis Latinisque Literis ad veram atque gloriosam doctrinam positum esse momenti: his itaque clamoribus undique occurrentibus si quis auferretur, quid magnopere mirandum esset? Sed nimirum Tu probe intelligebas, quanta esset in his Literis ubertas, quantaque praestantissimarum rerum copia, quod juvenis admodum per duos continuos annos omnem tuam operam in iis collocaveras. Ex quo studio cum ad aliarum

disciplinarum rationem, tum ad [121] universam vitam egregios Tibi manasse fructus, et Tu ipse haud illibenter memorare solebas, et qui Te norunt, facile cognoscere possunt omnes. Verumtamen Te postea aliud constilium ad Philosophiam deduxit, in quod tantum assecutus es, ut ad ejus scientiam atque rationem ipsam Theologiam redigeres atque adstringeres. Quod si qui sunt, qui non praeclarum existiment, videant an illa, quae postea in Sacras Literas invecta est, ratio, quamque haud pauci sequuntur, omnia perperam interpretando vexare, labefactare, et quocumque lubeat torquere, haec igitur an Theologiae aliquid auctoritatis et dignitatis additura sit. Maximum vero ex Philosophia fructum hunc percepisse Te dicam, quod et ingenium ipse Tuum ad lenitatem, et animum ad aequitatem conformasti, summamque virtutem hominis doctorisque Christiani in amore benevolentiaque generis humani, ut in sacra arce, reponas atque colas, neque in doctrina solum profitearis tua, sed vita, factisque demonstrates. Quis igitur unquam fuit, cui vel laboranti non libenter et alacriter opem ferres? vel quem dissentientem a Te non comiter audires et in viam reduceres; repugnantemque placide ferres? Quis non illam animi constantiam rerumque humanarum despicientiam miratus est, quod Te ad Socratis exemplum vultu semper eodem nec laetis rebus exsultantem, nec adversis fractum unquam vidimus? Hujus igitur tam praeclarae disciplinae studium per aliquod tempus intermissum ut repeterem, quum [122] muneris mei ratio postularet, minime tui moleste: eademque cum suaderet, ut ejus veluti instrumentum Dialecticam ederem; equidem inveni neminem, cui eam potius dedicarem,

quam Tibi, qui et ipse ex hac disciplina uberrimos, fructus cepisses, quique a me primum quoque publice grati animi testimonium repetere posses. Quo ex animo igitur oblatum libellum si benigne acceperis, eo sane reliquis tuis in me beneficiis quasi cumulum adjeceris. Vale."

Sunt vero hujus libri, qui a viris doctis magnopere laudatus, et cujus in Germanorum opusculis, menstruis admodum honorifica mentio facta est, duae editiones. Prior Amstelodamensis, ab ipso Wytttenbachio edita: posterior Halensis, a celeberrimi nominis philosopho, Jo. Aug. Eberhardo, repetita. Quid Wytttenbachius de hac posteriori editione statuerit, his verbis declaravit: *Cognovi novum editorem paucos locos, idque contra meum consilium, vel omisisse vel mutasse.* Lorryus autem, ille celeberrimus Parisiensis medicus, cujus modo antea mentionem feci, quum a Wytttenbachio illius libri exemplar accepisset, anno 1782 haec ei rescripsit: *Legi atque perlegi librum tuum de Arte cogitandi nitidum, tersum et ad purioris doctrinae elegantiam comparatum, eumque probavi et commendavi. Verum sordent nobis hic opera seria quaecumque, et quod non ludicrum est, ac risu non diducit rictum lectoris, vix admittitur.*

[123] Sequenti anno (1782) proponebant Curatores Legati Teyleriani hanc quaestionem: *Quae sint Veterum Philosophorum, inde a Thalete et Pythagorâ, usque ad Senecam, sententia de vita et statu animorum post mortem corporis?* Wytttenbachius illam cum studio Historiae Philosophicae, cui tunc iupprimis discipulorum suorum gratiâ operam haud exiguanı navabat, arctissime conjunctam esse videns,



et tractatu dignissimam judicans, ipsius praestantia continuo ita capiebatur, ut animum ad scribendum applicaret; *et experiretur, si forte in ejus tractatione aliquid efficere posset, quod Curatorum illorum iudiciis probaret.* Leniter igitur afflanti Musarum aurae obsequens, et certo rectoque cursu iter suum persequens, tandem optatum portum intrabat, ac voti sui compos fiebat. Disputatio enim ab ipso conscripta prae caeteris, subsequente anno, digna judicabatur, quae praemio ornaretur.

Et quoniam neque semper, quod volumus, agere possumus, neque ad omne opus semper aequae idonei sumus, viri prudentis omnino est, impetu praesente praesentis operis uti. Quod fecit inprimis Wyttenbachius. Quum enim in illo argumento de *Animorum immortalitate* mentem et cogitationem omnem defixam haberet, ejusque inquisitionem quam plurimum ad bene beateque vivendum conducere sentiret, neque quidquam ipsi prius ac potius esset, quam commodis [124] eorum inservire; qui quidem aliquid discere vellent; hanc sibi oblatam occasionem continuo arripiebat, inque scholis publicis universae hujus sententiae initia et progressus inde ab initio rerum usque ad Platonem explicabat. An ulterius pervenerit, dicere non ausim. Equidem in chartis optimi nec satis laudandi viri non nisi *quinque* ejusmodi scholas sive lectiones in Athenaeo Amstelodamensi publice habitas inveni, quarum ultima in loco de Platonis sententia desinit. Et quandoquidem hae acroases ex eodem sunt genere, quo reliqua viri scripta, ita ut veluti ex Phidiae officina prodierint videantur, et inprimis doctrinae ubertate, argumentorum delectu, et orationis naturali

---

*et experiretur]* Vid. Soc. Teyler. T. IV. p. IV.

palchritudinis conspicuae sint, neque me illis edendis elegantiorum Literarum cultoribus ingratum facturum existimem, ipsas primo quoque tempore publici juris faciam.

Porro habuit eodem hoc tempore (1783) cum alios quidem bonae indolis discipulos, tum inprimis duos, qui flagrante discendi ardore incensi animum ad scribendum applicarent, et progressuum suorum in Philosophiae et Literarum studio factorum specimina ederent. Alter fuit *B. P. van Wesele Scholten*, cui *Dissertationem Philosophico-Criticam de Philosophiae Ciceronianae loco, qui est de Divina Natura*, debemus: alter vero *Petrus Nieuwland*, qui item *Dissertationem Philosophico-Criticam* conscripsit, cujus argumentum [125] est de *Musonio Rufo, Philosopho Stoico*. Utrumque hujus anni mense Aprili ad publicae defensionis honorem praeses produxit, et mox, recensendis hisce Dissertationibus, ipsorum meritis debitam laudem in Bibliotheca Critica tribuit. Caeterum vero reliquum tempus domesticis studiis impendit, Plutarcho et Bibliothecae Criticae, \*cujus *septima* et *octava* pars deinceps brevi post prodierunt, et omnium eruditorum plausu exceptae sunt.

Interea vero temporis, dum Wyttenbachius in philosophia docenda versabatur, inque ea ut in rerum divinarum humanarumque scientia et laudatarum artium matre acquiescebat, Tollius, V. Cl., professionem Literarum magno cum laudis fructu tenuerat. Quum vero hic, deposito nunc munere suo, Hagam discederet ad erudiendos *Guiljelmi V*, Serenissimi Principis Arausiaci, filios (augustissimum Regem nostrum ipsiusque fratrem natu minorem, in Italia mortuum) provincia ejus ab amplissimis Athenaei Curatoribus Wyttenbachio deferebatur. At nondum hic Orationem

suam Inauguralem habuerat, quum ô xávu. Valckenaerius Leidæ anno 1785, mense Martio, diem suum obiret. Statim igitur Ruhnkenius, cui nihil Academiæ Leidensi carius erat, omnem operam dabat, ut Wyttenbachium, si posset, Amstelodamo abduceret, ac Leidam traduceret. Valckenaerio nimirum vix mortuo, adibat derepente Consules [126] Leidenses, cumque iis, apud quos multum auctoritate valebat, de Wyttenbachio in locum defuncti vocando agebat. Ipse de hoc negotio ad Wyttenbachium die 24 Martii hæc scripsit: „*Heri de Te vocando egi cum Ill. Bleisvicio et Consulibus hujus urbis, iisque facile persuasi, ut Tibi stipendium 2600 florenorum, quo Professorum, qui nunc sunt, nemo fruitur, liberalissime decernerent. Omnes Te summo studio expetunt. Tu Tibi etiam atque etiam caveas ab istorum insidiis, qui omnia experientur, ut Te, aliquid novi lucri spe ostensâ, retineant, magis quidem sud, quam Tud causâ. Nam necesse est, Tuo discessu discipulorum numerum minui, quin ipsum Athenaeum ad pristinam conditionem recidere, praesertim si Swindenus, quod ocius serius futurum auguror, Leidam vocetur. Ubi enim Amstelodamenses, in hac ingeniorum penuria, doctores Vobis pares reperient?*“ Ad hanc epistolam vero quum Wyttenbachius ita respondisset, ut sibi aliquot dies ad deliberandum necessarios esse diceret, Ruhnkenius longioris morae impatiens, die 4 Aprilis, praeter alia etiam hæc rescripsit: „*Si scire vis, quale Tibi stipendium constitutum sit, dabuntur 3000 floreni. Hæc certa et explorata sunt, quippe ex illustris Bleisvicii et Consulum auctoritate ad Te perscripta. Nunc Tuum erit decernere, quid Tibi faciundum putes. Non poterit res trahi diutius propter alios competitores.*“ Jam vero,

quemnam exitum habuerit. [127] hoc Leidense negotium, ipse Wyttenbachius nobis enarravit: „*Valckenarius*, ait, *diem obiit insequente anno (1785) mense Martio*, multis ille nominibus lugendus: et *Literarum causâ*, extincto earum altero veluti lumine et oculo: et *mei non minus causâ*, amisso altero doctore et amico, incrementorum meorum fauore utque adjutore. Huic nemo successurus erat, nisi quem *Ruhkenius* commendasset: atque is me dudum *Valckenario*, ne ipso quidem nolente, successorem destinaverat. Ego quominus oblatam cathedram accipere vellem, factum est rerum mearum temporisque illius rationibus; quod in *Amstelodamensi Athenaeo* recens. *Philosophiâ ad Historias, Eloquentiam, Literasque et Græcoas et Latinas* traductus, ampliore, in quo excurrerem, campum nactus essem, nec minus urbis diuturnâ consuetudine, quam civitate magistratum, tenerer. Si quid mihi tunc, repudiatae conditionis causâ, succensuit *Ruhkenius*, hoc et breve fuit, et cum amore conjunctum, et vetere mox benivolentiâ oblitteratum.“

Repudiata igitur cathedrâ Leidensi, *Literarum Graecarum et Latinarum, Historiæ cum Universalium Patriæ, Eloquentiæ, Poëseos, et Antiquitatum*, professionem die xviii Aprilis suscepit, et more majorum Orationem Inauguralem habuit, cujus argumentum fuit *De vi et efficaciâ historiæ ad virtutis studium*. Atque ne cui mirum videretur, cûr aut *Philosophiæ tradendæ muneri et honori* hanc [128] *Literarum* professionem anteposuerit, et in *Athenaeo Amstelodamensi* manere potius, quam in *Academiâ Leidensem* abire voluerit, hujus rei rationes in ex-

ordis Orationis perspicue exposuit. „*Ad Philosophiam*, inquit, *ad Literas* traductus sum. Quod in commutatione sentio fore nonnullos, qui, mei meorumque studiorum ignari, levitatis me et inconstantiae accusent, quibusque purgare me debeam in principio hujus Orationis, nec in eorum animis relinquere sorupulum, qui, ut ipsis ad audiendum, ita mihi ad dicendum obsit: quamquam non minus a mea natura et ingenio, quam ab hujus loci auctoritate abhorret, ut ipse de me multa dicam. Ego cum loco non sententiam mutavi, nec Philosophiae cum professione studium amoremque deposui: immo, ut antea eam et colui et aliis tradidi, ita in posterum eam et colam et aliis commendabo. Sed fuit haec semper studiorum meorum ratio, quae in primis ad Historiam et Antiquas Literas referretur, ut in Philosophia diverterem, in Literis habitarem: ut in Philosophia haberem instrumentum, in Literis finem: ut in Philosophia mihi essent auxilia, in Literis robur et firmamentum. Quis igitur aut non intelligat, Literarum cognitionem semper mihi eo loco modoque fuisse, ut magis per eam, quam per Philosophiae cognitionem et mihi et aliis satisfacere possem? aut quis, qui illud intelligit, jure me reprehendat, quod Philosophiae Literarum professionem anteposui? Accedit alia causa, eaque [129] gravissima et cum rebus meis arcte conjuncta. Ego, cum per duo deinceps in hac urbe gesta docendi munera, tum per magnam ejusdem cum natali mea patria similitudinem, morum, legum, institutorum: his igitur causis paulatim factum est, ut ad hanc urbem, veluti ad alteram patriam, cum animo sensuque adhaerescerem, tum iudicio et voluntate me applicarem. Quare, si haec praecipue urbs mihi dili-

*genda et colenda est, quidam eam et diligam et colam eo studiorum genere, quod ipse prae aliis praecipue studiis semper et colui et dilexi? Non est, quod hoc loco quidquam dissimulem: non est, quare animi sensum non aperte profitear. Dico, iterumque dico, me delatâ mihi Literarum professione, illud consecutum esse, quod semper et spectavi et optavi. Et, cum de ipsâ professione lactor, tum vero quod ea mihi obigit et hac meâ aetate, aut florente, aut certe nondum inclinâtâ, et hac in urbe, cui antea tantis necessitudinibus obstrictus, novo hoc munere, tamquam novo vinculo, obligatus sum.*

Haec vero Literarum professio ipsi scholarum varii generis habendarum necessitatem imponebat. Aliis quidem scholis *Historiae Universalis* explicatio prâposita erat: aliae ad *Scriptores Graecos et Latinos* interpretandos pertinebant: rursus aliae in *Antiquitatum* et Graecarum et Romanarum studio versabantur: et aliae denique *Historiae Literariae* dicatae erant. Et quandoquidem hisce [130] scholis per aliquot deinceps annos interfui, ab hac descriptione non omnino alienum puto, quâ ratione vir summus in illis versatus sit, breviter exponere.

In pueritiâ jam Wyttenbachius, uti supra vidimus, adhibitâ *Hübneri* Historiâ Universali, animo sibi paulatim historiæ universae designatam quamdam formam impresserat, quasi thecam multorum pluteorum, in quâ suis locis materiam factorum aut jam cognitam servaret, aut postea cognoscendam reponeret. Quod sane saluberrimum consilium juvenibus ad imitandum satis commendari nequit. Ita enim se res habet, ut tum demum, si illa forma animo bene concepta sit, cognitio factorum, suis temporibus locisque assignata, firma lucidaque constet ac maneat: sin desit, obacura

et confusa vagetur, atque tandem rursus sensim evanescat. Sed *Hübneriani* libri, perspicuitate descriptionis puerorum et indoctorum ingeniis plane accommodati, quum saeculi superioris initio ad medium viguissent, praesertim in Germaniâ, mox explosi sunt supervenientibus aliis aliorum deinceps auctorum operibus, quorum quaedam scientiâ historiae ex ipsis fontibus haustae valerent, dum alia potius stili commendationem afferrent. In priori genere numerare possumus *Johannem Christophorum Gattererum* et *Johannem Matthiam Schroekhium*: illum quamvis diligentem, tamen sine gratiâ frigidum: hunc jaceundum [131] et juniorum aetatis aptum narratorem. In posteriorum vero genere eos referendos censeo, qui more *Bossuetii*, causarum morumque notatione, arguto et sententioso stilo, philosophiae simul et eloquentiae speciem affectantes, disserunt aut declamant potius, quam narrant: veluti e Gallis *Millotius*, et ex aliis populis alii. Porro eorum, qui Latine scripserunt, merito principes habeantur, *Sleidanus*, *Petavius* et *Cellarius*: quamquam in his quoque nonnihil desideretur. Nam *Tursellinus*, quantum dictionis elegantia excellit, tantum rebus et judicio deficit.

*Wytenbachius* igitur in historia tradendâ exemplum illustrium in Acaemiis nostris professorum, qui et antea floruerant, et tunc adhuc florebant, non sequebatur. Neque *Tursellini*, neque alterius cujusdam *Compendio* utebatur. Ipse librum conscripserat. Hunc nobis in scholâ dictabat, et deinde praecipua quaeque ex eo loca fusius explicabat, habitâ imprimis ratione perspicuitatis et ordinis tam in temporibus, quam in locis. Verissime enim statuebat, omnem historiae descriptionem et enarrationem duabus potissimum partibus contineri, quarum una cernatur in *copia* et de-

*lectu*, altera in *ratione* et *oratione*. Jam vero his omnibus non dico perfecte, sed vel probabiliter satisfacere, rarae est ac prorsus egregiae facultatis. In priori parte ita versabatur Wyttenbachius, ut non nisi praecipua quaeque ex ingenti rerum factorumque, ut [132] ita dicam, acervo seligeret, eaque tantâ evidentiâ ac gravitate enarraret, ut auditores suâ veluti sponte intelligerent et sentirent, se per accuratam historiae cognitionem ad virtutem pariter atque sapientiam proficere posse. Atque eo jam spectaverat optimi viri Oratio inauguralis modo memorata. Nam ut historiam tamquam optimam virtutis magistram initio muneris sui commendaret, ejusque finem et fructum in eo potissimum positum esse ostenderet, ut non modo sapientiores, verum etiam meliores fieremus, eo ipsum impulerat observatio pervulgatae consuetudinis, quod scilicet animadverterat, plerosque ex historiâ non nisi oblectationem captare, actiones calamitatesque atrocissimas, ad quarum cognitionem in vitae usu et experientiâ ingemiscimus et cohorrescimus, in historiâ cum voluptate legere, lectasque cum risu aliis narrare, atque ita pravitati potius adsuescere, quam ab eâ averti. — Porro autem oratio (quem vulgo *stilum* vocant) erat nuda et simplex, nullis quaesitis verborum flosculis ornata, sed naturali pulchritudine ac venustate commendabilis: qualis cum in Julii Caesaris, tum in Nepotis et paucorum similium operibus dominatur. — Et quod denique ad rationem s. *methodum* spectat, illa talis erat, qualem hodieque ethnographico-synchronisticam nominant. De celeberrimis quibusque populis, praesertim in Historiâ Antiquâ, sigillatim deinceps agebat, eorumque [133] res gestas in suas epochas et periodos dividebat, ita ut synchronismus, s. nexus rerum in idem tempus concurren-



tium, in singulis partibus facile appareret. Atque haec ratio mihi semper admodum placuit. Primum enim illa multum conducit ad Geographiae cognitionem sibi facilius acquirendam, sine qua in Historiarum proficere possumus, et qua tamen plerique tirones Academici, quod profecto dolendum, nimis destituti sunt. Deinde vero imprimis valet ad singulorum populorum historiam perpetuam melius percipiendam. Quod secus est in illa sola synchronistica qualicumque ratione, quam v. c. Tursellinus secutus est. Fac enim, aliquem legisse et relegisse illud compendium cum dictatis, quamvis eruditissimis, Perizonii, Wesselingii, Ruhnkenii, Saxii et similium, num propterea putemus, illum uniuscujusque populi antiquiores et historiam propriam tenere? Minime profecto. Primum enim Tursellinus, exceptis rebus Judaicis et Romanis, quas satis copiose enarravit, *reliquorum omnium populorum rebus non item suos cuique locos suamque et propriam historiam dedit, sed eas non nisi obiter ac subinde attigit*. Deinde vero, etsi hi summi viri has lacunas supplere, et singula apte necesse studuerint, (quod v. c. Ruhnkenium fecisse narrat Wyttenbachius, nec ego negaverim) tamen haec ipsorum supplementa, tamquam totidem membra, per totum opus dispersa sunt, et a juvenibus vix [134] aut ne vix quidem ita conjungi possunt, ut temporis ordo ubivis appareat, nec rerum series unquam turbetur. Quid multa? Uno eodemque et loco et tempore adolescentibus, ut ita loquar, tot dapes ex omnibus orbis terrarum partibus, ex Asia, Africa et Europa, simul apponuntur, ut copia ipsos inopea faciat. Sed quum de tota hac historiae causa alio tempore fortasse ube-

rius agam; nunc satis sit referre ipsius Wytttenbachii de hoc argumento sententiam, proditam in Philom. Lib. II. p. 144. „*Judices exordium disceptationis ducunt ab interpretatione tituli, et recensione variorum officiorum meritorumque muneris historici. Plus, inquit, laboris facultatisque postulat, generalem plurium populorum, quam unius populi, Historiam conscribere: et plus item unius populi, quam unius alicujus temporis, belli et facti peculiaris: et unumquodque horum generum suam etiam habet meritorum varietatem. Primum sine dubio est officium veritas narrationis, nec tamen ea difficillimum. Multo enim difficilius est, eventus ex suis causis explicare, materiae partes suis temporibus, locis, mutationibus ita componere, ut quasi dramatica scena appareat, in qua principes auctores propriam, et quasi vultus, habitus, ingenii, animique formam servent, eique convenienter et agant et loquantur: color porro universae narrationis accommodetur ad naturam argumenti, ad varietatem temporum, fortunarum, conversionum. Haec est facultas, quae [135] egregii auctores historiarum censentur, quae lectorum animos capiunt, eorumque alliciendorum retinendorumque vim argumento suo adjungunt; itaque fructum historiae ampliore efficaciorum reddunt. — Sane, hanc nobis sententiam iudices probant; eum ed tamen exceptione, ut teneamus, saepe difficillimum esse rerum gestarum veritatem scire, non solum in argumentis nondum aliorum scriptione auctorum tractatis, sed in tritis adeo ac saepius repetitis; veluti in Historia adeo Universali, quae dicitur, in qua multi etiam nunc sunt loci nondum satis expliciti, nec ad liquidum perducti. Historicus autem si ad-*

*fert simplicem, sed eam locupletem, ac perspicuam, veritatis narrationem, et nos quidem contenti sumus; nec desideramus causarum explicationem, aut, picturae dramatisue oblectamenta, nisi quatenus haec ex ipsa veritatis cognitione existunt. Quod si vero haec ipse addidit scriptor, diserte significet: certe ita scribat, ut appareat, quid in ipsis factis et veritate insit, quid ipse de suo adjecerit: quam fidei sanctitatem in Antiquis, maxime Thucydide, Polybio, Plutarcho, Livio, Tacito, suspicimus. Nunc sunt, qui in historia scribenda nil nisi disserant ac ratiocinentur, et rerum gestarum ignorantiam philosophando dissimulent. Quin quotidianam in vitae consuetudine saepe nobis usu venit, ut quaerentibus ecquid publice novi acciderit, nil narrent, sed sua de rebus notis iudicia expromant. Quibus merito reponamus: Da mihi res gestas et facta; ipse [136] habeo iudicium, quo ex his causarum eventorumque cognitionem colligam."*

*Quid autem de scholis Graecis et Latinis dicam? Ipse Wyttenbachius in scriptis suis hoc argumentum accurate tractavit, et copiose explicuit. Primum materiam et formam harum scholarum his verbis descripsit: „Sed quum quatuor fere sint partes, quibus Literae Graecae et Latinae constant, quae partes vulgo dicuntur et habentur, Historia, Antiquitates, Enumeratio ac recensio Auctorum, Linguae grammatica scientia: tribus illis prioribus vel extraordinarias, vel cum aliis scholis nostris conjunctas, damus scholas: quartae nobis partis perpetua est et ordinaria institutio, ut quae ad reliquarum trium intelligentiam et ipsius linguae ingeniorumque cogni-*

---

*Sed quum quatuor] Praefat. ad Sel. Princ. Hist. ab init.*

tionem, interpretandis Auctorum scriptis aditum aperit." — Erant vero hi Auctores partim poëtae, partim prosae orationis scriptores; quorum interpretatio ita peragebatur, non ut eorum omnia opera enarrarentur, omnesque e commentariis copiae effunderentur, sed ut in praecipuis eorum scriptis, legendis discentes exercerentur ad eam facultatem, quae reliqua deinde Auctorum opera suo ipsi studio intelligerent. Deinde eodem loco refert, cur tam prosae quam ligatae orationis Auctores sibi quotannis interpretandos sumserit, ubi ait: Meum semper fuit iudicium, utriusque orationis, et ligatae et solutae, scripta non minus in scholis, quam in virili aetate et reliqua literata vita, tractanda esse. Qui solos [137] legunt prosae Scriptores, horum ipsorum locos plurimos, ut e Poëtis ductes, non intelligunt: ad multarum etiam prosae venustatum elegantiarumque sensum frigebunt. Contra, qui unice in poëtis versantur, ita paulatim ad carminum modum adhaerescunt, ut nil nisi canere velint: ut ad Atticam urbanitatem dictionisque lepores, in Platonis Dialogis, atque in Aristophanis adeo Comoediis, torpeant: magis etiam hebetes sint in Philosophis et Oratoribus, ad ingeniose dicta aut acute conclusa percipiendâ. Quamquam saepe animadverti, majore labore neglectam prosae, quam carminum, lectionem repeti: hominemque, ut ita dicam, mere prosaicum facilius ad Poëtarum, quam mure poëticum ad prosae Scriptorum, intelligentiam pervenire. Sed profecto utrumque eodem studio genus amplectendum est. Qui unice carmina sectantur, similes sunt

ita peragebatur] l. l. p. IV.

Meum semper fuit] l. l. p. V.

*is, qui fontis amoenitate capti ad eum desident, ejusdemque aquis agros irrigatos fructusque proditos negligunt. Qui non nisi solutae student orationi, hi fructuum ubertate contenti non ad fontem respiciunt, cujus cognitione et usu agri exhilarent, fructuumque proventum amplificent. Denique, si quis quaerat, quamnam Wyttenbachius viam et rationem in explicandis scriptoribus antiquis secutus sit, ille sciat, ipsum exemplo clarissimorum virorum, Hemsterhusii, Ruhnkensii et similium a diligente et accuratâ linguae et verborum explicatione Grammaticâ ad rerum interpretationem accessisse, eamque [138] pro re natâ modo ex Historiâ, modo ex Antiquitatibus, modo ex aliis aliarum doctrinarum disciplinis duxisse, adhibitâ ratione criticâ. Classicum omnino locum de hoc argumento in ipsius scriptis habemus, ubi legimus: „Sed primum est omnium, ut docentes moneamus, quid sit interpretatio, quae ejus forma. Nam, licet ad ejus facultatem plurimum valeat exercitatio et usus, et vani sint, qui eam Dialecticis praeceptis contineri putent; haec tamen minime sunt negligenda. In rectâ quidem institutione, quam sequimur, certe profiteamur, usui praemittenda est ratio, actioni cogitatio. Neque ita ad interpretandum accedere debemus, ut ipsum hoc interpretari, quid et quale sit, non perspicere diligenterque teneamus. Igitur interpretatio est oratio, quae efficit, ut alterius orationem intelligamus. Intelligimus alterius orationem, quando ei eundem, quem ipse alter, adjungimus sensum. Hoc in Logicis nostris praeceptis tradidimus. Sed interpretationis, tamquam generis, duae sunt formae, Grammatica et Critica.*

---

*Sed primum est]* Annot., ad Sel. Princ. Hist. ab init.

*Grammatica interpretatio iudicat, quid Scriptor dixerit; Critica, vere recteque, nec ne, dixerit. Hoc in Bibl. Crit. Vol. III. P. I. p. 10. monuimus. Utriusque interpretationis, et Grammaticae et Criticae, duplex est argumentum, materia et forma: materia duas habet partes, res et verba. Ita utriusque interpretationis tria sunt quasi instrumenta: Dialectica versatur in formâ, Linguae Ratio in verbis, Historica Doctrina in rebus. [139] Sed interpretando loco prior adhibenda est Grammatica interpretatio, ex ejusque instrumentis primum Dialectica, cujus est officium videre, quae nomina verbaque quibus nominibus, verbisque jungenda, praëponenda, postponenda sint, omnino, quod vulgo vocant, quomodo locus construendus sit. Secunda accedit Linguae Ratio, quae Dialecticam ad leges et consuetudinem orationis ejus, in quâ scriptus est locus, adstringit et moderatur. Tertio est Historica Doctrina, quae omnem antiquarum rerum intelligentiam complectitur, et intra hujus fines et auctoritatem duo priora instrumenta continet. Criticae Interpretationis eadem sunt argumenta, eadem via, nec peculiariter de ea dicere attinet."*

Ex his igitur videmus, in scholis literariis habendis duplex Wytttenbachio propositum fuisse. A Grammaticâ primum interpretatione incipiens, expositis ipsius sermonis proprietatibus, discipulos suos ad rerum intelligentiam ducebat. Deinde Graecis Latine vertendis disciplinae suae alumnos docebat Latine scribere. Ad hujus autem linguae bene scribendae facultatem consequendam quum opus sit variis exercitationibus, illarum *Introductionem*, quam vocant, ex optimi magistri scholis quondam habitis edidi in Epist. Sod. Philom. p. 111. In his prima et praecipua est

*Paraphrasis*, quæ et *Metaphrasis*, Latine *Interpretatio*, vulgo *Versio* dicitur, cujus hoc est officium, ut non tantummodo Græci auctoris sententia fideliter exprimatur, sed etiam [140] exemplum presse reddatur, et, quantum quidem salvâ Latinitate potest, forma atque compositio servetur. Itaque primum Græca quasi ad verbum Latine aut ipse vertebat, aut discipulo vertenda proponebat: deinde animum ad id advertebat, ut discipuli intelligerent, quibus in locis Græca et Latina proprietas differret: et tum denique hanc interpretationem ad Latinitatem conformabat. Et in scholis Latinis non tantum discipulis fontes Græcos indicabat, e quibus Romani sua sumsissent, verum etiam subinde verba Latina Græce vertebat, præsertim quum Græca efficaciora essent, atque rem accuratius significarent.

In *Antiquitatibus Græcis* sequebatur Latin. Rosium, in *Romanis* Christophorum Cellarium. Singula utriusque *Compendii* capita explicabat, perperam scripta corrigebat, omissa dictatis supplebat, et illa omnino addebat, quibus auditores ad rerum antiquarum cognitionem ac scientiam ducerentur. Denique in *Historiâ Literariâ* fere eodem modo versabatur, quo in *Historiâ Philosophiæ*, ut antea dixi, versatus erat. Et quandoquidem ad discipulorum captum sese scienter accommodabat, utpote artem docendi optime callens, et diligenter animadvertens, *quo essent auditorum ingenia gradu maturitatis ad partem studii, idque Socraticâ ratione cum ad nascendum eliceret, tum nascens juvaret, tum natum aleret ac moderaretur*; ipsius scholæ tironibus similiter atque veteranis

admodum fructuosae [141] erant, et a multis juvenibus quotannis audiebantur.

Proximo anno (1786) erat Wytttenbachius Professorum Athenaci Amstelodamensis praeses. Forte in illud ipsum tempus incidebat Heidelbergensis Academiae saecularis annus quartus. Prorektor igitur et Senatus inclytæ illius Academiae ad hæc Musarum sacra, quo majori solennitate peragerentur, aliarum regionum et terrarum Professores invitaverant, eumque honorem quoque Athenaci Amstelodamensis doctoribus habuerant. At vero hi, quum intelligerent, se sub finem mensis Novembris, quo tempore illud festum celebrandum esset, scholis habendis impeditum iri, quominus illi festivitati, quamvis lubentes, interesse possent, Senatui Academiae Heidelbergensis per literas grati animi sui sensus et absentiae futurae causam significanda esse statuebant. Hanc itaque provinciam suscipiebat Wytttenbachius, atque hac de re epistolam scribebat, cujus exemplar huic descriptioni inserere, et sic ad publicam notitiam perferre operae pretium duxi.

„MAGNIFICO PRORECTORI ET CLARISSIMIS PROFESSORIBUS  
INCLYTÆ ACADEMIAE HEIDELBERGENSIS  
PRAESES ET PROFESSORES ILLUSTRIS ATHENAEI  
AMSTELODAMENSIS

S.

*Quo majorem literae Vestrae, V. V. C. C., nobis attulerunt voluptatem cum testificatione honoris ac benevolentiae, eo magis dolemus, res [142] nostras ita comparatas esse, ut humanissimae Vestrae invitationi obsequi non possimus. In causâ est ipsum saecularis festi tempus, quod non in serias nostras, sed in summas occupationes incidit. Nam quum*



*Athenaei nostri haec sit ratio, ut in singulis doctrinarum generibus singuli sint Professores, nemo nostrum abesse potest, quin locum suum vacuum relinquat; nec locus vacare potest, nisi magno eum studiosae juventutis detrimento. Quare Vos ita Vobis persuadeatis, V. V. C. C., nos, quamquam a Vobis absentes, tamen animis studiisque praesentes, ita in partem accedere laetitiae Vestrae, eique congratulari, ut praesentium hospitum magis congratulari nemo possit. Quod quidem nos et facere debemus benevolentiae erga nos Vestrae honorisque nobis habiti causa: et lubentes etiam facimus peculiari quodam erga Vestram Academiam sensu et amore; quae omnibus cara esse debet amantibus bonarum literarum, quarum illa per Europam renascentium altrix fuit praecipua. Faxit D. O. M., ut et hoc, et multa deinceps saecularia festa apud Vos agantur cum vera laetitia, quae proficiscatur ex ipsius Academiae flore, prosperitate, salute! Faxit, antiquum illud et inclytum Heidelbergae nomen per omnes humaniores gentes et aetates celebretur! Fortunet res et consilia cum totius Academiae, tum singulorum Professorum ac sociorum, et qui nunc sunt, et qui postea erunt. Ita valete V. V. C. C., nobisque favete. Dat. Amstelodami d. 21 Sept. 1786."*

[143] Quid de civilibus istis dissensionibus ac discordiis dicam, quae sequente anno (1787) per omnes civium ordines manarunt, amicorum, affinium, cognatorum animos a se invicem abalienarunt, bellum partim domesticum, partim externum pepererunt, atque patriae nostrae haud exiguo detrimento fuerunt? Quum istarum turbarum causae sine juris Batavici et rerum anteactarum scientia recte intelligi nequeant, earumque

exitas nemini non notus sit: dixisse hoc loco sufficiat, Wyttenbachium semper sperasse et optasse, ut, neutrá parte victá aut victrix, res ad conditiones veniret; atque, quum id non fieri posse videret, exemplo Attici ita in re publicá versatum esse, ut civilibus fluctibus se non committeret, nulliusque voluntati se emanciparet, verum optimarum partium esset, h. e. iis faveret, qui non verbis prae se ferrent, sed factis ostenderent, patriae salutem sibi re verá cordi esse. Atque hinc, sopitis utcumque istis discordiis, quum mense Octobri scholas suas rursus aperiret, his verbis auditores suos allocutus est:

*„Quod Deus bene vertat! Auspicamur denuo lectiones nostras, ad quas Vos hac frequentia convenisse gaudeo vehementerque laetor; praesertim his temporibus, ubi publicae calamitatis privatum cuique solatium quaerendum est. De quibus temporibus nec quomodo dicam, nec quomodo taceam, reperio: dicere me tamen cogit muneris officiique vis ac religio. Non [144] est quod in memoriam Vobis revocem istas patriae misérias, quas ipsi recente memoria tenetis, vel oculis adhuc subjectas cernitis. Illud reticere non possum, quod ne ipsum quidem Vos fugit, harum omnium calamitatum ac miserrarum fontem et causam esse in dissensionibus civilibus: cujus mali nisi ipsae radices evellantur, patria stare non potest. Quae vero est ratio huius mali sanandi? Nimirum haec una est ratio, ut quisque bonus civis omnem ex animo suspicionem voluntatemque injuriae seponat, suum sibi officium persequatur, atque ita communi patriae utilitati consulat. Itaque et nos, Carissimi Auditores, quandoquidem boni cives et sumus, et haberi volumus, ita conveniamus ad institutiones doctrinarum, ut prius omnes*

*ex animis dissensionis, invidiae, odii reliquias abstergamus: et quandoquidem patriae ejusdem civēs sumus, ejusdem patriae salutem nobis propositam habemus, ad communem nos societatem et societatis caritatem jungamus duobus gravissimis vinculis, altero amore, patriae, altero studio doctrinarum. Curam reipublicae relinquamus, quibus ea mandata est, Patriae patribus, nos nostram officium obeamus, Vos discendo, ego docendo. In hoc studio laboreque operamque collocemus, in hoc omni animi contentione de victoria certemus: ita nos maxime vicisse existimemus, si maxime in doctrinarum scientiā profecerimus. Ita certamen suscipiamus, quo nullum animis ingenisque nostris fructuosius, nullum patriae salutaris [145] esse possit. Dicit ac fortunet D. O. M. Vobis hoc voluntatis propositum!*

Omisso itaque omni partium studio, optime se patriae consulturum arbitrabatur, si diligenter docendo juvenum ingenia excoleret, eorumque animos, quantum posset, virtutis amore imbueret. Atque profecto idem mihi de Wyttenbachio verissime scribere licet, quod ipse de Ruhenkenio scripsit: „In scholis numquam de praesente Reipublicae statu loquebatur, nec diserte nec oblique: in quo multi sibi placent ac sapientes videntur: recte statuens, civilem prudentiam ultro exsistere e certā Antiquitatum interpretatione, hanc unam debere tradere doctorem, non discentium judicia auctoritate partium occupare.“

Hinc quoque istae civiles turbae nihil quidquam detrimenti scholis Wyttenbachii afferebant. Athenacum Amstelodamense tunc inprimis cum professorum famā ac celebritate, tum discipulorum numero et frequentia

florebat. — Caeterum vero pergobat Wytttenbachius omne a docendi munere vacuum tempus, more solito, domesticis studiis impendere, Plutarcho potissimum et Bibliothecae Criticae, cujus *nona* pars sub finem hujus anni prodit. At quum antea nomen suum non sine ratione reticuisset, nunc jam auctorem hujus operis se profitebatur, scripta Epistola ad *P. Fonteinium* dedicatoria, in qua Wytttenbachii ingenium, doctrina et Latine scribendi eximia facultas utraque paginâ clucent.

[146] Ruhnkenius, qui cum nemine lubentius de Literis loquebatur, quam cum Wytttenbachio, ipsum quovis anno invitare solebat, ut tempore feriarum paschalium Leidam veniret. Ac Wytttenbachius, qui, mortuo Valckenaerio, neminem alium habebat, quem magis eoleret, quam Ruhnkenium, aut a quo plura discere posset, illam Ruhnkenii visendi, et cum ipso confabulandi occasionem fere semper grato animo acceperat. Initio igitur anni 1788 a Ruhnkenio rursus his verbis invitabatur: „*Ferias paschales ut Leidae apud nos degas, Te vehementer rogo. In agros vicinos excurremus, atque ambulando Te ita defatigabimus, ut ex pingui et obeso, qualem Te magis et magis fieri audio; gracilis tenuisque domum revertaris.*“ Ruhnkenius nimirum minime ignorabat, Wytttenbachium Amstelodami vitam domisedam agere, ipsiusque animum recreatione, et corpus ambulationis crebritate indigere. Atque idem jam aliquot annis ante animadverterat peritissimus Parisiensis medicus, Lorryus, epistolâ eum adhortans, „*ut illis tot meritis, quibus publicam Literarum rem ornaret, hoc inprimis adderet, ut, dum aliis consuleret, sui ipsius*

*memor sanitatem non negligeret, sed quotidie domo exiens, et animum et corpus modicâ ambulatione recrearet.*“ Quod salubre consilium quamvis non plane neglexerit, vereor tamen ut illi satis constanter et assidue obsecutus sit. At vero, quomodocunque id sese habuerit, illud saltem satis certum est, Wyttenbachium [147] valetudinis causâ Leidam constituto tempore ire, ac Ruhakenium convenire non potuisse. Mox enim in gravem morbum incidebat, eoque per binos menses ita conflictabatur, ut amici ac medici vitae ejus timerent, nec ipso, quamvis depulsâ morbi vi, nisi admodum tarde ac lente amissas corporis vires pristinamque sanitatem recuperaret.

Sub illud vero tempus, quo Wyttenbachius quodammodo revalescere incipiebat, ex Angliâ in Hollandiam veniebat *Thomas Burgessius, A.M., Collegii Corporis Christi Socius, vir in Graecis Latinisque Literis versatissimus, idemque editis compluribus doctrinae monumentis clârus.* Hic igitur Wyttenbachii visendi cupidus, statim e Ruhkenio querebat, ubi Wyttenbachius esset. Tum, de eo certior factus, sese continuo in viam dabat, et in *Eemnessano* Wyttenbachii horto non tantum de multis aliis rebus literariis cum eo amice ac comiter confabulabatur, verum imprimis de Plutarcho, sumtibus Academiae Oxoniensis imprimendo, agebat, seque illius negotii conciliatorem fore pollicebatur. Nam simulatque Plutarchi libellus *De Serâ Numinis Vindictâ*, studio Wyttenbachii emendatus, in lucem prodierat *Lugd. Bat. 1772*, et ad eruditorum Anglorum notitiam pervenerat, hi viri, editoris summam doctrinam admirati, nihil flagrantius cupierant, quam ut Wyttenbachius in edendis Plutarchi operibus studium et operam porro positurus [148] esset, ac sese ad eum, si

id facere vellet, copias Bibliothecarum Angliae deinceps transmissuros Ruhnkenio promiserant. Constat hoc ex epistolâ hujus viri ad Wyttenbachium anno 1772 scriptâ: „*Plutarchus tuus* (sunt verba Ruhnkenii) *quantâ cum ingenii et doctrinae admiratione ab omnibus, qui recte judicare possunt, exceptus sit, non dubito, quin multis multorum literis cognoris. Donaveram exemplum intelligentissimo harum literarum existimatori, Claudio Salgasio, quem prope solum, e genere literato, amicum dicere possum verum, et nullis simulationis involucris tectum. Is statim me jussit quatuor alia exemplaria Londinum mittere, ut Anglorum cupiditati satisfaceret. Qui librum tuum ita probarunt, ut, si in Plutarchi edendi consilio persisteres, fidem suam Salgasio adstringerent ad copias Angloarum Bibliothecarum submitendas.*“ Praeterea vero aliquot scriptorum Graecorum editiones ex typographiâ Oxoniensi prodierant, in quibus excudendis operae necessariam solertiam non adhibuerant. De eo non tantum alii viri docti questi erant, verum id inprimis *Brunckius* animadverterat, vulgandis mendis in Euripide Musgravii relictis. Ergo Oxoniensis illius typographiae Delegati, Viri Illustres, suam quoque rem inprimis agi sentientes, cupiebant istam culpam, quam nonnullis malis editionibus proferendis contraxerant, quam accuratissime edendo Wyttenbachii Plutarcho veluti redimere ac compensare. Quo consilio [149] tres viros eruditos magnis praemiis invitaverant, qui munere Correctorum fungerentur, ac summam curam diligentiamque adhiberent. Hoc institutum maxime urgebat Episcopus Salisburiensis, cujus *Capellanus* tunc *Bur-*

gessius erat. Qui, promissis suis stans, quum in patriam rediisset, statim cum Oxoniensis Academiae Vicecancellario agebat, et rem eo adducebat, ut sibi quam primum significarentur conditiones cum Wyttenbachio communicandae, sub quibus Delegati editionem Plutarchi suis sumptibus *duplici* formâ, *quarta*, uti dicitur, atque *octava*, excudendam in se recepturi essent.

Paucis itaque interjectis dierum hebdomadibus post discessum *Burgessii* ex Hollandiâ, primum veniebat ab ipso epistolâ ad Wyttenbachium, in qua huic Delegatorum conditiones proponebantur, et Plutarchei negotii veluti janua aperiiebatur. Hanc deinde epistolam sequebantur deinceps quaedam litterae Viri Rev. *Randolphi*, postea Episcopi Oxoniensis, cui illustres Delegati curam conficiendi cum Wyttenbachio pacti mandaverant. Verum interea temporis etiam Societas Bipontina, scriptoribus Graecis et Latinis nitide et emendate editis admodum clara ac conspicua, auctore potissimum *Heynio*, suas conditiones Wyttenbachio offerri curaverat. Et quum hae conditiones aequae honestae ac luculentae essent atque Oxonienses, Wyttenbachius, non nisi re accurate perpensâ et [150] consideratâ, has illis praetulit. Multum scilicet hac in parte apud ipsum valebat Curatorum Academiae singularis benevolentia in promittendis Angliae Codicum collationibus, tum vero etiam ipsius Academiae, opinor, nomen et ἀξιομα. Atque profecto, si recordamur iniquam, duram et miserandam sortem, quam typographia illa Bipontina invasione et libidine Francorum militum postea perpessa est; ratio omnino postulat, ut reipublicae literariae gratulentur, quod Plutarchus Wyttenbachii apud Oxonienses in tuto, nec furiosorum hominum licentiae, uti alia illius typographiae opera, expositus fuerit.

Jam autem, quantum studii ac laboris ab eo inde tempore Wyttenbachius perpurgando exemplari Moralinii Plutarchi impenderit, quantūque cum curā et sollicitudine singula folia emendaverit, dicta incredibile est, atque fidem propemodum excedit. Exemplar, quod utebatur, Graeco-Latinum erat (anni 1624) in folio, cujus quaevis pagina in duas partes, vulgo columnas dictas, divisa erat: quarum altera orationem Graecam, altera interpretationem Latinam continebat. Exemplar vero illud hoc modo perpurgabat. Primum emendabat Graecam orationem ad fidem Mstorum, et necessarias correctiones partim inter ipsas lineas, partim in margine ad latus annotabat. Deinde corrigebat interpretationem Latinam, et id quidem cum ad sententiae veritatem, tum ad Latinitatis rationem. Quae omnia item [151] aut inter ipsos versus, aut in altero latere ab ipso scribebantur. Denique in infimo margine, qui satis latus ac largus erat, minutis literis non modo recensebat Codices, unde correctiones sumtae essent, verum etiam commemorabat illas, quae sibi quidem faciendae viderentur, sed quas in *conten- tum* recipere noluisset, quod non e Codicibus sumtae, sed ex conjecturā natae essent. Ac quandoquidem singulas fere schedas in manibus habui, oculisque lustravi meis; affirmare sane possum, modo verum sit, quod fertur in primis, *Doctos male pingere*, Wyttenbachium in eo valde indoctum fuisse. Omnia enim tam perspicue, terse ac nitide descripta erant, ut nihil umquam majori curā exaratum viderim. Nec mirum. Optimo enim jure in Wyttenbachium conveniunt, quae apud Ciceronem de C. Sulpicio Gallo relata legimus: „*Quoties illum lux, noctu aliquid describere ingressum, quoties nox oppressit, cum mane coepisset!*“

[Quoties illum] Cic. de Senect. c. XIV.



Et vel sîc tamen Wytttenbachius, quamquam in illo laborioso opere Plutarcho summam diligentiam ponebat, eiue quotidie multum temperis impendebat, Bibliothecae Criticae minime obliviscatur. In ordinem redactâ posteriore parte *Annadversionum in JULIANI Orationem Primam*, curabat, ut decima Bibliothecae pars publici juris fieret, nec quidquam in illâ reperiretur, quod auctoris sui ingenio non dignum haberi posset.

Præterea vero sub finem ejusdem anni invitabatur [152] a Bernensis Academiae moderatoribus ad ornandam in patriâ urbe Literarum Graecarum et Philosophiae Moralis cathedram. Cognati et affines ipsius nihil flagrantius cupiebant, quam ut illam vocationem accepturus esset, eumque multis literis rogabant, ut in patriam rediret, e quâ tamdiu jam abfuisset, et in quâ tamen non modo ipsius doctrina et eruditio maximi aestimarentur, verum ipsi etiam aditus ad amplissimos honores obtinendos pateret. Verum Wytttenbachius, etsi natalis soli valde amans erat, tamen ob amorem item suum erga novam et adscitam patriam id a se impetrare non poterat, ut Batavorum terram relinqueret, nec amplius operam suam in erudiendâ juventute Batavâ collocare pergeret. Qui nuntius de recusatione Wytttenbachii quam ad notitiam amplissimorum civitatis Consulum Athenasque Curatorum perlatûs esset, hi annum ipsius honorarium *bis mille et ducentorum* florenorum *sexcentis* florenis augendum statuiebant.

Proximum deinde opus, quo eruditam civitatem anno 1793 beavit, fuerunt *Selecta Principum Historicorum*. Quod opus quamvis, ut ipse in Praefatione testatur, *magis ad studiosae juventutis institutionem, quam ad virorum doctorum cognitionem, compara-*

tus esset; tamen his ipsis eam ob prudentissime et elegantissime scriptam Praefationem, tum propter optimae frugis plenas annotationes, quibus in calce autum et exornatum est, admodum [153] gratum et acceptum fuisse omnino constat, nec aliquâ testificatione indiget. Quantopere autem nostratibus placuerit, et in quam multorum manibus sit, vel ex eo apparet, quod bibliopolae illud nunc jam *tertio* ediderunt.

Caeterum vero et hic et proxime sequens annus (1794) acerbam Wyttenbachio dolorem ac luctum attulerunt obitu egregiorum ipsique carissimorum hominum, *Schultensii* et *Nieuwandii*, quorum animi cum ejus animo mire congruerant, et quorum altero usus erat amico, alterum habuerat primo discipulam, mox item amicam ac familiarem. Utrinsque honorifice et pro meritis in Vita Ruhnkenii p. 207 et alibi meminit.

Porro exarserat interea, post famosam nimirum Francici regni conversionem, calamitosum istud bellum, quo patria nostra a Francis occupabatur, et quo quid nobis acciderit, nemini ignotum est. Wyttenbachius igitur, *victicibus Francorum armis magis magisque appropinquantibus*, inprimis festinabat Praefationem cum reliquâ contextus parte Operum Moralium Plutarchi Oxonium transmittere, *antequam belli flamma muros Batavorum attingeret*, atque libera trajectio ex Hollandiâ in Angliam aut impediretur, aut penitus intercluderetur. Atque ille fasciculus, favente Neptuno, sub finem anni 1794 integer in manus Illustrium Delegatorum pervenit. Continebat vero totum opus Moraliū, quemadmodum [154] Oxonii editum est, exceptâ parte eâ, quae complectitur Fragmenta, Spurious libellos, Animadversiones atque Indices.

*Incidit mox, ut ipse ait, sub initium anni 1795*

---

*Incidit mox*] Vita Ruhn. p. 212.

*altera rei publicae conversio, superiori illi ἀντίστροφος, ejusque vicem rependens.* Wyttenbachius, utpote αἰὲν ὁμολογούμενος ταυτὰ, nunc rursus quoque eodem modo, quo septem annis ante, sese gerbat. Neutri scilicet adversariarum partium adhaerescobat. Populi concionibus, tunc imprimis haberi solitis, nequaquam se immiscebat, et ab omni rei publicae tractatione prorsus abstinebat; ardentissime optans, ut hi, quibus administrandarum rerum provincia publice mandaretur, suas partes religiose et ad communem civium salutem acturi essent. Atque licet nonnulli τὰ πολυπραγμονούντων sum, ut ἀπεχόμενον τῶν κοινῶν καὶ τὰ ταυτοῦ πράττοντα, bonae causae non satis favere crepuerint; tamen nemo in eum jure accommodare poterit legem Solonis, qui volebat bonum civem ἐν στάσει μηδετέρας μερίδι προετίθεσθαι. Nam profecto τῇ πόλει προετίθετο, patriam amplectebatur, siquidem, omisso partium studio, suum munus professorium diligenter obire, et juventutis ingenia doctrinarum accuratâ scientiâ excolere pergebat. Hac ratione patriae se optime consulere, et boni civis partes agere arbitrabatur.

Ita autem sentiens, atque aliis rei publicae tractandae curam honoremque lubens ac laetus [155] relinquens, minime haesitabat profiteri, se *reipublicae praesenti formae acquiescere nec veteris restituendae suasorem adiutoremve futurum*, quam nimirum ista professio haud ita multo post publice omnibus imponeretur, qui muneribus cum stipendiis fungerentur. Utinam hoc exemplum viri docti ad unum omnes secuti essent! — Verum hoc secus fuit. Haud pauci id facere recusantes, vel ipsi sua munera ultro depo-

---

τῶν πολυπραγμονούντων] Vid. Wyt. ad Plut. de S. N. V. p. 13.

nebant, vel illis publicâ auctoritate priuabantur. Cujus calamitatis Academia Lugduno Batava quoque expers non manebat. *Suis doctoribus orbabantur cathedrae, Juris publici, Graecarum, Literarum, Physices et Mathematicarum.* — Ruhnkenius de Graecâ professione imprimis laborabat, *primum, retinendo qui eam deposuerat; tum, illa spe frustratus, vocando novo doctore.* — Is autem novus doctor, quem Ruhnkenius ante omnes reliquos Leidam vocari cupiebat, Wyttenbachius erat. Omnem operam dabat, ut hujus viti sui compos fieret, atque discipulorum suorum optimus et dilectissimus in extremo vitae cursu sibi semper adesse posset. Quocirca Academiae Curatoribus suadebat, ut novam professionem conjunctione Historiæ Philosophiæ cum Literis Graecis pararent. Quod quum ipsis persuasisset, illa professio offerebatur Wyttenbachio cum *quatuor millium florenorum* stipendio. Verum frustra. Multis epistolis ultro citroque missis, quinque etiam quibusdam sermonibus de hac negotio [156] habitis, tandem animadvertibat et sentiebat Wyttenbachius, se illam Leidensem vocationem accipere non posse. Igitur ad Ruhnkenium scribens, *neminem prudentem merito postulare posse, ut ex loco libero et soluto in adstrictum ac laboriosum, idque magno cum rei familiaris suae detrimento, sese conficeret*, in ipsius offensionem adeo incidebat, ut hic nescio quid illiberalitatis ei imputaret. Sed quum Wyttenbachio persuasum esset, se cum ratione egisse, quumque Ruhnkenii amorem erga Leidensem Academiam nosset, cujus salutem ut bonus procurator nisi unice, certe maxime spectaret, illam illiberalitatis insimulationem ei benevole condonabat, nec durius

quid reponebat, quod tamen pluribus de causis facere potuisset, satis habens, a tempore medicinam expectare, neque dubitans, Ruhnkonium, sedato illo offensionis primo impetu, sponte se ipsum potius, quam alios, auditurum esse, atque ad probandas recusationis rationes adductum iri. Quod deinde, uti Wyttenbachius praeviderat, re verà etiam eveniebat. Legimus enim in Vita Ruhnkonii: „*Offensionem diutius, quam pro veteri amore, in animo ejus haerentem tamen adventus meus, quum sexto inde mense, famà de ejus morbo ad me allatà, cum inviserem, ita abstersit, quasi numquam suscepta fuisset.*“

Quae verò rationes Wyttenbachium commoverant ad vocationem Leidensem recusandam, [157] caedem fere magnam partem proximo item anno (1797) in causâ erant, quominus in veteri et nativâ patriâ Bernâ professionem Philosophiae sibi denuo oblatam accipere vellet. Urgebant quidem eum nunc magis etiam, quam antea, amici et cognati, inprimis ambae sorores, desiderio fratris motae, omnesque prae se ferebant, ipsius statum ob Reipublicae conversionem ac temporum difficultatem in Hollandiâ dubium et incertum esse, ipsiunque ideo quamvis aliam conditionem, praesertim in natali patriâ, nunc lubentem accipere et arripere debere: at ille, omnibus accurate circumspectis cogitateque perpensis, tandem suis cum alia, tum haec fere respondebat: „*Laetor profecto Vos saluti meae prospicere velle: laetor item esse in patriâ eruditorum fautores, qui meâ rationem, his praesertim temporibus, habendam esse statuunt. Verum subductâ rationum summa, meum potius, et omnium aliorum, quos in consilium adhibui, iudicium, quam vestram*

*voluntatem, mihi sequendum, et in hac statione mihi manendum esse statuo. Spes praeterea, nec illa obscura, ostenditur, melius brevi futurum. Si fallar, quod Dii avertant, fallar cum ratione. Multos inexpectatos casus humanae res habent, quos ratio nec praevidere, nec cavere possit. At rationem homines sequi debemus. Hanc secuti, quisquis fuerit eventus, conscientia recte diligenterque deliberati consilii nos consolabitur."*

[158] Ne vero quis forte quaerat, cur Wyttenbachius suam Amstelodamensem stationem *liberam ac solutam*, oblatam sibi Leidensem contra ea *adstrictam et laboriosam* vocaverit, ab hoc loco haud alienum mihi videtur paucis referre, quam commoda et jucunda Wyttenbachii statio Amstelodamensis fuerit. Munere professorio fungebatur *libero*, h. e. nec Academiae Senatûs difficultatibus et oneribus obnoxio, nec scholis de Literarum Humaniorum ambitu constitutis circumscripto. Quascumque vellet habere scholas, sive *Latinas*, sive *Graecas*, sive *Historiae* cum Universae, tum Literariae, sive denique *Antiquitatum*, tam Graecarum quam Romanarum, id ipsi omnino liberum et integrum in Athenaeo Amstelodamensi erat. Nemini Collegarum scholis suis vel minimum crumenae detrimentum afferebat. Nullius invidiam excitabat. Quo plures habebat, eo majorem gratiam apud Amstelodamenses inibat. Quemadmodum ipse Athenaei flore vigeat, sic Athenaeum scholis ejus florebat. Porro erat munus ejus professorium ab omni inanum officiorum lege ac necessitate penitus immune: totam referebatur ad unum institutionis opus: satisque temporis tam ad privata studia, tum ad laboris relaxationem ipsi relinquebat. Praeterea, quoniam longo temporis usu animadverterat, Litoris honorem Amstelodami in-

primis haberi, seque civibus suis satisfacere, et ab illis amari ac magni aestimari, indies [159] magis magisque Amstelodami radices agere coeperat, et ejusmodi quidem radices, quae non nisi gravi convulsione ipsius quasi trunci et corporis, nec non rerum externarum ingente jacturâ extrahi possent.

At vero has radices, temporis diuturnitate altissime actas, haud ita multo post, mortuo Ruhnkenio, tamen evelli, seque, ut ita dicam, in aliud solum transferri passus est. Quod quomodo evenerit, ut nunc exponam, temporis et rerum ordo omnino postulant. Neque dubito, quin aequi et boni lectores ex hac quamvis brevi relatione mea intellecturi sint, Wyttenbachium in hoc negotio unice officium ac pietatem secutum esse, minime vero, quod nonnulli invidi et malevoli obtrepatores crepuerunt, crumenae stae consuluisse.

Quum igitur Ruhnkenius, mense Maio, anni 1798, diem supremum obiisset, relictâ infelice familiâ, defuncti superstitibus amici quovis modo illi calamitosae demui opem ferendam esse statuebant. In his quoque erant Curatores Academiae Lugduno-Batavae, qui pollicebantur, sese causam familiae Ruhnkenianae suscepturos, modo Wyttenbachius voluntati ipsorum obsequi, atque, confecto negotio, Leidam migrare vellet. Hoc nuntio Amstelodamum perlato, videbat Wyttenbachius, rem eo venisse, ut utraque conditio conjungeretur, et serio deliberabat, quid sibi faciendum esset. Quocum primo id communicaret, *Boschius* erat. Hic vero ad ipsum continuo [160] accurrebat, *docens, monens, postulans, ne luculentam stationem, urbem gratam, et quasi adoptivam patriam, multos sui et*

*amantes et studiosos relinqueret. Deinde alii quoque amici ad eum veniebant, rogantes, ut Amstelodami maneret, ubi ipsius merita ab omnibus, qui aliquid saperent, grato animo agnoscerentur. Denique eo accedebat Epistola studiosorum Athenaei juvenum, qui magistrum etiam atque etiam orabant, ut ne Athenaeo valedicturus Leidam migraret. Habebat illa profecto magnam vim ad dubium Wyttenbachii animum magis etiam commovendum. Postero enim die discipulos suos in scholâ ita alloquebatur: „Non debeo committere, quin Vos, hac lectione frequentes appellam de re, quae ad Nos omnes pertinet. Magnum hesterno die mihi dedistis documentum amoris erga me Vestri benevolentiaeque, quod ego tacitus praeterire nullo modo possum. Legastis duos ad me ex vestro ordine sodales, qui Literas mihi vestrorum omnium nominibus scriptas ac subscriptas traderent, quarum literarum hoc erat argumentum, Vos audivisse, me Leidam suscipiendo muneri professorio vocatum de eo accipiendi deliberare, Vos igitur omnes vehementer optare, ut, si fieri posset, praesentem oblatae stationi praeferrem, et apud Vos manerem. Quae Vestris respondi sodalibus, eadem ad Vos praesentes itero. Omnino ita se res habet. Jam dudum, et quod excurrit, sunt menses, quod Leidam invitator magnâ sollicitatione, magnâ item [161] hortatione virorum doctissimorum, quorum apud me plurimum valet auctoritas. Res quidem mihi non amplius est penitus integra, nec tamen captum est consilium. Quod quum in eo essem ut jamjam caperem, ecce supervenit vestra epistola, et legatio cum significatione vestrae erga me caritatis ac benevolentiae, quâ, quod vere possum dicere, inde a longo tempore nihil jucundius ad animum meum*



*accidit. Igitur hoc vobis affirmo, hanc vestram significationem magnum apud me in capiendo consilio pondus, magnumque momentum habituram. Cacterum quicumque mei consilii exitus, aut domicilii locus futurus sit, vobis ex animo polliceor, me semper operam daturum, ut vestro amoris respondeam, vestrisque utilitatibus, commodis studiisque serviam.*"

Quam cara igitur Wyttenbachio disciplinae necessitudo fuerit, et quomodo communem illam discipulorum benevolentiam et caritatis significationem amore verè paterno exceperit, ex hac allocutione sane quam manifestissime apparet. Atque propterea magis etiam viri constantiam et animi magnitudinem admirari debemus, quam in perficiendo consilio suo tam luculenter demonstravit. Quid enim quaerebat Wyttenbachius, qui, ut antea Leidensem cathedram aliquoties sibi oblata recusaverat, nunc quoque illius minime cupidus erat? Quid desiderabat, quum honorificentissima Amstelodamensis statio omnia ad *εὐκλείαν* et *εὐδαιμονίαν* conducibilia [162] ipsi largiter suppeditaret? Nihil profecto aliud quaerebat, nihil aliud spectabat, nisi ut familiae Ruhnkenianae honesta ratione consulere atque prospiceret. Eo omnis viri cura et sollicitudo tendebant. Hic ipsi labor, hoc ipsi opus erat. — Quid igitur? Quum sese hujus voti non modo compotem fieri non posse videret, verum etiam omnem operam suam omnino irritam fore sentiret, nisi stationem Leidensem acciperet, ac Ruhnkenio succederet; tunc profecto neque amicorum roagationibus, neque discipulorum precibus, neque ullis aliis omnino lenociniis se a proposito suo abduci passus est. Immo honestatem et officii pietatisque sancte servatae conscientiam multis illis ac magnis commodis vitaeque suavitatibus anteposuit, quas

Amstelodami per tot annos perceperat, seque Leidam venturum pollicitus est, quamprimum inter Academiae Curatores ipsumque de conditionibus convenisset.

Quis hic non agnoscit veritatem effati Ciceronis, ubi dicit, *nos multa facere amicorum causâ, quae nostrâ causâ nunquam faceremus?* At vero quam gratus et acceptus ille nuntius de futuro Wyttenbachii adventu in Academiam Leidensem amplissimis Curatoribus fuerit, vel ex eo inprimis intelligi potest, quod non modo, quae ad vocationis peractionem pertinerent, continuo a Curatoribus susciperentur, nec de die, ut subinde fit, in diem protraherentur, verum etiam quod [163] mox ad effectum adducerentur, quae antea frustra tentata erant. Nam non nisi posteaquam Wyttenbachius certo affirmasset, se Curatorum Leidsensium vocationi obtemperaturum, evenerunt illa, quae in Vita Ruhnkenii his verbis relata legimus: *Curatores Academiae persuadebant Senatui Reipublicae Batavae, ut Ruhnkenii librariam supellectilem, locupletem illam cum optimis libris, tum ipsius adversariis et scriptis, tum vero iheditis Veterum codicum exemplis, vindicaret adderetque bibliothecae Lugduno-Batavae, pretiique loco vectigal annuum viduae filiabusque duabus, quingentos in singulas florenos, constitueret.*

Attamen, interea dum haec agerentur, fatalis quaedam necessitas Wyttenbachium, nihil tale opinantem, admodum afflixit. Filia natu major sororis ejus, quae Hanoviâ Amstelodamum venerat, et avunculi rem domesticam administrabat, in Eemnessano ejus horto correpta acutissimo morbo intra paucos dies in ipso

---

*nos multa facere*] Cic. de Amic. c. XVI.

*Curatores Academiae*] Vita Ruhnk. p. 265.

juventutis flore opprimebatur. Qui casus quantopere optimum virum affecerit, ex his ejus verbis optime cognosci potest: „*Habuit hic ipse annus (1798) multum mihi privatim tristitia et adversa, cum alia, de quibus dicere non est opus, tum duo acerbissima ad animi mei dolorem funera. Primum, ipsius Ruhnkenii obitu, quantopere me commoveri fas fuit? quo amisso, simul et parentis affectum, et doctoris lumen, et amici fidem, et familiaris jucunditatem, et omnino maximam vitae [164] suavitatem desidero. Deinde, quum ex hoc me dolore aliquantum erigere, eumque vitæ viri conscribendæ solari coepissem, ecce! domesticum incidit vulnus! suavissima et filiae instar dilecta neptis, rei meae familiaris et adjuvmentum et ornamentum, in ipso juventutis flore, funesto morbo intra paucos dies domi meae exstinguitur. Qui casus sanequam suæ gravitate me vehementer perculit.*“

Jam autem ab eo inde tempore, quo Wyttenbachius, pietatis officium expleturus, Leidam abiit, ipsius vitæ extremus quasi actus incipit. In quo quos et quales partes egerit, nunc jam nobis videndum erit.

Ergo post *duodetriginta* fere annos, Amstelodami in summâ studiorum vitæque tranquillitate transactos, cathedram Leidensem accepit, et quidem iisdem titulis, quibus Amstelodamensem in Athenæo obtinuerat. Vocatus enim est *Professor Eloquentiæ, Historiæ, cum Universalis, tum Literariæ et Philosophiæ, Antiqvitatum, Literarum Humaniorum, et Graecarum et Latinarum*, nec non *Bibliothecarius*; idque cum honorario quinque millium florenorum, et onerum *Academicorum immunitate*. — Hoc novum munus

die 4 Maii 1799 auspiciatus est Oratione adituali, *De adolescentiâ DAVIDIS RUHNKENII in exemplum propositâ adolescentibus Batavis bonarum artium studiosis.* — Quod argumentum sane et tempori, et loco, et rebus Wytttenbachii valde accommodatum erat. Ruhnkenius enim non [165] modo decessor, magister, amicus et alter veluti parens Wytttenbachii fuerat, sed illius etiam merita, cum generatim in rem literariam, tum singulatim in Academiam Lugduno-Batavam, tanta exstiterant, quanta potuerint maxima. Atque idcirco non satis mirari potui levitatem istorum, quos primum magnopere illius Orationis Argumentum probasse, sed postea idem illud tamquam auspiciandae cathedrae parum conveniens culpasse scio. Verum tanta est subinde nonnullorum hominum animi varietas, ut ipsi nescire videantur, quid quaerant, aut sibi velint, atque ut ita levitate suâ ipsi suam simul stultitiam vel ultro prodant. Etenim quis non exclamet, talia audiens, *O curas hominum! o quantum est in rebus inane!* Atque propterea etiam Wytttenbachius optimo jure isti malesedulorum homuncionum vanitati non nisi *πλὴν γέλεα* opponebat, eosque ipsos tamquam pueros ludere, et longâ in arundine equitare sinebat.

Quum vero universa Literarum Humaniorum professio ipsi a Curatoribus mandata esset, id sibi imprimis agendum censebat, ut huic muneri suo, quoad posset, quam religiosissime satisfaceret. Quâ de causâ veterem illam in docendo viam, quam Amstelodami per tot annos summo cum fructu et maximâ intelligentium approbatione tenuerat, item Leidæ sequebatur. Quadruplicis generis scholas habebat, quarum aliae ad Historias, [166] aliae ad Literas Graecas, aliae ad Literas Latinas, et aliae denique ad Antiquitates pertinebant. Atque omnino satis constat, Wytttenbachium

suâ eruditione ac docendi solertiâ has scholas, quae sub adventum ejus fere extinctae et propemodum intermortuae erant, rursus ad vitam revocasse, Literarumque disciplinam in Academiâ Lugduno-Batavâ ad pristinum florem adduxisse, ita ut haec, ipso in eâ Literarum Humaniorum professionem administrante, neque famae commendatione, neque alumnorum uberimo proventu cuiquam alteri Academiae facile cederet.

Attamen vix dictu credibile est, cum quot et quantis difficultatibus Leidae aliquamdiu luctandum Wyttenbachio fuerit, qui Amstelodami in summâ vitae felicitate vixerat, et perpetuâ tranquillitate, nemine ei invidente, nemine cum obtrectante, suas partes egerat, suum officium secutus erat, et de quamplurimis bene mernerat. Nam non modo ante adventum ejus in Academiam Leidensem jam multorum animi adversus eum occupati, et varii rumores maligni ab inimiciis de eo sparsi erant, verum etiam postea multorum ingratum animum saepius expertus, et a malevolis passim petitus est. — Potuisset quidem inâitio aliquam illarum difficultatum partem evitare, si nimirum istis artibus uti voluisset, quibus haud pauci indoctae ac levioris multitudinis favorem ac plausum venari et captare solent; sed ipsius natura ab omnibus istiusmodi dolosis [167] machinationibus penitus abhorrebat. Se suamque existimationem non nisi recte factorum conscientiâ et diligente institutionis disciplinâ tueri volens, in id unice incumberebat, ut doctis ac melioris notae juvenibus quam maxime prodesset. In horum benevolentia et caritate acquiescens, vulgivagos obtrectatores excelso animo despiciebat, eorumque injuriam patienter ferebat.

Primum doctrinae monumentum ab ipso post mortem Ruhkenii editum hujus viri *Vita* fuit. Illa enim

Oratio aditialis, cujus modo memini, non separatim excusa, sed huic descriptioni tamquam particula ejusdem argumenti inserta est. — Verum factâ hujus *Vitae* mentione, plane ignoro, quid et quomodo de eâ dicam. Num laudes ac merita ejus praedicem? Hoc non modo longè longeque supra virium mearum mediocritatem esse, ultro ac lubens fateor, verum etiam nè opus quidem esse videtur. Exteri pariter atque nostrates cum in ephemeridibus, tum in aliis scriptis, hoc Wyttenbachii opus tamquam suis numeris absolutum veluti certatim laudarunt. Interim tamen hoc unum silentio praeterire nolim, quod mihi fide dignus testis aliquando narravit. Quidam nimirum Ruhnkenii amicus, civitatis Lugduno-Batavae magistratus curulis, idemque vir et eruditissimus, et in muneris sui officiis obutundis diligentissimus, hunc librum legens, suavitatis ac praestantiâ ejus adeo delectabatur et tenebatur, ut legendo [168] satiari non posset, nec tempus eundi in Senatum sibi jam adesse animadverteret. Igitur arcessitus, ad amicum sibi obviam factum dicebat: „*Hodie expertus sum, quod numquam antea mihi accidit. Legi illam fabulam Milesiam Latine scriptam, quâ a Wyttenbachio sub nomine Vitae Ruhnkenii edita est; ejusque lectio me adeo cepit, ut non nisi admonitus et vocatus domo exierim in curiam.*“ Quod quamvis lepide ac jocose dictum, quam vere dictum sit, non statuam. Etenim licet quis forte contendat, in illo libro plures digressiones, quamvis elegantissimas et eruditissimas, at digressiones tamen, exstare, quâe ad Ruhnkenium non proxime pertineant, et idcirco ejus titulum omnino mutandum esse censeat; tamen eum *Fabulam Milesiam* appellari nolim. Potius, et fortasse majori jure, *Historia Literaria aetatis Ruhnkenii* vocetur. Sed suum quisque hac in re

sequatur iudicium. Equidem malo librum, cui in titulo non promissa insint, quam cui promissa desint. Caeterum, quod ad *Vitam Ruhkenii*, quam legi, relegi, excerpsti, et propemodum edidici, illam mihi quam plurimum ad doctrinae fructum profuisse, semper gratissimo pectore agnoscam, nec prae me ferre unquam desinam.

Interim biennium praeterierat, nec Plutarcho manum admoverat Wyttenbachius, quum ante fere quotidie in illo exornando occupatus fuisset. „Quum, inquit, *conscripta jam priorē parte, ad alteram conscribendam accederem, incidi in quasdam temporum vel difficultates, vel varietates, quae me in proposito opere retardarent. Obiit Ruhkenius noster: ego Leidam migravi: nova negotia, literata et illiterata, μυστικά et ἀνοήτα: tum adversa fortuna fasciculi chartarum Plutarchearum in Britanniam missi, in itinere amissi, diu desiderati, jam conclamati, denique post duos annos et dimidium ab interitu retracti. Quae mihi fortuna, irreparabilis jacturae dolore, diu taedium fecit operis Plutarchei persequendi, nec nisi tarde ac sero ejus studium renasci sivit.*“ Quae paucis verbis relata aliquanto fusius exponam.

Priores fasciculos, chartarum Plutarchearum tradiderat Wyttenbachius anno 1794 Legato Britannico stationem Hagae Comitum habenti, hujusque beneficio et humanitate salvi deinde et integri in manus Illustrissimi Delegatorum Oxoniensium pervenerant. Sed quum quadriennio post, bello inter Britannos ac Batavos interea exorto, non amplius hac opportunitate frui posset, nec sua multorum annorum studiis ac

lucubrationibus elaborata scripta temere bellicis periculis et notae hominum, maritimorum libidini exponere vellet; se rursus per epistolam convertebat ad *Randolphum, V. R.*, quocum solo hucusque de negotio Plutarcheo egerat, eumque rogabat, ut sibi certam vecturae viam indicaret, quâ Plutarchi scripta, quae parata haberet, minimo [170] cum periculo in Angliam pervenire posse judicaret. Erant autem illa scripta, *Fragmenta* Plutarchi; porro libri de *Fluminibus, Nobilitate, Homero, Proverbiis, Metris*; et denique *Praefatio ad Animadversiones* et *Disputatio de spuria auctoritate libri Περὶ τῶν καλῶν ἀγωγῶν*.

Accepto responso, mittebatur mox anno 1798, ex sententiâ Illustris Delegati, cistula pice oblita, et omni solertiâ adversus maritimi itineris injurias undique munita, Hamburgum ad clari nominis et mercaturae laude insignem ac florentem virum, *Rowohl*, qui eam Honoratissimo Equiti *Crawford*, Legato Britannico, Oxonium mittendam traderet. Quae quum Hamburgum venisset, ac Legato Britannico, mense Novembri, salva et incolumis tradita esset; Rowollius de eo statim Wyttenbachium certiore faciebat. Hic igitur, nullâ interpositâ morâ, per epistolam a Randolpho V. R. petebat, ut sibi, acceptâ cistulâ, rescriberet, nec nimis diu in incerto esse sineret. Ad quam vero epistolam quum Randolphus V. R. non responderet, certe Wyttenbachius nihil responsi acciperet, alteram, tertiam, et plures deinceps ad eundem V. R. mittebat. Verum frustra: Oxonio nulla responsio Leidam afferebatur. Eo fiebat, ut Wyttenbachius, diuturnius silentii pertaesus, non sine ratione crederet, se irreparabile damnum missis in Angliam scriptis suis fecisse, ut ad nomen Plutarchi tremor ejus [171] artus occuparet, neque omnino a se impetrare posset, ut



ad opus depositum denuo inchoandum accederet. De quâ calamitate sub finem anni 1800 haec ad me scripsit: „Nosti me chartas Plutarcheas cistulae diligenter inclusas ante hoc biennium misisse Hamburgum, illasque salvas et incolumes illuc venisse. Sed quid iis postea acciderit, plane ignoro. Ad complures meas epistolas, plenas illas sollicitudinis, quas Oxoniensi Episcopo misi, hic omnino surdus et immotus mansit. Igitur has schedas meas in itinere intercidisse, meque irreparabilem jacturam fecisse, vix dubitem. Britanniam certe literis non amplius urgebo, quippe meas voces littora surda bibunt. Et quum conscriptio illarum chartarum totius quadriennii improbo labore mihi constiterit, egoque illas altero tanto temporis denique conficere nec possim, nec velim; operae Plutarcheae finem facere constitui.“

Verum istam rei literariae imminentem calamitatem Fortuna omnino avertit. Quum enim Wyttenbachius continuis amicorum flagitationibus, ut nimirum a proposito suo desisteret, tandem commotus esset, ipsorumque suasu ad plures preli Oxoniensis Delegatos uno eodemque tempore literas dedisset, eosque obsecrasset et obtestatus esset, ut suam auctoritatem interponerent, ac quoquo modo efficere studerent, ut cistula amissa omni sedulitate indagaretur, et ex fugâ quantocyus retraheretur; tandem evenit, ut indefesso [172] principum virorum Britanniae studio illa, quum duos annos et dimidium Hamburgi in angulo nescio quo latuisset, ex latebris in lucem produceretur, et producta Oxonium, mense Maio anni 1801, salva perveniret. Quo nuntio Randolphus V. R. beavit Wyttenbachium, haec ad eum scribens: *Tandem aliquando, Vir optime, de cistula Tua tamdiu desiderata Te*

*prorsus securum esse jubeo, et omnem sollicitudinem deponere. Etenim ea penes me est, curâ et humanitate Illustrissimi Ducis de Portland hesterno die ad me delata. Neque in tanto itinere, vel potius in tantâ itineris morâ quidquam detrimenti passa est: immo nitent omnia tamquam recenter descripta.*"

Sic quidem igitur Plutarcho, ut dixi, biennium et amplius periit; at vero nec Academiæ, nec Wyttenbachio periit; quippe cui nihil prius et antiquius erat, quam disciplinae suae alumniis viam indicare, quâ ad veram Literarum scientiam pervenire possent, eosque variis praeceptis erudire, et ad humanitatem informare. Per illud enim temporis intervallum, quum sibi haud paucos bonae indolis et discendi cupidos juvenes obtigisse videret, non modo Historias et Antiquitates accurate ac copiose illis explicuit, suamque institutionem in Graecis Literis diligente optimorum scriptorum interpretatione ornavit, verum etiam scripta Ciceronis philosopha *De Legibus, De Officiis, De Senectute, De Amicitia, Paradoxa* et alia, [173] nec non quosdam poëtarum libros ad scholarum usum accommodavit, *et in scholis suis interpretatus est ad eum modum, qui fere novae editionis instar esset.* Quo sane evenit, ut non modo isti invidi obtrectatores, qui ejus disciplinam labefactare, ejusque auditorium, nisi ad vacuitatem, certe ad infrequentiam redigere manibus, ut ajunt, pedibusque conati erant, sese turpiter deceptos et elusos viderent, verum etiam ut ipse ex discipulorum suorum progressibus summam voluptatem ac dulcissimam studii laborisque sui mercedem pereiperet. Atque quantâ benevolentia illos melioris notae juvenes ob literarum communionem

amplexus sit, quantoque hi vicissim amore ipsum pro  
 disciplinae necessitudine prosecuti sint, ex singulorum,  
 tam magistri quam discipulorum, scriptis adeo mani-  
 festum est, ut sane nemo eorum hac in parte alterius  
 cujusdam testimonio indigeat. Erant vero in illà co-  
 horte, et, ut ita dicam, in illo flore discipulorum,  
 quibuscum tunc tanta et disciplinae et benevolentiae  
 necessitudo Wytttenbachio intercederet, cum alii naturae  
 et morum bonitate admodum spectabiles juvenes, tum  
 autem duo, ipso quidem iudice Wytttenbachio, ob eru-  
 ditionis quoque praestantiam inprimis laudabiles, no-  
 bilissimus *F. G. Lydenus* et ornatissimus *Ph. G. Heusdius*: ille egregià *Disputatione Historico-Criticà*  
*De Panaetio Rhodio*, hic eximio *Specimine Cri-*  
*tico in Platonem* [174] clarus. Neque profecto ignotum  
 est, quanti Wytttenbachius horum amborum factos in  
 Literis progressus aestimaverit. Non modo in Biblio-  
 thecà Criticà et alibi utriusque laudes ex merito prae-  
 dicavit, verum etiam in Epistolis ad amicos ipsorum  
 honorificentissimam mentionem fecit. In manibus ha-  
 beo scriptam a Wytttenbachio epistolam ad *literarum*  
*laude florentissimum* quemdam virum, in quà haec  
 leguntur: „Mitto Tibi duo munuscula: alterum Dis-  
 putationem *de Panaetio*, disciplinae meae alumni,  
 studiosae nostrae juventutis et nobilitate et doctrinà  
 principis, qui mirificos fecit in Literis nostris pro-  
 gressus, ut non dubium sit, quin brevi tempore ad  
 illum gradum eruditionis perventurus sit, ut inter  
 principes *Literarum viros* nomen ejus celebretur,  
 modo ab interpellatoribus non advocatus continuo  
 eundem cursum tenuerit: alterum Specimen Criticum  
 in *Platonem*, cujus auctor item ex disciplinà no-  
 strà prodiit, quique futurus Platonis, ut spero so-  
 spitator erit, in *Trajectinà Literarum cathedrâ* Saxio

*et Segario successit, et, quamvis nunc jam quidem illam Academiam ornat, in posterum tamen majori etiam ornamento erit.*"

Licet autem, ex quo tempore ipsum Episcopus Oxoniensis de allatis in Britanniam chartis Plutarcho certiores fecerat, ad reliquam operis partem conficiendam subinde sese dederit, ac multa quidem moverit, tamen initio parum promovit. Ipse hoc testatur [175] in Epistola ad Heusdium his verbis: „*Quinque sunt anni, quod Rulnkenius obiit: quatuor, quod Lugdunum migravi. Horum quinque annorum quotam partem putas me Plutarcho tribuere potuisse? Sex menses, ne hos quidem continuos. Hoc sex mensium spatio confeci Animadversiones in Moraliū paginas priores centum, a libello De Educatione ad Consolationem Apollonii. Et hucusque profeceram, quum ecce, denuo belli tempestas intonat, post brevem pacis usuram nondum recreatā patriā, immo tamquam primae quietis dulci somnio lactatā et mox excussā.*“ Loquitur autem de pace Ambianensi, quam alio loco eleganter dicit nos magis somniasse, quam percepisse.

Quomodo autem ab illo inde tempore, quod in gratiam cum Plutarcho redierit, in illo studio versatus sit, non melius, nisi ipsius Wyttenbachii verbis, me referre posse opinor: „*Caeterum, inquit, ex quo me ad instaurandum opus retuli, bipertitas feci pensorum vices, hibernas et aestivas: ut per has ruri Scriptores quosdam, maxime Plutarchi habitā ratione, relegerem et exciperem: per illas in urbe et*

---

*Quinque sunt anni*] Ep. ad Heusd. in Spec. Plat. p. XXXII.

*Caeterum*] Bibl. Crit. P. XI. p. 4.

*justâ librorum copia animadversiones Plutarcheas conscriberem. Sed habet utrumque pensum suas retentiones et quasi inlibitiones. Nam in relegendis Scriptoribus nonnumquam sunt, qui me per aliquot menses teneant, ut illis tractandis tantum operae impertiam, quantum vix plerique eorum editores [176] impertivisse videntur. Et in animadversionibus quivis fere versus nobis manum injicit propter frequentiam; saepe etiam obscuritatem, doctrinae Plutarcheae, nec progredi nos patitur, nisi ei curam et diligentis interpretis officium adhibuerimus. Ita fit, ut, quo accuratius agere velimus, eo plus temporis insumendum sit: moveamus multum, parum promoveamus.“* Scriptores, vero, quos Wyttenbachius, quamvis antea jam lectos, hoc tempore Plutarchi gratiâ denuo se relegisse dicit, inprimis *Philo Judaeus, Athenaeus et Plotinus* fuerunt. Mense Sept. a. 1804 haec ad me scripsit: „*Commentarium Plutarcheum perduxi usque ad libellum De superstitione, quem primum tractabo in hibernis, quod unum est tempus Plutarcho destinatum. Hanc rusticationem dedi Philoni Judaeo retractando, quem ante hos triginta annos jam legi. Atque hac iteratâ lectione animadverti multa ab aliis nondum animadversa, quâe partim ad orationis emendationem, partim ad sententiae interpretationem pertinent, et a me aliquando edentur. Est enim Philo perdoctus sane et disertus scriptor.*“

Sed quum longi et laboriosi operis perpetua continuatio plerisque omnibus hominibus tandem molestiam et taedium creare soleat, neque quidquam magis e re doctrinarum studiosi cultoris sit, quam omni curâ et solertiâ evitare, ut ne sibi tale quid accidat, prudenter sane scripsisse, censendus est Wyttenbachius,

ubi dicit: „quando non possumus quod volumus, [177] debemus velle agere quod possumus, observare opportuna ad agendum tempora, ubi exstari nos et alacriores ad laborem fieri sentimus, eaque tempora subito se offerentia subito arripere ac sequi, sepositis, quoad ejus fieri potest, ordinariis negotiis.“

Atque hoc praeceptum non verbis tantum commendavit, verum factis quoque probavit. Quotiescunque animum suum, si Plutarcheae materiae tractatione defatigatus esset, novâ quadam scriptione recreare vellet, genio suo hac in parte statim obsequebatur, et ab illo opere ordinario ad aliud deinceps et aliud extraordinarium, tamquam ad quoddam *πάρεργον*, transibat; nec tamen unquam τοῦ ἔργου obliviscebatur.

Huic igitur studiorum varietati debemus *Epistolam ad Heusdium*, quam anno 1803 scripsit, et in quâ cum summi amoris significatione de illo *Specimine Platonico* gratulatur discipulo suo, atque non modo ipsius eruditionem merito laudat, verum etiam suae ipse juventutis recordans, suaviter enarrat, quomodo olim Platonis amore captus fuerit, et editionem illius philosophi sibi quondam informaverit. Quae omnia tam eleganter, tam copiose ac diserte describuntur, ut hebes omnino censendus sit, quem illa Epistola non admiratione praestantissimi viri impleat. His porro variandis laborum vicibus editionem *Phaedonis* acceptam referimus. Quum sentiret, muneris sui officium et rationes postulare, [178] ut Platonem in scholis interpretaretur, atque illius exemplaria non adessent, frustra e Germania arcessita essent; subito animi ardore incitatus ad illud opus statim accessit, et istum quam maxime aerumnosum ac taedii plenum

laborem corrigendorum speciminum typographicorum lubens pertulit, quamvis altero oculo jam adeo laborans, ut subinde a legendo et corrigendo desistere cogeretur. — Denique ad Bibliothecam Criticam animum advertens, *Age*, inquit, *ad eam absolvendam tandem quoque accedamus! Urget debiti religio: debemus et lectori et bibliopolae absolutionem inchoati libri, et Boschio nostro, optimo viro, munusculum.* Quā semel susceptā scribendi voluntate, erat, quod vulgo dicitur, *ἄμα τὸν ἀμα ἔργον*. Non modo undecima pars illius operis mox prodibat, sed sequentis quoque haud exigua portio scribi coeperat.

Britanni interea, ignari eorum, quae Wyttenbachius ageret, Plutarchi absolutionem avidè expectabant. *Randolphus*, V. S. R., hoc popularium suorum flagrans desiderium Wyttenbachio his verbis significabat: „*Crescit in dies apud omnes, qui in hac regione Graecarum Literarum studiosi sunt, de statu et progressu laborum tuorum cura et anxietas, interrumpi editionem Plutarchi aegre ferimus, prolo eam redonari maxime optamus.*“ At Wyttenbachius fortunam adversam prioris cistulae adhuc probe recordans, et praeterea intelligens, [179] intercluso com-  
meatu non nisi magno cum periculo quidquam in Britanniam a se mitti posse, hoc transmittendarum chartarum negotium in tempus magis opportunum, aut ad pacem confectam rejicere malebat. Verum mox superveniebant aliae rursus ab Episcopo literae, in quibus de vecturae via ac ratione haec scripta erant: „*Quod ad Plutarchum attinet, gaudemus valde, Te inter tot moras, tot tantisque negotiis implicitum, eo usque processisse, et longe maximam partem Commens-*

*tariorum Tuorum in Primum Volumen concessisse, ita ut pretii nostri labores redintegrari possent, quod maxime optamus, si vecturae ratio satis certa reperiri queat. In hunc finem itaque sedulo operam dedi, ut viam aliquam invenirem, quae Tibi satisfaceret. Unicus erat quaerendi locus inter mercatores, qui jam nunc commercium, si non liberum, at non nullum, nec leve illud exercent, nec de vecturae securitate in rebus quantivis pretii diffidunt. A mercatore igitur Londinensi didici, se habere amicum et negotiorum participem Amstelodami, Jacobum Kramer, cui si concedatur aliquid illius generis, ipsum apud se fasciculum retenturum, donec occasio daretur tuto illum ad nos transmittendi; esse autem eum virum, cui tuto credi possit. Penes Te est de ejus honesta fama Te ipsum certiore facere, aut etiam ipsum adire, et ex ipso sciscitari de vecturae natura et securitate."*

Ad has plenas benevolentiae et humanitatis [180] literas Episcopo, V. S. R., mox haec rescribebat Wytttenbachius: „Sub idem fere tempus, quo proximas Tuas, Vir S. R., literas accepi, scripsit ad me Jacobus Kramer, mercator Amstelodamensis, sibi et facultatem et voluntatem superesse hujus missionis procurandae. Quid ei responderim, fortasse ex ipso per alias cognoveris: neque tamen facere possum, quin Tibi quoque, Vir S. R., referam et disertius explicem. Nondum mihi ex memoria excidit, neque unquam vivo excidet, quantum adhuc laboraverim de fasciculis Plutarcheis in Britanniam transmissis, cum omnibus, tum praesertim illo per Hamburgensem difficultatem intercepto. Et nunc nonnulli spectati prudentia et negotiis mercatores nostri mihi recipiunt de transmissione, nec tamen



*sine periculo et exceptione. Et ipse ego satis intelligo, quanto nunc pluribus, quam antea, apud nos exportatio et navigatio difficultatibus casibusque subjecta sit. Optandum erat, ut nostris chartis incolumitas praestari posset, ea cautione, quam negotiatores nomine assecurationis usurpant. Nunc illa ratio non cadit in nostram materiam, ut unicam et irreparabilem; cujus solvendarum una superest cautio, ut ejus exemplum describamus, quod apud nos servemus. Hoc feci ante hoc undecim annos in Praefatione Plutarchae. Habebam, qui scriberent; habebam unde scribentibus mercedem solverem. Mutatae jam sunt res nostrae. Ut sint, qui scribant, non est unde solvam: certe res meae tantum dispendium non [181] ferunt. Igitur si apud Vestras Literarum Graecarum studiosos, ut scripsisti, tanta est expectatio et quasi flagitatio Commentarii nostri, atque, ut ita dicam, — tantus amor chartas cognoscere nostras; spero fore, ut Illustres Viri Delegati huic desiderio extraordinarium sumtum sexaginta librarum Anglicarum gratificentur. Haec enim summa eroganda erit in describendi mercedem totius reliquae partis. Hoc si Viris Illustribus placuerit, mihi et significaverint, et syngrapham miserint, quod pecunia mihi numeretur; statim negotium dabo scribis, ut intra paucos menses, quantum paratum erit Commentarii ad Vos mittatur. Paratus autem erit commentarius ad totum Primum Volumen. Quod de sententia quid statuerint Viri Ill., ut me primo tempore certiore facias, Te, Vir S. R., etiam atque etiam rogo.“*

Verba non data esse Wyttenbachio, atque Britannos re verâ nihil magis cupivisse, quam ut commentarius Wyttenbachii Plutarcheus primo quoque

tempore ad publicam notitiam produceretur, et sic flagranti multorum desiderio satisfaceret, hoc vel ex eo constat, quod, simulatque Episcopus rogationem Wyttenbachii cum Illustribus Collegis suis communicasset, hi illam statim ad unum omnes ratam haberent. Testis mihi est ipse Episcopus, quem mense Julio 1803 haec ad Wyttenbachium rescripsisse video: „*Nunc me sollicitum habet Commentarii Tui Plutarchei, in quantum eum elaborasti, ad nos deportatio. Non possum [182] certe non laudare consilium istud, quo exemplum ejus describere, et apud Te servare destinasti, ne in una jactura tota res periclitaretur. Concedo etiam libenter, si res Tuae tantum dispendium non ferant, aliudrum ope et auxilio necessitatem istam sublevari oportere. Itaque non moratus sum hanc Tuam petitionem Delegatis nostris referre, qui decreverunt, sumtum istum extraordinarium sexaginta librarum in describendi mercedem ex tuis redditibus tibi gratificandum esse, et mandarunt dimidium istius summae statim in hunc usum erogari, reliquum, prout opus fuit, erogaturi.*“

Confecta hac pactione, mandabat Wyttenbachius continuo scribis negotium describendi, et mittebat sub finem anni cistulam Amstelodamensi illi mercatori Jacobo Kramer, cujus viri honestissimi curâ ac diligentia Oxonium salva et integra mense Martio anni 1806 pervenit.

Temporis series nunc me cogit infandum renovare dolorem. Novimus initio subsequentis anni, die 12 Januarii 1807, horrendam cladem vastasse Leidam urbem, quum navigium pulvere pyrio oppletum exardesceret, terribilis flamma inde erumperet, unoque fatali ictu aedificia adeo percuterentur, ut fere ad mille partim contruerent, partim labarent, eorumque

ruinis centum et quinquaginta homines obruti perirent. Domus Wyttenbachii ne ducentos quidem passens ab illo loco aberat, ubi infernale istud navigium [183] disruptum fuerat. Ut igitur quivis facile intelligat, quamvis ipse salvus cum familiâ e praesente periculo evaserit, tamen domum, supellectilem et libros ejus multum detrimenti accepisse. Ipse mox testis istarum miserationum fui, Leidam quum venissem visurus, num quid magistro et amico meo accidisset, Quaerens ex eo, quomodo se haberet, „Non aegroto, inquit, sed supellex omnis mea diffracta, bibliotheca stillicidio inquinata, et adversariorum magna pars dispersa est. Sed quae ego passus sum, leviora et parva sunt prae aliorum damnis.“

Vix vero istius nefasti et exitiosi diei tristis nuntia ad exterorum aures pervenerat, quum multi amici ad Wyttenbachium scriberent, scire cupientes, quo loco et statu esset. Ipse quidem in scriptis suis istius dirae calamitatis mentionem faciens, pollicitus est, se isti enarrandae singularem locum daturum; sed aliis rebus nimis occupatus hoc consilium perficere non potuisse videtur. Quum vero Sanctocrucium unum ex illis amicis fuisse sciamus, qui ex Wyttenbachio cognoscere cupierit, quid ipsi illo calamitoso die eveniret, egoque epistolam ejus ad Sanctocrucium in manibus habeam; spero, me saltem aliquâ ex parte lectoribus satisfacturum, et illam Wyttenbachii promissionem, quae exitu caruit, quodammodo compensaturum esse, si epistolam illam publici juris faciam. En igitur ejus exemplum:

[184] „Complura deinceps, amicissime Sanctocruci, a Te accepi epistolia pariter scripta,

---

[Ipsa quidem] Bibl. Crit. P. XII. in Epistol. p. 222.

*amantissime postremum, in quo de salute mea quaeris. Equidem ad tantum Tuum erga me affectum tantamque sollicitudinem quominus citius responderem, factum est rerum mearum perturbatione, quae nunc quidem satis mihi vel otii, vel animi, vel omnino facultatis ad scribendum concedit. Cumque sub idem tempus plures amici mei, exteri et longinqui, nuntio cladis nostrae percussi, mihiq[ue] timentes, a me per literas peterent, ut sibi quamprimum significarem, quo loco et quâ conditione essem, Tu, mi Sanctocruci, mihi primus es, cui impertiam, si quid ad scribendum copiae virtutisque suppetit, et literarum officium praestem. —*

*Dies erat XII Ianuarii mensis, ultimus feriarum brumalium, quas ego conscribendis annotationibus Plutarcheis impendebam. In bibliothecâ libri omnes ad praesentem usum necessarii, maxime adversariorum, per pulpita expliciti, praesertim sub fenestris. Haec ita reliqueram ad prandium abiens, ut mox ad opus rediturus. Ecce! sedeo cum nepti ad mensam: sonitus ad aures accidit inusitatus ac terribilis, veluti multorum simul tormentorum. Der repente tectum vicinae domus corruit: fenestrae nostri conclavis diffringuntur: inde grandine vitrea verberamur. Surgimus, fugimus in viam publicam, sequentibus famulo et ancilla, item excitatis. Vicini item, ad januam quique suam, mirantur; multi vulnerati partim profugi e [185] domibus, partim adhuc inclusi ruinis, lamentantes, auxilium clamantes: saucii per viam currentes. Nondum ortus et causa mali apparet. Mox conspiciamus viciniam, inde a centesimo a nobis passu collapsam, eamque ruinam quoquoersus late patentem: et nostrae tamen aedes adhuc stabant: nam erant ad Occidentem cladis,*

indeque veniens ventus ictum magis ad Orientem ferebat: et statio navigii istius stygii, quod pulveris pyrii plenum exarserat, ictumque exitiosum viciniae intulerat, non nisi centum et octoginta passus a mea domo distabat; multaue aedificia duplo, ac triplo etiam longiora corruerant. Nondum videram, quid ante pedes esset. Via publica strata et sparsa chartis: tollo unam: agnosco manum meam, et omnes erant meae: colligimus eas: suspicio sursum ad fenestras bibliothecae meae, quae primo in tabulato ad viam publicam spectabat: cognosco fenestras fractas et introrsum coniectas, chartas adversariorum vehementia ictus ex pulpitis sublatas, in viam disiectas. Regredimur in domum, ut, quid intus acciderit, videamus, conclavia omnia quassata; fenestrae, januae, omnis supellex vitrea, porcellanica, lignea etiam politioris operis, horologia, lychni, patinae, omnia diffracta: totum totum disiectum: partes quasdam, in his auditorium, collapsas. Veretur, ut tutum sit, intus manere: fabri affirmant, in duobus conclavibus adhuc quidem tutum esse. Itaque mansimus ad finem Januarii: primum, sine lecto, fenestris, januis, per octo dies; ut [186] et ipsi pluviae, nive, frigore, vento, male vexaremur, et reliqua supellex, lintea et stragula vestis pessime mulctaretur: inprimis bibliotheca mea, quae per duas noctes stillicidio misere affecta est. Interea expectantes, dum domus reficiatur, fabri nos differunt. Vicinae deinceps aedes quassatae et ruinam minantes diruuntur jussu aedilium. Harum casu ne postra labefactetur, timent. Missis militibus, jubent nos vicinosque domus suas relinquere. Panicus terror meorum domesticorum, cujus ut vanitatem equidem intelligebam, ita rumore excitati amici, ad nos

*advolantes, suadent abire et pretiosissima quæque ad se asportare. Ego, quamvis reluctans, tamen voluntati eorum obsequens, quædam in sarcinas conjicio, ipsisque servandas trado. Per hanc tumultuationem alia adhuc salva mihi perierunt; in his crumena cum sexcentis florenis. Neque eo secius domum habitavimus adhuc per quindecim dies, sedate ac sensim quotidie sarcinas componentes, et navigio impositas in suburbanum hortulum devehentes: ubi nunc dego, statis diebus in urbem veniens ad habendas lectiones: caeterum, rebus ordinandis, et explicandâ disponendâque bibliothecâ, complures libros, etiam adversariorum chartas, annotationes in auctores Græcos et Latinos desiderans. Et sane experior, verum esse, quod mihi permulti narrarunt, nec tunc credere poteram, multas meas schedas, sub infernalem ictum, vento in locum cladis et rudera delatas esse.*

[187] *Habes quæ ad me attinent, optime Sanctocruci: quæ ego Tibi scripsi, quia jussisti. Nam re vera piget pudetque me ista narrasse, quæ puerilia et merae nugæ sunt, si cum aliorum casibus comparentur. Perierunt ad 150 homines ruinis ædium obruti: in his duo professores, Kluitius et Luzacius: ille, mihi amicus, ingentem copiam Historiæ Medii Aevi et rerum Belgicarum collectam a se edere cogitabat, quæ cum ipso periit. Luzacius ambulans oppressus est corridente domo amici cujusdam, ad quem salutatum ingredi parabat. Et hunc ex animo lugeo, communis calamitatis causâ: et magis etiam doleo, eum talem erga me fuisse, ut eum non tanto, quanto Kluitium, affectu dolere possim. Horum obitum cogitanti, semper mihi in mentem venit, quod apud Plutarchum in Conso-*

*latione ad Apollonium de Theramene proditum exstat, eum, collabente coenaculo, caeteris convivis oppressis, solum servatum exclamasse, O fortuna, ad quod me tempus conservas? et paulo post a sodalibus suis tyrannis interfectum esse. Quicquid fiet, aequo animo feramus. Interea facere non possum, quin saepe cogitem: Quare ille periit, non ego? Si ventus a contraria parte venisset, non ille periisset, sed ego. Ergo gratias agamus rectori ventorum et totius omnino naturae; per reliquum tempus et vitae spatium eum venaremur, officio nostro fideliter fungendo: cuius mihi pars erit, literis operari, et amissa adversaria supplere. — Quod [188] autem de Bibliotheca Academiae quaeris, nihil periit, nisi qui libri commodati erant iis, quorum domus collapsae sunt.“*

Atque haec quidem minime scribebat Wytttenbachius commiserationis movendae causâ, sed quod Sanctocrucii erga se amore ad scribendum provocatus erat. Quamquam enim communis calamitatis hand levis pars fuerat, tamen magis aliorum sorte dolebat, quam quidem suâ, utpote se jam satis beatum putans, quod sanus ac salvus ex isto cum maxime praesente malo evaserit. Ipse hoc testatur, scribens ad celebrem Germaniae Professore: „*Ex triplici bonorum genere duo potiora, animi et corporis, salva agnosco: in rebus externis desidero libros, adversaria, magnam supellectilis partem, et crumenam pecuniâ numeratâ plenam, quae vel ipso casu ac tumultu amissa, vel insidiatorum fraude surrepta est. Quae tamen omnia, duorum potiorum beneficio bonorum, aut reparentur facile, aut certe obruantur.“* Caeterum aliunde satis certo scio, ipsum praeterea quatuor sche-

dulas fœnebres amisisse, quas tabellario publico Amstelodamum ferendas tradiderat.

Sed collapsio auditorio, ac totâ domo ruinam minitante, quaerebat quidem statim Wyttenbachius aliam domum, aut certe quaedam cubicula, sed in istâ omnium rerum perturbatione nihil reperiebat, quamvis permagnâ habitationis mercede promissâ, quod conducere posset. Ergo necessitate coactus [189] cum omnibus e naufragio servatis rebus ac bibliothecâ in suburbanum hortum commigrabat, quamvis prævidens, illam rusticationem suis difficultatibus minime carituram esse.

Quum interim Professores scholas suas instaurare properarent, ne longiore illarum intermissione res Academicæ majus etiam detrimentum caperent, nec Wyttenbachius huic officio deesse vellet, quamvis loco ad scholas habendas idoneo destitutus; in auditorio philosophico Academiae publico lectiones suas habuit. Subsequente autem anno, quod illud auditorium publicum aliis professorum negotiis subinde inservire deberet, amplissimi Academiae Curatores, ipsi, utpote bibliothecario, non tantum duo conclavia in Nova Bibliothecae domo assignarunt, verum etiam pro vecturâ quotannis ei trecentos florenos tribuerunt, ne injuriâ temporis in professorio munere suo obeundò impediretur.

Isto autem atro die 12 Januarii in animadversionibus Plutarcheis conscribendis usque ad pag. 392 in libro de El Delphico pervenerat. Atque postea ruri libros suos lustrans et in pluteos digerens, Plutarchumque apparatus colligens ac recensens, magnò quidem gaudio afficiebatur, animadvertens, ex illo nihil quidquam sibi periisse, sed ad repetendum opus, quamvis cupiens et saepe conans, accedere non pote-



rat. Adeo ipsi in auribus [et animo infixus] haerebat iste fulmineus [190] ictus ac fragor, quo percussus et de Plutarchio dejectus fuerat. Verum ne interim nihil ageret, ad alia scribenda et edenda se conferebat. Primum bibliopolae gratificans, alteram editionem *SELECTORUM Principum Historicorum* fecit, eamque *Supplemento Annotationis* auctam, et mendis typographicis quam diligentissime purgatam. In quo posteriori negotio strenuum adiutorem habuit *Janum Bake*, tunc optimum disciplinae tuae alumnum, et nunc eximium ipsius in Graecâ cathedrâ successorem. Deinde, edendâ Parte *duodecimâ* Bibliothecae Criticae, illi quidem operi finem et fastigium imposuit, sed sese ingratae liti exposuit. Quamvis enim illa Epistola ad Virum Nobilissimum *F. G. Baronem van Lynden de Philosophia Kantiana*, quae huic ultimae Parti praefixa est, quam plurimis viris doctis in Germaniâ, illâ Philosophiae Kantianae matre, placuerit, et quidam clarissimi nominis Professor ad Wyttenbachium anno 1809 scripserit: „*His ipsis diebus novissimum volumen Bibliothecae Tuae Criticae, quod opus plurimos in Germaniâ lectores, totidemque admiratores quot lectores, habet, summo cum fructu nec minore voluptate legi; sed hanc quidem imminuit hoc, quod ultimum esset. At nihil me hercule ingeniosius, nihil elegantius illo dialogo Tuo de philosophiâ, in quo omnes, quibus eum legendum dedi, ambigui haerebant, utrum magis argumentandi vim, an suavissimam in ejusmodi* [191] *argumento eloquentiam, an leporem denique, per totum opus fustum, admirarentur*“: sed quamvis, inquam, hoc ita fuerit, tamen illa Epistola quoque in nonnullorum

vituperationem incurrit. Et quantopere ipsa paucis Kantianae philosophiae sectatoribus in patriâ nostrâ bilem moverit, satis notum est, nec denuo repetere quidquam attinet. Equidem enim voluntariae oblivioni lubens omnem istam odiosam litem trado, quae inde postea exorta est, et cui ipse etiam implicitus fui. Missis omnibus istis, quae vel levissimam ansam novae altercationi dare possent, atque, uti in aliis doctrinis, ita quoque in philosophiâ suum iudicium uniuersum liberum relinquendum esse statuens, huic loco convenientius duco, referre, quae Wyttenbachium paucis annis ante finitam Bibliothecae Criticae descriptionem ad *Eichstädtium*, Virum Clar., de munere censorio scripsisse video: „*Tu, quo es ingenio, mox intelliges, censorium illud in literis negotium afferre illud quidem facitanti aliquam cognitionem librorum, sed magis variam et vagam, quam certam et accuratam: neque ullum fere esse scriptorem libri, nec editorem antiqui auctoris, quin is suum argumentum melius perspectum habeat, quam quivis doctus censor: quippe hic ad quodvis novum opus ipse novus involare cogitur, et, ut fit, in novitatis sensu, rebus parvis magnisque pariter movetur, multa ut magna et gravia monet, quae scriptor editorve, in ipso argumento quasi habitans, tamquam [192] levia ac trita omiserat. Equidem velim institutum iter legendorum deinceps veterum scriptorum potius tenuissem, quam ad Bibliothecarum Criticam scribendam accessissem; quamquam huius scriptio me non penitus aucevit ab illo lectionis itinere, sed tamen retardavit.*“ Verum licet haec retardatio fortasse Wyttenbachio aliquantum obsuerit in persequendo illo lectionis itinere, quod sibi proposuerat, tamen Literarum cultoribus plurimum profuit, idque

ob egregia illa opera, quae, cessante lectione, composuit, quibusque summae eruditionis famam merito sibi peperit.

Quum autem Academiae Curatores in locum Luzacii, τοῦ μακροῦ alium Professore vocandum statuissent, seque idcirco ad *Heusdium*, V. Cl. convertissent; Wyttenbachius, de eo certior factus, non tantum Hensdio omni ratione suadebat, ut Leidensem cathedram acciperet, verum etiam ei promittebat et affirmabat, ipsum sibi, ut antea discipulum, ita nunc collegam gratum et acceptum fore, seque ipsi totam professionem Graecam concessurum, ut eadem inter ipsos esset munerum descriptio, quae inter Ruhnkenium et Valckenaerium fuisset. Verum frustra. Tanta non erat in Wyttenbachio παρὰράνη, ut Heusdium ad cathedram accipiendam permovere posset. Hic cum ob alias sane causas, tum quoque ob multiplices suavitates, quas ipsi statio Trajectina praebebat, Leidensem repudiabat.

[193] Post hanc itaque insperatam Clar. Heusdii reversionem quum alius Professor quaerendus esset, cui vacans cathedra recte offerri ac mandari posset, atque *Hieronymus Boschius*, Vir Ampl., probe perspiceret, in novo illo Professore constituendo Academiae laudem et existimationem magnopere verti; idem quoque non sine ratione censebat, eligendi collegae arbitrium Wyttenbachio potissimum relinquendum esse, cujus praecipue res ageretur, et cujus permagni interesset ad vitae suavitatem, quis in alterâ cathedrâ Literarum poneretur Professor, siquidem ipsi cum illo vivendum, agendum, et ad communem finem, ad Academiae Leidensis florem, contendendum esset. Quae sententia quum reliquis Curatoribus, Viris Ampl., aequa et justa visa esset; ex consulto ipsorum mandabatur

Boschio, ut communiter cum Wytttenbachio novum Professorem, celebratae eruditionis virum, Academiae vindicaret.

Primum per literas a Boschio rogabatur, Wytttenbachio consentiente, *Immanuel Gottl. Hushkius*, Professor Rostochiensis, num Leidam venturus esset, si vocaretur. Huic enim, utpote viro Graece doctissimo, et cathedrae tuendae maxime idoneo, non modo uterque favebat, sed ipse quoque jam antea, anno 1794, Leidam vocatus fuerat, etsi tunc, nescio quibus de causis, fortasse civilis dissensionis metu, cathedram [194] sibi oblatam auspicari recusaverat. Et quum Hushkius, Vir Cl., ad hanc novam invitationem respondisset, se vocatum conditionem accepturum esse, Curatoresque ipsum probassent; nihil aliud agendum restabat, nisi ut Curatorum praejudicium a Rege confirmaretur. At hoc propter Regis absentiam continuo fieri non poterat.

Interim vero, ad finem vergente feriarum tempore, instabat scholarum initium, et programma Lectionum proximo anno Academico habendarum proscribendum erat. Wytttenbachius igitur, de consilio Regis et exitu rei incertus, se in scholis Graecis Eutripidis Hippolytum et D. Jacobi Epistolam interpretaturum profitebatur. Sed paucis diebus post, quum certum nuntium de Hushkii vocatione a Rege sancita accepisset, statim aliud programma dabat, in quo declarabat, se Historiam Literariam Graecam ex ipsis scriptorum operibus haustam discipulis diclaturum et expliciturum esse. Quod ipsius consilium eo valebat, ut et Hushkio sua professio integra servaretur, nec tamen usque ad ejus adventum institutio Literarum Graecarum prorsus vacaret. — Praeterea per epistolam Hushkio ex animi sententia de novo munere gratula-

batur, eique affirmabat, sibi ipsius adventum pergratum fore. Verum ad haec Huschkius nihil quidquam rescribebat. Et idcirco ex isto silentio Wytténbachius non tantum colligebat, ipsum Leidensis cathedrae non valde [195] cupidum esse, verum etiam scribebat ad amicum suum Boschium, sub finem mensis Decembris 1807: „*Velim omnia experiaris, ut Huschkius Leidensem cathedram accipiat. Ego feci quod potui: scripsi ad eum medio mense Septembris, affirmans se mihi gratum collegam fore: nec ille rescripsit. Amplius hortari nolo; ne me suasorem incuset, si forte ad nos delato ei statio displicuerit.*“ Atque profecto eventus deinde docuit, praesensionem Wytténbachii veram fuisse. Etsi enim mox aliquot deinceps epistolae Hushkii cum ad Academiae Curatores, tum ad Wytténbachium, adveniebant, tamen tandem Vir Clar., post totius fere anni moram et tergiversationem, Curatoribus mense Augusto 1808 declarabat, se Leidensem stationem accipere non posse. — Atque ita illa quoque spes et exspectatio, quam Amplissimi Curatores in Hushkió collocatam habuerant, irrita fiebat.

Denique vero, quum post hanc alteram recusationem ipsi Academiae curandae Quinqueviri de alio quodam professorii muneris candidato, in vacuum cathedram vocando, inter se dissentirent, ac res de die in diem differri, certe parum progredi, videretur; tandem ipse Rex interveniebat, mandans Meermannò, Viro Exc., universae rei literariae praefecto, ut alium Professore arcesseret.

Hic igitur eximiae eruditionis virum, *Fridericum Creuzerum*, Academiae Heidelbergensis Professore, statim invitabat.

[196] Cujus conditionibus probatis, Rex die 10 Februarii 1809 ipsi cathedram Graecam deferri, at vocandi negotium, solito more, per Curatores fieri debere jubebat.

Wyttenbachius, his auditis, valde laetabatur. Mense enim Junio illud gaudium suum mecum his verbis communicabat: „*Habeo quod et ipse gaudeam, et Leidae gratuler. Creuzerus, magnae vir doctrinae, meique studiosus, propediem, ut spero, noster erit. Scripsi ad eum, quod debui: ipsum non modo mihi accipiendâ statione oblata gratissimum facturum, verum etiam ad nos non ut ad peregrinos, sed ut ad suos venturum esse.*“

Utinam modo illud gaudium Wyttenbachio diuturnum fuisset, nec somnii instar mox rursus evanuisset! Nam venit quidem Creuzerus mense Julio Leidam, sed quum ejus et animus et corpus sub ipsum terrae Batavae ingressum coeli aërisque mutatione adeo afficerentur, ut nulla alia ratio salutis superesse videretur, nisi ut quanto cocius ad suos rediret; initio mensis Octobris, in veterem cathedram Heidelbergensem revocatus, Leidâ in patriam continuo reversus est, istâque exigui temporis commoratione perpetuum sui desiderium nobis reliquit. Sed quo magis appareat, quid et quantum abitus Creuzeri ad animum Wyttenbachii valuerit, ipsum hoc enarrantem audiamus.

„*Creuzerum, V. Cl., inquit, quem Bibliothecae Criticae P. XII. p. 222, Academiae [197] Heidelbergensi gratulati eramus, rursus eidem gratulari debemus: Homerice quidem ἐκὼν ἀέκωρτι γε θυμῷ. Nam quum illa scriberemus, oblata ei jam tum Leidæ cathedra Graecarum Literarum, verba sic*

---

*enarrantem audiamus]* Philom. L. I. p. 200.

posuimus, ut re, si forte, ante editum nostrum libellum confecta, pro Heidelbergensi Leidensem poneremus. At re praeter expectationem retardata, libellum nostrum, et locum illum, ita ut erat scriptus, edidimus. Venit tandem Creuzerus mense Julio, expectatus sane, et animi bonis talis, qualem eum absentem cognoveramus, eleganti ingenio, exquisita et varia doctrina, egregia humanitate: at vero minus, quam sperabamus, et ipse volebat, firmus ac vicens valetudine. Quam jam antea tentatam insueta coeli et aëris Batavi novitas sic porro affectit, ut gravius etiam quid vitae metuendum videretur, nisi in solitam se naturam loci referret. Itaque nos reliquit, magno et nostro cum dolore, et Academiae Leidensis dampno: et fortunam nos quasi ludificante, eumque, nobis simul et dante et adimente, Heidelbergam lubens lubentem recepit. In qua nos iacturam unice illa spes consolatur, fore ut, quantum nobis emolumentum abitu viri detractum est, tantum cum ad ipsius vitam diuturnitatis, tum ad Literas utilitatis accedat. Nunc eum vivum dimittentes, non quidem χαλκότερες, quod illo poetae dicto celebratur, sed tamen εὐφημοῦντες ἐκπέμποντες δόμων, scriptis ejus commemorandis prosequamur.“ — Atque sic Fortuna [198] Wyttenbachium in adipiscendo Collegam tertio elusit.

Ex quo autem tempore Respublica Batava in Regnum Hollandiae transfigurata erat, Regemque Franco-Gallum acceperat, multas res novas ad imitationem Francici imperii per hunc ipsum Regem deinceps institutas esse, satis notum est. Utrum vero istud rerum innovandarum flagrans studium ab eodem publicae utilitatis gratia reapse susceptum sit, an contra potius eo spectaverit, ut Batavi sensim a moribus majorum

desuescerent, Francicis institutis pedetentim adsuescerent, atque ita veluti inscii ad subeundam istam patriae funestam *καταστροφήν* praepararentur, quae quadriennio post Batavorum genti maximam calamitatem attulit, illud equidem, utpote ab hoc loco alienum, disquisitioni aliorum lubens relinquo. At hoc unum silentio praeterire nequeo, quod ad rem Literariam pertinet, atque aliquā ex parte cum rebus Wyttenbachii conjunctum fuit.

Die scilicet 4 Maii 1808 placebat Regi Hollandiae decernere, ut ad exemplar Parisinae Academiae Sodalitium doctorum virorum, in *quatuor* classes divisum, nomine *Instituti Regii* insignitum, atque colendis et proferendis Doctrinis, Literis Artibusque destinatum, Amstelodami institueretur. Hoc decretum ad Artium Doctrinarumque studia alenda et evehenda imprimis aptum et utile judicabatur. Itaque quum socii hujus Instituti, probante [199] Rege, nominandi essent; *Wyttenbachius* quoque dignus habebatur, qui *tertia* Classis, *Historiae* et *Antiquitatum*, socius adscisceretur.

Ipse quidem censebat, ad Literas Humaniores alendas, earumque studia frequentanda, plus, quam omnia *Instituta* et *Συνέδρια*, valere bene constitutas scholas, doctos et prudentes magistros, et morem majorum, disciplinae veteris sanitate ac severitate insignem, caste integreque servandum; sed vel sio tamen illum sibi habitum honorem, quippe non rogatum, immo sponte et ultro oblatum, accipere non recusabat. Verum ista nova, ista inusitata vestimentorum ornamenta, quibus Sodales conventuum haben-

---

[Die scilicet 4 Maji] Conf. Nuntius Artium et Literarum  
A. 1808. Nro. XXI. p. 323.



dorum causâ insigniri debebant, Batavorum eruditorum consuetudine simplicitati parum convenientia, et Francicam ostentationem nimis redolentia ipsi videbantur, adeoque displicebant, ut ad *Janum Valckenzerium*, V. Ampl., scriberet: „*Quod autem cogimur, Instituto aggregati, humeralibus ac manicis aureis insigniri! Quid pater tuus, gravissimus virorum, diceret? Ne Ruhnkenius quidem, caeteroquin ad istas nugas facilius, faceret. Me quidem ab obeundis huiusmodi consessuum officiis et valetudo prohibet, et prudentiorum Sodalium iudicium, credo, excusat.*“

Noverat suam ipse naturam, ad eamque potius, quam ad multitudinis opinionem, vitae suae rationes accommodandas censebat. [200] Plus rebus ac factis, quam laudibus ambitiose quaesitis tribuens, et illud, *Σπάρταν ἔλαχες, ταύτην κόσμει*, ante omnia ponens, non modo nihil quidquam e domestico studio remittebat, verum etiam in scholis habendis, et juventute ad rerum scientiam et virtutem more majorem instituendâ suam praecipuam officii oblectationem ponere pergebat. Et erant sane illo tempore scholae ejus frequentes. Quum enim anno 1808 Ciceronem *De Finibus* interpretaretur, centum et septem auditores habebat. In his cum alii multi egregii juvenes erant, qui accuratâ Linguae Græcæ et Latinae, Historiae et Antiquitatum scientiâ excellere, omnique laude dignissimi essent, tum quoque quatuor editis scriptis clari. Horum primus est *Jo. Theodorus Netscher*, qui in tractandâ Oratione Ciceronis *Pro Archid. Poëtâ* egregium specimen suorum progressuum prodidit. Alter *Janus Bake*, scriptor eruditissimae Commentationis *De Po-*

---

*J. Theod. Netscher*] Philom. L. I. p. 190.

*Janus Bake*] Philom. L. II. p. 210.

*sidonii Rhodii Reliquiis Doctrinae*. Tertius *Bernardus van Laar*, auctor elegantissime scriptae Dissertationis *De Romanorum Ponderibus et Mensuris*. Quartus τοῦ πάρι Valckenaerii ex filiâ nepos *Ludovici Casparus Luzac*, cui debemus exquisitâ doctrinâ refertum Specimen Academicum *De Hortensio Oratore, Ciceronis Aemulo*. Quibus singulis debitam sane laudem Wyttenbachius in Philomathiâ suâ honorifice tribuit.

[201] Ipse vero interea occupatus fuerat partim legendis et excerptendis interpretibus Platonicis nondum editis, *Olympiodoro, Hermid et Proclo*, partim scribendis et edendis minoribus et extraordinariis operibus, quod ad magnum illud et ordinarium, ad Plutarcheum scilicet opus, nondum accedere auderet. Ne igitur quid dicam de *tribus illis locis* in *Netscheri* Disputatione obviis, neque de illo studio, quod posuit in *Ciceronis* quinque libris *De Finibus* ad Scholarum interpretationem accommodandis, et *Animadversionibus in Eunapium* inchoandis; hoc tempore edi curavit *Philomathiae Librum Primum*, deinde *Annotationem ad J. Bakii librum De Posidonio*, et denique *Annotationem in Platonis Phaedonem*. Quibus sane scriptis editis Wyttenbachium maximum fructum bonis studiis attulisse, ad unum fere omnes judicarunt, qui de his rebus judicandi facultate valerent.

Dolendum interim maxime erat, hanc *Phaedonis* editionem ob typorum exiguitatem et speciminum corrigendorum necessitatem optimi viri oculos adco hebetasse atque infirmasse, ut ab eo inde tempore vix

---

*Bern. van Laar*] l. l. p. 220.

*J. C. Luzac*] l. l. p. 216.

*Olympiodoro*] Annot. in Plat. Phaed. p. 100. et Philom. III. p. 32.

interdum, nedum ad lumina, aliquid legere aut scribere potuerit; eamque praeterea incidisse in ista calamitissima tempora, quae ipsum in Epilogo haec scribere veluti coegerint: „*Ut haec extrema civitatis Batavae conversio neque huic libello in lucem eunti, neque omnino optimarum [202] artium studiis adhuc, more majorum, insigni cum laude fructuque cultis, obsit, faxit Deus O. M.*“

Quum scilicet jam aliquamdiu instans publici status commutatio civium animos sollicitudine et incertâ rerum futurarum expectatione suspensos tenuisset; tandem apparuit illud Ovidii, *Fratrum quoque gratia rara est*. Iste enim Gallorum αὐτοκράτωρ, qui paucis annis ante maximam sese voluptatem percipere simulaverat, quod Legati gentis Batavae Parisios venissent, fratremque suum sibi Regem expeterent, nunc fratri Regi primum insulas Zelandicas cum parte Brabantiae Septentrionalis adimebat, et deinde toto regno privabat, Bataviamque nostram Gallico Imperio provinciam adijci jubebat. Quantam rerum conversionem et fortunarum eversionem ista fraudulenta machinatio patriae nostrae attulerit, nemo non expertus est. — Memini me, tunc ad Wyttenbachium de vexationibus τῶν τελωνῶν καὶ ἀμαρτωλῶν, de incertâ sorte meâ, et id genus pluribus scribere, inque fine epistolae addere, *vereor ne cum sexcentis aliis triste illud canere cogar*:

„*De maris et coeli (quid enim nisi vota supersunt?)*“

*Solvere quassatae parcite membra ratis:*

*Neve, precor, duri subscribite Caesaris irae.*“

Ad haec ille die 30 Julii mihi rescribebat: „*Et pa-*

---

*Ut haec extrema]* Epilog. ad Plat. Phaed. p. 305.

*Fratrum quoque]* Ovid. Met. I. 145.

*De maris]* Ovid. Trist. I. el. 2.

*triae quidem casus, quamvis praevius, tamen gravis ad animum accidit: non solum [203] praesente nostro innumerabiliumque civium damno, sed futurae etiam calamitatis metu. Illud semper in ore et cogitatione habendum, nihil mali nobis accidere posse, quod culpa careat, et quidquid illud sit incommodi, adversi, acerbis, id divina voluntate evenisse, et ferundo superandum, et prudentia moderandum esse: Dabit Deus his quoque finem. Interea transferamus, ut Ciceronis nostri verbis utar, animum ad ea, quibus secundae res ornantur, adversae adjuvantur, h. e. semper maximum solatium ex Literarum studiis petamus, et quo magis res publicae nostrae laborant, eo magis in id incumbamus, ut res literaria quam minimum detrimenti capiat. Et tu velim bono animo sis: Θαρσύνε χρη, φίλε Βάττε, τάχ' αὐριον ἔσσει' ἄμεινον.*"

Neque ipse aliter agebat. Etsi enim status Academiae incertus erat, discipulorum numerus in dies imminuebatur, honoraria suo tempore professoribus non solvebantur, syngraphae Batavae ad trientem redactae erant, et omnia fere ruinam patriae undique minitabantur; tamen in istis difficultatibus non modo animum non despondebat, verum adeo ipsum consueto Literarum studio recreare, et alios item ad illarum ulteriorem culturam admonere pergebat. Egregium profecto monumentum amoris ejus erga Literas et patriam habemus in illo *Protreptico*, quem die 18 Sept. 1810 dixit *instaurandis scholis, et discipulis ad Literarum studium confirmandis*. [204] Quum enim, patria in Francici imperii provinciam redacta, multorum adolescentium animi ad haec studia refrige-

acerent ac retardarentur, et ejusmodi errore occuparentur, ut putarent, se nullam omnino amplius patriam habere, nullam sibi ejus jam rationem ducendam esse, nullam porro causam exstare, quare quis Literis studeret: tunc illo summâ eloquentiae vi istum perniciosum errorem confutavit, ex eorumque animis evellere, eosque ad vetera studia revocare conatus est, habito ad eos publice ex cathedrâ *Protreptico*, in quo partim argumentis ex philosophiâ, partim exemplis ex historiâ desumptis docuit, assumptâ novâ patriâ veterem nequaquam repudiari, sed et ipsam remanere, et nostram cum eâ necessitudinē illibatam servari, et Literas disciplinasque discendi officium sanctum ac perpetuum constare; idque eo magis, quia, patriae majestate et auctoritate amissâ, unicum nobis superesset pristinum Literarum doctrinarumque decus, quod, ut praeclarum a majoribus accepissemus, sic a nobis posteritati tradendum, et ad omnis aevi perpetuitatem propagandum esset. — Atque si in illo Pittaci dicto, καὶ πόρ' ὑπῆρθε, haud exigua humanae prudentiae pars posita est, nemo sane Wyttenbachium non admirabitur, qui in hoc *Protreptico* illum ancipitem ac lubricum locum tam accurate, graviter ac sententiose tractavit, ut prope modum statuendum sit, [205] non tam *raram esse temporum felicitatē, ubi sentire, quae velis, et, quae sentias, dicere liceat*, modo quis temporibus recte uti sciat, h. e. modo cum judicio agat, *inter deformē obsequium atque abruptam contumaciam* mediam viam constanter teneat, justamque rationem ac moderationem in dicendo adhibeat.

Porro, triginta annis ante in Bibliothecâ Criticâ scripsērat, *Nonnulli, qui Censuras novorum librorum*

*raram esse*] Tac. Hist. L. I. c. II.

*Nonnulli, qui Censuras*] Bibl. Crit. P. V. p. IV.

scribunt, rempublicam literariam ita in classes describunt, non ut ingenii et doctrinae, sed nationum ac regionum, censum sequantur. Qui puerilis est error, neque aliunde profectus, quam ex rerum humanarum et communis vitae ignoratione. Sunt enim apud omnes nationes, qui melius et qui pejus artem tractent: sunt vel principes, vel secundarii, vel tertiani, vel inferiores. Igitur classium ratio habenda est, non populorum: neque videndum, cujas quisque sit, sed quid dicat. — Una est et communis bonorum Scriptorum civitas: cujus quidem jus non a vulgi opinione tribuitur, sed paritur doctrinâ diligente, ejusque prudenti disertâque explicatione. Quibus virtutibus ut quisque maxime excellit, ita quemque nobiscum maxime conjunctum, et civem nostrum arbitramur.“ Hujus igitur sententiae, uti antea semper, sic nunc quoque se tenacem ostendebat. Quum enim Placentiae Dux, Napoleontis in Hollandiâ vicarius, vir humanitatis et doctrinae laude clarus, Literarumque Humaniorum peritissimus aestimator, [206] Wyttenbachio, ut donum ipsius Imperatoris, misisset librum, plenum humillimae adulationis, *De Praemiis Decennibus*, hic istud opus non modo vere et liberaliter descripsit, laudandaque laudavit, vituperandaque vituperavit, verum etiam ipsum Napoleonem satis aperte remisit ad tempora Regis *Francisci Primi*, atque diserte ostendit, ad Literarum cultum frequentandum non sufficere, ut praemia ad faciendas *Versions* proponerentur, sed inprimis opus esse bene constitutis scholis ac liberaliter institutis doctoribus, e quorum disciplinâ prodirent „vere eruditi. omnem

---

ut donum] Philom. L. I. p. 190.

vere eruditi] Philom. L. II. p. 196.

*veterum lectionem facile complectentes, ex fontibus haurientes, non rivulos consectantes; certe tales, qui metaphrases ac versiones ipsi non desiderarent: sed, si quando, desideratas ab imperitioribus multo accuratiores certioresque conficere possent, quam vulgares plerumque interioris linguarum rationis parum periti interpretes, opus temere ac subito suscipientes."*

Scholas praeterea moro majorum non modo ordinarias habere pergebat, verum etiam iis extraordinariam addebat. Rogatus scilicet a quibusdam discipulis, ut in ipsorum gratiam et commodum nonnullas *Disputandi* scholas haberet, lubens illorum honestae ac laudabili petitioni satisfaciebat, et hoc haud invito susceptum pensum tam docte atque scite peragebat, ut inde magnus omnino fructus in discendi studiosos juvenes redundaret. Et [207] quandoquidem in chartis Wyttenbachii schedulam inveni, in qua leguntur verba, quibus has scholas aperuit; illa hoc loco ad publicam notitiam perferre omnino operae pretium duco:

*„Videor mihi haud temere facturum, si in principio hujus exercitationis breviter de ejus officio moneam. Egregie, ut omnia, dixit Plato (Symp. 318 F.) Disputationem in iis numerandam esse rebus, quae per se nec bonae, nec malae sint, sed ita bonae aut malae fiant, prouti aut bene aut male tractatae fuerint. Igitur bene disputare, magnam habere laudem et utilitatem: male, magnum damnum ac dedecus. Mala autem disputari posse, constat inter omnes, et ego adolescens jam, et adultus, cognovi, quum interesset ejusmodi Disputationibus,*

ubi disputantes nec materiam perceptam haberent, nec formam viamque disserendi tenerent, omnia turbarent, se invicem non intelligerent, sibi tamen et aliis, nescio quomodo, docti, acuti, disertī viderentur. Quae disputationes et a prudentioribus deridentur, et disputantium ingenia corrumpunt, erroribus implent, falsā scientiae opinione inflant. At vero, si disputantes, perceptā Litterarum cognitione, thesium ex iis depromptarum sententiam causasque probe perspexerint, tum rationibus in utramque partem expositis, dialecticā viā arguendo, definiendo, dividendo, cogitate considerateque progrediantur; tunc vero disputandi exercitatio insignem affert fructum. [208] cum ad verum inveniendum, dijudicandum et cum aliis communicandum, tum ad ingenium acuendum, tum vero ad accurate ac Latine et cogitandum et disserendum. — Jam huiusmodi exercitationibus apti quidem discipuli mihi numquam defuerunt: at non semper fuerunt, qui simul et apti essent, et disputationis facitandae scholas a me expeterent. Qui si contingerent, eorum studiis numquam defui. Idque quum rursus mihi obtigerit, ut, qui ad hanc exercitationem idonei essent, iidem eam a me expeterent; iisdem gratificari non dubitavi, meumque studium ac laborem eo conferre, ut inde illym, de quo diximus, speratum ingenii doctrinaeque fructum percipiant. In quibus quum tuae primae sint, Orn. Wassenaeri, respondendi partes, age eas rite, iuste, legitimeque ordine.

Annus Academicus interea praeterierat, et novus instabat, nec quidquam certi de futura sorte Academicarum Batavarum adhuc constabat. Duo quidem Inspectores Universitatis Caesaris Parisiensis, Cu-



*vierius* et *Noëllius*, viri doctrinâ celebres, in Hollandiâ fuerant, missi nomine Imperatoris a Magno Magistro, Comiti *De Fontanes*, qui Batavorum Gymnasia et Academias inspicerent, deque institutionis publicae ratione ac disciplinâ ad consilium Universitatis referrent, sed decretum Imperatoris adhuc expectabatur, et civium Academicorum animi ideo inter spem ac metum adhuc suspensi haerebant. — Wyttenbachius, qui oculorum [209] infirmitate in dies magis magisque laborare incipiebat, in solâ *Philomathiae Libri secundi* editione acquiescebat, nec quidquam aliud praeterea instruebat. Et erat sane illud tempus ad quidvis aliud potius, quam ad libros edendos, idoneum, Wyttenbachioque insuper cum alias ob causas, tum imprimis ob *apoplexiam* et trium carissimorum capitum amissionem grave ac luctuosum. Accepi d. 30 Aug. 1811 ab ipso epistolam, in quâ haec leguntur: „*Multa scribere me oculi mei prohibent, in dies magis infirmi, ut sinister lumen jam prorsus amiserit, et alteri parcere debeam: quod quo evasurum sit, vereor. Me certe tanta apoplexia invasit, ut inde a tuo discessu ne unam quidem lineam scripserim. Et deficiebat cum oculorum acumine animi alacritas; ut fere perpetuus sopor me teneret. Praeterea obitu doctissimi meique amantissimi adolescentis, Wassenaerii, acerbissimus dolor intimis adhuc meis medullis insidet. Similis huic amore et studio obiit, Derkinderenus; item H. Boschius, vetus amicus. — Caeterum de nostrâ Academia quid futurum sit, nondum scimus. Auditorum numerus et ipse ad trientem redactus videtur. Interim tempore ac more solito scholas auspicabimur, meque illarum officio quotidiano haud impari futurum spero.*“

Haec ille. Verum licet altero oculo privatus, et altero labefactatus, licet corpore aliquantum debilitatus, et bonis quibusdam [210] amicis orbatus esset; tamen animo adhuc, ut antea, vigebat, et muneri professorio recte sustentando omnino adhuc par erat. Manifestissime hoc apparuit, quum die 24 Septembris primam illius anni scholam consecraret celebrandae memoriae desideratissimi sui *Wassenaerii*, 'cujus acerbum fatum nondum eluxerat, et in cujus eximii adolescentis exemplo justam optimamque viam discendi Literas Humaniores suaviter et simul graviter indicavit ac descripsit, ut haud sciam, an post renatas Literas nihil scriptum sit, quod hac in parte cum illa *Memoria* comparari mereatur. Quantamque vero praestantissimi *sentis comita et mitis oratio audientiam sibi fecerit*, et quantum illa auditorum oculos animosque commoverit, vel ex eo intelligi potest, quod illorum haud pauci lacrymas tunc fudisse dicuntur.

Mox sub finem Octobris tristis nuntius de *tribus* sublatis Academiis, *Franequerand, Harderovicend et Rheno-Trajectind*, per ephemerides ad publicam notitiam perveniebat. Napoleon nimirum decreverat die 21 ejusdem mensis, *duas* tantum Academias in Hollandia remansuras, *Leidensem* ac *Groninganam*, easque tamquam Universitatis Caesaris partes secundum hujus ipsius leges ordinandas esse. Quo decreto etsi dissentibus copia discendi, et ipsis studiis magna praemiorum pars adimebatur, tamen isti obediendum ac parendum erat. Notum istud [211] tyrannorum, Sic

*lacrymas fudisse*] Nunt. Art. et Lit. A. 1811. Nr. XLI. p. 227.

*die 21 ejusdem mensis*] L. laud. Nr. XLIV. p. 275 et Vir Rev. Jod. Heringa in Orat., quae legitur in Ann. Acad. Traj. vol. I. p. 107. et seqq.

*volo, sic jubeo, nullum excusationi locum relinquebat: pro ratione voluntas stabat.*

Neque tamen statim (quod sane multis mirum videbatur) istud decretum ad effectum adducebatur. Aliquanto post demum solennitas ordinationis Academiae Leidensis in diem *tertium* Novembris 1812 indicebatur. Intra hoc vero temporis intervallum haud pauci cives Academici, qui potius more majorum, quam Gallorum, honores Academicos capessere vellent, id praecipue agebant, ut ante illum diem votorum suorum compotes fierent. Atque ista properatione *Doctorum* in patria nostra numerus mire profecto augebatur, *discipulorum* contra ea misere imminuebatur.

E discipulis Wytttenbachii, v. c., qui, finito studiorum Academicorum curriculo, in eo cum maxime versarentur, ut conscribendis speciminibus eruditionis civitati ostenderent, quos qualesque in Literis Humanioribus progressus, duce magistro suo, fecissent, sed qui ob instantem Academiae transfigurationem, *seposito ampliore argumento, brevius sumerent, quod citius et ante illum diem* III Novembris *perscribi et in specimen legitimum produci posset*, duo inprimis memorandi sunt, *Guilielmus Theodorus Baumhauer*, et *Petrus van Lelyveld*, Prior, qui sibi *Stoicam quaestionem Περὶ εὐλόγου ἑξαγωγῆς argumentum Disputationis habendae ad consequendum gradum Doctoris Juris destinaverat, ad eamque* [212] *tantum apparatum collegerat, ut ei nulla pars materiae in antiquis monumentis proditae ad hoc propositum spectans deesse videretur, illius loco edidit Specimen Juridicum inaugurale, De Lege VIII. C. „Si certum*

*tertiam Nov.] Nant. Art. et Lit. A, 1812. Nro. XLV. p. 306.*

*seposito] Philom. L. III. p. 265.*

petatur." *Cui accedunt Tria Capita Observationum in Ciceronis Librum secundum Academicarum Quaestionum.* — Posterior, qui Dissertationem *Περὶ ἀριτίας* conscribere sibi proposuerat, in eâque elaborandâ non festinanter ac leviter, verum lente et accurate versari vellet, mutato consilio, *Theses juridicas Inaugurales XXII* publici juris facit. Quod tamen minime ita accipiendum est, ac si hi juvenes tantummodo dicis causâ leve ac nugatorium quid consarcinaverint, et tamquam immaturum foetum utcunque in lucem emiserint. Longe profecto aliter sese res habet, quemadmodum non modo e Philomathiae Libro III. apparet, ubi Wytttenbachius horum Speciminum laudabiliter meminit, verum magis etiam ex utriusque scriptionis lectione unicuique constare potest.

Interim Wytttenbachius decreto Magni Magistri Universitatis denuo *Professor Literaturae Graecae et Latinae* constitutus erat. Sed quam dicto illo die iii Novembris Academiae Leidensis nova ordinatio, cui ipse propter valetudinem interesse non potuerat, non sine magnâ pompâ et ostentatione peracta esset; continuo ad Virum Exc., *Comitem* [213] *De Fontanes*, has literas scribendas esse e re suâ arbitrabatur:

VIRO EXCELLÉNTISSIMO

COMITI DE FONTANES,

MAGNO MAGISTRO UNIVERSITATIS,

S. P. D.

DANIEL WYTTENBACH.

Quum nuper Academiae Leidensis Rector, Vir Magnificus; mihi per literas significasset, me decreto

*Theses Inaugurales XXII*] Philom. L. III. p. 267.

*magnâ pompa*] Nunt. Art. et Lit. A. 1812. N. XLVII. p. 330.

*Tuo, Vir Exc., constitutum esse Professorem Literarum Graecarum et Latinarum; respondi ei, me id sic interpretari, ut judicem, mihi non solum Literas Graecas et Latinas, sed etiam reliquas mei muneris partes, id est, Historiam Universalem, Eloquentiam et Praefecturam Bibliothecae, mandatas servatasque esse. Cujus mei judicii causam et rationem postea eidem laudatissimo Rectori disertius explicui per literas: quas ut Tecum, Vir Exc., communicaret, eum rogavi: et nunc easdem ut ad Te amplius interpretarer, mihi faciendum putavi. Ego ante hos tredecim annos Amstelodamo in hanc Academiam et locum Ruhnkenii vocatus sum, qui habuerat Professionem Literarum Latinarum, Historiae Universalis, Eloquentiae, et Praefecturam Bibliothecae. Et quia tunc Graecarum quoque Literarum professio vacabat, eadem quoque mihi data est. Vocabar autem ea conditione, ut fruerer salario annuo quinque millium florenorum; [214] et quia meae cathedrae hujus fere triplex erat unus, et quia Amstelodami lautiorum etiam redditum percipiebam, et illas easdem disciplinarum partes per octo et viginti annos docueram. Sed in Catalogo Professorum Leidensium nuper Magno Magistro, Viro Exc., et Legatis Cuvierio et Noëllio, Viris Ampl., tradito mea munera brevitatis causa sic significata sunt, ut meo nomini nude adscriberetur, Professor Graecae et Latinae Literaturae. Atqui hinc periculum nasci poterat, ne quis in eum errorem incideret, ut putaret, aut nullam tradi in hac Leidensi Academia Historiam Universalem, aut ejus docendae mihi veterano ademptam facultatem, novoque Professore Historiarum traditam esse. Itaque in novo Catalogo Professorum, a Te, Vir Exc., ad nos misso,*

quisque Professor suum titulum sic interpretatus est, et ego meum item in hanc sententiam accepi, ut publice et gratis cuique docendum sit illud pensum, quod in Catalogo ejus nomini adscriptum est: privatim autem nemini interdictum censeatur, ne ea, quae antea docuit, docere porro pergat; itaque mihi publice et gratis tradendae sint Graecae Latinaeque Literae, ut jam professus sum me illarum Introductionem publice traditurum: privatim autem ea docere concedatur, quae jam per quadraginta annos haud improbabili ter docui. Haec ut ad Te scriberem, muneris me mei ratio et religio jussit: qui Te, Vir Exc., et propter dignitatem Magni Magistratus Tui, et propriae [215] virtutis doctrinaeque gratia veneror, omniaque Tibi bona precor.

Probatis vero a Magno Magistro rationibus in hac epistolâ allatis, Wyttenbachius bis per dierum hebdomadem scholas *publicas* habebat, quarum argumentum *Introductio in Literas Latinas* erat: at vero *privatim*, more pristino, *Scriptores Graecos et Latinos, Historiamque Universalem* explicabat. Sed quod aliorum Professorum scholae publicae in aliorum privatas lectiones inciderent, ac multi cives Academici solis publice habitis scholis jam contenti essent, nec Literas Humaniores ulterius addiscere magnopere cuperent, contra ea quam primum ad illas doctrinarum disciplinas festinarent, e quibus brevi tantum perciperent, quantum ad victum quaerendum vix satis esset; facile intelligitur, tristi isto tempore scholas Professorum de Literis Humanioribus privatas non admodum frequentes fuisse, immo potius per communem rerum perturbationem fere desertas jacuisse. At tamen aderant adhuc Wyttenbachio e veteranis probati quidam discipuli: in his *J. Kappeyne van de Coppello*, qui

nunc magnâ cum intelligentium virorum laude et approbatione *Gymnasio Hagano* Rector praeest; tum *Abrahamus Willet*, qui edito et doctâ Annotatione illustrato *Protreptico Galeniano*, anno 1812, optime de bonis Literis meruit, et *Janus Adrianus van der Heim*, qui, ut ipse Wyttenbachius [216] ait, sibi proposuerat argumentum elegantis doctrinae specimini ad consequendum gradum doctoris Paradoxa Ciceroniana, sed ob Francicam dominationem, sepositâ illâ vetere et ampliore materia, item brevioris argumenti specimen conscripsit, continens Explicationem Legis V. Codicis. De contrahendâ et committendâ stipulatione: Disputationem de Emancipatione secundum Codicem Napoleonticum; et Theses varii argumenti. De quâ scriptiōne Wyttenbachius in *Philomathiae* L. III. p. 269 agens, „Haec breviter, inquit, et summatim a nobis relata satis indicant scriptoris doctrinam; ut intelligatur, quam erudita et elegans destinata Commentatio Ciceroniana futura fuisset, quamque dolendum sit, eam temporum iniquitate interceptam esse.“

Quod porro ad ipsius Wyttenbachii studia hujus anni domestica attinet, hæc, quantum per oculorum infirmitatem fieri poterat, praecipue versabantur in componendis quibusdam locis, quae leguntur in *Philomathiae* Libro III. atque perscribendis *Animadversionibus in Eunapium*. In Epistolâ quadam ad me mense Augusto 1812 datâ de hoc negotio ita scripsit: „Ego nunc Notas in *Eunapium* conscribo, et properandum est, ne infecto opere nox oculorum me occupet. Nam ocularius medicus mihi affirmavit, in altero etiam meo, eoque sano, oculo apparere indicia venturi

*glaucomatis, eumque acie minus, quam antea, valere.*“ Pervenit vero optimus senex [217] usque ad p. 91, edit. Boissonadii. Legimus enim in fine Annotationis p. 528 hæc ab ipso scripta: „*Hactenus annotationem hanc conscripseram auctumno anni 1812, cum in nostram Academiam Francicam ordinatio incidit.*“ Hinc Eunapius e manibus, nescio quomodo, sepositus.“

Sequente anno inexpectatus et rariori distributione illustrior redditus honor ipsi obtigit. Qui qualis fuerit, quo melius intelligatur, res a capite repetenda videtur. *Ludovicus* scilicet, primus Hollandiæ Rex, exemplo aliorum Regum, in novo regno suo *Ordinem Unionis* instituerat, in quem reciperentur *quingenti* cives, sive militari scientiâ ac gloriâ clari, sive eruditionis laude et famâ celebres, sive artium mercaturæque studio et diligentia florentes, sive eximii virtutibus moribusque conspicui essent. Jam autem, licet Wyttenbachii nomen et plane admirabilis eruditio per omnem cultiorem Europam satis superque nota essent, ipseque ab omnibus prudentioribus ubivis terrarum patriæ nostræ decus et ornamentum a longo jam inde tempore iudicatus esset, atque ideo equestris dignitatis honos ei, tamquam uni e principibus literatæ civitatis, omnino tribui debuisset; tamen ejus, quasi unius e multis, nulla ratio habebatur, quamvis bis deinceps aucto Equitum numero. Ipse id parum curabat, nec cuiquam illum honorem invidebat, satius habens, exemplo Catonis, ut homines [218] interrogarent, quare illo ornamento careret, quam quare illud haberet. Verum enim vero, quum mox ille ordo *Unionis* cum Regiâ maiestate evanisset, ac Napoleon-



tis jussu novus ordo sub nomine *Reunionis* constitutus esset; Wytttenbachio a Francis optimo jure meritis honos habebatur, quem Batavi ei habere aut noluerant, aut certe neglexerant. Magnus Magister Universitatis, cui, ut reliquis doctis et eruditis Parisiensibus, immortalia Wytttenbachii in rem literariam merita probe cognita et perspecta erant, facile persuadebat Imperatori, ut Wytttenbachius honorificâ ratione in Ordinem Equestrem Reunionis allegeretur. Hoc officium mandabatur Praefecto ostiorum Mosae, qui illud lubens suscipiebat, magnâ festivitate perficiebat, et singulari elegantia exornabat. Nam non modo Wytttenbachium continuo de delatâ ipsi dignitate sodalitiî Ordinis Equestris Reunionis certiore faciebat, verum etiam in diem certum honoratissimos magistratus, clarissimos professores, et florentissimum literatae juventutis coetum in aedem Academiae publicam convocabat, ipse stipatus satellitio suo Leidam veniebat, inque illâ splendidâ panegyri ipse Wytttenbachium Ordinis Equestris Reunionis sodalem allegebat, allectum renuntiabat, et ordinis insignibus condecorabat, habito elegante et Wytttenbachio admodum honorifico sermone. Ad quem quum ob temporis angustias copiose respondere [219] Wytttenbachio non liceret, tamen pauca et ad rem praesentem apprime accommodata *De Professore, bono cive*, dixit.

Mecum hunc sibi habitum honorem paucis diebus post per epistolam communicans, praeter alia haec scripsit: „*Dudum literas tuas desiderans, ad te scribere constitueram: nunc, acceptis tuis, te rursus meas desiderare passus sum. In causa fuerunt,*

*præter imbecillitatem oculorum meorum, quibus omnino parcendum, negotia quaedam subita nec exspectata, quæ longum sit enarrare omnia. Unum certe celare te non possum, me sodalem Ordinis Reunionis factum, illum sponte oblatum honorem recusare nec potuisse, nec debuisse, ideoque multa agere, multa loqui, multa scribere, multumque temporis in alieno a Literis nostris argumento consumere, coactum esse. Utinam modo ille honor aliquam facultatem ad benefaciendum amicis daret!"*

Ad illa autem negotia, quibus se occupatum tunc teneri scribebat, etiam epistolarum scribendarum necessitas pertinebat. Commendatione Comitum De Fontanes eques factus, humanitatis rationibus consentaneum erat, ut huic Viro Exc. debitas gratias ageret. Porro, acceptis literis a Serenissimo Duce De Cadore, Magno Ordinis Reunionis Cancellario, quibus jussus erat non modo præscriptam jurisjurandi formulam, suâ manu descriptam, et nominis sui subscriptione insignitam, Parisios mittere, sed illi etiam [220] simul rerum suarum notationem addere. E quibus vero binis literis quum imprimis appareat, quam simplex, candidus et ab omni adulatione atque ostentatione alienus Wyttenbachii animus fuerit, et quam parum inanis gloriolæ aucupio in vitæ ac rerum suarum enarratione tribuerit, ambas hac occasione ad lectorum notitiam perferre, mihi haud ineptum visum est. En igitur utriusque exemplar:

„VIRO EXCELLENTISSIMO  
COMITI DE FONTANES,  
MAGNO MAGISTRO UNIVERSITATIS,

S. P. D.

DANIEL WYTTEBACH.

*Accepi, Vir Exc., humanissimas Tuas literas, quibus mihi significas, me Tui commendatione a potentissimo Caesare in Ordinem Equestrem Reunionis allectum esse. Ego vero, quo gravius est tuum iudicium, et quo latius patet Caesaris majestas, eo mihi ampliorem hunc honorem duco: eumque candidè accipio, ut vetus mihi meum officium servantem et comprobantem, non ut interpellantem et impediētem necessitate obeundorum rituum aut conventuum meae valetudini et aetati adversantium. Fuit enim hoc mihi adhuc quotidianum officium, in quo vitam contrivi, patriae inservire erudiendā ad Litterarum cognitionem et [221] virtutem juventute. In quo si strenue pergam, confido me illius Ordinis legibus satisfacturum, nec quem quid aliud a me postulaturum. — Caeterum vale, Vir Exc., ac sic Tibi persuadeas, me pro ea, quā Te colo, observantia omnem reliquam fortunae et existimationis meae spem in Te reponere.“*

„SERENISSIMO DUCI DE CADOR,  
MAGNO CANCELLARIO ORDINIS EQUESTRI IMPERIALIS  
REUNIONIS, ADMINISTRO STATUS,

S. P. D.

DANIEL WYTTEBACH.

*Et literas Tuas humanissimas, Serenissime Dux, ad me misit Vir Excellentissimus, Comes De Stas-*

sard, *Praefectus ostiorum Mosae, et idem mox Leidam veniens, publice mihi insigne Ordinis imperavit. Itaque honor jam rarior, et Augusto Caesaris nomine amplius, etiam inaugurandi celebritate mihi cumulus est. Cujus beneficii quum magnam partem Tibi, Serenissime Dux, debere videar, gratias, pro eo ac meritis es, magnas Tibi et habeo et ago. Exemplar jurisjurandi meae manu descriptum, meoque nomine subscriptum, item rerum mearum breve commentariolum, ut jussisti, huic epistolae adjeci. Vale, Serenissime Dux, atque ita Deus O. M. res tuas fortunet, ut Te mihi faventem cognoscam.*

## [222] COMMENTARIOLUM

### VITAE RERUMQUE MEARUM.

„*Dan. Wytttenbach, natus anno MDCCXLVI Bernae Helvetiorum, familia patricia, patre Daniele Wytttenbachio, Theologiae Professore. Quo in eadem facultate Marburgum honorificentissimis conditionibus invitato et profecto, filius ibidem, domestica institutione et academicis scholis perceptis, se totum Graecorum Latinorumque Scriptorum lectioni dedit. Tum annum Goettingae degit, et Epistolam Criticam de Juliano ad Ruhnkenium scriptam edidit anno MDCCLXIX. Mox Leidam abiit, ut interiorum harum Literarum rationem ab earum principibus, Ruhnkenio et Valckenaerio, acciperet: quibus persuadentibus delatam sibi in Remonstrantium Collegio Amstelodami Philosophiae Literarumque professionem suscepit, et per octo annos obtinuit. Hinc in Athenaeum Illustrè Civitatis Amstelodamensis traductus, deinceps in eo duo professoria munera gessit; primum Philosophiae ab anno MDCCLXXIX ad MDCCLXXXV: deinde Historiarum, Eloquen-*

*tiae, Antiquitatum, Literarum Graecarum et Latinarum inde ad annum MDCCXCIX, quo ad easdem disciplinas docendas Leidam vocatus, eo migravit, ibique hoc quotidianum officium adducit. Libri autem, quos scripsit, hi sunt: — Caetera vitae mea acta et eventa non sunt tanti, ut in hoc commentariolo memorentur."*

[223] Quum vero vetera illa Literarum studia, quae Wytttenbachio novis istis Equitum ornamentis cariora erant, per Francicam dominationem misere turbarentur, ac fere tamquam res nullius pretii ac momenti derelinquerentur; quumque eo partim aliae publicae calamitates accéderent, veluti (ut unam saltem commemorem) iste novus, et in Hollandiâ praesertim inexorabili acerbitate habitus *Satellitum honorariorum* delectus, qui omnium bonorum animos terribili horrore percellerat, dirumque in modum cruciabat; partim vero etiam privata incommoda istis publicis miseriis, ut ita dicam, sese adjungerent, qualia erant oculorum ingravescens malum, et nimis saepe ipsi allatus nuncijs de hujus illiusque aut necessarii aut amici obitu, ita ut ab omni parte tam praesentibus quam absentibus familiaribus orbareretur: quum tot, inquam, diversi generis mala eum veluti obruere velle viderentur; unumquemque facile intellecturum et sensurum opinor, istorum temporum difficultatem Wytttenbachio lectionis et scriptionis operam, suavitatem ac fructum magnopere ademisse, ipsumque huic praecipuo vitae suae oblectamento, utpote oculis valde inimico, non tantâ studii assiduitate, quantâ superioribus annis, indulgere potuisse.

At vel sic tamen, ut animi dolorem, quo ob me-

morata regula, et causarum adjuncta subinde afficiebatur, quantum posset, a se [224] amoveret, aut certe enim leniret, tempus consumebat potissimum quidem meditando de gravissimis veterum poetarum et philosophorum locis, quorum insignem copiam memoriâ tenebat, partim vero etiam excerptendis variantibus Plotini lectionibus et conscribendis notis in ejusdem scriptoris librum *De Pulchritudine*, quibus *Crœusero*, Viro eruditissimo, et futuro editori Operum Plotini, gratificaretur. Etenim ipsi interdum contingebant, praesertim circa meridiem, quum solis candor clarior esset, ac senis bibliothecam illustraret, istiusmodi *intervalla*, quae *incida* vocare possis, quaeque ipsum aut legere aut scribere aliquid sinebant, et quibus ad officia literaria amicis praestanda uti solebat. Quam Wytttenbachii benevolentiam humanissimus *Crœusero*, qui, est sinceritate ac probitate, gratissimo animo agnovit. Primum enim in Prolegomenis ad lib. latel. p. CXXIV haec publice praedicavit: „*In iis, qui insigniter me demeruerunt, memorandus est primo loco Wytttenbachius meus, qui, postquam me confirmasset in eo universo consilio, eidem multis nominibus profuit. Neque enim Plotini, Jambliski Procliique codices exhibuit modo excerptendos aliis, sed bonam partem ipse lastravit contulique, idque eodem tempore, quo oculis maxime infirmis utebatur, atque, quo cumulum adderet suo illi in me meoque conatus studio, Notas etiam conscripsit cum in hunc librum de Pulchritudine, quas infra adjei [225] integras, verum etiam in Porphyrianam vitam Plotini, quas una cum viri clarissimi, J. Francisci Boissonadii, mihiq. amicissimi, aliquot in eandem observationibus alii tempori reservabo.*“—

- Deinde eadem illa candida et *aurei profecto generis* anima non satis habuit, Wytttenbachio tantum gratias egisse, sed voluit etiam eas referre. Summâ orationis et suavitate et gravitate in Epistolâ, libro Plotini prae-missâ Wytttenbachioque dedicatâ, hunc non modo suâ sponte defendit contra Lipaiensem Theologum, Literatorem agere volentem, *Tittmannum*, qui atrocissimâ maledicentiâ Wytttenbachium petierat, et admodum stulte ac stolide *calumniae* et *adulationis* accusaverat, verum insuper etiam Batavorum Literatarum patrocinium in se recepit, quos idem iste sycophanta ad unum omnes nullius fere momenti amplius habendos esse crepuerat. Sed post illa, quae in Philomathiae Libro III. legi possunt, de istâ *Tittmanni* cum magno stupore conjunctâ vanitate plura dicere me piget, taceatque.

Mox sequebatur illud omnibus bonis gratum ac jucundum tempus, quo, post diuturnam servitutem, fractâ tyrannide Neapolaeontis, et excussâ nimis durâ ac superbâ Gallorum dominatione, tandem pristina Batavorum libertas reviviscere incipiebat. Hocce singulari beneficio divini Numinis admodum laetabatur Wytttenbachius, ex animo optans, [226] ut Gallorum abitus e patriâ nostrâ et ipsis commodus, et nobis frugifer, et universae omnino Europae salutaris foret, coque bono perpressae calamitates sensim paulatimque e memoriâ evanescerent. Locupletem laetitiae ojus testem habeo Epistolam, quam ad veterem spectataeque fidei amicum, *Fredericum Guilielmum Boersium* scripsit. Cujus initium, quatenus huc spectat, exhibebo.

„Ergo rediit jam laetum tempus! Quantum

*illud mutatum ab eo, quo postremas invicem scripsimus epistolas mense Julio! Rediit libertas, cujus nomen non modo amiseramus, sed adeo oblitum eramus: et quod saepe, quamquam frustra nos optare putantes, tamen optabamus, O mihi tam longae maneat pars ultima vitae, Spiritus, et quantum sat erit tua dicere facta! id tandem nobis contigit. Nef fuimus Troës, quod nuper in nos valebat, sed sumus Troës; Trojaque nunc stabit, Priamique arx alta manebit. Jam redit et Virgo (sc. Batava), redeunt Saturnia saecula. Et qui eam reducit patriae pater, Ille Deum vitam accipiat, — Pacatumque regat patriis virtutibus orbem. Et quandoquidem Libertas nos sera tamen respexit inertes; age, ne maneamus inertes, sed omnia expurgemus, si qua manent sceleris vestigia nostri: et si quis manet equus ligneis, ex quo hostes latentes prorumpant, patriamque opprimant, Equo ne credite, Teucri: — Aut pelago Danaum insidias suspectaque dona Praecipitare jube, [227] subiectisque urere flammis, Aut terebrare cavae uteri et tentare latebras. — Ain' vero, nonne Tibi Virgilianum centonem occurrentem repuerascere videor? Tanta est vis temporum et mei curvatorum. Itaque haec semel scripta non delebo, sed Tibi ut curvatorum impingam. Tu ea, quae es humanitate, aequi bonique consules. Sed jam ad seria veniamus etc. —*

Atque hanc sinceram animi voluptatem suam etiam eo ostendit, quod, quum princeps Arausiacus, Rex noster augustissimus, die 21. Decembris Leidam venisset, atque Professores, duce Clar. Kempero, Rectore Magnifico, Principem solenni more salutare decrevissent, ipse domi non manserit, licet id ob aetatem ac valetudinem satis honeste facere, Principemque per-



litteras salutare potuisset, quemadmodum antea aliis quibusdam principibus viris gratulatorias epistolas scripserat. Qualis enim erat tunc status valetudinis ejus? Hic optime cognosci potest ex illis, quae paucis diebus post ad me scripsit: „*Mihi, ut nosti, ad scribendum opus est alacritate animi et vigore, quem saepe restinguit, certe deprimit, torpor et pigritia: nunc imprimis accedente frigore, cujus quanta sit cum pigritia conjunctio per hos dies re et facto expertus sum; ut sapientem et naturae peritum judicem Horatium nostrum ex illo, pigris ubi nulla campis Arbor aestivâ recreatur aurâ. Est enim piger per analogiam a Gr. πῆψος, [228] et hoc a πῆγναι figere, congelare. Nam rivo me frigus affecit, ut numquam ante: nec nisi in lectulô cogitando meditandoque vigui: surgenti autem cogitata statim congelabant: itaque totos dies saepe condidi discurrendo per domum, et si forte per hortulum, quamquam et hoc nunc nivium montes prohibent; nec nisi raro et cursim librum inspexi, veluti canis ex Nilo bibens; ut ipse mirer, me mihi non magis displicuisse.*“

Proximâ aestate (1814) denuo a doctis Parisiensibus ejusmodi honos Wyttenbachio habebatur, ut haud sciam, an nemini antea talis contigerit. Et quandoquidem ob raram viri modestiam ille ipsi habitus honos tantummodo ad paucissimorum amicorum notitiam pervenerit, atque tamen certissimo indicio nobis sit, eruditionem Wyttenbachii in Galliâ a primariis viris maximi aestimatum esse; rem paulo altius repetendam arbitror.

Unus ex amicis Wyttenbachii erat Sanctocrucius. De hujus igitur viri vitâ et rebus *Memoriam* in Philomathiâ edens, praeter alia haec scripsit ipse

Wytttenbachius: „*Idem, quum eodem tempore ageretur de Republicâ nostrâ in Regnum mutandâ, nihil prius potiusque habuit, quam ut me per literas moneret, quibus rationibus meae fortunae, quam periclitari putabat, consulerem. Quod consilium licet insecuta temporum lentitas supervacaneum redderet, magnum tamen ejus erga me fidei et amoris documentum existit.*“ Ex his verbis videmus Sanctocrucium salutî Wytttenbachii consulere [229] voluisse, et Wytttenbachium Sanctocrucii erga se benevolentiam et amorem grato animo agnovisse. Sed quale illud consilium fuerit, hoc illud est, quod non videmus. Res igitur ita se habuit. Quum sub novâ illâ dynastiâ Napoleonticâ res Batavorum Sanctocrucio non satis firmæ, immo nimis fluxæ viderentur; non modo suadebat Wytttenbachio, ut sibi prospiceret, h. e., ut se *Francici Instituti* sodalem fieri curaret, verum etiam ei affirmabat, ipsum continuo cooptatum iri, modo secundum consuetudinis legem ipse rogasset, ut in sodalitiū rite reciperetur. Quid alii, acceptâ ejusmodi admonitione, fecissent, nec scio, nec quaero: sed Wytttenbachius, quamvis amici singularem sollicitudinem landans, quod nullius usquam sodalitiū locum rogaverat, immo istiusmodi conditiones semper aspernatus erat, tunc quoque a se impetrare non poterat, ut eo descenderet. Quocirca illud Sanctocrucii consilium effectu caruit, nec Wytttenbachius amplius de hoc negotio cogitavit. — Verum enimvero, quum octo annis post unū Sodalium ex Wytttenbachio per epistolam quaereret, *an ipso probante facturus esset, si operam daret, ut ipsius nomen nominibus Exteriorum Sodalium tertiæ Classis Instituti, Historiæ et Litera-*

turae adscriberetur; tunc ipse candide et aperte respondebat: „*Conditio Tua, Vir Eruditissime, libera et gratuita est; itaque eam accipio, ut ab eo conciliatore oblatam, quocum arctius [230] etiam conciliari velim.*“ Et deinde quum haud ita multo post vir amplissimus, *Silvester de Sacy*, Wyttenbachio scripsisset, ipsum Instituti Regii Francici sodalem nominatum esse, huic viro ita rescripsit:

„*Jam fere mensis est, quod epistolam Tuam accepi, quā me certiore fecisti, me a Classe Historicā et Literariā Instituti Regii Francici sodalem cooptatum esse. Cui ego epistolas quum continuo respondere et vellem et deberem, ecce adversa valetudo meum propositum officiumque hucusque distulit. Nunc, quo primo possum tempore, gratum animi mei sensum testificor, cum Tibi, Vir Amplissime, cujus auctoritate ac benevolentia is mihi honos delatus est, tum Sodalibus Instituti, Viris Clarissimis et Eruditissimis, qui Tibi ad me ornandum suffragati sunt. Me quidem infirmitas oculorum ne meas quidem res, nedum alienas, agere sinit: quo magis mihi Regium Institutum ignoscet, si minus operae laborisque novo huic muneri tribuero, quam quantum et ipse volo, et a me expectatur. Tibi cui rara naturae felicitate tantum superest facultatis, ut ad summam Literarum scientiam accedat civilis prudentia et reipublicae administratio; Deus O. M. in utroque genere tuos honores laboresque fortunet. Vale; Vir amplissime, mihi quoque porro fave. Scr. d. XV. Dec. MDCCCXIX.*“

Atque profecto ita erat, ut scripserat. Non modo ingravescent oculorum infirmitas ipsum illo studiorum fructu, qui hucusque solus ei [231] vitam vitalem praestiterat, in dies magis magisque privare pergebat,

verum etiam reliquæ corporis vires sensim imminuebantur: ita ut nonnumquam, habitâ unâ alterâque scholâ, in asthmaticas et vertiginosas affectiones incideret, reliquasque differre cogeretur. Sperabat quidem, se ambulando pristinas vires quodammodo recuperaturum, membrorum *δυσκίνησις* depulsurum, et sanguinis frigus soluturum, quod industriae *circum præcordia obstabat*, verum hæc spes ipsum valde fallebat. Vix ambulatum abierat, quin continuo defatigaretur atque deficeret. Nisi enim hoc ita fuisset, sequentibus feriis aestivis unâ cum fratre iter per Helvetiam et Aquitaniam fecisset, cupiens nimirum, antequam sibi aliquid accideret, patriam suam post tanti temporis decursum iterum invisere. Nam per omnes illos annos, quos in Hollandiâ transegerat, non nisi semel in Helvetiâ fuerat. Iter illud anno 1780 susceperat cum tribus discipulis, duobus fratribus *Graaflandiis* et *Weselio Scholtens*. Atque de illo itinere multa auditu jucunda idem vir amplissimus *Scholtenus* mihi superiore anno Leidæ enarravit, affirmans, se semper adhuc cum summâ animi voluptate illius temporis, et peregrinationis recordari, neque unquam Helvetiorum humanitatem, et inprimis Wyttenbachianæ familiæ ingenuitatem obliturum esse. Quod equidem viro honoratissimo vel non diserte affirmanti facile crediderim, utpote aliunde sciens, [232] ipsius mores amabiles et cum flagrante doctrinarum studio conjunctum virtutis amorem cum aliis Helvetiis admodum placuisse, tum vero *Salchlium*, maritum majoris natu sororis Wyttenbachii, adeo cepisse, ut hic ipsi postea Carmen suum *De Malo* dedicaverit.

Sed quum Wyttenbachius sentiret, peregrinandi

consilium ob valetudinem in aliud tempus rejiciendum esse, attamen interea nihil agere non posset, rursus ad Literarum studium confugiebat, tamquam ad humanissimam et liberalissimam animi oblectationem, optimumque miseriarum levamentum. Nam aut ipse, in lectulo cubans, rerum antea actarum recognitione se oblectabat, aut neptis ei praesto erat, omni ratione praecavens, ut ne optimus vir quidquam desideraret ex illo genere officiorum, quibus explendis ipsa par esset. Modo enim avunculo loca, quae vellet, ex utriusque antiquitatis scriptoribus praelegebat, modo epistolas scribebat, quas ille dictare solebat, modo etiam ei recitabat nonnulla ex iis, quae ipsa composuerat, ejusque, tamquam Aristarchi, judicium sibi expetebat. Licet enim corpore aeger esset, tamen animi ingeniique viribus adhuc, uti antea, omnino vigeat. Quo factum est, ut neptis, avunculi potissimum judicio confirmata, precibus amicorum concederet, atque promitteret, se ad publicam utilitatem deinceps edituram esse, quae ad animi voluptatem suam conscripisset. Cuique promisso doctissima *Cleobulina* (quo [233] nomine eam avunculus insignivit) partim jam satisfecit, partim adhuc satisfacere pergit. Nam hoc ipso tempore, quo haec scribo, Parisiis opusculum ipsius, *Symposiaca* dictam, imprimitur, in quod sub fictis quidem nominibus veri tamen cum ipsius, tum defuncti Wytttenbachii amici *De animi immortalitate* colloquentes Socraticâ ratione, plenâ Atticae gratiae, inducuntur. Sed de illo libro pluribus alio tempore agam.

Praeterea etiam eveniebat, ut, emto quodam praetulo, hortum suum altero tanto majorem, et ambula-

tiunculis aptiorem reddere posset. Istiusmodi quid antea hand magni aestimasset, quum adhuc libere, quocunque vellet, obambulare posset: at vero nunc, quum ob imminentem caecitatem sine comite ac duce vix pedem extra horti cancellos proferre amplius auderet, illius soli possessionem maximi faciebat. Quod mihi his verbis scribebat: „*Contigit mihi his ipsis diebus angulum acquirere, qui adhuc meum denormabat agellum, quo ordinando et arboribus conserendis otium fallam et me oblectem.*“ Semper scilicet loca arboribus fruticibusque consita ipsi magis placuerant, quam prata fossis intersecta, et late patentem undique prospectum praebeantia. Hoc ipse alicubi fatetur his versibus Horatianis: •

*Hoc erat in votis: modus agri non ita magnus,*

*Hortus ubi, et tecto vicinus jugis aquae fons,*

*Et paulum sylvae super his foret.*

[234] Rahnkenius contra potius plautie et campestribus regionibus delectatus fuisse videtur, quippe quod talia loca ad venationem cum vertagis instituendam, et felici successu exercendam, maxime idonea essent. Atque idcirco ipsum aliquando stomachatum esse video, quum audivisset, Wyttenbachium secessu quodam Warmondano, quem ei commendasset, uti nolentem, constituisse rusticatum abire in agrum Eemnessanum, ntpote in amoeniori tractu provinciae Rheno-Trajectinae situm, arboribus fruticetisque copiose consitum, et ob ampliora praedia, quae in illius vicinitate essent, ad ambulationes faciendas melius ordinatum. Scripsit enim tunc Rahnkenius Wyttenbachio admodum ironice: „*Gratulor Tibi de loco tandem invento, ubi*

---

*Hoc ipse alicubi]* Bibl. Crit. P. XI. p. XXIX.

*nullus fluviorum aut fossarum obiectus ambulationem Tuam impediat. Speramus tamen fore, ut, antequam Te in istas solitudines abstrudas, teque abdas eo, quo Te nemo sequi possit, nos et reliquos amicos invisas, qui Harderovicensium Professorum viciniam prae Leidensium a Te expetitam esse dolent."*

Verumtamen interea, ut ad Wytttenbachii valetudinem revertar, neque domestica oblectamenta, quae ipsi pia et officiosa neptis continuo praeberere solebat, neque voluptas, quam ex novis plantariis percipiebat, quae in horto institui curaverat, quidquam valebant ad veterem istam ἀσπαῖαν et δόξιναν ex corpore ejus expellendam. Medici igitur [235] ei suadebant, ut feriarum aestivalium tempore iter susciperet, affirmantes, hanc ipsi unicam medicinam corpori firmando superesse. De hoc consilio ipsorum me hoc modo (mense Augusto 1816) certiore faciebat: „*Magnum iter proficisci cogor, non quidem ad doctas Athenas, sed in Germaniam ad Rheni ripam, si forte eam sequens coeli mutatione, aëris salubritate, tum vero locorum natura et amoenitate corpus animumque recreem. Neptim vero comitem itineris mihi optavi.*" — Atque paucis diebus post reapse itineri se committebat, et lente procedendo tandem satis commode Heidelbergam veniebat. In qua vero celebri Academia quum aliquot dies commoratus, et suavissimis Creuzeri aliorumque clarissimorum virorum sermonibus aliquanto exhilaratus esset, primum quidem ulterius proficisci volebat, sed mox secum reputans, quibus vitae commoditatibus in viâ careret, atque εἰς οἶκον βέλτιον εἶναι; prudentius judicabat redire in patriam, quam longius ab eâ abire. Sed ista domum reditio admodum ipsi molesta fuit, nec omni omnino

periculo caruit. In *Supplicio* nimirum, nescio quo casu, incidebat, eaque per triduum tam vehementer vexabatur, ut non modo balneorum utendorum proposito privaretur, verum insuper etiam, quum domum reversus esset, per aliquot deinceps hebdomades medici auxilio indigeret, atque ad amissas corporis vires utcunque reficiendas medicamina quotidie sumere cogeretur.

[236] Quum interea ob magnam illam rerum civilium commutationem, quae, finitâ Napoleontis dominatione, in patriâ nostrâ necessario locum habere debuerat, praeter alia etiam *Ordo Reunionis* sublatus, atque ex Lege, die 29 Septembris anni 1815 latâ, sub nomine *Belgici Leonis* novus Ordo institutus esset, in quem potissimum regnicolae reciperentur, qui aut indubia documenta amoris sui erga patriam dedissent, aut singulari studio ac fide in exsequendis bono civi propriis et privis officiis sese conspicuos reddidissent, aut denique eximiâ artium ac doctrinarum scientiâ excelluissent; altero post institutum illum Ordinem anno eveniebat, ut Wyttenbachius equestri Ordini in supplementum adscriberetur, et signum illius Ordinis ei publice mitteretur. Quod, ut par erat, grato animo accipiebat, sibi persuadens, se ab harum rerum idoneis aestimatoribus augustissimo Regi commendatum esse ut hominem, qui in terrâ Batavorum de Literarum studio unâ cum aliis bene meritus fuisset.

Hucusque vero, quod nonnulli fortunatum putant, uxorem non habuerat: sed nunc neptim quam uxorem ducere volebat. Multis quidem annis ante amoris dulcedine captus fuerat aliquando, at divam Venerem consilii fautricem non habuerat. Quod utrum ipsius, an vero amatae culpâ acciderit, nescio; nec, si vel maxime sciam, referre necessarium putem. Sed quae



de illâ re amatoriâ in duabus [237] Epistolis Ruhnkenii inveni, quia perquam festivo scripta sunt, impetrare a me non possum, quia cum lectoribus communice. In priori Epistolâ legitur: „*Ex literis Tuis suavissimis intellexi, Te, solitudinis pertaesum, vitae torique sociam quaerere. Magni res consilii, et Tibi, quod inaptus esse nescis, difficilis futura. His enim moribus, sine ineptiis, quibus amabilitas censetur, nihil apud puellas proficitur. Ergo si vis uxorem ducere, eo modo, ut. ameris, amabilis celo. Sed haec in congressum nostrum conseruenus.* — In posteriori autem haec scripta sunt: „*De uxoris ducendae consilio, quod cum maxime agitas, quo diligentius cogita, eo magis Te ab eo deterreo. Si indolem Tuam tot annorum familiari consuetudine recte perspexi, videtur simillima esse ingenio Rudolphi Agricolae, de quo vide Baelium in Lex. Hist. et Crit. Quae igitur illum rationes, eadem Te, si bene et tranquille vis vivere, a matrimonio insundo revocare debent.*“

At vero, quæ olim ipsum, exemplo Agricolae, a matrimonio absterre potuerint rationes, harum nullam amplius quidquam valuisse, neminem sanum non intelligere opinor. Nulla enim causa aderat, cur videretur, ne matrimonium sibi aut aliam vitam, aut alios mores, nedum aliquam in Litterarum studio exercendo sive mutationem, sive retardationem allaturum esset. Porro aetas ipsum ab omnibus illis reliquis sollicitudinibus atque curis vacuum et immunem reddiderat, [238] in quas ingeniosi juvenes sese saepe per matrimonia conjicere solent. Sed de istis omnibus etiam ne per somnium quidem cogitabat, et causae,

quibus nunc ad matrimonium ineundum compellebatur; plane singulares et a vulgaribus disjunctae erant. Recognoscens nempe, quantâ neptis diligentia rem familiarem ac domesticam suam per viginti annos administrasset; secum reputans, quantum illa per tam longum contubernium et sermonum suavitate, et morum dulcedine ad vitam suam exhilarandam et veluti condiendam contulisset; ac denique persuasissimum habens, se a nepti semper tantâ pietate dilectum et cultum esse, ut a filiâ majus obsequium ac majora officia desiderare nequitiam potuisset: horum beneficiorum momento commotus, id sibi inprimis agendum censebat, ut non modo sese gratum erga ipsam in hac vitâ ostenderet, verum etiam, quantum posset, post mortem suam ipsius salutem prospiceret. Et quum hoc nullâ ratione melius et efficacius sese praestare posse intelliceret, quam si ipsam duceret uxorem; ob incertum vitae spatium id nunc cum maxime agitabat. Sed quum per leges civiles ipsi non liceret cum sororis suae filiâ conjugium inire, nisi veniam publice impetratâ, ad angustissimum Regem libellum supplicem mittebat, ab Ipsoque hanc sibi veniam expetebat. Et ne forte ille libellus aut in oblivionem abiret, aut in nescio quas [239] difficultates incideret, aut omnino interiret, simul etiam se convertebat ad Virum Excellentissimum, *A. R. Fâlkium*, qui tunc carissimo nostro Patriae Patri ab actis et epistolis erat, eumque per veterem disciplinae necessitudinem rogabat, ut in hac honestissimâ et justissimâ causâ sibi fautor ac commendator esset. Cui rogationi quantâ cum humanitate et plane singulari atque eximiâ benevolentia hic Vir Exc. satisfecit, eventus nos docuit. Mox enim, acceptâ ab angustissimo Rege legitimâ auctoritate, voti sui Wyttenbachius senex compos factus, die 17 Fe-

brnarii 1817, inito matrimonio, illud officium, explevit, quod ipsi tunc maxime cordi erat, suâque paternâ erga neptim curâ effecit, ut nomen *Wyttenbachiae* hodieque inter doctarum mulierum nomina unum e primariis locis obtineat.

Ab eruditissimo Creuzero, qui libros Ciceronis *De Naturâ Deorum* edere sibi proposuerat, rogatus, ut, si quas haberet animadversiones in illos libros, eas secum communicaret, haec ipsum rescripsisse video: „*Quod meas in Ciceronem De Naturâ Deorum annotationes requiris, sunt haec, ut Tibi praesens narraui, dictata mea, nec aliter ea accipi et inscribi volo. Dictavi ea in scholis, quas jam alterum idque partim disserendo, partim dictando habui. Duo exemplaria in scriniis meis reperi, quorum alterum suis partibus absolutum Tibi destinavi, quodque ad Te propediem [240] perveniet. Quantum per oculorum infirmitatem a me fieri potuit, illud relegi, et quaedam addidi, aut deleui, quoniam etiam correxi. Sed de libro Tu ipse judicabis. Reperies eum certe accommodatum captui auditorum, quem adhibeant ut praesens intelligentiae subsidium, et pleraque omnia referri ad interpretationem sententiae, historiae, antiquitatis, philosophiae, observationem orationis Latinae, quaedam quoque ad restituendam manum Ciceronis. Quod vero magis discentibus, quam doctis, scriptus est, quod etiam pars materiae ex prioribus assumpta interpretibus est; hoc in huiusmodi consilio aliter fieri non poterat, et Heynius in Virgilio aliisque scriptoribus, et multi laudati viri in multis item fecerunt.*“

Atque huius beneficii ipse Creuzerus his verbis candide ac peramanter meminit: „*Item Wyttenbachius,*

*Item Wyttenbachius]* Creuz. Praef. ad Cic. de N. D. p. X.

*Vir in literis primarius, non codicum modo Leiden-  
sium mihi ultro copiam fecit, verum etiam, licet  
oculis suis officere sensisset id negotium, Scholas  
super hoc libro suas meâ causâ ipse perlustravis  
correxerat. Quo singulari in me studio factum  
est, ut earundem Excerptis hanc meam editionem  
augere et exornare possem."*

Scholis anno 1817 finitis cum conjuge ad insignem illum et omnium ore celebratum fontem, qui apud Tungros est, abierat, experturus, an aquarum usu nisi liberari morbo, certe levare posset. Nequicquam. Uti abierat, ita redibat, nec aquarum usus quidquam levaminis ipsi attulerat.

[241] Itaque septuagenario major, quum *quadraginta sex* annos professorio munere functus esset, ac Batavorum terram non tantum luce suâ collustrasset, verum etiam magno bonorum discipulorum numero atque proventu beasset, nomen quidem suum inter *Emeritos* profitebatur, et veniâ ætatis utebatur, attamen non eo consilio, ut nullas omnino scholas in posterum amplius habiturus esset. Immo sibi proposuerat, nisi plures, certe unam scholam habere, quam primum id per corporis vires facere posset. Quod tamen ipsius propositum ad effectum non pervenit. In Serie Lectionum, anni 1818, nomen ipsius alto silentio prætermissum erat, quasi jam in locum communem abiisset, aut certe non amplius opus videretur aliquam Wytttenbachii rationem habere; quum tamen aliorum item *rude donatorum* Professorum nomina in illâ Serie neutiquam omissa essent. Quam sibi illatam ignominiam senex non sine causâ ægre ferebat. Sed vel sic tamen isti nominis sui præteritioni nihil aliud reponebat, nisi hoc: „*Daniel Wytttenbach, Professor Literarum Humaniorum, nomen suum antecedente*

*in Serie omissum revocat, et porro tuebitur, repensens vetus promissum habendarum scholarum, si corpori vires accesserint.*"

Interea autem operam dederat, ut *Philomathiae* liber *tertius* in publicam lucem prodiret, qui jam septem annis ante scribi et describi coeptus erat. — Qui liber ultimus [242] ab ipso editus censendus est. — Nam quominus hunc alii sequerentur, praecipue in causâ fuit et oculorum infirmitas et manuum tremor. His etenim malis simul cum scribendi facultate etiam voluntas imminuebatur. Ipse hoc diserte testatus est in fine Annotationis in Eunapium, ubi legimus: „*Annotandi officium intermissum usque ad hunc diem, qui est 17 Aprilis anni 1818. Interea vetus oculorum detrimentum increnerat: accesserant nova, tarditas aetatis, rigor artuum, tremor manuum, alia multa, omnia adversaria studendo: in quo sunt multae magnaeque partes corporis, volutari in bibliothecâ, librorum sedes nosse, eos inde promere, in pulpitis exponere, evolvere, excerpere, quae plena sunt sudoris, et prorsus illud Hesiodicum subiciant, τῆς δ' ἀπειρῆς ἰδρωτὰ θεοὶ προπάροισεν ἔσθηναι. Ut igitur in operis difficultate longe majore, nostrâ facultate multo minore, lectores nobis ignoscant, si annotationis copiam et frequentiam ad paucitatem et brevitatem revocabimus. — At ne hoc quidem efficere increscens infirmitas sivit: sed propositum opus finire coëgit die 25 Februarii 1816.*"

Quod tamen non ita accipiendum est, ac si ab eo inde tempore Wyttenbachius scribere omnino desierit. Cum ex aliis indiciis, tum e quibusdam nondum editis animadversionibus in Eunapium constat, ipsum ad extremum fere vitae tempus mirâ quâdam animi constantiâ in scribendi officio et literarum [243]

colendarum officio perseverasse. Neque dubito, quin unusquisque intellecturus sit, optimum senem nihil amplius typographo excudendum dare potuisse, modo ad deformitatem scripturae animadvertat, quae in illâ ultimâ animadversionum Eunapianarum particulâ conspici potest, quam secundum autographum quam diligentissime manu lithographi exarandam, et huic scriptioni addendam curavi.

Reliquam itaque vitae partem praestantissimus senex re vera in otio transegit, patienter ac moderate ingravescentia senectutis incommoda ferens, animumque philosophiae praeceptis et recte factorum conscientia recreans, donec initio Januarii 1820, in lectulo cubans, apoplexiâ corripereetur, unde neque se amplius movere, neque articulatim ac distincte loqui poterat. Carissima autem conjux isto inexpectato et repentino casu perculsa statim virum experientissimum *Bernardum*, mariti suavissimum collegam, arcessebat. Hujus igitur viri solertia et singulari curâ bonus senex tunc quidem e praesente mortis periculo feliciter extrahabatur; sed quum aliquot diebus post, iterato gravioris ἀποπληξέως impetu, in idem discrimen rursus incidisset, omnia artis praecepta ab eodem medico et amico frustra adhibita essent, et dilectissima conjux per illud temporis intervallum incredibili pietate ac sollicitudine maritum fovisset, tandem [244] die 17 Januarii animam placide efflavit, bonisque omnibus ingens desiderium suū reliquit.

Hucusque igitur de vitâ ac rebus Wyttenbachii egi, et maxime memoratu digna per annorum seriem

---

die 17 Januarii 1820.] Cf. Orat. V. Cl. De Pui in Annal. Acad. L. Bat. vol. V. p. 20., et Nunt. Art. et Lit., A. 1820. Nr. IV. p. 49.

enarravi, quatenus illa ad meam notitiam pervenerunt. Atque ubi mecum reputo, ipsum a primâ juventute suâ nihil aliud sibi proposuisse, nisi ut in doctrinarum studio vitae suae tabernacula collocaret; non magis cuique sano ac prudenti mirum videri posse opinor, quam mihi videtur, cur huic studio maxime congruens vitae genus sibi elegerit, h. e., cur magis domi ac cum paucis doctis, quam extra domum et in circulis semidoctorum vivere voluerit. Scio quidem, fuisse jam multis abhinc annis quosdam vulgivagos, qui manibus, ut ajunt, pedibusque persuadere aliis conarentur, Wyttenbachium haud ita multum differre ab isto se ipsum cruciante Heantontimorumenō, et nisi omnino *μὴδὲνδρῶπον*, certe *φυγὰνδρῶπον* esse: verum etiam me non fugiunt, quae Clar. *Creuzerus* verissime scripsit: „*Quod nonnulli missitant subinde, Tuque ipse prae Te fers, paucorum Te esse hominum, illud eam vim habet, doctiorum Te esse, non otiosorum, non male feriatorum, non vulgi. Quorum qui esse velit, is non potest Musarum esse.*“ Jam autem Wyttenbachium vitam suam Musis dicasse, ipsisque [245] dies noctesque operatum esse, non modo egregia illa, quae edidit, opera declarant, verum constat etiam ex epistolarum commercio, quod ipsi cum primariis in re literariâ viris, cum in Angliâ et Galliâ, tum in Germaniâ Italiâque, intercessit. Et quamquam, ut ipse ait, *demum post obitum Rulnkenii epistolarum suarum exempla facere coeperit, ut reliquae vitae suae et instanti senectuti consuleret, nec oblivisceretur, quae scripsisset*: tamen illa collectio plures quam *quadringentas* epistolas continet.

---

[*quod nonnulli missitant*] Ep. ad. D. Wyttenb. praefixa Plotino, p. XXVII.

*demum post obitum R.*] Bibl. Crit. P. XII. p. 92.

Quam parvi vero ipse leviorum hominutionum de se sermones aestimaverit, inprimis intelligitur ex illis, quae de vitae suae antea actae ratione senex scripsit: „*Haud me poenitet vitae adhuc sic actae: quam sive solitariam, sive umbraticam, sive scholasticam, quis appellet, non repugno: modo illud concedat, unumquemque suam ipsum naturam nosse debere, ad eamque vitae suae genus rationemque ita accommodare, ut se ipsum et alios maxime juvet.*“ Hoc autem Wyttenbachium fecisse, quis est qui negare ausit? Non contentus philosophorum praeceptis ad rerum divinarum et humanarum intelligentiam solummodo profecisse, in id ante omnia incumbibat, ut illarum rerum cognitio, quas studii sui assiduitate sibi acquisivisset, in actionem abiret, atque salutares fructus proferret. Eo spectabant tam ipsius colloquia cum praesentibus collegis, discipulis et amicis [246] habita, quam literae ad absentes scriptae. Eo referebatur omnis ejus docendi ratio, quam non ad solam discipulorum scientiam augendam referebat, verum in quâ ita versabatur, ut in auditorum suorum animis studium virtutis simul excitaret, eosque eo adduceret, ut morum elegantiam et honestatem cum doctrinarum disciplinâ conjungerent. Quod quam plurimi deinceps melioris notae juvenes grato pectore agnoverunt, et in suis ipsi scriptis professi sunt.

Hanc autem viam, quam semel ingressus erat, constanter persecutus est, seque rarâ quadam modestiâ et singulari liberalitate per omnem vitam spectabilem reddidit.

Neque enim in sermonibus, neque in scriptis suis se unquam supra alios extulit, sed potius sese infra



alios semper posuit, quamvis eos eruditione longe superaret. Atque alienus ab omni vanitate, nec ipse honores sibi ab aliis habitos, more multorum, per ephemerides aut menstruos libellos divulgavit, nec id ab amicis suis fieri voluit. Sic v. c. non ad vulgi, sed vix ad paucorum familiarium notitiam pervenit, ipsum anno 1802, *Societatis Latinae Jenensis*, anno 1811 *Societatis Regiae Göttingensis*, et anno 1816 *Instituti Regii Francici* sodalem cooptatum esse.

Et quum vix quisquam, qui sua negligat, aliis consulere queat, tenendum est, Wyttenbachium semper studiose cavisse, ut ne [247] in liberalitate suâ desiderari posset ethica; cujus unum e praecipuis praeceptis hoc est, Virtutem in mediocritate esse positam, et ab extremis utrimque reductam. Hinc et liberalis erat, et simul ad rem attentus, ut nimirum haberet, unde liberalior esse posset. Vanam vero liberalitatem ferre omnino non poterat, et prodigus neque esse, neque haberi volebat. Istiusmodi homunciones maxime contemnebat, quia saepius viderat, longe maximam istorum partem aut aliis detrahere, aut aes alienum contrahere, aut creditores differre, aut non solvendo esse; ita ut de istis vulgo quererentur non solum

*cupedarii omnes,*

*Cetarii, lanii, coqui, fartores, piscatores,*

verum etiam vinarii, vestiarii, autôres, sartores, fabri et multi alii. — Jam autem liberalitas Wyttenbachii partim ad discipulos, partim ad alios pertinebat. Erant ipsius scholae admodum frequentes studiosorum juvenum numero, sed tam frequentes sane non fuissent, si ab omnibus auditoribus honorarium severe exegisset. Ex illis indicibus, quibus auditores nomina sua inscri-

bere solent, factâ computatione, mihi luce clarius apparuit, Wyttenbachium Leidae aliquot florenorum millia discipulis remisisse. Sed quoniam ostentationem non sectabatur, verum illud praeceptum religiose sequebatur, quo hi tantum beneficia meminisse jubentur, qui ea acceperunt, non vero commemorare, qui ea contulerunt, [248] idcirco ipsius liberalitas vulgo minus nota fuit. At tandem tamen, ipso vel maxime invito, illa aliquâ certe ex parte anno 1817 magis innotuit; quo anno nimirum ob annonae caritatem cum aliae urbes, tum praecipue Leida pauperibus adeo oppleta erat, ut nemo paulo honestior civis vel advena domo vel diversorio exire posset, quin continua in mendicorum catervas incideret. Tunc enim optimo seni, ad scholas habendas in urbem venienti, tanta mendicantium turba, stipem ablatura, extra portam semper obviam ibat, ipsumque usque ad auditorium sequebatur, ut magistratus, de eo certiores facti, tandem metuerent, ne a faece plebis in plateâ obrueretur, ipsumque amice praemonerent, ut sibi caveret, affirmantes, ad mendicorum importunitatem in tantâ cibariorum inopiâ et caritate coercendam accensurum nimis exiguum numerum non sufficere.

Sed cur plura? Quum Wyttenbachius unus ex illis fuerit, quos Plinius beatissimos judicat, qui scribenda fecerit, et legenda scripserit, atque idcirco non indigeat meo praeconio, nec ego is sim, qui summi viri cum ingenii tum animi virtutes, quod in praefatione jam dixi, pro meritis laudare queam; satis sit dixisse, me neutiquam dubitare, quin boni, aequi et harum rerum idonei iudices, qui ipsi vivo cunctis suffragiis ob eximiam doctrinae praestantiam unum e principibus locis inter eruditorum principes dederunt, [249] mortui quoque nomen ac famam, quamdiu literis lu-

manioribus apud cultiores orbis terrarum nationes suis honos constabit, perpetuo summâ cum laude celebraturi sint.

V  
XV  
Psalms  
Sepultus autem est in horto suo prope introitum, fere sub fenestram coenaculi. Hunc enim locum non modo ipse sibi vivus futuro sepulcro elegerat, verum etiam carissimae coniugi mandaverat, ut, si quid sibi accidisset, aliquot pondo calcis vivae loculo mortuali imponeret, quo citius corpus suum dissolveretur. Quod mandatum humanissima vidua quam diligentissime peregit. Verum ut eadem, quemadmodum sibi proposuit, etiam propediem sepulcro cippum imponi curet, etiam atque etiam opto. Tali enim modo poterit quivis hortum praeteriens viator videre, ubi sepositum sit corpus tuus ex celeberrimis triumviris illis, qui in eâ vicinâ deinceps rusticati sunt. Ubinam enim alibi invenies locum, in quo possis uno oculorum obtutu conspicere tria suburbana fere contigua virorum, quales *Cartesius*, *Boerhaavius*, *Wyttenbachius* fuerunt?

Atque, his scriptis, huic opusculo finem impono, nihil ardentius optans, nisi ut illis tribus coryphaeis similes virtute, doctrinâ et sapientiâ viri patriae nostrae nunquam desint.

[cippum imponi curet] Scripsit mihi nuperrime honestissima vidua, id jamjam actum iri.

FINIS.

G. L. MAHNI

*epicrisis censurarum Bibliothecae Criticae Vol. III. P. 3.*

---

VIRO AMPLISSIMO, GRAVISSIMO,

HIERONYMO DE BOSCH,

ORDINIS EQUESTRIS SOCIO, ACADEMIAE REGIAE, QUAE  
EST LUGDUNI IN BATAVIS, CURATORI, EIDEMQUE  
ERUDITISSIMO BONARUM ARTIUM ATQUE  
DOCTRINARUM FAUTORI ET PATRONO,

HANC EPICRISIN EA, QUA DECET, OBSERVANTIA

D. D. D.

GUIL. LEON. MAHNE.

*Rem actam agam, Vir Ampl., si denuo declarare velim,  
quae me caussa ad hanc epicrisin conscribendam impulerit.  
De ea in praefatione satis me egisse arbitror. Imo vero longe  
diversae, et quidem duplicis rei rationem mihi reddendam esse,  
in primis sentio: primum, cur hoc opusculum tam sero in  
lucem prodeat: deinde, cur Te in fronte ipsius alloquendum  
existimaverim. Utrumque igitur paucis exponam.*

*Hanc ego epicrisin jam perscripseram, quum interveniente  
calamitoso urbis Leidae casu, miserabili Luzacii obitu, Wyg-  
tenbachii mirabili salute, commotus, rerumque humanarum  
fragilitatem cogitans, totum hoc edendi libelli consilium ob-  
jeci. Ad quod ut me referrem, fecit non tam irrisio malevo-  
lorum, crepantium, me nihil quod responderem habere: quam*

*admonitio amicorum, affirmantium, me apud homines doctos meae existimationi tacendo obfuturum, nimis diu jam ab invidis et indoctis vexatae; ergo meum esse respondere, praesertim in causa facili et iusta; idque me mihi ipsum debere. Itaque feci. Et quandoquidem iste posterior vitio creatus censor meam reprehensionem cum Luzacii, V. Cl., laudatione conjunxisset, egoque nihil ex ea detraxissem, vivo parcens, eo magis cavi, ut mortui manes ne laederem, sed debitum iis honorem haberem: eaque de causa nonnulla omitterem argumenta, quibus censoris calumnias copiosius refutare potuissem.*

*Porro autem, cur Tibi potissimum, Ampl. BOSCHI, hanc operam meam dedicandam censuerim, hujus quoque ratio in promptu est, nec difficiles explicatus habet. Etiam si enim nullam aliam hujus consilii mei causam commemorare possem, quam quod Cel. Wytttenbachius Tibi Bibliothecae Criticae Partem Undecimam inscripserit, cujus hoc, quidquid est muneris, appendiculæ instar haberi velim; tamen vix dubito, quin Rarum rerum idonei existimatores et judices mihi assensuri sint, cui sors obtigerit, eidem quoque usuras deberi. Atque hanc jam ob causam, si libello ipsi optio dari potuisset, in cujus tutelam potissimum venire vellet, Te sua sponte sibi tutorem elegisset. Sed accessit huc cumuli instar alia ratio. Jam diu meam erga Te observantiam Tibi testatam esse optavi: sed ejus testificandae opportunitas hucusque mihi defuit. Quae quum nunc quasi ultra sese offerret, lubens avideque eam arripui. Tua enim in rem literariam et literarum studiosam juventutem merita tanta sunt, quanta ea possunt esse maxima. Non modo ipse, quamvis aliis iisque gravissimis munerum Tuorum curis et negotiis occupatus, literis assidue operam navare, earumque fines, quasi nihil amplius Tibi agendum sit, inque id unica Tibi incumbere liceat, proferre haud desinis; sed adolescentes quoque ad bona studia incitare soles. Illud mihi constat ex operibus Tuis, quae quidem ad meritam meam pervenerunt, quoque summo cum fructu et*

utilitate legi: hoc non tam fando saepe audiui, quam ex Cl. Wytttenbachii ad Te nostri elegantissime scripta epistola denique intellexi. Utinam mihi, quum Amstelodami in Wytttenbachii schola literis nostris operam navabam, tam felici esse contigisset, ut in Tuam familiaritatem venire potuissem! Utinam me juvenilis quidam pudor tunc temporis a congressu et sermone Tuo non deterruisset! Certo enim scio, me quoque, ut meorū commilitonum permultos, semper a Te doctiorem discessurum fuisse. Verum enim vero, quoniam nec Tu meo meritorum Tuorum praeconio eges, nec ego illam orationis facultatem, qua haec dilucide, copiose et ornate praedicem, satis calleo; liceat mihi, omissis inanibus multorum verborum lenociniis, ad Te transferre illud Sallustii: Silere melius puto, quam parum dicere. Liceat porro mihi, quoniam Fortuna non amplius regressum habet, hac spe, nisi certa, saltem blanda, me recreare, quod olim culpa mea factum non sit, nunc adhuc studio meo fieri posse. Liceat denique mihi a Te petere, ut hoc munusculum benevole excipias, nec ex pretio suo, quod exiguum esse sentio, sed ex grato erga Te animo meo aestimes.

Te Deus patriae et literis diu salvum et incolumem conservet, faxitque, ut in summam usque senectutem perennes et uberrimos Tuorum meritorum fructus percipias. Quod animi mei votum, ut Summum Numen ratum habeat, etiam atque etiam precor.

Scrpsi Amisfurti, m. Sept. A. 1808.

## ARTIUM HUMANITATIS

STUDIOSO LECTORI

SALUTEM ET OFFICIA.

Ducentis jam, et amplius, abhinc annis, B. L., viri docti de Literarum Graecarum et Latinarum in deterius vergente conditione questi sunt. Quem enim fugit, modo non sit plane hospes in Literis, quantopere Muretus, et postea Graevius, ut alios hisce similes viros silentio praeteream, in eruditorum virorum panegyri majorum suorum tempora extulerint? Quibus eloquentiae stimulis commilitones suos incitaverint, ut majorum suorum vestigia premerent; et summa animi contentione ac studii assiduitate utriusque antiquitatis eruditae scriptores pervolverent, eosque diurna et nocturna manu versarent? Quam singulari et plane divina persuadendi arte usi sint, ut caverent, quo minus saluberrimum illud ingenilis Literarum humaniorum studium evanesceret, et studiosa juvenus aut male suadentium lenociniis caperetur, aut per iudicii levitatem et inconstantiam sibi ipsa deesset?

Verum enim vero, si superiorum illorum saeculorum memoriam repetimus, et Literarum, Graecarum pariter atque Latinarum, statum, qualem Mureti et Graevii temporibus fuisse videmus, cum hodierno comparamus, haud difficulter unusquisque nostrum ingentem quamdam mutationem in pejus factam agnoscet; et parum aberit, quin vel maxime invitus tristem illam et lugubrem cantilenam canere cogatur, *ô tempora, ô mores!*

Velim hoc unum modo mecum recognoscas, B. L., quoniam de omnibus harum Literarum detrimentis sigillatim dicere nimis longum est, quanto in honore tunc Latini sermonis usus fuerit, „*Ante hos ducentos annos,*“ sunt verba

Clar. Wytttenbachii, \*) „*quam homo non plebejus fere quisque bene Latine scriberet, certe a nostrae barbarie aetatis longe abesset, nulla ferebantur compendia stili Latini, ipsi scriptores lectitabantur, ex iisque illa facultas sanitasque orationis hauriebatur.*“ Atque alio loco \*\*) idem vir doctus de eadem re ita scripsit: „*Inde a renatis Literis usque ad medium fere saeculum decimum septimum, simul cum lectione scriptio florebat. Nemo erat literatus, quin bene scriberet: plurimi adeo aliarum disciplinarum studiosi ac scriptores eandem scribendi laudem et sequebantur et assequebantur, Theologi, Jurisconsulti, Medici, Philosophi.*“

Utebantur igitur illa aetate viri docti, qui supra vulgus sapere didicerant, in conscribendis operibus suis sermone Latino, h. e. eo, qui non exiguis alienius regionis finibus contineretur, sed ad omnem eruditam civitatem pertineret, et in omnibus fere gentibus legeretur. At vero, ut nunc sunt tempora, longe maxima hodiernorum scriptorum pars, tam in patria nostra, quam extra illam, in Gallia, Germania, Britannia, aliisque regionibus, neglecto Latini sermonis usu, vernaculam sibi linguam usurpat. Hoc valeat in argumentis vel ad solas res patrias spectantibus, vel ad plebis cognitionem oblectationemque compositis: hoc valeat in fabulis vel scenicis, vel Milesiis, et id genus aliis scriptiunculis, quarum cum novitate plerumque etiam simul quaecunque pretium evanescere solet; sed in doctrinae cuiusque et eruditionis interioris genere, nec nisi ad doctorum hominum cognitionem accommodato, quin etiam in librorum Latine scriptorum censuris neutiquam ferendum: imo potius quoquomodo coercendum arbitror. \*\*\*) Nam,

\*) *Bibl. Crit. Vol. I. P. IV. p. 117.*

\*\*) *Bibl. Crit. Vol. III. P. II. p. 12.*

\*\*\*) *Vere scripsit F. A. Wolfius in praef. ad Cic. Orat. p. 13.* „Nihil profecto potest esse perversius, quam ad controversias de reconditis partibus literarum, omnibus communium gentibus, invitari popularium vulgus vernaculis linguis: ex quo consequitur, ut caussae, quas tractamus, ab exiguo numero eorum, qui praecipue iudices expeti debeant, judicari possint, ab indoctis autem et saepe hominum personas, non rerum momenta ponderantibus tanto majore vel levitate vel cupiditate iudicentur.“



quod de publica laebe menuit Cicero [*de Amic. XII.*], *serpis deinde res, quae proclivius ad perniciem, cum semel coepit, labitur*. Ad communem nimirum omnium doctrinae fructum spectat, et omnium eruditorum interest, quocunque terrarum loco habitent, ut artium et doctrinarum quasi pomœria quam longissime dilatentur, nec res literaria, veluti Abayrti corpus, dilaceretur. Qui malo quemadmodum in primis aditum patefacit ista in dies magis magisque ingravescens per-versitas patrii sermonis ad omne argumenti scriptiônisque genus adhibendi et quasi abutendi; sic contra ea ad istud malum sanandum et extirpandum, nec non ad doctrinarum studium altius provehendum, Latini sermonis usus valet, ejus apud omne ferme gentes concinnitas et pulchritudo percipi solent. Latina enim lingua non amplius populi alicujus imperio regitur, aut ex multitudinis libidine pendet, sed certis regulis constat, et scribenti certam scribendi legem et normam praebet. Porro haec potissimum lingua cum literis humanioribus et caeteris disciplinis, vulgo non satis apto nomine dictis illis quatuor *Academicis Facultatibus*, arctissimo vinculo nexa et copulata est. Accedit huc, quod hi, qui non nisi patrio sermone scribere sciunt, nunquam sine periculo pennas extra nidum, h. e. patrium solum, extendere, et cum viris doctis per omnem terrarum orbem literarum commercia inire queunt. Qua profecto opportunitate soli Latine scribentes fruuntur.

At vero, inquis, non omnes unum idemque pretium Latino sermoni facimus. Scio duplex fere hominum genus esse, qui ab hoc nostro judicio dissentiant: de quibus quid sentiam, breviter declarare haud dubito.

Prius genus est eorum, qui Latinam linguam plane supervacaneam hodieque esse crepant, quod scilicet praecipua quaeque Romanorum scripta partim in Gallicam et Germanicam, partim in vernaculam nostram linguam conversa sint. Hi profecto misere caecutiunt, et tamdiu in Cimmeriis tenebris oberrabunt, donec didicerint multo melius esse, ex ipsis fontibus haurire, quam turbidos rivulos consecrari. Atque utinam hi versionum, quas vocant, patrum imitarentur pictores, quos nonnunquam in longissime remotas regiones profectos legimus, ut praestantissima pictarum tabularum exemplaria oculis ipsi suis lustrare,

et easque exscribere et pingere possent, quemvis illarum imagines exactissime depictas in patria sua haberent, quibus uti liceret. Caeterum quam difficile sit bene vertere, et quam lubricum fidere interpretibus, jam docuit Hieronymus in praef. ad Eusebii Chronicon: et ex nostra aetate omnino legi merentur Joh. Aug. Ernestius in dedicatione operum Ciceronis ad Stiglizium, nec non Joh. Jac. Hottingerus in opusculo de recentissimis versionum Germanicarum officinis, ejus memoria exstat in Bibl. Crit. V. II. P. III. p. 105.

Posteriorius genus continet eos, qui Linguae Latinae cognitionem ad intelligendos veteres scriptores necessariam quidem esse dicant, sed nullum ejus ad scriptionem usum statuunt. Ajunt majus meliusque esse Latinos auctores intelligere, quam, ut probabiliter scribere possis, in scriptoribus antiquis non nisi verba et loquendi formulas venari. Sed, primum omnium, ecquis tandem adeo stultus reperitur, ut orationis Latinae facultatem ita consequatur, ut rerum cognitionem ac sententiarum praestantiam praetermittat aut repudiet? Deinde, verba non nisi rerum notae sunt, nec quidquam fidei meretur vana istorum gloriatio, qui, dissidium quoddam rationis et orationis fingentes, rerum sapientiam sibi arrogant, quasi alterum alterius adminiculo et consubio carere queat \*). Neque porro quisquam, nisi qui verba teneat, res perceptas habere potest. Qui aliter judicat, qui mentem a voce, rationem et sententias ab oratione sejungit, nae is idem facit, ac si rivum a fonte, animum a corpore separet, quamvis reluctante natura. Jam vero fac aliquem nullo alio consilio, nisi ut verum Latinitatis colorem in scriptis suis exprimere possit, ad veterum scriptorum Latinorum lectionem accedere; nonne illi ante omnia optimi quique scriptores diu et diligenter legendi sunt? Ita sane. Stultissimum enim est, ut cum Plinio [Ep. I. V, 12.] loquar, non optima quaeque ad imitandum sibi proponere. Porro nonne necesse est huc accedant *Observatio* et *Imitatio*? Illa, ne quid in lectione praetermittas, quod ad scribendi usum et artem pertineat, haec, quia ex praecepto Ciceronis [de Or. I, 33.] stilus optimus tam dicendi, quam scribendi, magister est.

\*) Cic. de Or. III. 61. et Muret. T. I. p. 327.

quod de publica labe mon-  
deinde res, quae proclivius  
labitur. Ad communem  
spectat, et omnium eru-  
loco habitent, ut a  
quam longissime dil-  
corpus, dilaoeretur  
tum patefacit ist-  
versitas patrii  
genus adhiber-  
malum sana  
studium a/  
eujus ap/

nae mihi certe veris-  
invenieris, qui veter-  
it, et utraque pr-  
erum pariter

usum

tur,

ar

ante

ad eruditam

posita sint, et quidem

ad legitimae antiquitatis prae-

astet.

percipi causa eo magis dolendum est, tantopere  
alicuj spatio et curriculo majorum consuetudinem  
sed. Quemadmodum enim olim patria nostra ma-  
les virorum Latine scribentium proventum protulit, sic  
nodieque summa illorum penuria est. *Ruhnkenio* enim et  
*Saxio* mortuis, unus in primis nobis superest *Wytttenbachius*,  
qui hac in laude majorum morem caste et integre tueatur.  
Hic orationis suae bonitate et praestantia non tantum dignus  
est, qui cum optimis Latinis scriptoribus comparetur, sed  
etiam apud harum rerum idoneos judices tantam laudem  
adeptus est, ut haud facile quemquam invenias, qui non  
lubens ad ipsum Latine scribendi principatum deferat.

Et licet hoc ita sese habeat, tamen non defuerunt  
nonnulli vitio creati censores, qui pro sua virili utcunque  
ostendere conarentur, Latinitatem *Wytttenbachii* non modo  
vitiis suis non carere, sed ipsius quoque de Latina lingua  
praeceptis parum fidei habendum esse. Simul enim atque  
*Bibl. Criticae* nuper particulam ediderat, prodierunt non-  
nullae censurae, inque iis duae inprimis memorandae \*).  
Utramque censuram aliquoties legi, et inter legendum plus  
quam semel animadverti, illarum opifices ad quidvis aliud

\*) Harum altera exstat in opusculo, quod patrio sermone  
scriptum est, et hunc habet titulum: *Schouwburg van In- en  
Uitlandsche Letter- en Huishoudkunde*; altera invenitur in alio  
item vernacule scripto libello, qui inscribitur: *De Recensent,  
ook der Recensenten*.

quam ad censori  
esse, Bini cens

In pueriles  
ostenderun  
s plane h  
vidunt,  
n suo  
por

istis hom.

ras progressi falsam

ant. Nam et cedere praecipien.

veluti jure quodam potestatis, quo fere hoc  
intumescit, imperiosi atque interim saevientes, stult.  
perdocent."

Ne itaque istiusmodi homuncionum auctoritate, quae  
cum apud alios, tum potissimum apud adolescentes vulgo  
nimis magna esse solet, artium humaniorum studiosa, ju-  
ventus deciperetur, haud inutile nec a persona mea alienum  
esse duxi, utramque censuram ipsum censere, earumque  
notas ad scientiae judiciiue normam exigere. Neque est,  
quod dubitem, quin solam hanc causam, etiamsi nulla alia  
accederet, viri docti probaturi sint. Sed accessit huc alia,  
quae ad me ipsum proprie pertinet.

Quum anno aetatis vicesimo primo per quinque dein-  
ceps annos Wytttenbachii institutione ac disciplina usus  
fuissem, eodem suatore magistro edidi quaecumque pro-  
gressuum meorum periculum, *Diatriben de Aristoxeno Phi-  
losopho Peripatetico*. Primus in patria fuit, quod sciam,  
Wytttenbachius, qui hujus opusculi mentionem fecerit,  
illudque dignum judicaverit, cui cum aliis commilitonum  
suorum speciminibus locum in Bibliotheca Critica tribueret.  
At vero extra patriam magis innotuisse, et quodammodo  
desideratum fuisse videtur. Nam quum illud meis sumtibus  
typorum formulis excudi curassem, ideoque nulla in biblio-  
poliis exemplaria venalia essent, quatuor abhinc annis Lip-  
siae repetitum est uno volumine cum *Huberti Eldikii*, viri  
Graece Latineque eruditissimi, *Suspicionibus*; addita viri  
docti cujusdam, sed non nominati, praefatione, cujus haec  
sunt verba: „Opus exordimur multis multorum priscae litera-

paginis, utpote a re  
mod multa dicamus:  
uae in hac ultima  
in vero praedica-  
et propemodum  
convertit ad  
suscipiens  
tivus esse  
Sed! ac  
averse

Quodsi autem haec vera sunt, quae mihi certe verissima videntur, haud facile quemquam inveneris, qui veterum scripta legens non statim sibi persuadeat, et utraque pagina agnoscere cogatur, legendi finem in rerum pariter atque verborum intelligentia positum esse.

Videant igitur, qui Latini sermonis usum tam vanas et futes ob causas deserendum arbitrentur, quam bene et prudenter agant! Judicent ipsi, quam parum rei literariae consulant! Intelligere discant, quanto intervallo distent ab iis viris doctis, quorum scripta ad eruditam civitatem spectantia Latino sermone composita sint, et quidem ita composita, ut in iis oratio ad legitimae antiquitatis praeceptiones conformata exstet.

Atque hac de causa eo magis dolendum est, tantopere deflexisse de spatio et curriculo majorum consuetudinem posterorum. Quemadmodum enim olim patria nostra magnam virorum Latine scribentium proventum protulit, sic hodieque summa illorum penuria est. *Ruhnkenio* enim et *Saxio* mortuis, unus in primis nobis superest *Wytttenbachius*, qui hac in laude majorum morem caste et integre tueatur. Hic orationis suae bonitate et praestantia non tantum dignus est, qui cum optimis Latinis scriptoribus comparetur, sed etiam apud harum rerum idoneos iudices tantam laudem adeptus est, ut haud facile quemquam invenias, qui non lubens ad ipsum Latine scribendi principatum deferat.

Et licet hoc ita sese habeat, tamen non defuerunt nonnulli vitio creati censores, qui pro sua virili utcumque ostendere conarentur, Latinitatem *Wytttenbachii* non modo vitiis suis non carere, sed ipsius quoque de Latina lingua praeceptis parum fidei habendum esse. Simul enim atque *Bibl. Criticae* nuper particulam ediderat, prodierunt nonnullae censurae, inque iis duae inprimis memorandae \*). Utramque censuram aliquoties legi, et inter legendum plus quam semel animadverti, illarum opifices ad quidvis aliud

---

\*) Harum altera exstat in opusculo, quod patrio sermone scriptum est, et hunc habet titulum: *Schouwborg van In- en Uitlandsche Letter- en Huishoudkunde*; altera invenitur in alio item vernacule scripto libello, qui inscribitur: *De Recensent, ook der Recensenten*.

potius, quam ad censorum provinciam recte sustentandam, idoneos esse. Bini censores neq̃ multa, nec multum legisse videntur. In pueriles enim subinde errores inciderunt, et luce clarius ostenderunt, se in veterum Latinorum scriptorum operibus plane hospites esse. Et nihilo secius tamen mire sibi plaudunt, anserum Capitulinorum instar Reip. literariae salutem suo strepitu sustinere et tueri sibi videntur, velut ex tripodē pronunciant, suaque effata rata esse jubent. Adeo verum est, quod scripsit Quintilianus [I, 1.]: „Nihil pejus est istis hominibus, qui paullum aliquid ultra primas literas progressi falsam sibi scientiae persuasionem induerunt. Nam et cedere praecipendi peritis indignantur, et veluti jure quodam potestatis, quo fere hoc hominum genus intumescit, imperiosi atque interim saevientes, stultitiam suam perdacent.“

Ne itaque istiusmodi homuncionum auctoritate, quae cum apud alios, tum potissimum apud adolescentes vulgo nimis magna esse solet, artium humaniorum studiosa, juvenus deciperetur, haud inutile nec a persona mea alienum esse duxi, utramque censuram ipsum censere, earumque notas ad scientiae judiciiue normam exigere. Neque est, quod dubitem, quin solam hanc causam, etiamsi nulla alia accederet, viri docti probaturi sint. Sed accessit huc alia, quae ad me ipsum proprie pertinet.

Quum anno aetatis vicesimo primo per quinque deinceps annos Wytttenbachii institutione ac disciplina usus fuisset, eodem suasore magistro edidi quaecumque progressuum meorum periculum, *Diatriben de Aristoxeno Philosopho Peripatetico*. Primus in patria fuit, quod sciam, Wytttenbachius, qui hujus opusculi mentionem fecerit, illudque dignum judicaverit, cui cum aliis commilitonum suorum speciminibus locum in Bibliotheca Critica tribueret. At vero extra patriam magis innotuisse, et quodammodo desideratum fuisse videtur. Nam quum illud meis sumtibus typorum formulis excudi curassem, ideoque nulla in bibliopoliis exemplaria venalia essent, quatuor abhinc annis Lipsiae repetitum est uno volumine cum *Huberti Eldikii*, viri Graece Latineque eruditissimi, *Suspicionibus*; addita viri docti cujusdam, sed non nominati, praefatione, cujus haec sunt verba: „Opus exordimur multis multorum praeae litera-

*turas amantium votis expetitur. In quo instituendo quid nobis consilii fuerit, quibusque momentis totum hoc quidquid est negotii ponderandum sit, melius ex hoc ipso, quod nunc damus, specimine, quam ex verbosa praefatione, intelligetur. Ingens recentioribus temporibus, maxime in terris exteris, scriptorum philologico — criticarum numerus prodiit. Insignis plurimarum praestantia, sed magna exemplorum raritas. Harum optimas quasque, acerbo delectu habito, commode digestas indicibusque copiosissimis instructas deinceps repetemus. In primo hoc Thesauri Critici Novi volumine libelli hi continentur: Diatribe de Aristoxeno, philosopho peripatetico, auctore Guil. Leon. Mahne, ill. Athenaei Amstelodamensis cive. — Auctor, ex Wytttenbachii disciplina profectus, omnem de Aristoxeno, clarissimo viro, quaestionem magna cum doctrina lucidoque ordine explicuit: ut hic libellus dignissimus sit, qui praestantioribus hujus generis scriptio- nibus annumeretur. Neque pauca insunt quantivis pretii, de- prompta illa ex ipsius Wytttenbachii copiis."*

Equidem non is ego sum, qui hanc mihi doctrinae laudem arrogem, quam mihi tam largiter Lipsiensis vir doctus tribuit. Scio haud pauca scriptioni meae deesse. Sed quod alter censorum, ultro in me involans, ausus est pronunciare, meam Latinitatem ejusmodi esse, ut in ea minus, quam in scriptore Lectionum Andocidearum, Wytttenbachii discipulum agnoscere possis, hoc aegre tuli, hoc magis invidiose, quam vere, dictum esse contendo.

Atque haec est illa altera caussa, quae me ad hoc opusculum scribendum insuper impulit. Ecquis enim dubitet, uniuscujusque officium postulare, et unumquemque hoc sibi debere, ut immerito lacessitus se contra malevolorum injurias defendat. Jam vero Tuum erit, B. L., judicare, rectene, an secus, partes meas egerim.

Scripsi Amisfurti, d. 10. Dec. 1806.

## C E N S U R A I.

De quinque prioribus hujus censurae paginis, utpote a re et consilio meo alienis, non est, quod multa dicamus. Continent brevem relationem locorum, quae in hac ultima Bibliothecae Criticae parte tractantur: tum vero praedicationem laudum Wytttenbachii liberalem et propemodum effusam. Ex hac, mirabile dictum! se censor convertit ad ejusdem Latinitatem reprehendendam, causam suscipiens Andocidei libelli. Quam causam ingrediens festivus esse vult, praescripto [Hom. Il. A, I.] *Μῆνιν ἄειδε θεά!* ac tribus his in verbis his peccat: primum accentus perverse ponens: quos vel pueri sciunt hos esse, *Μῆνιν ἄειδε θεά* deinde in re [2] ipsa. Nulla enim, o bone, adest *μήνις*: duae adsunt deae, *Δίκη* et *Νέμεσις*, maledicta vindicantes. Tibi vero, qui non nisi duos Iliadis priores libros nosse videris, unde purpureas tibi pannos assuas, alium locum, congruentem illum inceptis tuis gravibus et magna professis, praebebo e sexto libro [v. 234], hunc: *Ἐνθ' αὖτε Γλαύκῃ Κρονίδῃ φρένας ἐξέλετο Ζεὺς*. Nam profecto Jupiter mentem et tibi ademit, qui modo sapiebas et favebas, nunc ineptis et invides, et *χρύσεια χαλκείων*, te ex aureo aëruginosum fecisti. — Sed age de iis, quae pag. 93. occurrunt, plura dicamus.

I. Bibl. Crit. p. 126. haec leguntur: „*Illud etiam monendum est, Epistolam Gallice scriptam esse, quod Auctor eam edere constituerat in Millini, V. Cl., Horreo Encyclopaedutico, sic enim Latine reddere nobis concedatur nomen Gallicum libri Magasin Encyclopédique de Mr. Millin.*“ Quam sibi veniam tam modeste petit Wytttenbachius, hanc ipsi concedere censor dubitat. Adeo religiosus homo est. Quaerit nimirum, an dicendi formula *Promptuarium Encyclopaedeticum* non magis [3] Latina sit, et veterum consuetudini melius conveniat. Vellem censor opinionis suae rationes addidisset, quas nullas adjecit. Equidem certe profiteor, me id nullo modo assequi posse. *Horrei* enim significatio

[*Χρύσεια χαλκείων*] Hom. Il. Z, 236. Cf. Periz. ad Acl. V. H. IV. 5.



lâtissime patet, et dicitur de omnibus locis, in quibus homines pretiosissimas quasque res reponere solent. Hoc nos docent Salmas. ad Spartiani Hadrian. p. 98. et Brisson. de Verbo Sign. in V. *Horreum*. Sic, quod e vulgaribus Lexicis satis notum esse potest, legitur ap. Plin. VIII. ep. 18. *de loco, ubi picturae et statuæ servantur*: et ap. Sen. ep. XLV. p. m. 457. *de bibliotheca* adhibetur. — Porro ad *Promptuarium* quod spectat, tenendum est, videri recentioris ætatis esse, ut hoc vocabulum *substantive* ponatur. Apud antiquissimos certe scriptores non nisi adjuncti vim habet, ut apparet e dictionibus *cella promptuaria*; *armarium promptuarium*; consuli omnino merentur intpp. ad Cat. de R. R. p. 27. Sed in novis vocabulis, Latine reddendis, spectanda est utrorumque et etymologia et consuetudo, et hæc quidem non solum significationis, sed etiam rei, veluti in his vocabulis ostendere juvat. HORREUM est Græcæ originis, inde in Latinam linguam transiit, unde rursus a [4] Græcis posteriorum sæculorum repetitum est, dictumque ὀρεῖον, quasi ab adjectivo ὀρεῖος esset, quod τὰ ὀρεῖα, maturæ fruges, in eo conderentur. At plus auctoritatis tribuendum est Porphyrio MS. *De Regulis Spirituum*, ejus verba apponit Ducang. in Gloss. Med. et Inf. Gr. p. 1793: ὀρεῶν, τὸ φυλάσσω, ἀφ' οὗ καὶ ὀρεῖον apud quem complures etiam, sed posteriorum Græcorum, loci exstant. Sed haud scio an verius etiam ducatur a χορτος, *pabulum*, unde ortum est item cognatum *hordeum*: ut *horreum* recta notatione dicatur locus et cella *hordei*. PROMPTUARIi notio et origo cognitæ sunt. Jam Latine reddendum est vocabulum hodiernum, de quo agitur: quod Carpenterius in Gloss. Nov. ad Script. Med. Aev. p. 1110. explicat: „MAGASENUM, *promptuarium, cella*. Ital. *Magazzino*. Gall. *Magazin*,“ tum scriptorum locos subjiciens. Et hujus vocabuli originem Phoeniciam, cognatam vocabulo *gazeæ*, ostendit Bochart. Geogr. Sacr. II. 27. p. 138. Wyttenbachius vertit *horreum*, sequens rationes Latinitatis et usus; quas eum ante complures annos familiari in sermone explicare memini. „Quod nomen, inquit, quibusdam inscriptum videmus libris *Magazinum*, id ego satis probabiliter [5] Latine reddere, nisi *horreum*, haud possim. Alia synonyma minus apta sunt. Theca, repositorium, cella, non satis late patent. Apotheca

magis convenire videatur: sed primo auribus hominum imperitorum parcendum est, qui facile credant ridiculum quaeri, quod apotheca et apothecarius hodie de pharmacopola ejusque officina ac taberna usurpantur: deinde, quum haec de libris nomina metaphorice adhibeantur, nil attinet novam huic nomini metaphoram ad libros referendam affingere, siquidem affinis et cognatae compositionis in promptu sunt nomina, fere propria et usu trita, bibliotheca et bibliothecarius. Superest horreum et promptuarium: quorum illud hac in causa praeferam. Nam promptuarium intelligitur locus instructus et locuples copia rerum ad usum necessariorum, unde promas, si quid opus sit: quo sensu metaphorice de libris non nisi Lexica rerum, vel verborum, vel Bibliothecas, veluti sunt Graeca et Latina Fabriciana, similesve libri, promptuaria dici fas sit. At hanc laudem copiae et ordinis non habent magasena nostra; quippe a compluribus scriptoribus conscribuntur per symbolas, quarum suam quisque, quo vult argumento ac tempore, confert, quae expleto voluminum modo deinceps edantur. Itaque ut horreum ab hordeo, ut farrago a farre dicitur: sic ista Magasena, Latine non temere [6] Farragines, Congeries, Strues, Acervi, Confusanea, Miscellanea, Collectanea, et quidvis horum potius, quam Promptuaria, dicantur. Sed tamen ut magis et honestum, et cum Latina ratione conveniens, horreum usurpaverim: praesertim si liber, ut ille Gallicus, bonam frugem, nec, ut alii quidam, quisquillas, contineat." Haec aliquando Wytt. Caeterum, ut hoc obiter moneam, mirum est nostrum tam sagacem et elegantem Latinitatis magistrum in rebus, quae vel pueris notae esse solent, labi potuisse. Primum enim bis scripsit *Encyclopeduticum* pro *Encyclopaeduticum*, ut legitur in Bibl. Critica: deinde etiam in vocabulo *promptuarium*, quod sine P scribendum est, maluit vitiosam scripturam, quam veram Latinitatis legem sequi. Eo enim demum tempore, quo barbaries et ignorantia Latini sermonis Italiam occuparunt, inter M et S aut T intrudi coepta est littera P. Scio quidem Priscianum [X. p. 897.] aliam sequi rationem, sed plus apud me valet auctoritas Marrii Victorini [p. 2466.], cui assentiuntur e recentioribus V.V. DD., Lambinus in praef. Horat., et Sanctius in Minerva p. m. 848.

[7] II. Tum quoque silentio praeterire non possum illa

censoris verba, ubi contendit *Christophorum Saxium*, illum nonagenario tunc temporis majorem senem, et Mantissae Onomastici Literarii editorem a Wyttenbachio praeter veritatem et immerito *Literarum Nestorem* vocatum esse. „Nemo unquam, ait, Saxio vel minimam suaviloquentiam tribuit, et vitae diuturnitatem cum omnibus Longaevis, quorum memoria exstat apud Lucianum, communem habuit.“ In his verbis tamquam insignitae notae animi contumacis apparent. Etsi enim non Πειθώ τις ἐπεκάθητο τοῖσι χεῖλεσιν, nec in hujus tam de me, quam sexcentis alijs, optime meriti viri scriptis illa Tullianae eloquentiae suavis dominatur; etsi cultum illud et tersum orationis genus, quo inprimis Terentius, Caesar et Nepos excelluerunt, in illis haud cernitur; etsi Saxius cum quatuorviris illis, Mureto, Ernesto, Ruhakenio et Wyttenbachio, comparari non potest: tamen nemo erit, ah invidia modo et malevolentia alienus sit, qui non lubens profiteatur, Saxium ultra *quinquaginta* annos literarum humaniorum cultissimum antistitem existisse, nosque ipsi eruditissima varii generis opera debere. Et tam venerabilem senem *Literarum Nestorem* vocare quisquam dubitabit! [8] Etsi enim illius Pyli principis eloquentia tanta fuisse dicitur, ut ex ejus ore melle dulcior sermo fluxerit, tamen non magis ob eloquentiam, quam ob prudentiam suam, vitae diuturnitate acquisitam, Homero laudatur. Qua prudentia vehementer dubitem, an omnes illi Longaevi, quorum Lucianus meminit, aequae inclauerint, atque Saxius, *rarum illud vegetae et literis exhilaratae senectutis exemplum* \*). Pudeat igitur censorem omnes Longaevos sine ullo discrimine tali viro equiparasse! Pudeat ipsum tam humili et abjecta ratione merita venerandi senis attenuare voluisse!

III. Ante hos triginta annos scripserat Wyttenbachius in praef. primae partis Bibl. Criticae: „*Levium hominum errores nec cautos Lectores inficiunt, et ipsi sua levitate evanescent, magnorum virorum errores auctoritate plurimum*

---

Πειθώ τις ἐπεκάθητο τοῖσι χεῖλεσιν] Hoc Enpolidis de Pericle dictum vide apud scriptores a Cel. Wyttenbachio ad Plutarch. de S. N. V. p. 7. et sqq. citatos.

\*) Wyta in V. Ruhnk. p. 288.

*nocent, et celerius animos capiunt, et in his altiores radices agunt.* Horum verborum vis et veritas tantopere apud censoris animum valuerunt, ut nihil sibi prius, nihil sibi antiquius duxerit, quam scriptiunculae suae corollarii instar addere animadversiones quasdam, quibus ostendatur, Wyttenbachii [9] praeceptis de Latinitate et vera Latine scribendi ratione parum fidei habendum esse. Bene profecto de Literis et literata juventute meritis fuisset bonus hic vir, si, quod promittebat, idoneis rationibus effecisset; sed, ut nunc sese res habet, vereor, ne potius his animadversiunculis opusculum oneraverit, quam ornaverit, et non nemo dicat censori occentandum esse illud Horatii: [A. P. 138.] *Quid dignum tanto feret hic promissor hiatu? Parturiunt montes, nasocetur ridiculus mus.* Sed ne hoc cuiquam magis acerbè et invidiose, quam vere dictum videatur, necessè est, singula loca examini subjiciamus.

IV. P. 96. ait Censor, Eutropium VIII. 6. de *Antonino Pio* dicere, facilius esse eum mirari, quam laudare. Est crassus error. Hoc enim Eutrop. VIII. 11. de *Antonino Philosopho* dixit. Sed haec leviora sunt. Progrediamur ad alia.

V. In ep. ad Hier. Boschium p. 4. exponit Wyttenbachius rationes, cur huic potius viro, quam alii, hanc tertiam Bibl. Criticae partem dedicaverit. Tum, [10] his expositis, sequitur locus mirae suavitatis et Attico lepore in primis conditus. Fonteinius, divinorum oraculorum apud Teleobaptistas Amstelodamenses interpres, imposuerat Wyttenbachio opus, Theophrasti editionem. Haec Wyttenbachio *filia adoptiva* dicitur. Cui quum pater adoptivus bonam et honestam conditionem quaereret, inter confabulandum cum discipulis quibusdam suis, quibus Titan de meliore luto finxerat praecordia, de futura virginis dote loquebatur, sperans fore, ut aliquis horum juvenum ipsius amore caperetur, eamque in matrimonium sibi expeteret. At vero frustra. Nemo eam expetebat, etsi non deerant, qui *prae se ferrent, se conditionem non repudiare, sed deliberare.*

Lecto aliquoties hoc loco, cujus venustas me mirum in modum ceperat, in mentem mihi veniebat locus Ciceronis, huic haud dissimilis, ubi ait: [Brut. 96.] „*Nos autem, Brute, quoniam post Hortensii, clarissimi oratoris, mortem orbae*

*eloquentiae quasi tutores relictī sumus, domi teneamus eam septam liberali custodia; et ignotos atque impudentes procos repudiemus, tuamurque, ut adultam virginem, caste, et ab [H] amatorum impetu, quantum possumus, prohibeamus.*“

Censori nostro displicet non modo formula dicendi *prae se ferre*, sed etiam verbum *repudiare*. Interrogat enim, an non potius scribendum fuisset *simulant*, quam *prae se ferant*: et pro *repudiare* mavult *recusare*, quia virgo, utpote nondum *desponsata*, non potuerit *repudiari*.

Festivus plane censor. Primum fingit, Wytttenbachium hoc dicere voluisse: deinde contendit, eum hoc non recte dixisse. Atqui, o bone, quis tibi dixit, Wytttenbachium hoc dicere voluisse, *discipulos quosdam simulare, se id edendi officium suscipere velle*. Immo dixit eos *prae se ferre*, id est, *profiteri, ostendere, affirmare*. Illam vero dictionem *aliquid prae se ferre*, non esse *simulare*, sed *profiteri*, Wytttenbachius scilicet a te discere debebat: qui unum locum citas, quum alii multi exstent, et apud alios scriptores, et ap. Cic. veluti p. Arch. XI., p. Planc. XVII., Phil. I. 4., ad Fam. II. I., p. Mil. XVI. Sed res sic se habet. Colloquebatur aliquando Wytttenbachius cum com-militonibus quibusdam suis de futura Theophrasti editione; et hi non *simulabant*, h. e. *dicis causa* [12] magistro assentabantur, eique verba dabant, sed *prae se ferebant*, s. cum asseveratione et serio affirmabant, se minime quidem salutare illud praeceptoris consilium aspernari, sed sibi prius ex Horatii praecepto examinandum videri, quid humeri valeant, quid ferre recusent, antequam ad opus accingerentur. Quin etiam, ut mea certe fert sententia, non tantum discipulorum suorum famae atque existimationi pessime consulisset Wytttenbachius, si scripsisset, *non tamen desunt, qui simulant*; sed etiam antecedentibus plane repugnantia scripsisset, utpote qui modo antea dixerat: *virginem non nisi in adolescentium doctorum eorumdemque castorum et modestorum conspectum et colloquium eduxi*. Etenim non est verosimile, illam a Wytttenbachio laudatam discipulorum doctrinam, castitatem et modestiam in sola *simulandi calliditate* positas fuisse. Etsi enim verissime scripsit Cicero [Ep. ad Qu. Fratr. I. r. §. 5]: „*Multis simulationum involucris tegitur, et quasi velis quibusdam obtenditur*

*uniuscujusque natura: frons, oculi, vultus persaepe mentiantur, oratio vero saepissime;*“ tamen non ita hebes judicandus est Wytttenbachius, quem ignorare credas magnas [13] illas animorum latebras et magnos recessus, aut quem intelligendi facultate destitutum putes, *quid aera distent lupinis.* Multo minus etiam credendum est, convenire in ipsum ejusdem Ciceronis de Curione [Br. c. 60.] verba: „*Memoria autem ita fuit nulla, ut aliquoties, tria cum proposuisset, aut quartum adderet, aut tertium quaereret.* — *Magna haec immemoris ingenii signa: sed nihil turpius, quam quod etiam in scriptis oblivisceretur, quid paulo ante posuisset.*“ Imo potius, mi censor, solet Wytttenbachius imitari Pythagorae consuetudinem, qui, antequam discipulos in familiaritatem recipiebat, in ipsorum docilitatem, ingenium, animos moresque sedulo inquirebat.

Ad verbum *repudiare* quod attinet, dicere se aliquid putat censor; sed hoc aliquid nihil est. Nam non tantum de sponso et sponsa dicitur, sed universae etiam est *rejicere*: v. c. Ter. Andr. IV. 3. 18. *repudio-consilium.* Cic. Off. I. 25. *iracundia* — *repudianda est.* Plura piget apponere; siquidem vis exemplorum exstat ap. Nizol. et Facciol.

VI. Legimus porro Bibl. Crit. p. 8. „*Omnimodae res et artes.*“ Usus hujus adjectivi [14] his verbis censor reprehendit: „*Adjectiva omnigenus et omnimodus apud melioris notae prosaicos* \*) *scriptores non occurrere, jam dudum monuit Ruhnck. ad Muret. T. II. p. 280.*“ Sed hac notula censor istius Homeromastigis personam imitari voluisse videtur, qui, ut notum est, ubivis nihil aliud, nisi nimiam suam vituperandi libidinem declarare solebat. Abutiur enim Ruhnkenii auctoritate, qui l. l. nihil aliud scripsit, nisi *Omnigenus est vox poetica.* Et licet concedamus tò *omnimodus* non occurrere apud Ciceronem hujusque aequales prosae scriptores; tamen inde minime sequi opinor, hoc adjectivum

---

\*) Corrigatur: *Adjectiva omnigenus et omnimodus apud meliores prosae orationis scriptores non occurrere.* Nam adjectivum *prosaicus* infimae fere est Latinitatis. Lexicographi certe Venantio Honorio Clementiano Fortunato, medi saeculi sexti versificatore Christiano, antiquiorem hujus vocabuli auctorem non citant.

Ex Addend.

minus Latinum esse, quam *unimodus* et *multimodus*. Primum non repugnat analogiae: deinde eo saepius usus est Lucretius, et posteriori aetate Apulejus. Dii boni! quid? nonne te pudeat, dixerit fortasse quis, Apulejum, istum tumidum scriptorem, citare, qui nimia antiquitatis affectatione orationem suam utraque pagina ita obscuravit, ut lectores potius a legendo deterrire, quam ad legendum allicere voluisse videatur? Concedo. Sed habeo, quod respondeam. Usus est Apulejus hoc adjectivo in Apol. p. m. 293, quae, eodem teste Ruhnkenio, non in umbraculis eruditorum legenda, sed in fori luce habenda [15] esset, et in qua tam vacuus est ineptiis scholasticis, ut ejus orationi nihil, aut certe non multum, ad summam sanitatem deesse videatur: cf. Bibl. Crit. V. III. P. I. p. 114. Sed quidquid ejus sit, nimis pueriliter agunt, qui in singulis vocabulis ita Ciceroni tenaces adhaerent, ut omnia proximorum saeculorum vocabula fastidiant, aut poetarum optima aetatis verba, proprie adhibita, a prosa orationis scriptiōne abesse volunt. Major cautio est, ne ad alienae linguae indolem orationem nostram Latinam effingamus, aut in loquendi formulis a legitimae antiquitatis consuetudine recedamus. Possumus enim per omnem orationem nostram verum Latinitatis colorem et quasi sanitatem tenere, etiamsi subinde recentioris aetatis vocabulo utamur. Legi omnino merentur verba Jac. Thomasii in praef. ad opp. Mureti p. 5. Et quum haec ita se habeant, noli haud aegre ferre, mi censor! nos te ducem sequi non posse. Sed ὅταν γὰρ εὖ φρονῆς, τόδ' ἡγήσῃ σύ νῶγ. [Soph. Electr. 1041.]

VII. Sequenti animadversione Sluiteri Latinitatem defendere conatur censor, sed profecto pingui Minerva. Quod quo melius intelligatur, haud inutile erit verba Lectionum Andoc. una cum animadversione Wyttenbachii hic repetere. [16] In illis p. 80. legimus: „*Tertio postquam in patriam redierat anno in summum omnium discrimen adductus fuit Andocides, ad quod depellendum cum dicta sit ab eo palmaria illa de mysteriis oratio, singula caussarum momenta exponemus, quibus inducti oratoris inimici hanc ei litem intulerunt: quod ut tutius meliusque facere possimus*“ etc. — His verbis W. hanc addidit animadversionem: „*In rebus externis dicitur tutus, qui muro, armis, aliorum auxilio, aut sua pru-*

*dentia, adversus insidias aut vim tectus, munitus, sepius est: hoc loco requirebatur certius, eo minore cum erroris periculo.*"

Has dapes, quamvis delicatas, et ex interiori, ut ita loquar, Latinitatis penuaria cella depromptas respuit censoris stomachus; ipsius eruditum palatum fastidit ejusmodi cibos. Adeo verum est, quod ajunt, de gustibus non esse disputandum. Sed veniamus in rem praesentem, et videamus, quale hoc sit. Noster Critices magister se Terentium legisse, et in comoedia, quae inscribitur *Heautontimoroumenos*, reperisse *tutum consilium* testatur. Optime: sed quid mirum? idem quoque alii reppererunt, veluti *Basilius Faber*, qui eundem h. l. in *Thes.* suo sub v. *tutus* citat. Porro [17] dignissimus est Terentius, qui non in scholis modo a pueris legatur, sed etiam a viris doctis, quinimo a Bibl. Criticae censore. Is. Casaubonus certe aliquo loco affirmat, neminem bene Latine loqui posse, qui Terentium non contriverit. Sed vehementer dubitem, an loci Terentiani nexum recte censor perspexerit. Age igitur ipsa Comici verba videamus. Syrus adducit Baccidem, Clitophonis amicam, ad patrem Chremetem. Timet filius, ne hoc nimis periculosum sit. Sed Syrus mox, paucis interjectis, respondet, *consilium, quod cepi, scio rectum et tutum esse*, h. e. scio consilium meum ejusmodi esse, ut tu meo auxilio, meaque prudentia munitus *sine metu* esse queas. Jam nunc alii judicent, num locus Terentii aliquo jure cum verbis illis a W. reprehensis comparari queat. Scriptor *Lect. Andoc.* nimirum loquitur de ratione, qua omnium optime et certissime singula caussarum momenta exponere possit, quibus inducti Andocidis inimici hanc ei litem intulerint: Syrus vero de rebus externis, velut *mihi* et *verberibus*. Apparet hoc e seqq. II. III. 1-2.

[18] *Ridiculum est, te istuc me admonere Clitopho:*

*Quasi istic minor mea res agatur, quam tua.*

*Hic si quid nobis forte adversi evenerit,*

*Tibi erunt parata verba: huic homini verbera.*

• Caeterum hic locus certissimo nobis argumento esse potest, censorem in librorum lectione parum diligenter et accurate versari. Testatur enim p. 19 se Bibl. Criticam



saepe lectitasse; et vel sic tamen non animadvertit, jam ante multos annos Wytttenbachium Bibl. Crit. V. I. P. IV. p. 84. de eodem hoc errore *παῦρα μὲν, ἀλλὰ μάλα λιγέως* [Hom. II. Γ, 214.] dixisse: *quid tuto? an veluti hostem ex specula?*

VIII. Progreditur censor in defendenda Latinitate Lectionum Andoc. Sed est profecto inter illos causarum patronos referendus, de quibus Siculus quidam ap. Cic.: [de Or. II. c. 69.] *Quaeso, inquit, praetor, adversario meo da istum patronum, deinde mihi neminem dederis.* Verba in Lect. Andoc. p. 86. haec sunt: „Secundo post pubertatem anno, aetatis vicesimo, bona paterna et avita sibi acquirebat.“ Hanc dicendi formulam, utpote Latinis scriptoribus hoc sensu inusitatum, hoc modo reprehendit [19] W.: „*Quae nostro ipsi studio comparamus, ea dicimur acquirere, quasi quaerendo addere iis, quae jam habemus, bonis.*“ Censor aegre ferens Latinitatem Lect. Andocidearum rursus vituperari, non tantum Wytttenbachii definitionem verbi *acquirere*, tamquam falsam damnat, sed in ipsum adeo Wytttenbachium acerbè invehitur. Primum vero, qui hunc virum norunt, aut ipsius scripta duntaxat legerunt, facile sibi persuadebunt, ipsum tam in virtutibus scriptorum celebrandis, quam in vitiis eorundem reprehendendis unice veritatem sequi. Hanc sibi ipse legem scripserat in praef. Bibl. Criticae, eamque caste et integre servavit. Sed quoniam Wytttenbachio hac in re non opus est defensore, obiter monuisse sufficiat, unice eum pietate erga Ruhnkenium ad conjecta in illum malevolorum crimina confutanda descendisse: minime per invidiam erga scriptores Andocidei libelli, quippe nihil habentes, quod ipsis invideret. Sed ad verbum *acquirere* quod spectat, nonne censoris officium postulasset, ut loca e veteribus scriptoribus, iisque locupletibus, protulisset, ubi filius *paterna bona sibi acquisivisse* eo sensu dicatur, ut significetur, ipsum in bonorum paternorum [20] possessione positum esse? Non enim satis est, tanti viri auctoritatem quasi dictatorio spiritu, sine idoneis argumentorum rationibus, imminuere et elevare velle. Illud, *sic volo, sic jubeo*, a persona censoris, certe anonymi, plane alienum esse debet. Sed ne quidam scrupulus Literarum Latinarum studiosis juvenibus restet, iique contra ea sine

ullo periculo queant in definitione Wytttenbachii acquiescere; pauca quaedam loca citabo, in quibus *acquirere* eo sensu, quo dixit W., usurpetur. Cic. Tusc. Qu. V. 3: *et ut illic liberalissimum esset spectare, nihil sibi acquirentem, sic in vita longe omnibus studiis contemplationem rerum cognitionemque praestare.* De Off. III. 4: *Nam sibi ut quisque malit, quod ad usum vitae pertineat, quam alteri acquirere, concessum est, non repugnante natura.* Orat. II. in Cat. c. 8: *tu rebus omnibus ornatus et copiosus sis, et dubites de possessione detrudere, ac fidem acquirere.* In ep. ad App. Pulchrum, III. 7: *postea vero quam ita et accipi et gessi maxima imperia, ut mihi nihil neque ad honorem, neque ad gloriam acquirendum putarem.* In ep. ad Planc. X. 3: *omnem tibi reliquae vitae dignitatem ex optimo reipublicae statu acquires.* Passim quoque occurrit [21] hoc verbum eodem sensu ap. Justinum, veluti VII. 6: *nam dum regni incrementa affinitate Philippi acquisitum se sperat, proprio regna ab eodem privatus, in exilio consenuit.* Neque etiam apud poetas infrequens est; argumento nobis sit Horatius de A. P. 55: *Ego cur acquirere pauca, Si possum, invideor?* Ovidius Met. VII. 459: *Ante tamen bellum vires acquirit amicas;* Juvenalis Sat. XIV. 115: *adde quod hunc, de Quo loquor, egregium populus putet acquirendi Artificem: quippe his crescunt patrimonia fabris.* Versu 125: *Mox acquirendi docet insatiabile votum.* Atque Phaedrus I. 14: *Verbosis acquisivit sibi famam strophis.*

Sed obijciat forte mihi quis, nonne censor duo loca e Pandectis citavit? Est ita. Confugit nimirum homo sagax ad Lex. Briss. de Verb. Signif., tamquam ad Latinitatis suae obrussam, surripuitque erudito illius operis [22] auctori hinc illa loca. Prior exstat Dig. XVII. tit. 1. §. 32. p. m. 342, et sic se habet: „*Legatum acquisitum nunquam illi damno esse potuit, hereditas interdum damnosa est.*“ Posterior reperitur p. m. 962: „*Praeterea ex his, quae per flagitium damnatus acquisivit, portiones liberorum non augentur.*“ Jam autem velim, ut quis ex posteriori hoc loco demonstret, falsam esse Wytttenbachii definitionem. Ipsum corpus Juris ne inspexisse quidem videtur censor. Prior quidem locus pugnare videtur cum Wytttenbachii verbis, quoniam sine ullo studio nostro pars bonorum alterius nobis legari potest,

seu, quoniam *legatum acquirere*, ut loquuntur Icti, sine studio nostro possumus; neque me fugit in Pandectis saepius occurrere verbum *acquirere* eo sensu, ut nihil aliud significet, nisi *accipere*, *adiptisci*, *nancisci*, aut simile quid: sed vel sic tamen tanta non est hac in re Ictorum auctoritas, quantam eam esse censor noster opinatur. Sed quoniam mox de Ictorum Latinitate quaedam dicenda erunt, istis nuno missis, ad reliqua progrediar. Nam locus qui sequitur, tanto iudice dignus est. Criticen rursus exercuit noster Eranistes, sed suo more, h. e. ut quivis facile intelligat, quid sit cogitare scribere, [23] quid temere effutire. Equidem certe nescio, magisne de pingui Censoris ingenio dolere, an ipsius carpendi petulantiam reprehendere debeam. Sed audiamus ipsa ejus verba.

IX. Bibl. Crit. V. III. P. III. p. 95. notavit W. in Lect. Andocid. barbarismum dictionis *matri alimenta praestare tenebatur*. Ad haec Censor: „Quaero igitur, cur ipse W. de Heusdio dixerit p. 66. se — Platonis studium, quo adhuc teneretur, concepisse? Sed dixerit forte quis, hoc verbo eo sensu non uti debemus, quo fecit Sluiterus, ut significet legibus obstrictum esse, quemadmodum in illis: *matri alimenta praestare tenebatur*. Sed nulla opera demonstrabo, Sluiterum sic, nec aliter, scribere debuisse. Romani, qui hanc sententiam, legum necessitate coactum esse, plurimum et maxima cum efficacia exprimere solent, utuntur ad id significandum fere semper verbo *teneri*. Hi vero sunt Icti, quibus hoc verbum valde proprium est; v. Briss. de V. Signif. voce *teneri*. At quærat non nemo, quis unquam serio contendit, Latinitatis praecepta ex Corp. Juris petenda esse? Nonne putatis, Literatores! nunc mihi aquam haerere? Atqui, viri optimi! legite, quaeso, quae Cl. Ruhnkenius de praeclaris vindicibus verae [24] Latinitatis, de Romanis Ictis, in praef. Lex. Schell. p. 2. scripsit, ubi de fontibus bonae Latinitatis ita loquitur: „Huc adde Ictos, quorum fragmenta in Pandectis supersunt, qui, etsi labente Latinitate vixerunt, tamen ex Mucii Scaevolae, Servii Sulpicii, Afferi Vari, et aliorum veterum libris, quos legendo conterebant, et ex ipso edicto perpetuo, quod memoria tenebant, talem orationis nitorem duxerunt, ut in classicorum scriptorum numerum recipiendi videantur.“

„*Quid multa? ipse Cicero [p. Cluent. 53.] eodem fere sensu, quo Sluiterus, verbo teneri utitur.*“

Mihi hæc legenti [quid enim impedit, quominus verum profitear?] in mentem veniebant illa Gnathonis Terentiani [Eun. IV, 7, 21.] *Di vostram fidem, quanti est sapere!* Primum simulat censor, se verborum sensum non percipere, eaque sic interpretatur, ac si Sluiterus a W. accusatus sit ὀνοματοποιήσεως, quasi Latinum sermonem novo verbo teneri locupletasset. Quam lepide! Quaerit enim, cur ipse W., quum Latinitas verbi teneri suspecta et nullius auctoritatis sit, de Heusdio scripserit, *se Platonis studium, quo adhuc teneretur, concepisse.* Deinde vero, quasi [25] se corrigens, εἰρωνικῶς addit: „sed dixerit fortasse quis, probae Latinitatis lex vetat, verbum teneri illa significatione adhiberi, qua illo usus est Sluiterus, ut idem significet, atque legum necessitate coactum esse.“ — Ita sane est, mi Censor! verum videris, nec vero, quid videris, intellexisti. Nam quicumque ita statuit, *et sapit, et mecum facit, et Jove iudicat aequo.* Tu quidem, qui rursus ad Lex. Briss. provocas, tibi rem acu tetigisse videaris, sed mihi hoc haud facile persuadebis. Quid, mihine soli? imo omnibus, qui non e solis Lexicis sapiunt, sed ipsos veteres scriptores accurate legerunt. Errasti: quamquam noli ideo mihi succensere. Errare humanum est, et bonus adeo Homerus nonnunquam dormitasse dicitur. Fomento tibi sit illud, *Solamen miseris, socios habuisse malorum.* Jam ante te alii quoque in eodem errore versati sunt. Ego te doceho, modo mihi dociles aures praeberere velis, nec credas infra dignitatem esse tuam, qui Bibl. Criticae censorem egeris, a me doceri. Peto a te, ut hoc mihi ignoscas. *Σοφία γὰρ ἐστὶ καὶ μάδεν, ὃ μὴ νοεῖς.* [Menand. ap. Stob. Serm. p. 51.] Non arrogantiae causa hoc faciam, sed salubri consilio, ne tu nimirum alios in eundem errorem tecum trahas, et, nostin'? *ex stultis [26] insanos facias.* Audi igitur, homo sagacissime! Illa Wyttenbachii verba, quae te, o bone! tam misere cruciasset videntur, optime se habent. Simili ratione locutus est Cicero in Brut. c. 89: *reliquos frequenter audiens acerrimo studio tenebar.* Contra ea Sluiterianum hoc: *matri alimenta praestare tenebatur*, ἄκυρον est. Verae et germanae Latinitatis lex postulat, ut verbo teneri semper

ablativo casu addatur id, quo quis teneatur, sive illud sit actio, sive conventio, sive edictum, sive interdictum, sive lex, sive poena, sive senatusconsultum. Sedecim illa loca, quae citavit Briss., si accurate consideres, omnem tibi dubitationem adimere poterunt. Eodem modo locutus est Cicero p. Cluent. 53 et 55. Non simpliciter dixit *teneri*, sed *legibus teneri*. Vide igitur, quam parum accurate Ciceronis verba consideraveris. Sed quoniam tua Latini sermonis cognitio maximam partem auctoritate Lexicorum niti videtur; inspice Nizolium in Thes. Cic., et Ernest. in Clave Cic., nec aqua tibi amplius haerebit. Denique, si vis, cumuli instar, adde his libris anim. Burmanni ad Quintil. p. 514. „*TENERI HAC LEGE. Aerodius omisit hac lege, et parum Latinam fecit orationem: [27] nam teneri simpliciter, non dixerunt, non modo emendatae et antiquioris Latinitatis auctores, sed ne ipsi quidem juris prudentes, ut observat Vavassor De vi et usu quorundam verbb. p. 75.*“ Interim tamen cave, ne hoc praecepto in errorem inductus putes scribendum fuisse, *matri alimenta praestare lege tenebatur*. Etsi enim Auctor Lect. Andoc. ita scripsisset, non minus, quam nunc, peccasset. Nam ne his quidem formulis *infinitivum* addere licet. Rem tibi locupletum de Latina puritate iudicum testimoniis explicabo. En notationem Jo. Vorstii in lib. de Latin. merito suspecta C. XVII. p. 361: „*Vulgaris modus loquendi hodie est, ut dicant teneor facere, pro oportet me facere: exempli gratia Thuanus lib. LI. Ut alter alteri octo navigia omni re instructa cum CCC hominibus et comiteatu in bimestre idoneo commodare teneatur. Et Casaubonum notat Scioppius, quod scripserit: Tenetur nuptias cogitare, dicitque hoc barbarismi genus unum hodie omnibus esse familiarissimum. Ego istum verbi teneor usum non quidem plane barbarum dici velim, quippe quem in Institutionibus juris et alibi observare memini: sed aevi Ciceroniani tamen esse nego. [28] Sunt autem varia, quae istius loco vocabula usurpare possis. Scioppius in Iudicio de Stilo Historico haec Ciceronis ex ejus Topicis recenset: Non debet praestare, quid fornix vitii fecerit. Item haec ejusdem: Et quid alterum alteri praestare oportebit. Porro autem et haec: Id habet operis ac muneris, ut hoc nobis efficiat: Munus meum hoc non est: cum meae partes*

sint hospitum recipiendorum: Principium munus est resistere levitati populari." Haec Vorstius: quem memoria fefellit, quod putavit se hanc dictionem in Institt. Juris et alibi legisse. Nam Cellar. in Antibarh. p. 202. „TENEOR id est oportet me, purae Latinitatis non est. Habent quidem Icti jure teneri, lege teneri: verum teneor facere et similia impuriora sunt. Cum Cicerone dices, oportet: munus est ejus: meae partes sunt: non alienum est a persona cujus cet:" Et in Curis Poster. p. 327. haec addit: „TENEOR c. Infin. pro oportet, huc refertur a Vorstio, cujus antiquiorem auctoritatem vir doct. non habuit, quam Institutt. Justinianearum. Ante hunc etiam Scioppius improbaverat De Stilo Histor. p. 192. Videtur putem detruncatum ex Latina formula, legibus teneri, jurejurando teneri; quamquam neque [29] his Infinitivum addere licitum est. Latini dixerant, officium, munus, partes sunt." Forcellinus denique in Lex. Lat. V. TENEOR haec notat: „TENEOR hoc facere i. e. debeo Vorstius De Lat. Mer. Susp. c. 17, usurpari ait a Justiniano in Institutt. Jur., nullo tamen designato loco." Atqui et Cellarins et Forcellinus Veterum Ictorum scripta legerant, et notabiles dictiones inde exerpserant: et idem certe tactitarunt Brisson. et Scriptt. De Latinitate Ictorum in Sylloge Dukeriana. At horum nemo inde hanc dictionem protulit. Quare eam aliis quaerendam relinquimus.

Restat nunc, ut videamus de Ruhnkenii, gravissimi hac in re judicis, verbia, quae leguntur supra. „Huc adde Ictos, quorum fragmenta in Pandectis supersunt, etc."

Jam inde a temporibus Laurentii Vallae, h. e. medio seculo decimo quinto, de Ictorum Latinitate viri docti in maxime diversas partes abierunt. Constat hoc cum aliunde, tum vero imprimis ex illis variis opusculis de Latinitate Veterum Ictorum, quae junctim edidit et animadvv. illustravit C. A. Dukerus L. B. 1711. Alii scilicet Ictos in sermonis puritate Augustei aevi scriptoribus haud postponendos [30] arbitrabantur: alii contra minus benigne sentientes dicebant, illos ita haerere in exprimendo id, quod velint, ut dimidia pars supplenda sit, et, ut vulgo dicitur, adjuvanda litera etiam divinando, teste Ant. Schultingio in Or. De Studio Triboniani in colligendis Pandectis p. 900. Sed quandoquidem tam extra, ut ajunt, quam intra Iliacos

muros peccari solet, idem quoque hac in re usu venisse, non est quod miremur. Quemadmodum enim vehementer ertant, qui omnes in Pandectis obvias dicendi formulas sine ullo discrimine probandas opinentur; sic quoque isti non audiendi sunt, qui Ictorum in constituenda Latinitate nullam auctoritatem esse dictitent. „Novi, inquit Schultingius l. l., non unum alterumque, at septem et triginta auctores symbolas ad hoc opus contulisse, quorum novissimi a vetustissimis ampliori quam quadringentorum annorum intercapidine disjuncti fuerint: quorumque adeo alii, quibus florente quam maxime Latini sermonis nitore nasci contigerit, emendatissime locuti reperiantur: alii non patriae vitio, sed temporum suorum abrepti consuetudine, a pristina recesserint elegantia.“ Operae pretium est cum hoc loco conferre verba Sanctii in Min. pag. 511.

[31] Atque quum haec ita sese habeant, intellectu non difficile est, non omnes Ictos uno eodemque loco habendos, sed summa cautione in hac re opus esse. Quid multa? Non nisi quatenus Icti cum optimis quibusque scriptoribus consentiunt, in ipsorum Latinitate acquiescendum arbitror. Et quin haec quoque Ruhnkenii V. CI. sententia fuerit, non est, quod dubitem; praesertim quum verborum nexus hoc manifesto declaret. Abeat igitur censor cum ista religione sua, ubi simulat se ad incitas redactum esse, quod nullos scriptores alios, praeter Ictos, citaverit, et ex iis, quid bene Latinum sit, demonstrare satis habuerit. Ita ludimus cum pueris, non vero agimus cum viris doctis. Auctor ipsi sum, ut legat Terentium, Ciceronem, Nepotem, Caesarem, Sallustium, Livium et alios scriptores, ex iisque discat, quid bene Latine dictum sit, quidque a veterum consuetudine dicendi abhorreat.

X. Quod sequitur, plane in eodem genere est vel stuporis vel impudentiae. Scripserat W. Bibl. Crit. III. III. p. 117. „Optamus illi certe in statione Daventriensi earum rerum otiique copiam, ut laudis et doctrinae [32] viam feliciter persequatur.“ Quod Censor reprehendendum sibi proponens non veretur ita balbutire, ut lectoribus suis, veluti pueris, illudere videatur. En istius verba: „Equidem dubito, idque auctoritate Ruhnkenii ad Muret. T. I. p. 38 et 67, an dictio Viam persequi bene Latina sit.“ Potestne

enim aliquid extogitari, quod tantae sit vel caecitatis vel stultitiae? Apud Muretum nihil invenitur, quod ad hanc phrasin culpandam ullo modo pertineat. Priori loco ad haec Mureti verba, „qui herbarum, qui stirpium, qui animalium ortus, progressus, naturas, vires, utilitates prosequuntur,” in nota subjecta testatur Ruhnck. in marg. Ald. ed. bene correxisse Muretum *persequuntur*. Posteriori loco, ubi legitur: *ut ea*, — orationis genere *prosequar*; imo, inquit Ruhnckenius, *persequar*. Tum vero, quod caput rei est, omnem dubitationem tollunt verba Terentii in Hec. III. 5, 4., ubi Pamphilus ait: *Certum obfirmare est viam me, quam decrevi, persequi*; nec non Cic. ad Fam. XIV. 3, ubi ad Nigidium Figulum scribens: *et certe*, inquit, *omnes vias persequar, quibus putabo ad id, quod volumus, pervenire* [33] *posse*. Sed forte dicas, censorem aliqua novitate lectores suos delectare voluisse. Scio novitatem hominibus vulgo magnam sui cupiditatem injicere, *Τὴν γὰρ αἰοιδὴν μᾶλλον ἐπικλείουσ' ἄνθρωποι*, *Ἐπερ ἀκούοντες οὖν νεωτάτη ἀμφοτέρω* [Hom. Od. A. 351. sq.] sed idem ego scio in libris censendis veritati potius studendum, quam novitatis studio inserviendum esse. Quid vero, si luserit censor? Si lusit, satis inepte lusit. Nam qui cum R. et W. ludere velit, nescio quibuscum is serio acturus sit. Quid igitur? Nimia carpendi libidine et vanitate *loquax talpa* exstitit.

XI. Ep. rursus puerum! quot verba, tot errores! Atqui ostendam tibi, et *tempora* conjungi cum ejusmodi adjectivis, quae illorum statum et conditionem significant: et *sanguinolentum* metaphorice pro *pleno caedibus, crudeli*, dici. Nam hoc quidem est Varronis ap. Non. p. 465: — *seditionibus sanguinolentis* — *dominatus quos appeterent*. Auct. ad Her. IV, 39: *sanguinolentā palmā, crudelissima victoria potiti*. Alios locos v. ap. Forcell. At, inquis, nullus e Cic. [34] locus profertur. Rursus pueriliter erras, qui putes non nisi Ciceronianis verbis Latinitatem constare. Nunc de temporibus audi Cic. p. Cluent, 34: [*Sylla*num] *tempus illud omnibus invidiae tempestatibus concitatum*. p. Balb. 9. *in periculis atque asperis temporibus*. Verr. V, 1: *dubii formidolosisque temporibus*. Ep. ad Div. l. 7, 8: *suspiciosissimo tempore Caniniano*: i. e. quo Caninius Trib. Pl. in concionibus dominabatur, et Pompejus facile iniquam suspi-



cionem de Lentulo suscipere poterat. Ad Att. XII, 18: *his temporibus tam eruditis*. Intelligis tandem, *tēpora* dici de ipsis hominibus eorumque moribus ac studiis? In eodem genere est *Siciliensis annus* De Claris Or. 9: i. e. annus quem in Sicilia transegit. Enimvero, inquis, velim locum, ubi hoc ipsum *sanguinolenta tempora* diserte dicatur. Jam puero etiam puerilior es. Nonne satis est utrumque seorsum ita usurpari? Tu non vis duo nomina jungi, quae non item apud Veteres juncta reperiantur. Viden' quam late hoc serpat? Eadem ratione quis nolit tria, quatuor, ne totas quidem sententias poni, nisi quae item apud Veteres reperiantur. Hoc vero non est Latine scribere, sed Latinos exscribere. Nec ita factitarunt [35] Musetus, Perpinianus, Paulus Manutius, Ernestus, Ruhnkenius, a quorum elegantia in Veteribus imitandis, tu nos ad centones et imitatorum servum pecus redigis: quo tibi abundum est.

XII. Proxime sequentia luce clarius ostendunt, verum esse illud Comici: *Dii immortales! homini homo quid praestat! stulto intelligens quid interest!* Ex sententia nimirum Aristarchi nostri, apud Ciceronem, Terentium, Caesarem et Nepotem non reperitur adjectivum *inopinatus*, sed ejus loco *nec opinatus* in usu est. Ingentes tibi, acutissime Critices magister! gratias debemus: *Τοια γὰρ ἀμυν ἔργων, αἷ' οὐ πάρος ἀνέρες ἴσμεν*. [Callimach. in Anthol. Gr. V. II. p. 258. ed. H. Besch.] Sed pueri contra in scholis ad istiusmodi ineptias vix risum teneant. Quibus si serio obtrudere velles, adjectivum *inopinatus* non esse bene Latinum, statim provocarent ad Nepotis sui verba e vita Dionis c. vi: *has tam prosperas, tamque inopinatas res consecuta est subita commutatio*: nec non e vita Phoc. c. iv: *at non inopinata; hunc enim exitum plerique elari viri habuerunt*. Ne itaque illis ludibrio sis, scias apud illos veteres scriptores, quos tu nominatim appellasti, occurrere, *Inopinans, Nec opinans, Inoplnatus, Nec opinatus, Non opinatus*. Loca quaedam tibi [36] ostendam. Inspice Jul. Caes. B. G. IV. 4. — Nep. in v. Dat. III. — Terent. Andr. I, 2, 8. — Cic. ad Div. XIII, 18. — de N. D. I, 3. — de Off. II, 4. — pro Demo. c. iv. — Tum Latinitatis tuae augendae et corroborandae gratia consule recentiorum eruditorum animadvv., veluti Oudendorpii ad Front. III, 1., Drakenb.

ad Liv. IV. 27., Scheff. ad Phaedr. I. 9., Dispontii et Gudii ad Phaedr. V. 7. — Quin etiam, crede mihi, illi sagacissimi viri, Marklandus atque Wolfius, Ciceronis loca ex Oratione, pro Domo, in qua bis certe τὸ *inopinatus* occurrit, alto silentio non praeteriissent, si hujus vocabuli auctoritas aliqua ratione, quamvis speciosa, in dubium vocari posset. Pudeat itaque te, Bibliothecae Criticae censorem, talia effutiisse! Fac haec admonitio tibi mea prosit! ostende tuo ipse exemplo in posterum, verum esse illud Sophoclis [Trach. 91.] ὁστέρῳ τόγ' εὖ Πράσσειν, ἐπεὶ πύθοιτο, κέρδος ἐμπολᾷ.

XIII. Quae antecedenti animadversioni subjiciuntur, in eodem, quo caetera, stupore sunt. [37] *Sequax* tritum est bonorum scriptorum usu nomen: *sequax alicujus rei* si nullam haberet auctoritatem, tueretur se [in hoc loco, et figurae concinnitate, et antecedenti membro *sui judicii tenax*, et analogiā eorum ejusdem terminationis Nominum Verbalium, *edax*, *bibax*, *rapax*, *ferax*, *audax*, *pertinax*, quae, more Graecorum Verborum in τικός desinentium, Genitivum regunt, v. c. ἀπαλλακτικός τινος, οἰδτικός τινος, repellendae alicujus rei vim habens, *ferax alicujus rei*; ut non dubitem in simili caussa, caetera hujus formae Nomina cum Genitivo jungere, *emax*, *contumax*, *mordax*, *pellax*, *vorax*: licet nulla hujus usus exempla in Lexicis prodita sint. At *sequax* habet certe auctoritatem Manilii V, 143. *Bacchi Venerisque sequaces*. et posteriorum quorundam, quos citavit Barthius Advers. XXIII. p. 1174.

Caeterum in hac Wytttenbachii dictione insignis est oppositionis elegantia. Constat inter omnes Artis Rhetoricae peritos, figuras [gr. σχήματα] pertinere vel ad suavitatem, vel ad gravitatem orationis, atque utraque de caussa ornatum ipsi afferre. Inter figuras suavitati inservientes referenda est *paronomasia* s. agnominatio; quae est levismutatio verbi, et fit una itemque altera litera vel mutanda, vel [38] transponenda, vel addenda, vel detrahenda. Ad figuras vero, quae gravitati prosunt, *antitheta* pertinent, quum contraria contrariis opponuntur. Utriusque hujus figurae, certe ἀντιθέσεως, habemus egregium exemplum et supra p. XXXV. *plena doloris, plena amoris*, et in his verbis Wytttenbachii a censore obelo signatis, *magis sui judicii*

*tenax, quam alieni sequax.* Licet enim hac dictione W. teretes Critici auriculas offenderit, tamen non magis *ὁμοιοτελεῦτων* opifex habendus est, quam aut Terentius, aut Cicero. Ille enim in Andr. L. 3. 13. scripsit: *Nam incoeptio est amentium, non amantium.* Hic in Or. p. Coel. 32. *Conservate civem bonarum artium, bonarum partium.* Ex uno Cic. centena afferri possint. Nunc satis est ex solo de Officiis l. pr. quaedam apposuisse: c. 23: *expetenda magis est decernendi ratio, quam decertandi fortitudo.* c. 31: *nec quidquam sequi, quod assequi non queas.* c. 37: *literae neque expressae, neque oppressae.* c. 39: *attulit — retulit.* ibid. *nec domo dominus, sed domino domus honestanda est.* c. 44: *ut otium suum ad nostrum negotium contulisse videantur.* Alia vide exempla annotata Cortio ad Ep. ad Div. L. 6. §. 2. [39] In Graecorum autem optimis quibusque millena deprehendas. Sic. Isocr. Or. ad Nicoclem p. 30: *ὁσῶ γὰρ ἂν ἐρρώμενεστέρωσ τὴν τῶν ἄλλων ἄνοιαν ἀτιμάσῃς, τοσοῦτῳ μᾶλλον τὴν σεαυτοῦ διάνοιαν ἀσκήσεις.* Panathen. p. 416: *ταῖς πόλεσι παριστάναι — τὰς σῶζεσθαι δεομένας πρὸς τὰς σῶζειν δυναμένας.* ibid. p. 465: *διείλοντο τὰς πόλεις, καὶ τὰς χώρας ἀφείλοντο τοὺς δικαίως κερκτημένους.* Sed infinitum est haec persequi. Plura de usu harum figurarum peti possunt ex scriptis veterum, veluti magistri Herenniani IV. c. 21., et Quintil. X. c. 3. —

XIV. Non praeter veritatem dixit Thucydides II. 40. *ἀμαθία θράσος φέρει.* Siccine enim te abuti auctoritate Ruhnkenii, eamque cum dictatorio vultu tuae ignorantiae praetendere! Hoc ergo W. ignorabat, raro occurrentibus verbis abstinendum esse, quocum R. haec monita, antequam ea ederet, communicaverat, — ejusque judicio subjecerat. Tu vero rationem hujus moniti a R. adcitam non animadvertis: scilicet, *quod saepe accidit, ut talia, melioribus libris inspectis, vitiosa reperiuntur.* Atqui non ista Plautini loci Pers. IV. 3. 46. est causa; quippe in quo huic nominis sua auctoritas constat. Et omnino [40] illa cautio, magis ad Mureti, quam ad nostram pertinet aetatem, quae editionibus ad multa deinceps exempla scripta exactis, longe certior fides et integritas parta est. Caeterum, reliqua tua dubitatio ex stupore et imperitia percipiendae elegantiae venit, et proxime antecedente nostro de paronomasia monito

confutatur. Nam apud veteres hanc vocabulorum compositionem usu receptam fuisse, dubitare nos non sinunt alia hujus generis vocabula, qualia sunt: *beneficus, furtificus, grandificus, glorificus, horrificus, justificus, laetificus, lanificus, lucificus, luctificus, maleficus, mirificus, monstificus, mortificus, munificus, pacificus, purificus, salvificus, somnificus, terrificus, tristificus, veneficus, vestificus, vivificus, vulnificus*. Et quum haec ita sint, huic loco *τὸ lucrificus* inprimis aptum et accommodatum arbitror. Oppositio enim nullo vocabulo efficacius et majori cum vi exprimi poterat, quam ejusmodi simili exitu claudente voce.

XV. Ex praecepto Quintiliani [X, 1.] monemur, modeste et circumspecto judicio de magnis viris pronuntiare, ne, quod plerisque accidere soleat, damnemus, quae non intelligamus. Ejusmodi salubria praecepta non curat noster censor. Est enim *Δεινὸς ἀνὴρ τὰ χα* [41] *καὶ ἀναιτιόφρο*. [Hom. II. λ, 653] Quodsi hujus praecepti memor fuisset, plane intacta reliquisset verba Wytttenbachii Bibl. Crit. p. 155: *valeat et vivat adhuc diu*. Ait particulam *adhuc* non nisi cadentis Latinitatis auctores comparativo addere. Sed hic locus certissimo nobis indicio esse potest, quam parum accurate noster severissimus Latinitatis judex Ruhnkenii verba consideraverit. Muretus comparativo addiderat *τὸ adhuc*, et ideo monet R. ad Mur. T. III. p. 198., hanc particulam Senecae, non Ciceronis, aetate cum comparativo jungi coeptam esse. Idem hoc jam monuerant Gesn. in Thes. et Ernestus ad Tursell. de partic. p. 59. Sed hic nulla est comparatio, atque idcirco Ruhnkenii verba huc referri nequeunt. Porro satis constat particulam *adhuc* a veteribus subinde positam esse pro *praeterea*, quod docent Perizon. ad Sanctii Min. p. m. 575., et Tursell. l. l. *Plerumque quidem adhuc significat usque ad hoc tempus, usque ad hunc modum*, et respondet Graeco *ἕως τούτου, πρὸς τοῦτο* at subinde idem est quod *praeterea, ad hoc, πρὸς τοῦτο*. Et hoc sensu *ad hoc, ad haec, adhuc*, in libris antiquis usurpata et permutata reperiri docet Drakenb. ad Liv. XXI, 52. Itaque *adhuc* pro *praeterea, ulterius* magis [42] etiam frequentatum antiquitus fuisse videtur, quam hodie in editionibus apparet. Ergo Cic. de Amic. c. IX. *Nisi quid adhuc forte vultis*: ubi Ernestus voluit *ad haec*, Faccio-

latus in sua ed. adhuc retinuit \*). Multi sunt loci, ubi adhuc utroque modo accipi possit, pro *huc usque et praeterea*: nec vero desunt, ubi diserte sit *praeterea*, *ulterius*. Veluti notatis ap. Tursell. et Facciol. addi possunt Plin. Ep. II, 10: *magna etiam longaue expectatio est: quam frustrari adhuc et differre non debes*. IV, 13: *Ipse pauculis adhuc diebus in Tusculano commorabor*. Ex eodem genere est illud Virgilianum Aen. VI, 807: *Et dubitamus adhuc virtutem extendere factis*. — Eodem modo, quo hic, olim quoque scripsit W. Bibl. Crit. P. I. p. 27. *cujusque luce, ut diu adhuc fruantur literae*. Caeterum jam ante hos triginta annos hanc particulam etiam significationem haud ignotam fuisse Wytttenbachio apparet ex B. Crit. P. II. p. 22: *qui quidem plerique non magis, aut minus etiam, noti sunt*. Neque eum oblitum ipsius esse videmus ex hac ultima parte Bibl. Crit. p. XII: *magis etiam admirari*. et p. XXVIII: *longius etiam*. Quod autem Censor ipsam dictionem humilem judicat, rursus [43] ostendit, se, ut Latinitatis scientia, ita elegantiae sensu carere.

XVI. Et illa quoque Wytttenbachii verba, B. Crit. p. II, 15, de Saxii Onomastico reprehendit Censor: *ubique nobis occurrit grata cum varietas, tum novitas in elogiis hominum nobis vel notorum vel minus cognitorum*. Nam quasi ex tripode effatur: *Elogia sunt inscriptiones sepulchrales; scribendum erat JUDICIA*. Sed W. ita de industria mihi scripsisse videtur, *elogia* vocans, quas notationes, titulos, vocare poterat, singulos locos quos vulgo *articulos* appellant: idque nomen huic rei convenire judicans, ex ejus usu ap. Sueton. in Galba 3., et simili ap. Cic. p. Cluent. 43, ac Senec. Controv. III, 15, quos Facciol. in Lex. citavit, quibus addatur J. F. Gronovii anima ad Plauti Merc. II, 3, 74. At censor ad hanc significationem non attendit; illam unicam esse putavit. Qui est crassus error. Et voluit *judicia*. Qui crassior etiam est.

---

\*) Adde ad Divi XVI, II, 4: *Et ipse Caesar, amicus noster, minaces ad Senatum et acerbis literas miserat: et erat adhuc impudens*. Quo loco maluit J. F. Gronovius legere *ad hoc*: Ernestus vero, *Adhuc*, inquit, pro insuper, praeterea, accipiendum, nisi *ad haec* legendum. Corius contra nihil mutandum arbitrat. Ex Addend.

XVII. Postrema in notula, Graecum nomen unum attingens, non uno modo peccat: ita pronuncians: „*W. recte dicit Patriophilum et Alethophilum inepta esse nomina, quippe quae graeca ratione componi debeant*, [44] *Philalêthes et Philopatrius. Attamen censor apud Theocritum VIII. 60, invenit Ζεύς γυναικοφιλής*”. Primo nihili est nomen *Philopatrius*, nec ita scripsit Wytttenbachius, sed *Philopatridem*, Accusativum Nominativi *Philopatris*. Deinde censor volens ostendere se Theocritum nosse; debebat Dorice et penultima acutum, ut est in probis editionibus, apponere *γυναικοφίλας*. Tertio; non attendit, Theocriti, ut poetae et Dorici, nullam esse auctoritatem adversus Atticam et communem prosae dictionis consuetudinem. Quarto; ignoravit, hoc ipsum nomen improbari a Polluce VI, 168: ὁ δὲ γυναικοφιλής, ἐν ταῖς Πολυζήλου Μουσῶν Γοναῖς, οὐ πάνυ ἀνεκτόν' i. e. nomen γυναικοφιλής, in *Polyzeli carmine*, cui nomen est *Musarum Generatio*, non magnopere est tolerandum. Quinto; nescivit quam rationem Attici in nominum compositione sequerentur: v. c. in φίλος et μῖσος, nomen activum praeponi, passivum postponi, ut φιλάνθρωπος, μισάνθρωπος, cet: in ποιός a ποιῶ facio, postponi, ut ἀρτοποιός. item πώλης a πωλέω vendo, ἀρτοπώλης, βιβλιοπώλης. Hinc φιλόθεος, deum amans: θεοφιλής a deo amatus: μισόθεος, dei osor: θεομιστής deo exosus. Ergo, secundum analogiam, γυναικοφιλής est a mulieribus dilectus, sed usu caret: [45] at γυναικοφίλης, mulierum, amator. Sexto: hoc ipsum ignoravit censor, quam vim Accentus haberet in compositis nominibus Activis et Passivis distinguendis: hoc ex Eustathio ad Il. A. 270, 109. noscere poterat: aut si haec auctoritas nimium est recondita pro illius captu, certe habet Scapulae Lex., in quo est Cyrilli, vel, iudice H. Stephano, Philoponi, *Collectio Vocum*, quae pro diversa significatione, Accentum diversum accipiunt; ex qua exempla abunde promere licet; v. c. αἰνότηκος, gravis pariens: ἀνότηκος, gravi fato natus: ἀρτίτοκος, nuper enixa: ἀρτίτοκος, nuper natus: ἀρτίτομος, nuper incisus: ἀρτίτομος qui nuper incidit: εὐδύβολος, recte jactus: εὐδυβόλος, recte jaciens: θεότηκος, ex deo natus: θεοτόκος, deum pariens: λιθότηκος, incisus ex petra: λιθοτόμος, lapicida: πρωτόγονος, primogenitus: πρωτογόνος, primo enixa:

πρωτότοκος, *primo genitus*: πρωτότοκος, *primo enixa*, Sed Accentuum ratio negligitur vulgo etiam ab iis, qui Graecarum Literarum cognitionem affectant: sed tantum abfuit, ut in Wytttenbachii schola negligeretur, ut me ob neglectam Accentuum rationem aliquando ab ipso admonitum adhuc meminerim.

XV. Denique, censura ad finem perducta, additur clausula quaedam, qua censor primum [46] deprecatur, ne quis existimet, se his animadversionibus suis egregias Clar. Wytttenbachii dotes vel minima ratione imminuere voluisse: deinde vero, quasi in gratiam et solatium Wytttenbachii, refert Muretum adeo atque Ernestum, viros Latine scribendi facultate in primis conspicuos, nonnunquam merito reprehensos esse. Sed profecto, quisquis harum ineptiarum architectus sit, melius famae suae consulisset, si Bibl. Criticae censendae provinciam aliis doctioribus reliquisset integram, et, quae sibi minus Latine dicta visa essent, majori cura examinasset, acquiescens interea in saepius jam laudati Quintiliani sententia, qui X, I: *si necesse est*, ait, *in alteram partem errare, omnia summorum virorum legentibus placere, quam multa displicere maluerim*. Nam omnes ejus animadversiones vanas falsasque esse, ex iis, quae dixi, satis apparet. Quae porro de Mureto et Ernesto dicuntur, dudum omnibus notissima sunt. Ecquis enim ignorat et Veterum optimis, et Luciano, elegantissimo et Atticae normae observantissimo scriptori, accidisse, ut aliquoties ea sermonis vitia ei exciderint, in quibus alios scriptores reprehenderat. Quo minus mirandum est, idem accidere recentioribus Latine, [47] quamvis optime, scribentibus. Etsi enim Muretus, ut ait Ruhnkenius, ea felicitate Tullianam eloquentiam expressit, ut nisi res, quas tractat, recentiorem scriptorem proderent, ipsum Ciceronem a te legi putares; tamen nonnulla minus Latina ipsi exciderunt. Haec R. sedula et summa diligentia indicavit et emendavit in sua operum Mureti ed. Idem porro valet de Ernesto. Memini me aliquo loco in scriptis ejus legere *ad instar*, quod bene Latinum esse vix credam. Agroetius certe, vetus Grammaticus, p. 2269. ed. Putsch: *Instar illius rei*, inquit, *dicere debemus, non ad instar*. Et in praef. Suetoniana p. 7: *neque tamen is ego sum, qui existimet, pro*

*existimem.* Denique ad ipsum *Ruhnkenium* quod spectat, hic scripsit T. I. p. 13. Opp. Mur: „*Solida doctrina ἄνθρωπος est, nec Latinis usitatum: ut mirer, elegantissimum librum, quo Philosophiae elementa traduntur, ab Ernesto inscriptum esse Initia Doctrinae Solidioris:*“ et vel sic tamen eadem hac formula usus erat in Or. *De Graecia Artium et Doctrinarum Inventrice* p. 79: „*Haec est illa, inquit, barbariae et immanitatis victrix, veritatis indagatrix, solidioris doctrinae parens, officii moderatrix, vitae humanae magistra,*“ \*) Sed talia [48] animadvertere in magnorum virorum scriptis etiam semidocti et quadrantarii adeo possunt: et ubi animadverterunt, sublimi sidera vertice ferire sibi videntur. Qui potius illud cogitare deberent: Πολλάκι τοι καὶ μωρὸς ἄνθρωπος μάλα καίριον εἶπεν [Gell. N. A. II, 6. Macrobian. Sat. I, 7.] Hujus profecto *μωρίας* manifesta documenta cum in tota ubique censura, tum manifestissimum hac in clausula exhibuit censor, quod Wytttenbachii oratione purganda se operam non perditurum putavit. Cujus quidem viri in scriptis si quis tales naevos, non dico reprehendere, sed quaerere velit, is certe facultate eandem ad Wytttenbachium proportionem habere debet, quam ad Muretum habuit Ruhnkenius. Atqui hanc se putans proportionem obtinere censor, plane ridiculus est; qui et ceteris artibus carens, Latinitatis cognitione vix puerilis institutionis modum excedat, et magis etiam judicio deficiatur.

\*) *Ad instar* Latinum *esse*, negari non potest, si quidem omnes dicendi formulae in scriptis Veterum Latinorum obviae in universum Latinas vocare licet. Quod in hac causa valet. Nam *ad instar* dixerunt Justin. XXXVI, 3: *Est namque vallis, quae ad instar castrorum clauditur.* Apulejus Met. IX. p. 645: *qui ad instar testudinis alveum succubabat,* p. 654: *ad instar scoparum.* p. 666: *ad instar infelicissimi sui filii.* Solinus in Polyh. XXXII: *Hunc [Apim] colunt ad instar Numinis.* XXXVII: *ad instar Aegyptii amnis terras contegens.* At vel sic tamen hand vereor dicere, hanc esse loquendi formulam posterioris Latinitatis, cujus exempla in optimis aureae aetatis scriptoribus frustra quaeras. Praeter Agroetium, testem habeo Serv. ad Virg. Aen. II, 15: VI, 866: XII, 923. Neque video, cur Freinshemius in Ind. Justin. V. *Instar* dixerit, rationem a Servio allatam contra ipsum pugnare. Plura de hoc vocabulo v. ap. Voss. de Anal. I, 46: Vorst. ad Val. Max. II, 85: Burm. ad Virg. Aen. XII, 923.



Atque haec de priori censura sufficiant. Relinquamus igitur hunc Censorem scenicum, eumque rogemus, ut non prius in scenam rursus prodeat, quam majori et magis accurata Latini sermonis cognitione imbutus sit, atque priori ratione suas partes tueri didicerit.

## C E N S U R A II.

Qui hunc abortivum foetum edidit, nec suas quisquillas civitati eruditae obtrudere dubitavit, is profecto censorem exiit, ut calumniatorem se gerere posset. Utraque pagina invidentiam suam prodidit, et hoc illiberali labore suo ostendit, se nullo alio consilio animum ad scribendum appulisse, nisi ut bilem suam effunderet, et tam in Wyttenbachium, quam in me, inveheretur. Neque est, quod dubitem, quin mire sibi placuerit, quum videret, suum quaecumque in hac scriptiuncula positum studium sibi tam prospere et ex voto cecidisse. Ab initio enim ad finem sibi similis permansit, Zoilique personam optime sustinuit. Et quod vidimus, quam pauper ingenii doctrinaeque fuerit prior censor; hic alter, quod vix credibile sit, utriusque dotis etiam pauperior est; sed hanc pauperiem insigni arrogantia et pronunciandi superbia compensat; ut nimirum decet non simplicem censorem, sed *Censorem etiam Censorum*. O tempora! O mores! O ridiculo [50] capiti ridiculum praescriptum nomen! Sed crimina censoris deinceps videamus.

Primum testatur homo candidus, jucundum sibi fuisse, quod haec Bibl. Criticae pars post praeterlapsos *quindecim* annos, intra quos frustra sit desiderata, tandem in lucem prodierit. Tum profitetur, suam inter legendum sphinde perceptam animi voluptatem multis locis turbatam, et veluti felle infectam fuisse. Denique ait, se singula opusculi capita expositurum, et veritatis atque aequitatis vi et efficacia fretum, singulis locis suas animadversiones additurum esse. Antequam vero in hanc operam incumbit, velut in transitu sui ordinis homines, vernaculos censors, maledictis insectatur,

Quae ad W. pertinent, ejusmodi sunt, ut intellecta haud sit difficile, verum esse illud Nepotis: „*Invidia gloriae comes est, et libenter de his detrahunt, quos eminere vident altius.*“ Eaque de causa Censoris crimina, ut mere invidiosa, et falsa, et mendacii manifesta breviter tantum attingam, Heusdio, V. Cl., defensionem integram relinquam. Quae ad me pertinent, de illis ultimo loco agam.

I. Principio statim malevolentiam prodit, [51] quod ait Wytttenbachium in Ep. ad Hier. Boschium *huic in sermonibus et actionibus deteriolem, quam sibi, personam tribuere.* Nil minus egit W., quam ut supra amicum suum sapere, velle videretur. Qui hoc suspicantur, aut ignorantia labuntur, aut malevolentia ducuntur. Ignorant utriusque viri mores, veritatis studium, mutuam consuetudinem: ignorant Socraticam rationem Atticamque venustatem, huic scriptionis generi debitam. Malevolentiae autem summæ est conari, amicos ab amicis abalienare; si quidem verissime dicitur, maximas esse divitias, bonos amicos habere. Censori quidem non major cum animi benevolentia, quam cum ingenii elegantia communiõ est.

II. „Porro Wytttenbachius ait“ *se mutanda statione aliis ingratum fecisse.* Hoc, sit venia verbo, non verum est. Non ipsius Leidam migratio, sed totius Literarum professionis susceptio, et Graecarum Literarum institutio, quae nunquam pars fuerat provinciae Ruhnkenii, cujus se successorem ferebat Wytttenbachius: — hoc aliis ingratum erat: et merito: quia sic illo tempore restitutio Luzacii difficilior reddebatur, minusque necessaria existimari debebat: cujus rei invidia in Wytttenbachium [52] redibat.“ Haec Censor. Sed quot verba, tot mendacia: eademque vestigia, quibus paulatim ad istius personati censoris cubile ducamur. Dicam quae non solum ex W. et multis aliis audiui, sed etiam quae vidi, quorumque ipse testis fui. Wytttenbachius nunquam cupidus fuit cathedrae Leidensis: hanc post Valckenarii obitum, et Luzacii abdicationem aliquoties sibi oblatam recusavit. Mortuo Ruhnkenio, sibi rursus oblatam accepit: ut illius familiae consuleret, causamque obtineret. Hoc quamquam ipse publice plus quam semel scripsit, tamen denuo me repetere oportet; quia multi oblivisci, quam meminisse, malle videntur. Accepit igitur cathedram Leidensem iidem

titulis, quibus Amstelodamensem obtinuerat, excepta Historia patriae: simul Curatores rogans, ut Luzacium, virum cl., restituerent, cui restituto Graecae institutionis provinciam relinqueret. Respondebatur, tempus Luzacii restituendi nondum venisse. Quid ergo faceret? nullas Graecas scholas haberet? Hoc erat Curatorum voluntatem frustrari, qui et Graecis Literis provideri volebant: erat contra animi sui sententiam agere, Latinarumque Literarum studia labefactare, quae sine Graecis manca et imperfecta [53] sunt. Ille vero, ut studiosae juventuti consuleret, Graecas habiturus erat scholas, etiamsi earum professio a cathedrae suae titulis abfuisset. Hoc igitur consilio W. Graecam institutionem suscepit, ut ne eam extinguere sineret in Academia, sed servaret, donec Luzacius restitutus esset. At is ita nimirum Academiam diligebat, ut Graecas Literas aut a nemine, aut a se tradi postularet, et aliam quemvis hoc officio fungentem odisset. Hoc eruditissimo nostrae aetatis Theologo accidit, Tewatero, qui juvenibus hanc disciplinam desiderantibus gratificans scholas in N. T. et Homerum habuerat: hoc multo etiam magis Wytttenbachio: contra quem susceptum odium simultatemque sermonibus et factis exercuit, neque restitutus, amplioreque et salario et munere auctus, deposuit. Censori quidem merito quis objiciat, *φθονῶν γὰρ οὐ βλέπεις ἃ δὲ βλέπειν χρεῶν* [Eurip. Phoen. 720.] *per invidiam non intelligis, quod intelligere debebas.*

Verissimum, enim est, *Wytttenbachium mutanda statione aliis ingratum fecisse.* Nisi enim tunc Leidae fuerint, quibus ejus adventus ingratus fuerit: certe Amstelodami fuerunt, quibus [54] ejus discessus ingratus erat. Sed censor acutus scilicet, ex duobus disjunctis non nisi alterum vidit. En dialecticam hominis! Et judicium eleganti formula declarat: *hoc, sit venia verbo, non verum est. En hominis urbanitatem!*

III. Pergit censor: „*Animus sua sorte contentus, quem profitetur Wytttenbachius, nihil tamen est nisi circumscriptio et cohibitio ulteriorum votorum!!!*“ Nunc ethicam experitur: quae nihilo ei melius procedit, quam dialectica. Quid enim aliud, nisi hoc est, animus sua sorte contentus. Ergo ab ethica repulsus, confert se ad jocos: sed verbis eum exprimere nequit, notis significat: iam pantomimus fit:

vellem tuum haec scribentis gestum et Sardonium risum videre! Caeterum et ego praesens cognovi, et alii omnes mecum condiscipuli sciunt, quam fuerit Wytttenbachii statio Amstelodamensis et commoda, et jucunda, et, ut ipsius formula utar, *non modo honorifica, sed etiam lucrifica*; ut Leidensis, quamquam solito modo amplior, tamen ad illius modum non accedat. Sed hoc noster homo ignorabat. Et tamen judicat. Hi mihi sunt censores censorum! sed videamus sequentia.

IV. „*Computatio summae errorum, quorum in [55] edendo Plutarcho veniam sibi dari ab intelligentibus iudicibus aequum censet W. p. 6. et 7, nobis, ut aperte dicamus, puerilis videtur. Indocti enim, quorum causa eam instituit, ea non digni sunt: prudentes autem non opus habent.*“

Ergo monere id, quod vulgo non observatur, et tamen observatu necessarium est, nisi iniqui futuri simus; id quod novitatem, quod admirabilitatem habet; hoc ergo monere puerile est? Sic nobis, inquit, censorum censoribus videtur. Quid hoc, inquam, aliud est, quam *sic visum Superis*. Indocti autem non digni tibi videntur, qui doceantur? quid ergo vos censores agitis censendo? nonne docere vultis? Ita sane. Quid tum? Nonne vides per hanc tuam disjunctionem, tuum istud censendi et omne docendi munus tolli? Si enim indocti non digni sunt, qui doceantur, prudentes docente non indigent; nemo supererit, qui doceri debeat. Mirum acumen censoris censorum!

V. „*Cui bono autem fuit,*“ sunt verba censoris, „*hanc de Plutarcho narrationem retulisse? Quae iis, qui carent editione Wytttenbachii, nunc quidem jucundissima et fructuosissima est, sed perpetuum pretium non habet: [56] quandoquidem unusquisque verus Graecarum Literarum amator aliquando, minus impedito commeatu maritimo, hanc sibi editionem comparaturus est; itaque idem bis habebit.*“

Haec satis est legisse, ut agnoscamus animum et malevolum et stupidum, quod reprehendat quaerentem nec invenientem, seque ipsum impredientem. Primo, non videt, se rursus sua vineta caedere: si enim de bonis et praestantibus in aliquo genere libris non uberius referendum est, quorsum abihat censorum munus, et quid noster censor agat? Certe res ipsa et communis sensus jubent, ut de

praestantissimo quoque libro copiosissime referatur. Sed rationem quoque addit: in vaticinationem se conjicit: bene sperare nos jubet de restituendo commeatu et pace, de arcis et crumenis hominum studiosorum, quorum unumquemque hanc sibi editionem comparaturum. Censor videtur se divitem velle videri. Non enim cujusque studiosi est librum ducentis aut trecentis florenis emere. Ergo usque eo, dum haec venerit felicitas, Wyttenbachii de Plutarcho *anticipatio jucundissima et fructuosissima* erit, ipsius judicio censoris. Et erit etiam postea, nostro quidem judicio, grata et utilis nec minus habentibus ipsum librum, quam non [57] habentibus; ad eumque interius cognoscendum quasi praeparatio, et epitome ad perspicuitatem accommodata, quibusdam etiam necessariis locis aucta.

VI. Sed nae ego praeter meum propositum diligens sum in istis calumniatoris sordibus ad verbum Latine reddendis: quarum sententias universe retulisse satis erat. „Ergo deinceps dicit *Wyttenbachium melius facturum fuisse, si, rejecta Plutarchae editionis descriptione inter Relationes Breviores, ejus loco accuratam et locupletem recensitionem Homeri Heyniani aut Athenaei Schweighauseriani, aut similis hoc novissimo temporis spatio editi libri dedisset.*“ Homo superbia et stupore sibi plane constat. Ipse censor censorum Wyttenbachio censori praescribit pensum. Hic vero jam dudum professus erat in praefationibus singulorum Voluminum, quem delectum librorum censorum secuturus esset: ipse sibi leges tulit, nec novas exspectat, minime ab homine imperito et stupido. Nonne sentis te in tuam modo positam reprehensionem ipsum incidere? Etenim si Plutarcho Wyttenbachiano non est danda longa descriptio propter illas causas, quas tu voluisti, minus etiam dari debet illis, quos modo dixisti, libris. Nam et hi sunt [58] ejusmodi, ut iis verus Literarum Graecarum amator vix carere possit: et sunt minore pretio, et faciliores ad accessendum, et frequentiores in nostris terris, et magis cogniti. Aut si omnino censuram conscribi vis, quare non ipse tu cum tuis sociis hoc agis? Sed ais, hoc magis in Wyttenbachii facultatem convenire. Tunc igitur, qui fateri cogeris, Wyttenbachium tibi censendi scientia praestare, hunc tu

censere audes? Vero, inquis, sum enim censor censorum. Immo *persona tragica, quae cerebrum non habet!*

VII. „*Censuram Lectionum Andocidearum, non modo severam, sed illiberalem et iniquam pronunciat.*“ Hanc item calumniam esse censoris nostri sponte intelligitur. Quod autem Censor in Wytttenbachium transfert illud in Vita D. Ruhpkenii de *Jac. Gronovio* dictum Eurip. Orest. 253: *Οἱ μοι, κατίγνητ' ὄμμα σὸν παράσβεται, Ταχὺς δὲ μετέδου λύσσαν, ἄρτι σωφρονῶν* dupliciter errat: primo, quod pro *Jac. Gronovio* scripsit *Graevium*: deinde quod in Wytttenbachii oratione nulla λύσσα, *rabies, ira*, contra animadversionis summa lenitas apparet, [59] Sluitero, quantum poterat, parcentis. Illud igitur dictum Euripideum potius in censorem nostrum convenit, cujus tota censura nihil nisi vituperandi libidinem ac caecum furorem anhelat. Hoc sibi habeat, et aliud a nobis accipiat proximum in eadem fabula dictum, mire in hominem quadrans: *Μέν', ὦ τάλαιπῶρ, ἀτρέμα σόῃς ἐν δαμνίοις. Ὅπως γὰρ αὐδέν, ὧν δοκεῖς σάφ' εἰδέναι* [Eurip. Orest. 258.] mane, o miser, quietus tuo vernaculo in nidulo, nec extra eum pennas exsere tuas Graeca aut Romana in vireta; nil enim ibi vides, sed caecus de coloribus iudicas.

VIII. Imperitiam suam ostendit, eamque prorsus plebejam, in usu antiquarum Literarum. W. desiderayerat in Lectionibus Andocideis *notitiam historicam studii hucusque ab hominibus doctis in Andocide edendo emendandoque navati.* Hanc iniquam postulationem esse clamat censor, quippe quam W. non item fecisset in Mahnii Diatribe, nec in Heusdii Specimine, quorum in hoc notitia historica, in illa index abesset. O mi illiterate et idiota censor! nonne vides, te duas res plane diversas confundere? Mahnii [60] Diatribe, ut brevis libellus instar Disputationis Academicæ, et ipsa distributione capitum locorumque notatus, non desiderabat indicem: nec Heusdii V. Cl. Specimen requirebat notitiam illam: de Platone, ut celeberrimo scriptore, haec putida futura erat; de Andocide, ut obscuro, certe in vulgus minus cognito, merito exspectabatur. Porro ex eadem ignorantia venit, quod ibidem posuit „*Wytttenbachium testimonia veterum de Andocide censere sine ullo argumento.*“ Hoc, ut censori elegantiam suam referamus, sit *venia verbo*,

*non verum est.* Rationes judiciorum paucis verbis significantur: et quod intelligenti satis esset: a censore non intelligerentur vel totis paginis explicitae. Neque pro talibus hominibus Bibl. Critica scribitur. Abstineant manus: et maneant in suo nidulo!

IX. Et tamen se extra nidulum in Graecas Literas profert; Heusdii conjecturas reprehendens. Cui equidem, quod dixi, suam causam integram relinquens, facere nequeo, quin tarditatem censoris notem, adeo crassam illam, ut vel festinanter has paginas percurrenti in oculos incurrat. Quae, ut in omnibus locis manifesta, tum in hoc palmaria est, ubi Heusdii conjecturam in Phaedone p. 108, 4. [61] Specim. p. 23, pro ἀγνοῖ proponentis ἀγανκτεῖ, repudians, ex suo ingenio ἀπονεύει adfert: quo nihil obtusius infectiusque excogitari potest.

X. Tum rursus in Ethicam se conjicit: „Ratio,“ inquit, „qua Wyttenbachius collagam suum Luzacium tractat, summo opere immodesta est, et exemplum praebet belli Literati Klotziani!“ Haec supra dictis refelluntur. Si bellum hoc dicendum est, W. certe ejus auctor non fuit. Huic nulla causa erat, quare per modestiam errores reticeret, quibus oneratus Luzacius et ipse in publicum prodibat, et oneratum discipulum producebat: posteaquam ille ita se gerere pergeret, ut manifesto ostenderet, nullam se erga Wyttenbachium necessitudinis more majorum inter collegas constitutae rationem habere. Et illorum tamen errores, quod intelligentissimi lectores judicarunt, ut ipsa re diligenter et vere, sic verbis leniter et parce notavit.

XI. Tandem quod W. in Relationibus Brevioribus p. 117, ostendit se sua Ruhnkeniique dictata editurum, censor sapientissimum monitum, tamquam ex tripode oraculum, fundit: in tertia persona, ut solent censores, loquens: „Dictata edi, censor vehementissime [62] improbat: quia studiis obest. Adolescentes, emtis clari Professoris dictatis, supervacaneum judicant, de iisdem argumentis scholas Professorum audire. Quodsi emta legerent, detrimentum non nisi ad Professorum crumenas pertineret. At vero plerumque satis habent ea possidere, scite ligata et vestita in bibliotheca sua reponere, nec porro inspicere.“ Hanc ex intimo sapientiae suae penu recondita et nemini ignota oracula ut

depromere posset, non legit proxima illi loco verba Wyttenbachii, aut potius prudens ea omisit: illa, inquam, proxima, quibus consilii ratio declaratur, „et quam nostris, eandem aliorum, maxime Ruhnkenii, dictatis editionem destinavimus: quae nunc mendosa in multorum manibus jactantur, et ut res nullius a primo quoque occupantur.“ quod refertur ad ejusdem argumenti locum, in ep. huic Parti praemissa, proditum p. III. „si quid in scholarum nostrarum dictatis novae lucis inesset, totum hoc in Bibl. Critica, si quando eam instauraremus, prodere decrevimus.“ Ergo nec ad integra dictata, sed locos exquisitiores et novitate commendatos, omissis vulgaribus et ad tirones solos pertinentibus, haec edendi voluntas spectat; et eo consilio suscipitur, ut [63] et Literae novis repertis locupletentur, et sua inventoribus auctoritas servetur, in eamque evadere conantes arceantur. Censor hoc edendi consilium reformidet, si ipse Literarum doctor est, suaeque dictata transscribendis aliorum dictatis consarcinat. W. quidem hoc proposito ostendit, se dictatis sive suis, sive aliorum pervulgatis, nec quaestui suo, nec existimationi timere. Caeterum de dictandi dictatarumque scholarum commodis atque incommodis, ipse multo prudentius veriusque censore nostro judicavit in Vita Ruhn. p. 76 et 77.

XII. Denique, ne quid stupiditati suae deesse videatur, et postrema prioribus ex aequo respondeant, Wyttenbachium hortari homo hardus haud erubescit, ut nimirum in edendis Ruhnkenii epistolis sui ipse praecepti, Slatero Bibl. Crit. p. 98. dati, memor sit: *ad magnorum virorum Adversaria edenda iudicii delectum afferendum esse.* Hac intempestiva admonitione nihil magis ridiculum et insulsum excogitari potest. Quis enim unquam in Wyttenbachii scriptis iudicii delectum desideraverit? Tibi certe, nasute! qui molari, quam Lydio lapidi, similior es, nulla cum iudicii delectu communio est. Abi ad Tui similes: in [64] horum coetu recita hoc praeceptum: ibi operam dato, ut illud in succum et sanguinem convertatur. Tibi et commilitonibus tuis salubre erit, quoniam hoc medicamine vobis magnopere opus esse videmus.

XIII. Venio nunc ad alteram hujus Censurae partem, h. e. ad illa loca, in quibus de Latinitate, tam mea quam



Wyttenbachii agitur, atque temere et puerliter loquacem bonus noster Aristarchus se praebet. Primo loco [p. 588.] aegre fert, quod Wyttenbachius me Bibl. Crit. p. 48. *discipulorum, illo tempore, Graecae Latinaeque eruditionis studiosissimum* appellaverit. Quid hac animadversione sibi Censor [si modo Censor, nec potius alienae personae histrio nominandus est] voluerit, satis apparet. Istius nempe stomachus superlativum *studiosissimus* concoquere non potuit, atque ideo Wyttenbachii verba calumniatus est, ac si hic lectoribus suis persuadere voluisset, me in Graeca Latinaque eruditione commilitonibus meis longe antecelluisse. Haec vero nec Wyttenbachii sententia fuit, nec ego hoc mihi unquam arrogavi. Probe enim adhuc scio, haud paucos tunc temporis inter condiscipulos meos, quos semper fraterno amore dilexi, exstitisse, qui nisi majori etiam, certe [65] haud minori studio Literis Graecis et Latinis operam navarent. Nominatim hos appellare possem, si necesse esset, nec vererem, ne quidam, lepidi magis quam acuti, reperirentur, qui hoc a me gratiae aucupandae causa factum dicerent. Interim tamen hoc prae me fero, me Literarum Graecarum et Latinarum pro mea virili *studiosissimum*, h. e. *valde studiosum* fuisse, utpote qui eo consilio has literas discebam, ut eas aliquando docere possem. Quale consilium, quantum memini, illo tempore condiscipulorum meorum nemo sibi proposuerat. Abeat igitur homo inutilis cum religione sua! Haud facile, ut opinor, quemquam aequalium meorum adeo recordem invenerit, qui hisce Wyttenbachii verbis se laesum arbitretur.

XIV. Altero loco reprehenduntur haec diatribes meae verba [p. 8.]: *aliorum philosophorum praecepta habere voluit percepta*. Additur haec nimirum animadversio: „*In istis simili exitu claudentibus verbis, praecepta — percepta, frigidus lusus, monachis proprius, inest.*“ Dii boni! Adeone hominem esse quemquam sagacem ad odorandas monachorum sordes, quam hic obesae naris censor est! Agis rex improbo cuidam homini percunctanti, [66] quis inter Spartanos vir optimus esset, respondit: *qui tui est dissimilimus*. Eodem profecto jure quis Tibi, stolidissime! dicere posset: *Censorum stupidissimus quisque tibi vitiligator simillimus est*. Ad unum enim omnes chronologiae et hi-

storiae peritos oro et obtestor, ut me argumentis ad persuadendum idoneis doceant, jam *centum* ante Christum natum annis *monachos* exstitisse. Etenim ex effato garrientis hujus hominis, cui has insulas dapes debemus, *Cornelius Nepos* inter monachos referendus est, cujus haec sunt verba in Vita Attici c. XVII: *Nam et principum philosophorum ita percepta habuit praecepta, ut iis ad vitam agendam, non ad ostentationem uteretur.* Similiter scripsit Cic. de Off. 1. 18: *Sed ut nec medici, nec imperatores, nec oratores, quamvis artis praecepta perceperint, quidquam magna laude dignum sine usu et exercitatione consequi possunt.* II. 2: *cum percipi nihil posse dicamus, — tamen — praecepta officii persequamur.* Porro Horat. A. P. 335: *Quidquid praecipies, esto brevis, ut cito dicta Percipiant animi dociles, teneantque fideles\**. [67] Apage igitur in nidum tuum monachicum! Delitescere ibi, nec pennas prius exsere, quam alarum remigio uti didiceris!

XV. Pergit deinde dialectice quoque fastosus magister hoc modo: „*Recte observat Wytttenbachius initio Animadversionum suarum de Latinitate Sluiteri, [bene scribendi fundamentum esse bene cogitare. Atqui ex hoc praecepto verba MAHNII [p. 13.], Speusippo ipsiusque praedecessore Platone jam mortuis, male se habent, quia auctor non bene cogitavit. Per se enim apparet, minime necesse esse, Speusippo, Platonis successore, jam mortuo, de decessore Platone denuo loqui. Scribendum fuerat, Platone ipsiusque successore jam mortuis.*“ — Ecce rursus in summa reprehendendi libidine Censoris summum stuporem; qui una in reprehensione duos errores committat. Ego aut recte scripsi, aut secus. Si recte; perperam me reprehendit. Sin secus; perperam me corrigit. Atqui recte scripsi. Nam poterat Speusippus Platoni vivo successisse. Argumento nobis sit Theophrastus, qui magistro Aristoteli, Chalcidem profugo, successit. Argumento Xenocrates, qui vivo Speusippo successit; teste Diog. Laërt. IV, 3. [68] Porro Crantor, vivis magistris, Cratete et Polemone, mortuus discipulum ipsi in Academia succedentem Arcesilaum reliquit; ibid. 27 — 29. Denique

---

\*) Conf. quae de hujus generis imperitia in priorē censura notavimus p. 37 et 38.

etiam Carneadi successit Clitomachus, quocum simul con-discipuli ejus, auditores ejusdem Carneadis, Aeschines et Charmadas, Academiam obtinebant: ut colligitur e Cic. De Or. I. 11, 18. Nec in scholarum, nec in regnorum success-ionibus, series ita constans est. Sed Censorem, ut idiotam, neutrius historiae gnarum esse, non miramur. Sanam sane mentem habere eum oportebat, hactenus quidem, ut videret, me prudentem et cogitantem ita scripsisse; quia nulla erat naturae necessitas, ut, succedente Xenocrate, jam Speusippus ejus successor, et hujus item decessor et communis magister, Plato obiisset. Ergo jam cogeri, mi censor, fateri, me recte scripsisse. Fac vero me scripsisse, ut tu jubes: *Platone ipsiusque successore Speusippo jam mortuis*, male scripsissem tuo ipsius judicio; quia scilicet hanc tui judicii rationem adfers, *nominato Speusippo non opus fuisse nomi-nari Platonem*. Viden' quam misere balbutias? Sed si quis tali ratione omnia ad vivum resecare velit, is non tantum in recentiorum virorum [69] doctorum scriptis, sed in ipsis etiam Veterum operibus sexcenta loca obelo notare possit. Quoniam vero hominem liberaliter educatum ita agere non decet, tenebriosis nostri exemplum non sequar, nec loca proferam, quamvis factu proclive sit, e quibus appareat, verum esse, quod modo dixerim. Interim tamen, silentio praeterire nequeo, dicamne negligentiam, an malum cen-soris dolum? Primarium censoris officium in eo cernitur, ut scriptoris verba, quae censoria virgula notanda sibi sumserit, accurate, et ut ab auctore suo scripta sint, de-scribat et apponat. At vero noster eranista verba mea cor-rupt. Ego enim ita scripsi: *Speusippo, ipsiusque decessore Platone, jam mortuis*. Nam voce *praedeccessore* Galli quidem utuntur, quorum scripta legerit noster censor: non vero bonae Latinitatis auctores, ad quorum exemplum ego ora-tionem meam accommodare studeui.

XVI. Subsequente animadversione homo pica loquacior impudentissime damnat, quae non intelligit. Scripsi diatr. meae p. 17: *quae sequenti capite exponere promisimus*. Noster autem Latinitatis magister, *scribendum est*, inquit, *sine ulla controversia*: Quae sequenti capite [70] *nos exposituros* pro-misimus. — Nonne jurares, ipsum cum lacte materno Latini sermonis cognitionem suxisse? Imo Latinas Literas

vix primis labris degustasse videtur. Sic enim Plant. Cistell. II, 2, 7: *Quia ei promisi dolium vini dare*. Et saepius: ut vel ex Lexicis discere poterat. Et polliceor ap. Ter. in Andr. III, 5, 7: *Quae modo pollicitus sum dare*. Porro ap. Ovid. Met. VII, 739: *Dum census dare me pro nocte promitto*. Sexcenties tempus praesens pro futuro ponitur: idque non solum apud poëtas, sed etiam apud optimos quosque prosae scriptores. Ut igitur ridiculus homo nodum in scirpo quae-rere desinat, velim inspiciat Vechn. Hellenolex. p. 265, et ibi Heusing.: J. Fr. Gronov. in Obs. Eccl. p. m. 150: Perizon. ad Sanctii Min. p. m. 110: Duker, ad Flor. I, XII, 9: Vorst. ad Justin. III, 6: Cortiumque ad Sallust. B. Jug. 14 et 87.

XVII. Nihil quoque sani, ex effato nimirum censoris nostri, in his diatr. meae verbis p. 36: „*Hic longa eaque praeclara oratione, qua juvenes ad virtutem admonuit, magistratum animos ita in se convertit, ut eorum rogatu aliis deinceps orationibus cives voluptatum illecebris [71] irretitos e luxuria ad frugalitatem revocaret.*“ Haec omnia homini, quo est miro ingenii acumine, displicent. Utitur sua qualicunque Critices facultate, tamquam machina, ad hunc locum omni vi subvertendum. Sed videamus ejus crisin. Primo loco animadvertit homo lynceus, pro *e luxuria* scribendum fuisse *a luxuria*. Quam docte! Formula, *revocare aliquem ab aliqua re*, vel pueris nota est. Attamen magnas, imo ingentes, ipsi gratias habemus agimusque pro sedulitate sua in corrigendo vitio typographico. Utinam modo ipse eandem curam in emendandis suis chartis adhibuisset! In diatriba mea legitur, *Hic*: at censor perperam edidit, *Hinc*. Porro *irretitos* mutavit in *irritatos*. Quod forte fecerit, ut Latinitatem aeneam deteriolem faceret. Deinde vero, ex ipsius sententia, iterum non cogitate scripsi. Disserit enim hoc modo: „*Ratio, cur Pythagoras cives ad frugalitatem revocaverit, non in eo quaerenda est, quod multum apud magistratus potuerit: sed quia plurimum apud hos valuit, factum est, ut hi ipsum rogarent, alias deinceps orationes habere: quibus orationibus demum ipsi tam felici esse contigerit, ut cives ad frugalitatem revocaret.*“ [72] Quam misere bonus interpres sese hoc loco cruciaverit, video: sed quaeritur, an verborum meorum sententia non satis per-

spicua sit; et huc redeat: „*Quum Pythagoras Crotona venerat, longam eamque praeclaram orationem habuit, qua juvenes ad virtutem adhortaretur. Hac oratione tantam apud magistratus gratiam consecutus est, ut ipsis rogantibus alias orationes haberet, quibus populum in luxuriam delapsum ad frugalitatem revocavit.*“ Jam igitur alii, me acutiores, judicent, an quidquam in his verbis sit, quod minus cogitate scriptum videri possit.

XVIII. Ne Latini sermonis ignorantia prioris censurae opifici cederet, silentio praeterire non potuit illa verba mea p. 56: *sunt autem alia adhuc loca.* Nam pro *adhuc* legi jubet, *etiam*. Vide, quae in priori censura p. 41. et sq. de hujus particulae usu et significatione dixi.

XIX. Quae sequitur notula, referenda est ad illa diatr. verba p. 89: „*Quae itaque doctissimi Perizonii sententia fuit, videamus.*“ Censor, indicativum ex oratione obliqua prorsus excludens, corrigit, fuerit. Frequentior quidem ratio ita postulat: atque ipse [73] jam ante hos duodecim annos sic correxeram, quamquam haud ignorabam, Indicativum usu exquisitiore se tueri: veluti his locis Ciceronis, Att. VII, 12: *sin discedit; quo, aut qua, aut quid nobis agendum est, nescio.* Senect. c. IV: *nihil est admirabilius, quam quomodo ille mortem M. filii tulit.* Amicit. c. XXV: *meministis, quam popularis lex de sacerdotiis C. Licinii Crassi videbatur.* Plura loca hanc ad causam apposuit Heusing. ad Cic. de Off. I, 7 et 26.

XX. Pergit censor et stilum et oculos in me intendere, ac librarii descriptoris errorem mihi tribuens laureolam fronti suae praeponere. Verum, o bone! *ὁράσον δὲ δεινὸν ὄμμα καὶ θυμὸν προῶς.* [Eur. Phoen. 457.] Quis enim non videt, in diatr. mea p. 219 pro ipse debuisse ipsum poni? At tu, non perspicuens, quomodo hoc pronomen commode cum hac sententia et constructione componi possit, graviter edicis, sic scribi debuisse: *me magis ut ipse discerem, quam ut alios docerem, animum ad scribendum appulisse.* Imo lenius et constructione servata, ponas ipsum.

XXI. „*Haec loca, sunt verba censoris, ea tantum de causa indicavi, ut constaret, Wytttenbachium inique et illiberaliter cum Stuitero [74] egisse, cujus oratio Latina ejusmodi est, ut ex ea magis, quam ex ista Mahnii, disciplinae*

*Wytttenbachianae alumnus agnoscere quas.* Hac de comparatione hujus censuræ opifex statuere nequit. Docti homines, qui Latini sermonis intelligentiam ex accurata veterum scriptorum lectione sibi acquisiverint, de me statuant. Censor quidem iste, qui non nisi ignorantiae, stuporis, et curtae ingenti sui suspectilis argumenta manifestissima ubique dedit, unus omnium ad judicandum ineptissimus est. Atque ea de causa tamdiu istius verba, ubi ait, „facile sibi fuisse, plura etiam vitia notare, modo diatriben meam censorio supercilio examinare sibi volupe fuisset.“ tamdiu, dico, haec istius verba, ut certissimam auctoris arrogantiae, aut malevolentiae notam prae se ferentia, susque deque habebō, donec fidem suam persolverit. Ad quam persolvendam, probe quidem scio, me addito vitiorum elencho, quae W. in Lect. And. intacta reliquit, eum quodammodo cogere posse: sed hoc a vitae meae instituto et moribus plane abhorret. Nolo discordiae tubam, quamvis provocatus, inflare. Nihil aliud quaero, nisi et a me amoliri, quae vitio mihi nefarie data sunt, et hoc agendo turpissimos [75] censorum errores Literarum nostrarum studiosae juventuti indicare. Porro Sluitero faveo, et, ut Deus O. M. ei stationem suam fortunet, opto. Quod nisi ita esset, haud magni sane laboris foret ostendere, Wytttenbachium potius indulgentem et conniventem, quam nimis severum, et, ut noster nimirum mirmillo ait, injustum censorem fuisse.

XXII. Quam late pateat in censore nostro malevolentiae vitium, sequentia nos docent. Ruhnkenius a scriptore Lect. Andoc. p. 26., ut plagiarius in conspectum Reip. literatae producit, quasi Valckenarii scrinia expilasset. Porro idem scriptor de Scaligero, Valckenario et Taylora parum modestè loquitur. Hujus rei causa indignationem Wytttenbachii in se convertit, ut apparet ex novissima Bibl. Crit. parte, p. 79, 91 et 98. Jam vero hanc protervitatem comparare non dubitat censor cum verbis diatr. meae p. 82: *nam quo jure scripserit nuper vir quidam doctus, hanc in Virum sapientissimum accusationem meram esse calumniam, Peripateticorum auctoritatem fallacem, ipsosque πολυτρόπων affectantes, de eo alii judicent.* Sed hanc comparationem et ineptam, et injustam esse, nemo non videt. Lect. Andoc. auctor laesit summorum in Literis [76] virorum manes:

ego neminem laesi. Idem ille velut e tribunali iudicat: ego iudicium meum in medium non protuli, sed aliis rem integram reliqui, ne praejudicio meo quemquam impedirem, quominus ipse libere iudicare posset. At quaerat fortasse quis, cur igitur scripsisti, *Vir quidam doctus*, nec potius *Vir summus Joh. Luzacius*? Primum, quia mihi non constabat, utrum illae, ut vocari solent, *theses*, e quibus haec verba mea repetita sunt, ex illorum juvenum officina prodissent, qui illarum defensionem in se susceperant, et quorum nomina in fronte uniuscujusque speciminis majusculis litteris expressa erant: an vero ipsum Luzacium auctorem haberent. Deinde, quia non necesse erat addere nomen. Nam quo quis est clarior, eo magis ipsius scripta eruditorum manibus teruntur. Denique honoris causa ipsi parcens Luzacio, qui reprehendendum istud iudicium de Peripateticis tulisset, ejus nomen potius reticendum, quam apponendum existimabam. Quid multa? Si Luzacium ut nullius pretii et auctoritatis homuncionem traducere voluissem, sine dubio eum non vocassem *virum doctum*, sed, ut censoris utar verbis, aut *terras filium*, aut *non neminem*, aut *nescio quem*. Videmus igitur nostrum hominem [77] rursus stuporem cum pari malevolentia et rerum ignorantia prodere. Certe pronomen *quidam* tali in compositione honeste, nec ulla cum significatione contemptus dicitur. W. v. c. Bibl. Crit. V. II. P. I. praef. p. VII. ita scripsit: „*Hinc est, quod vir quidam doctus moleste tulit, vitia quaedam libri ab eo editi commemorata esse.*“ At Wyttenbachius significabat *Brunckium*; quum alter alterum magni faceret, neque hoc iudicium dictumve quidquam ex mutua benevolentia imminueret. Nihil disertius est loco Ciceronis p. Cluent. 63: „*quidam ex advocatis, homo et honoribus populi ornatus, et summa virtute praeditus, intelligere se dixit, non id agi, ut verum inveniretur, sed ut aliquid falsi dicere cogerentur.*“ Similiter Acad. Qu. IV. 6: „*quidam e philosophis, et ti quidem non mediocres.*“ At si dixissem, *Luzacius quidam*, hoc demum contemptum et contumeliam habuisset, quod longe a meis moribus abest. Ita haec formula usurpatur in narratione de hominibus minus cognitis, et ne sic quidem semper contemptum significat: ut censor discere poterat ex Andr. Bosii Ind. in Nep. v. *Quidam*.

**XXIII.** Venio nunc ad locum, quæ nullum [78] unquam magis ineptum me legere memini. Rursus sua cornua noster Suffenus tollit. Sub crasso Boeotiae coelo sum natura iurares. Censorem priorem, quem subinde corripit et mirifice contemnit, hac in Latinitatis Wyttenbachiana reprehensione, ut communi causa, auctorem laudat, et adjicit quaedam in nota subjecta p. 593. de suis commentis: in quibus multo etiam turpiorem illo se dat. „LABORES, inquit, multitudinis numero a Veteribus vocantur, aerumnae, calamitates, aut simile quid. Haec significatio huic vocabulo SEMPER propria est.“

Miseret me profecto hominis tam inepte garrientis. Inhumanum puto sinere, ut diutius in tenebris versetur. Censorem censor, et per loca planissima incerto et titubante gradu repat: quem pro tituli magnificentia vel per ardua firmo pede incedere deceat. Accede igitur, ὦ νῆπιε! Exemplum tuum haud sequar, nec tibi solennem tuam cantilenam occentabo: Hoc, sit venia verbo, falsum est. Nimis durum hoc, nec ad veritatem perspicendam satis accommodatum mihi videtur. Nam, ut sapienter monet Herodotus, ὥτα τυγχάνει ἀνθρώποισιν εὐντα ἀπίστωτερα ὀφθαλμοῦν. [Herodot. ap. Wyttenb. in Sel. Princ. Hist. p. 2.] Itaque te potius manu quasi ducam ad ipsos Latinitatis fontes, ut [79] oculis ipse tuis cernere queas, quam ineptum te esse ostenderis. Quid? mene sequi non vis? obluctarisne mihi? clamitasne? „duce mihi non opus est; εἰδὼ μοι ὀφθαλμοὶ τε καὶ οὐατα καὶ πόδες ἄμφω.“ [Hom. Od. γ, 365.] Sit ita; habeas tibi; gaudeas naturam haec omnia tibi tam benevolè largitam esse. Sed quaero vicissim, an tibi etiam sit καὶ νόος ἐν στήθεσσι τετυγμένος οὐδὲν ἀεικῆς. Hoc si quo alio loco et tempore, certe in tota hac censura non ostendisti. Attamen bono animo esto. Noli de ingenii tui docilitate desperare, modo discere velis, et tibi persuadeas πρεῖτον ὀφθαλμῶν εἶναι, ἢ ἁμαθῆ. [Socrates ap. Stob. Serm. p. 201.] Jam hoc age. Substantivum LABOR, tam singulari quam plurali numero, penitur a Veteribus eo sensu, ut significet difficultates, calamitates. Testes tibi sint Virg. Aen. I. 460: Quae regio in terris nostri non plena LABORIS? Ovid. ex Ponto L. IV. 8: *Anxietas animi, continuusque LABOR.* Caes. B. Civ. III. 53: *et quum LABORIS sui periculique testimonium*



*referre vellent.* Rursus Virg. Aen. I. 601: *o sola infandos Trojae miserata LABORES!* IV. 18: *Iliacos iterum demens audire LABORES.* Cic. p. Arch. XII: *In his vitae periculis LABORIBUSQUE versantur.* Sed cave putes, eruditissime censor! [80] hanc esse unicam pluralis numeri significationem. Inspice Cic. De Sen. XI: *Semper enim in his studiis LABORIBUSQUE viventi non intelligitur, quando obrepat senectus.* Quo loco labores sunt ingenii exercitationes. P. Arch. XI: *neque quisquam tam aversus est a Musis, qui non mandari versibus aeternum suorum LABORUM, h. e. rerum gestarum, praeconium facile patiatur.* Tusc. Qu. I, 1: *Quum defensionum LABORIBUS, s. studiis fori, essem aliquando liberatus.* Brut. 69: *sic ille [Q. Arrius], cum omni jam fortuna prospere functus, LABORES, i. e. actiones forenses, etiam magnos excepisset.* Porro animadvertite ad locum Horatii, ubi de Getarum vivendi et agri colendi ratione loquitur, III. od. 24, 15: *Defunctumque LABORIBUS Aequali recreat sorte vicarius.* In hoc versu *Labores* nihil aliud significant, nisi *negotia ad agros colendos spectantia.* Reputa tecum verba Juvenalis, III, 21: *quando artibus, inquit, honestis Nullus in urbe locus, nulla emolumenta LABORUM.* Quae quum Satirographus scribebat, non tam de calamitatibus et miseriis, quam de doctrinarum studio cogitasse videtur. Tum quoque considera verba Plinii III. ep. I. II: *Interim mille [81] LABORIBUS, h. e. negotiis publicis, conteror.* Porro ubi idem scriptor de incredibili studio avunculi et assiduitate in literis colendis [III. ep. 5.] agit, *Haec, ait, inter medios LABORES s. occupationes.* Denique perpende sensum verborum Senecae De Brev. Vit. p. m. 216: *Omnis ejus [Augusti] sermo ad hoc semper revolutus est, ut sibi speraret otium.* Hoc *LABORES suos*, h. e. negotia sua, etiamsi falso, dulci tamen oblectabat solatio. — Praeterea vero, pro tuo stupore, non animadvertisti, Wytttenbachium id ipsum significare, hanc docendi scribendique operam laboriosam et molestam fieri, nisi argumentorum et materiae varietate exhilaretur et recreetur.

Porro quod ais, hanc periodum crebris sententiis ita refertam esse, ut aptam verborum constructionem facere haud possis, hoc plane indicat, te Grammaticen non perceptam habere. Si unum duntaxat Latinum scriptorem legisses, agnosceres constructionem per plures Ablativos

continuatam. Cujusmodi est ap. Cic. ad Att. I. 1: *Nos autem initium prensandi facere cogitaramus eo ipso tempore, quo tuum puerum cum his literis proficisci Cincius dicebat, in campo, comitiis tribuniciis.* Ibid. Ep. 5: *non dubito, quin tibi quoque id molestum sit, [82] cum et meo dolore moveare, et ipse omni virtute, officioque ornatissimum, tuique et sua sponte, et meo sermone amantem, affinem, amicumque amiseris.* II. 19. in fine: *Edicta Bibuli audio ad te missa. Iis ardet dolore et ira noster Pompejus.* Ibid. Ep. 22: *In caussis atque in illa opera nostra forensi summa industria versamur.* De Fin. B. et M. II. 19: *At quam pulchre dicere videbare, cum ex altera parte ponebas cumulatam aliquem plurimis et maximis voluptatibus, nullo nec praesenti, nec futuro dolore: ex altera autem, cruciatibus maximis, toto corpore, nulla nec adjuncta, nec sperata voluptate.* Ad Div. VII. 1: *His ego tamen diebus, ludis scenicis: ne forte videar tibi non modo beatus, sed liber omnino fuisse: dirupi paene me in iudicio Galli Caninii, familiaris tui.* Plin. VI. ep. 16: *Quamvis enim pulcherrimarum clade terrarum, ut populi, ut urbes, memorabili casu, quasi semper victurus, occiderit.* Alia etiam de hoc usu exempla notantem vide Cortium ad Ep. Div. XV, 3. Locus igitur Wytttenbachii et Latinus et perspicuus est. Sed ut certior fierem, an horum verborum constructio facta difficilis esset, periodum exercitii causa discipulis quibusdam meis proposui: nec quisquam sane illorum fuit, qui vel minimam difficultatem animadverteret. [83] Ad unum omnes mihi locum ita constitutum reddiderunt: „*Agnovim et honestatem caussae: promisi me Bibliothecam Criticam materiam scriptionis sumturum, si quando, ut fieri solet, defatigatus aut perpetuitate Plutarchei operis, aut satietate aliorum studiorum, novitate materiae et variandis vicibus laborum animum vellem recreare alia scriptione.*“ In quibus igitur verbis ne quidem discipulos scholasticos quidquam impedit, quominus aptam verborum constructionem facere queant, in iis laborare Bibliothecae Criticae Censorem! Apage ad monachos Tuos, qui hoc saltem te docebunt!

XXIV. Iterum alio loco severissimum Latinitatis iudicem inter malleum, ut ajunt, et incudem esse videmus. Nescit Criticus, utrum Bibl. Crit. p. 47. l. 3. particula quam referenda sit ad superiora illa *argumentum aliud*, an vero ad

proxime antecedens *utilius*. Quaerime, qui hoc fieri possit? Ratio in promptu est. Aut in illorum numero habendus est Censor, qui turpe putent, quae imberbes didicerunt, seniores, non dico *perdenda*, sed *adhibenda* fateri: aut plane oblitus est, quae in prima pueritia didicerit. Nam jam diu esse videtur, quod apud magistros suos, si quos [84] habuit, verborum analysin, seu, ut pueri vulgo in scholis loquantur, *partes* facere desierit. Ne itaque Aristarcho nostro scrupulus amplius restet, auctor ipsi sum, ut illud *quam* ad *argumentum aliud* referat, quoniam propter sequens pronomen *illud* nullo modo ad *utilius* referri potest. Nam *ro utilius* non est comparativus positivi *utile*, sed adverbium comparativi gradus, a positivo *utiliter*. Adeo multa sunt, quae ignorat Bibl. Criticae Censor!

XXV. Restat ut videamus de scribendi ratione Nominum Propriorum. — Hic rursus vitio creatus Censor cum suo supercilio caecutit, et locum cum loco, titulam cum perpetua oratione confundit. In titulo licet nomen hodierno et vulgarimodo ponere; modo praenomen Latine terminetur: veluti in Callimacheae ed. titulo fecit Ernestus — *notas suas adjecit I. A. Ernesti*: item Valckenarius in Phoenissarum ed. — *L. C. Valckenaer*: itaque homines non inelegantes solent. Licet etiam, imo oportet, ubi diserte declarare volumus, quomodo is, de quo agimus, vulgo nominetur. Exemplo nobis sint verba Wyttenbachii ex hac novissima Bibl. Crit. parte p. 161: *De quo emit nobilissimus vir J. CLEAVER BANKS*. At [85] in perpetua oratione, vel prosa vel ligata, quis unquam ex hodiernis puritatis et elegantiae studiosis, nomen, praenomen, cognomen, alia quam antiqua terminatione posuit? praesertim si hominis, de quo loquimur, nomina jam aliunde satis cognita sint. Haec et alia nos olim in Wyttenbachii schola audivimus. Sluiterus autem hujus praecepti aut immemor aut negligens fuisse videtur: qui sic non semel, sed saepius scripsit: v. c. p. 115: *Reiske mavult εἰρη.* ibid. ut conjecit *Reiske*, item p. 114: *cum Reiskio consentit Valckenaer*. porro p. 115: *Valckenaer malebat*, p. 121: *mutari mavult Valckenaer*: p. 71, 106, *Taylor*. p. 103, *Markland*. item p. 108, 116, et alibi. Quas ista non offendant Latinas aures? At non Censorem: qui nec Latinitatis

sensum, et aures crassas potius longasque, quam teretes et acutas habet.

XXVI. Sed finiamus disceptationem, quam ut suscipere-mus, fecerunt cum supra memoratae rationes, tum quoque imperitia et iniquitas Censorum, Censuram Andocidae libelli in Bibliotheca Critica proditam iniquissimam esse clamantium. Qua profecto, si quid video, nihil aequius excogitari potest. Quod quo certius constet, rem paucis explicabo.

[86] Necesse fuit, ut W. illi libello aut locum daret in Bibl. Critica; aut non daret. Non dare non poterat, qui condiscipulorum libellis dedisset. Si daret, debebat vere, diligenter et integre judicare, id est, in utramque partem, ut et laudanda laudaret, et reprehendenda reprehenderet. Itaque fecit. Sed, inquit Censor, in condiscipulorum libellis nil reprehendit; haecine non est iniquitas? Non est, o bone! nihil erat quod reprehenderetur. Caverant ne esset: ergo si reprehendisset illos, tunc iniquissimus fuisset, qualis tu es erga W. Hujus in Latinis Literis et Historia discipulum se profitebatur Sluiterus: in Graecis unius Luzaci, eundemque et studiorum et libelli edendi auspicem praedicabat. Hujus igitur erat purgare, non propriis onerare erroribus, libellum. Quem si discipulus nondum editum Wytttenbachio ostendisset, nec ab ejus cognitione sedulo cohibuisset, hic, qua est humanitate, de erroribus eum vere et candide moniturus erat. Editum libellum legens, dolebat discipulo tam multa temere dicta excidisse: magnos viros subinde contemtim haberi et Luzacio postponi, mirabatur, et juventutis novitatem pietatemque officientem judicio, interpretabatur: in [87] Ruhnkenium vero plagii crimen conjici vehementer indignabatur, idque a Luzacio vel positum, vel admissum ac probatum, qui Ruhnkenio unice cathedram Graecam et alia beneficia deberet, conviciumque a se impune latum speraret, nec vindicem metueret, si neminem alium, certe Vitae illius scriptorem. His et aliis de causis, supra memoratis, judicavit, maledicentium errores non esse dissimulandos. Ergo notavit eos, et leniter, nec exagitavit. Et nisi notasset, in suspicionem malevolentiae vel negligentiae apud multos incidisset, Graece Latineque doctos, suspicantes eum non cavisse, quominus libellus sibi antea, ut discipuli, ad inspiciendum corrigendumque datus,

sic affectus in publicum protruderetur. Huc accedebat, quod ipse W. p. 94. ait: „*quod ipsius in Literis Latinis et stilo institutione se usum profitebatur Sluiterus*,” ut haud temere quis Wyttenbachii silentio in eam opinionem induceretur, eum Latinitatem libelli Andocidei totam probare.

Jam ergo satis dictum est, ut censores intelligant, Wyttenbachii censuram aequam et doctam fuisse: suam, utriusque quidem, iniquam et indoctam, alterius autem istius *Censoris Censorum*, longe iniquiorem et indoctiorem, et [88] praeterea pueriliter superbam. His ego auctor sum, ut censendi munus deponant, nec antea factitare audeant, quam in Wyttenbachii schola ad Graecarum Latinarumque Literarum cognitionem, et judicandi facultatem profecerint. Utinam vero interim, erroribus suis convicti, hoc Sophocleum memoria percipiant: *Κεῖνος οὐκέτ' ἔστ' ἀνὴρ ἄβουλος οὐδ' ἄνολβος, ὅστις ἐς κακὸν Πέσων, ἀκεῖται, μηδ' ἀκίνητος πέλει.* [Sophocl. Antig. 1041.] Nam sic se gerendo omnium optime sane cavebunt, ne quis merito in ipsos transferenda dicat verba Senecae Ep. XXXIX: *Tunc consummata est infelicitas, ubi turpia non solum delectant, sed etiam placent: et desinit esse remedio locus, ubi, quae vitia fuerant, mores sunt.*

EPISTOLAE  
DANIELIS WYTTENBACHII  
ET  
LAURENTII DE SANTEN  
AD  
ERNESTUM THEODORUM LANGERUM  
BIBLIOTHECARIUM GUELFERBYTANUM  
SCRIPTAE.

---

*L e c t o r i S.*

Quae summus Lessingius anno MDCCLXXIV inscripsit  
philothecae beati Langeri,

*Omnis Aristippum decuit color et status et res,*  
ea verissime applicuit ad virum longo varioque vitae usu exercitatum et edoctum. Qui enim strenuum militem egerat, qui publicas res non sine laude tractaverat, qui juvenum nobilium principumque institutioni et peregrinationibus summa cum dexteritate praefuerat, eundem Langerum jam videmus amicum et doctum confabulatorem doctissimi Wyttenbachii. Quam dignus autem vir ille fuerit tali amico, et alio loco dicendi erit occasio et literae ipsius essent ostensurae, si exstarent. Has autem Wyttenbachii epistolas [quas solas e diuturno horum virorum commercio literario superesse dolemus] edendas putavimus, tum quod ingenium animumque Wyttenbachii egregie declarant, tum quod perspicue docent, causas invidiae, quam inter Batavos Germanosque per aliquod tempus obtinuisse vidimus, non in solis Batavis, sed magis etiam in iis viris esse quaerendas, quorum cupidissimos laudatores nosmet ipsi superrime experti sumus. Cumque alii protraxerint e bibliothecarum latebris, quae contra Batavos facerent, quidni nobis ea proferre liceat, quibus causa illorum probabiliter defendi posse videatur?

*Frid. Adolfus Ebert,*  
bibliothecarius Guelferbytanus.

*Langero suo S. P. D. D. Wytttenbach.*

Tandem illuxit feriarum tempus exoptatissimum illud mihi cum aliis nominibus, tum in primis tuo. Cave enim putes, silentium meum profectum esse a vindictae studio, quo tibi par pari rependerem: quod quidem longe abest ab animo meo tui amantissimo. Sum homo paucorum hominum, et ex his paucis tu mihi unus es. Itaque saepius in tui memoriam rediens, literas tuas relegi, veluti praesens cum praesente egi, neque eas fere deposui ex manibus, nisi cum desiderio tui et reprehensione tarditatis meae. Ceterum obrutus negotiis et amicitia tua fretus, respondendi officium in feriarum otium distuli: quod simulac venit, nil mihi prius fuit quam ut hanc epistolam scriberem. Cupio te, amicissime Langere, et valetudine et fortuna uti digna ingenio animoque tuo: quod si per me fieri possit, omnia velim a me et postules et exspectes. Valetudini quidem ipse consulens ratione ac prudentia: fortunam vero lautissimam tibi praestabit commendatio doctrinae tuae vel apud exteros vel apud Principem tuum, si quidem vere ingeniorum fautor perhibetur. Videris mihi in honestissimum delatus esse portum, ubi nil requiras eorum, quibus hominis literati felicitas continetur; modo ne corporis intemperies aut coeli inclementia <sup>1)</sup> turbet animi tranquillitatem. Semper mihi placuit illud Pythagoricum: *ελοῦ βίον τὸν ἀριστόν, ἡδὺν δ' αὐτὸν ἢ συνήθεια ποιήσει.* Atqui praesens tuus status est *ἀριστός*: hoc si tu ipse judicaveris et firmiter apud te constitueris, *συνήθεια* quoque accedet et voluptatem.

<sup>1)</sup> De coeli Guelferbytani inclementia et inconstantia acerbissime conqueri apud amicos solebat Langerus. E.

adferet. Sed quid ego haec ad te, hominem rerum scientia et usu praestantem? Quare me converto a Pythagoreis ad Stoicos, quorum est praeceptum, ὁ δοφὸς γαμήσει. Magni est ad vitae suavitatem momenti, habere sociam quacum omnia tibi sint communia et in cuius quotidiana consuetudine acquiescas: in primis in ea urbe, ubi propter hominum paucitatem non possis delectum facere eorum, quibuscum juncunde tempus transigas. Est in vicinia tua mulier, de qua nescio an aliquando collocuti simus: *Reiskiam* dico, in qua videntur esse omnia, quibus conjugii felicitas censeatur, tuo praesertim loco et statu. Haec profecto doctrinae, ingenii et laudis dotem tibi adferet: fortasse quoque nonnihil bonorum. *Bona* dico non Stoicorum sensu, sed ex vulgari consuetudine: neque enim *Reiskia* omnia sua secum portare nec ita nuda ex *Reiskii* naufragio enatasse videtur. Tunc igitur, inquis, caelebs me ad matrimonium compellis? Ego vero caelebs hucusque degi, non eo animo, ut decreverim nunquam uxorem ducere. Immo nondum inveni, cui vere dicerem, *Tu mihi sola places*: quam quidem simul atque invenero, faciam quod nunc te moneo. Omnino de *Reiskia* ipse cogitaturus eram, si me Deus alicubi Germaniae honesta in conditione vel tuo in loco constituisset <sup>2)</sup>. Καὶ τὰυτα μὲν δὴ τὰύτη. Venio ad reliqua epistolae tuae capita.

Libellum logicum <sup>3)</sup>, de quo scribis, et Bibliothecae Criticae partem sextam accipies; quam primum opportunitatem nactus fuero; nam publico vehiculo ea tradere nolui. Jucundum mihi fecisti, quod scripsisti

<sup>2)</sup> Amici monitis morem non gessit Langerus, qui caelebs obiit d. 24. Febr. 1820 anno aetatis septuagesimo septimo. E.

<sup>3)</sup> Praecepta philosophiae logicae. Amst. 1781, 8. E.



de censuris disputationis meae in Novellis Germanorum literariis. Lego Gottingenses Ephemerides et Bibliothecam Universalem Berolinensem; sed in neutris quid erat hujus rei. Gottingenses quidem nescio quomodo abinent a meis scriptis recensendis. Nil de Plutarchi libello dixerunt. Postea, edita prima parte bibliothecae criticae, eam Heynio misi rogans, ut ejus mentionem faceret, quo magis libelli notitia per Germaniam vulgaretur. Secuta est recensio et indocta et iniqua, quae quidem vel auctorem vel suasorem Heynium habere non potuit <sup>4)</sup>. Ab eo tempore nec quaesivi nec curavi istam laudis fabricam.

*Herodiani* elegans est dictio, historia minus diligens et sine temporum notatione, aliis tamen laudibus excellens. Ejus editionem susceperat *Leisnerus*, *Ernesti* discipulus, sed diu ante magistrum mortuus <sup>5)</sup>. Operae pretium faciat, ut vere dicis, qui hanc provinciam bene administret. *Xenophontis* lectionem tibi multum voluptatis adferre minime miror; jam quoque suavitatem ejus facilitatemque, gustata *Plutarchi* dictione, magis et intelligis et percipis. In *Zeunio* neque ingenii neque doctrinae multum inest: nec tamen nullo habendus est loco; quippe aliquem usum Atticae proprietatis tenet <sup>6)</sup>. De Cyropaediae editione

---

<sup>4)</sup> Vid. Gött. gel. Anzeigen 1777. Vol. II. p. 1162 - 65. Qui inspexerit librum, fatebitur, aliter vix statui posse de illa recensione, quam statuit Wytttenbachius. Nec melior est, quae legitur 1778. Vol. II. p. 1024. Quis fuerit auctor utriusque censurae, id quidem indagare non est operae pretium. *Heynii* certe erat, malevolas has nugas non admittere. E.

<sup>5)</sup> *Leisnerus*, qui scholam S. Thomae dicatam apud Lipsienses regebat, obiit anno 1767. Extat ejus prolusio scholastica de *Herodiano Herodianique versione Bergleriana*. Lips. 1761, 4. E.

<sup>6)</sup> En quo jure Batavi dicantur a nostratibus iniqui rerum nostrarum judices et censores. Longe inclementius judicium de *Zeunio* tulerunt alii, nihil fere meritorum ipsi relinquentes. E.

ab eo facta dictum est Bibl. Criticae P. V. quam tu habes: in ejus animadversionibus plus est obscurae diligentiae quam bonae frugis. Antea ediderat *Vigeri* librum de idiotismis cum notis *Hoogeveni*, quem saepius reprehendit. Has reprehensiones diluit *Hoogevenus* libello superiore anno edito <sup>7)</sup>, quo *Zeunii* stuporem et plagia tam manifeste exposuit, hominem adeo belle depexuit et exornavit, ut necesse sit, eum, si modo quidquam residui habeat pudoris, nil editurum, priusquam multum legendo discendoque copiolas auxerit.

*Ruhnkenius* noster epistolas criticas, quas juvenis ad *Valckenarium* et *Ernestium* scripsit, nunc auctiores edit, ut Homérico hymno in unum adjungantur volumen <sup>8)</sup>. *Valckenarius*, nescio quo fato, ab edendo *Xenophonte* ad conscribendam Diatriben in fragmenta elegiaca *Callimachi* traductus est, qua diatribe *Ernestus* et multi Germani male accipiuntur, multa etiam alia dicuntur, quae jam nec ipse probet. Igitur opusculum inchoatum reliquit, quum ejus fere centenae paginae typis essent descriptae <sup>9)</sup>.

De rebus civilibus bellicisque dudum est quod sollicitus esse desii, nec enim sine dolore de iis cogitare possumus, nec dolendo proficimus. Tu, ut omnia, prudenter mones. In hoc dissentio, causam male administratae rei publicae positam esse in morum perversitate. Neque enim Belgae magis corruptis sunt moribus quam alii populi, quorum res publicae melius

<sup>7)</sup> J. Car. Zeunii animadversiones in Fr. Vigeri de praecipuis graecae dictionis idiotismis librum, ad justam examinis lancem revocatae ab H. Hoogveen. Lugd. Bat. 1781, 8. E.

<sup>8)</sup> Cf. Wytenbachii vita Ruhnkenii p. 162. ed. Lindemann. E.

<sup>9)</sup> Opus tamen postea in lucem prolatum est Lugd. Bat. 1799, 8. curante Joanne Luzac. E.

gerantur. Doleo, *Borrelium* optimum virum in haec tempora incidisse. Nullam in illo fuisse negligentiae culpam, vel hoc est documento, quod negotium nunc non diligentius agitur.

Alumnum tuum non vidi, sed tamen mea opera factum est, ut *Tollio* in domesticam disciplinam traderetur. Nam *Borrellii*, tandem pertaesi successoris tui a *Frisemanno* commendati, aliud quaerebant, et *Tollius* abeunte ejus priore alumno alium quaerebat: itaque accepit conditionem, ut *Bickerulus* cum novo paedago (qui est Gallicus theologiae candidatus et ab ipso *Tollio* hunc in locum constitutus) in convictum et contubernium reciperentur, tribus millibus florenis. Paedagogus praeterea stipendium accipit a *Borrellio* nescio quantum. Ceterum *Tollius*, quem nuper vidi quique salutem mihi tuo nomine ex tuis ad *Bickerulum* literis nunciavit, *Tollius* igitur magnopere puerum laudat ab ingenio et diligentia. *Frisemannus* non in Helvetiam proficiscetur, sed primum quodque munus scholasticum consecrabitur, et cum sua *Glycerio* apud nos manebit. Audio *Rendorpium* ei fidem dedisse suam, se eum in hoc genere provecturum. *Wagnerus*, quem tu aliquando a me rogatus *Borrelio* seniori commendaveras, sub finem aetatis huc veniet in suscipiendum munus paedagogi domestici. Hic aliquot odas latinas in pugnam navalem superiori anno Batavos inter et Britannos patratam et in *Ben-tinckii* obitum composuit, Principi Arausiensi inscripsit, ad eumque et ad Ordines foederati Belgii misit. A quibus num quid responsi tulerit, nescio, atque adeo dubito. A rege vero Borussiae, cui item exemplum odarum miserat, ei responsum est per literas, quibus nil humanius excogitari potest.

Catalogum *Gudianum* nondum vidi. Si quid

Bibliotheca vestra habeat *Plutarcheorum* codicum, ejus mihi usum concedi vehementer cupiam. Quare tu, qua es humanitate, proximis literis mihi significabis, quid quantumque in hoc genere habeatis: qua ratione conditioneque *Brunckius Zeuniusque* codicum illorum copiam nacti sint: qua et ego via ad eam rem pervenire possim. Tu vero: suavissime *Langere*, si majus otium nactus fueris, ipse aliquid in his literis edas, veluti lectiones \*) in *Lucianum* ex codice vestro, vel simile quid. Non dubito, quin majorem ex *Luciano*, quam ex *Xenophonte*, voluptatem percepturus sis: et, si forte mea tibi opera utilis in eo negotio videatur, eam a te desiderari non patiar. Quid fit *Ciceronis* operi de officiis ab *Heusingero* quondam edendo? quod quidem institutum ne irritum fiat, quaeso provideas auctoritate, qua te apud illos homines valere credibile est: magnopere tibi gratam doctorum hominum voluntatem adjunges. Miror *Heusingeri* vitam a nemine adhuc scriptam \*\*) esse: magis etiam miror, neminem etiam nunc Germanorum *Ernesti* elogio animum adjecisse <sup>10)</sup>.

*Brunckius*, *Sophocle* paululum seposito, *Aristophanis* editionem aggressus est; ejus mihi nuper misit tria volumina, quibus nova ab ipso facta latina versio continetur. *Augerus*, abbas *Parisiensis*, *Isocratem* edidit, quem propediem nanciscar. Ejus sunt quae-

\*) Has lectiones codicis neque a *Fabricio* in *Bibl. Gr.* commemorati, neque ab *Hemsterhusio*, *Reitzio* aut *Lehmanno* consulti mox publico usui aperiet *Friedemannus*. E.

\*\*) Scripsit eam *Christianus Leiste*, *Heusingeri* in praefectura scholae Guelpherbytanae successor, a. 1788. pp. 21. 4to. E.

<sup>10)</sup> Dum haec scribebat *Wyttenbachius*, prodierat *Baueri* libellus optimus de formulae et disciplinae *Ernestianae* indole, *Lips.* 1782, 8. E.

dam exempla quartae formae, adeo splendide expressae, ut exemplum CXX libris constet, licet non nisi duobus contineatur voluminibus. *Haynii Apollodorus* nondum ad nos delatus est.

Tu quidem, mi *Langere*, vale, tibi quae persuadeas velim, paucos esse, qui me tui amore vincant. Quare noli committere, ut paucitate tarditateque literarum tuarum de amore erga me tuo dubitare incipiam. Ego me tibi in posterum ad scribendum alacrem praestabo. Vale, et proximis me literis de *Plutarcho* bea. Dab. Amstelædami a. d. 12. Jul. 1782.

P. S. Quum *Reiskiae* respondendum esset de vita Mariti librum edere cogitanti, cujus rei causa ad me scripserat, cum ejus mentione tum vicinia tua invitatus, utor opportunitate. Tu, quae es humanitate, efficies, ut haec literae ad eam perveniant.

*Langero suo S. P. D. Daniel Wytttenbach.*

Quo tandem fato fieri dicam, optime *Langere*, ut proximis tuis literis non promptiorem me praestem responsorem quam superioribus, quum is meus erga te sit amor, ea fuerit voluntatis inductio, ut crebris literis suavitatem tuam repraesentarem, nec fere sint, quibus magis delecter, quam tuis ad me scriptis? Ceterum ut Logici nostri ajunt, similes causas esse similium eventuum, ita nunc quoque factum est, ut per totum hibernum tempus ad literas scribendas ne accedere quidem liceret, quamvis miro tui desiderio affecto; et eo ipso die, quo Deus mihi otia facit magnarum feriarum, primum mihi est officium scriptio literarum, in iisque adeo primae sunt tuae. Te non

satis valere quantum mihi dolorem attulerit, facile estimabis pro meo erga te amore. *Θαρδαιν γὰρ, φίλε Βάττε· καὶ αὐριον ἔδωκε δμεινον.* Omnino, quoad ego naturam tuam perspicere potui, ita judico, certissimam tibi medicinam paratam esse in ea animi voluptate, quae ex intento quodam studiorum genere existit: veluti nunc, quum graecis literis ita operaris, ut omnia tibi reliqua prae iis sordeant. Ego ipse memini, me juvenem ejusmodi corporis languore et animi ἀδνημονία confectum ad graecas forte literas delatum ita iis vehementer adhaesisse, ut eas numquam dimitterem et aliquantum etiam in iis proficerem. Tu ergo fortiter in instituto persistes; nam quod ais te esse proveciori aetate, quin multum profecturus sis: hoc vero nihili est. Magis etiam proficitur, quo major est rerum aliarum usus majusque judicium; modo absit illa studii intentio, quae ut est rara vulgo in hac aetate, ita in te est maxima. Nil dico amplius de matrimonio: hoc *δεῶν ἐν γυνάσσει καίται.* Ego ceterum adversa per annum continuum valetudine conflictatus, quod superest a scholis habendis tempus partim in *Plutarcho*, partim in Bibliotheca critica pono. Hujus libelli duas partes ultimas cum logico compendio et aliis dudum ad te misissem, si mihi adfuisset opportunitas alia quam plaustrum publici. Librarii nostri nonnisi cum Lipsiensibus vel Francofurtanis agunt. Ergo tu mihi significabis, an tanti hos libellos putes, ut eos publico plastro ad te pervenire velis. Interea dum de tua voluntate mihi constet, utar oblata occasione. Mense Aprili victoriam retuli apud iudices Societatis Teylerianae nuper Harlemi constitutae, scripta disputatione de sententiis veterum philosophorum in loco de animo-

apud eum habitat, cujus habitationis mercedem lautam esse arbitror. Cogitat etiamnum de *Dionysio Periegete* edendo <sup>14)</sup>. *Ruhnkennii* novam epistolarum duarum criticarum editionem prodiisse, non dubito quin aliunde jam intellexeris. De his et multis aliis tibi *Gervinus* noster narrabit, qui vel ante ad te veniet, quam Gottingam viderit, vel postea e frequentibus Gottingâ excursionibus unam tibi dabit. Ergo nec de rebus vel civilibus vel bellicis nostris scribere juvat, quippe de quibus ne cogitare quidem cum voluptate possum. Legi censuram Gottingensium dialectici mei libelli <sup>15)</sup>: dicerem, censores nec bonas nec malas ejus partes satis intellexisse. Neque me istorum judicium deterrebit, quin aliquando metaphysicam partem et historiae philosophicae compendium edam: modo mihi otium et vita constet. Nunc ut muneri satis facerem, physicas mihi habendas scholas constitui in proximum cursum, quas numquam antea habui. Tu, optime *Langere*, in unis graecis literis omnem vitae suavitatem, omne laborum et taediorum solatium ponas <sup>16)</sup>: ita minime dubito, quin ingenio studioque tuo ad primariam in hoc genere laudem perventurus sis. Interea si quid superest temporis, velim mihi conficias collationem vitae Homeri, cujus exemplum typis expressum invenies in editione *Ernestina* et *Galei* opusculis physicis et ethicis. Vale,

<sup>14)</sup> Hoc quidem eum perfecisse non reperio, sed edidit *Avieni* descriptionem orbis terrae. Amst. 1786, 8. et annotat. critt. in nonnulla scripta antiqua. Amst. 1782, 8, abjecto etiam *Geographorum Minorum* edendorum consilio. cf. *Bredowii* Epp. Paris. p. 33 et 257. E.

<sup>15)</sup> Vid. Gött. gel. Anzeigen 1782. T. I. p. 505-508. E.

<sup>16)</sup> Ne quis hoc consilium miretur, tenendum est, accommodasse se *Wytenbachium* ad genium *Langeri*, quem probe notum et perspectum habebat, E.

optime *Langeri*, mihi que fave. Dabam Amstelæ-  
dami, a. d. 1. Jul. 1783.

*Laurentii Santenii epistola ad Langerum.*

Monsieur,

C'étoit avec un plaisir extrême, que j'appris par votre lettre à notre ami *Gervinus* que vous me veuillez du bien, et que vous ne vous refusiez pas de m'être d'utilité, où vous le pouvez. Sur ce fondement j'ose m'adresser à vous avec assurance et sans préambule, et vous prier que vous veuillez avoir la bonté de faire copier pour moi tous les manuscrits de *Catulle*, de l'un bout à l'autre, que votre bibliothèque Ducale possède. Je comprends fort bien, que cela n'est pas l'affaire d'un jour; mais d'abord l'affaire ne presse pas tant, puisque je ne pourrai penser durant une année à travailler sur ce poète; secondement vous aurez peut-être quelque peine à trouver sur l'endroit un bon copiste. Je souhaite, comme vous pouvez penser, que la copie soit exacte et très-lisible, et qu'on s'y prenne avec le papier de sorte, qu'en laissant une marge à la copie, je puisse la faire rogner après qu'elle sera reliée. Les conditions, les payemens, soit une fois en entier, soit par portions, je laisse tout cela à votre arrangement; quand vous tirerez sur moi, je payerai; je sais, que lorsqu'on veut avoir de bon ouvrage, il faut bien payer, et quoique je ne suis du tout pas riche, j'aime à sacrifier tout à mes études favorites. Ce qui presse un peu d'avantage, c'est que je souhaiterois que vous me fassiez collationner dans l'espace de trois mois l'épique



de *Catulle*, que j'enfermerai dans cette lettre, avec tous les manuscrits que vous avez; dont les variantes pourront bien se ranger, je crois, sur cette feuille de papier et sur sa marge, surtout si l'on denote chaque manuscrit par une simple lettre. Par cet échantillon je pourrai en même tems un peu juger de la bonté de vos manuscrits, quoique celle-là n'y fasse rien et que je n'en souhaite pas moins d'en posséder une copie entière de tous. Pour le *Propertius* je ne vous importunerai pas à présent, et du *Tibulle* je compte que Mr. *Heyne* aura tiré tout l'or qu'il y eut dans votre bibliothèque <sup>17</sup>). Toute la notice, que vous pourrez jamais me donner sur l'histoire de ces manuscrits de *Catulle*, me sera toujours la bien venue; d'où ils sont venus, par quelles mains ils ont passé, si vous en trouvez des traces. J'ai appris par le livre de *Burckhardt* <sup>18</sup>), que *Nic. Heinsius* a fait présent de quelques bons exemplaires, qu'il apportoit de l'Italie, au Duc; mais je compte qu'il aura gardé les *Catulles* pour lui-même, du moins je possède son meilleur, dont *Charles Dati* lui avoit fait présent. Je suis aussi curieux, si vous possédez de très-anciennes éditions de *Catulle*, comme la première de toutes de 1472 et celle de 1474 de Jenson, et s'il n'y a des notes inédites de savans modernes sur mon poëte parmi vos trésors <sup>19</sup>). Comme j'ai cru m'ap-

<sup>17</sup>) Ille quidem tempore id nondum factum erat. Guelferbytanis codicibus in tertia demum Tibulli editione usus est. *E.*

<sup>18</sup>) *Historia bibliothecae Augustae. Lips. 1744. 4. T. I. p. 115. E.*

<sup>19</sup>) Habet bibliotheca Guelferbytana tres codices *Catulli*, eosque membranaceos, sed satis recentes. Unus enim est seculi 15. exeuntis, ceterique duo seculi 16. ineuntis. Editionum typis expressarum, quae sunt in eadem bibliotheca, antiquissima est

percevoir que vous n'aviez pas encore d'exemplaire du *Properce* de Burman, je prends la liberté de vous en offrir un, que je vous ferai passer par la première occasion que l'ami *Gervinus* m'indiquera, et comme je sais que vous faites cas de la poésie en général, je vous présente cette feuille des *Deliciae* <sup>20)</sup>, que je viens de donner au jour. Je vais me mettre à présent à donner une nouvelle édition du petit commentaire de *Probus* sur les églogues de *Virgile*, et de quelques corrections dans le *Terentianus Maurus* <sup>21)</sup>, mais je ne crois pas que votre rotonde, par laquelle l'ami *Lessing* m'a conduit autrefois, en fournit des manuscrits, ni de l'un ni de l'autre. Il doit y avoir de très-bonnes notes de feu Mr. *Heusinger* sur les offices de *Cicéron*, et son traité de la veillesse et de l'amitié. Si l'on étoit enclin de me les envoyer ici, je me ferai un vrai plaisir d'en faire soigner chez nous l'édition sous mes auspices et ceux de Mr. *Ruhnkenius*, et d'autant plus que je possède moi-même un manuscrit des deux derniers traités, dont j'y pourrais ajouter la collation. Vous ne douterez, j'espère, Monsieur, que si je pourrais vous être à mon tour de service, vous n'auriez qu'à disposer; que vous m'y trouveriez prêt si bien par goût que

---

ea, quae Venetiis per Andream de Paltasciohis a. 1487 in forma maxima prodit. Observationes notaeque ineditae virorum doctorum in Catullum nullae adsunt. E.

<sup>20)</sup> *Deliciarum poeticarum Santenii octo fasciculi editi sunt Lugduni Batavorum, 1783-94, 8.* E.

<sup>21)</sup> *Probi* quidem, quod equidem sciam, nihil unquam prodit. *Terentiani Mauri* editionem affectam quidem, sed non perfectam reliquit. Excudebatur illa in forma quarta, sed vix ducentenis paginis e prelo sublatâ anno 1798 mors Santenium eripuit incepto operi. Cf. *Wyttenbachii* de ejus obitu narrationem in *Bibl. Crit.* XI. p. 133. et *Opusc. T. II.* p. 80. E.

par reconnaissance, et que c'est avec la plus haute  
estime et sincérité que j'ai l'honneur d'être

Monsieur

Leide, ce 1. de Juin 1783.

votre obéissant serviteur

*Laurent van Santen.*

P. S. Si vous avez besoin d'un libraire en Hollande, je vous  
recommande *Koenig* ici à Leide, comme fort honnête  
et diligent. Il fait aussi venir des livres de l'Italie,  
comme le *Forcellini* lexicon etc.

D. W Y T T E N B A C H I I  
E P I S T O L A

A D

AUG. MATTHIAE, V. CL.

GYMNAS. ALTENBURG. DIRECT. ETC. ETC.

*Augusto Matthiae eruditissimo viro*  
*D. Wytttenbach. S.*

Munus tuum, optime Matthiae, cum tuo nomine, tum  
sua praestantia gratissimum mihi accidit. Nam ut  
antea semper tuum erga me amorem praesens prae-  
sentis amavi, sic eum a Te absente, per tantum tem-  
poris locique intervallum, integrum illibatumque serva-  
tum esse, ut ejus etiam publicum documentum pro-  
deres, id vero, si quid umquam aliud, ex animo  
laetatus sum. Doctrina autem tua quum nec antea,  
tempore illo tuo Amstelodamensi, mihi obscura esset,  
tum eam incredibiliter auctam cumulatamque ex hoc

libro cognovi; quamquam et magnos ejus progressus interea ex Miscellaneis tuis Altenburgensibus agnovi; quae tuo, opinor, beneficio ad me delata, ac memorata in Bibliothecae nostrae Criticae Vol. III. Part. III. p. 113, ego dira ista hujus urbis clade die XII. Januarii cum aliis libris amisi. Sed redeo ad praesentem librum. Hunc pervolvitavi: multos locos, praefationem certe, cogitate legi. Sed quando in meam meorumque adversam valetudinem incidit, nec respondendi officium diutius differre volo; nunc pauca, alias otium nactus plura scribam. Et viam, quam sequeris, proba: qui cum ratione usum ita conjunxisti, ut huic plurimum tribueres, eumque per insignem lectionis copiam confirmares, qua te totius linguae Graecae tamquam corpus, et singulas partes earumque compositionem perspectam habere ostendis. Equidem vellem hunc librum Latine scripsisses: ut apud externos etiam in commendatione ad professorium munus tui ratio haberi posset. Hoc igitur Tu ages, ex majore minorem libellum, non tamen illum omissis Auctorum testimoniis, tali ornamento orbatum, conficies: in stilo autem perspicuitati et suavitati studebis; tuoque ipse exemplo ostendes te Graecorum rationem non modo professum, sed et secutum esse, certe a scholasticis eam formulis sordibusque immunem servasse. — Sed quod dixi de usu, huic Tu recto primas partes tribuisti. Nam analogia, ut eam post Scaligerum et Salmasium informavit Hemsterhusius, est illa quidem quasi inventum deorum, plurimumque verborum et origini, et significationi, et formationi, lucis adfert: sed neque a Lennepio satis ad auctoris sententiam explicata, a Scheidio etiam interpolata et contaminata, a multis adeo pessime usurpatur. Hanc enim, nescio quomodo, imperiti complures ita amplexantur, ut se

jam declinationum conjugationumque discendarum labori supersedere posse existiment, eorumque ignoratio ad multos scholarum magistros et Professores adeo serpat. Praestabat omnino veterem disciplinam severam illam et fructuosam retinere ediscendis graviter paradigmatis Graecis et Latinis: qua nos pueros patres nostri et ipsi continuerunt, et per magistros exercuerunt. Reprehendi istum errorem in Relatione de Scheidiana editione operis Lennepiani, Bibliothecae Criticae Vol. III, Part. II. p. 125: quem Tu meum librum si cum aliis meis libris adhibuisses in Grammatica tua conscribenda, poteras complures ejus locos multis partibus explere. Nam Commentarius Plutarcheus jam ante biennium a me Oxonium typis describendus missus, nondum descriptus est: qui si aliquando ad Te perveniet, copiam item augendi tui operis praebeat, frequens quippe praeceptis de ratione et consuetudine Graecae orationis.

Cum H. nostro tibi aliquid simultatis fuisse doleo. Qui simul atque ad nos venerit, operam dabo ut ad veterem invicem benivolentiam reconciliemini: et Attici exemplo, ὡς μικρὰ μεγάλους εὐκάζειν, efficiam, ut inter quos tanta laudis est aemulatio, nulla intercedat obtrectatio, sed ut sit talium virorum copula. De Huschkio autem in hanc academiam vocando, ita res acta est. Quum in Luzacii τοῦ μακαρίτου successor vocandus esset, Curatoresque me rogassent ut cum Boschio nostro collegam mihi jucundum munerique idoneum quaererem, de aliis dissidentes, Huschkium habuimus eum, in quo utriusque nostrum judicium consentiret. Hoc judicium Curatores ratum habuerunt: sed sanctione nuper demum allata, Huschkii adventus interea dilatus est.

Quod scribis de Dracone Stratonicensi: equidem

omnia tui et Hermannī egregii viri causa cupiam; ut si per oculorum infirmitatem et negotiorum multitudinem mihi liceret, sponte ipse et gratis opus suscipiam. Sed nunc difficilius est negotium quam illud quod ante hos octo annos describendis notulis Ruhnkenii in Hymnōs Homericos Tibi praestiti. Tunc mei res erat arbitrii, nunc est Curatorum: quorum Obligium libros Ruhnkenianos redemit publicaeque Bibliothecae asseruit. Ab his petere debet is qui uti vult libro, sive ipse, sive per me; non, ut per alium me roget. Haec est lex et consuetudo Hujus Bibliothecae. Qua quidem in petitione Clarissimi Hermannī omnem operam auctoritatemque, si qua est, apud Curatores interponam. Sed antequam huc devenimus, quaerendus est qui describat certus et idoneus homo: quī vereor ut a nobis reperiatur, aut repertus ad describendum quamvis luculenta mercede conducī se patiat. Atamen quidquid industria, diligentia studioque a me fieri poterit, id me Tibi effecturum spondeo.

Tu vero, optime Matthiae, proximis tuis ad me literis, scribe quaeso de rebus tuis: caelebs, an cum uxore, vivas: qui sit status Vestri Gymnasii, vicinarumque Academiarum Jenensis, Halensis, Lipsiensis. Et quando semper philosophiae Historiam, ut nosti, dilexi, significa mihi librum ex quo breviter omnem illam philiae apud Germanos conversionem cognoscam, quae a Kantio inchoata deinceps per Fichtium Schellingiumque immutata denique ad hujus aetatis formam venit, quam Tu in praefationis tuae exordio ad Platoniam rationem propendere dicis. Hoc mihi in primis gratum facies.

Vale, mi Matthiae, res tuas bene gere, meque ut facis ama. Scripsi Leidae, d. 6. Octobr. a. MDCCCVII.

D. W Y T T E N B A C H I I  
E P I S T O L A

A D

J. G. HUSCHKIUM, V. CL.

ACADEM. ROSTOGH. PROFESS. P. O. ETC. ETC.

*Huschkio Viro Cl. D. Wytttenbach S.*

Quum successor vocandus esset in locum Luzacii τοῦ μακαρίτου, Curatoresque Ampl. me rogassent, ut cum Boschio nostro agerem de quaerendo homine idoneo nec mihi injucundo, Tu is fuisti in quo utriusque nostrum judicium consentiret. Itaque et Boschius Tibi Curatorum de Te praejudicium perscripsit, et nos sperabamus illud primo quoque tempore regis auctoritate confirmatum iri, cujus peregrinatio confectionem negotii morabatur. Interea exstiterant qui alium candidatum animose magis quam prudenter producerent. Quorum consilia dum ego, quantum per valetudinem licebat, et literis et sermonibus reprimere laborabam, ecce adfertur laetissimus, meque multis laboribus liberans nuntius de Curatorum sententia confirmata. Ergo gratulor Tibi hunc honorem, optime Huschki, quem lubens melioribusque quam antea auspiciis accipies. Equidem haud dubito Te cum doctrina tum vero humanitate gratum mihi collegam fore. De me autem sic Tibi persuadeas velim, me, si quid ex re tua sit, quo Tibi nova haec statio jucundior reddatur, Tibi quoad ejus fieri possit, non defuturum. Vale et valens ad nos advola. Scr. Lugd. Bat. d. XIV. Septembris a. MDCCCVII.

# D. WYTTENBACHII EPISTOLAE

AD  
CH. G. HEYNIUM,

ACADEM. GOETTING. PROF. P. O. ETC. ETC.

*Praestantissimo Virorum Heynio  
D. Wytttenbachius S.*

Quod humanissimus Binder literas a te mihi attulit plenas illas veteris tuae erga me benevolentiae, nil mihi gratius accidere poterat, his praesertim temporibus, ubi *πάντ' ἐστὶν ἐχθρῶν μετὰ κοῦδεις τις φίλος*, certe *ἐν καιρῷ δεομένων φίλων πολλοὶ μὲν ὀνόματι φίλοι, ὄντως δὲ καὶ γνησίως ἢ τις ἢ οὐδεις*. Itaque et hoc horum temporum est, ut quisque non modo ab amicis, sed etiam, quod in Phaedone docemur, a corpore animum in se ipsum revocet, et, quantum habet in se ipso roboris et consilii, tantum sibi adversus has vitae calamitates auxilii et solatii paratum putet. Tu quidem, optime Heyni, tua sorte contentus vivis, et pristinam alacritatem hilaritatemque obtines: hoc et Moserus et Binderus testantur, et literae tuae confirmant. Ego vero, quod Tu scribis, *δρᾶν τὰν ναῦν* at non fortunae, sed animi; et hanc vix, ac ne vix quidem; ut subinde verear, ne hanc quoque *ὁ Ποτειδᾶν καταδύη*. Opus est Minerva, quae nos feroci patruo eripiat. Interea unice nos Literarum studiis sustentemus. Quod hellenistas vestros Phaedonem *ἰδιοποιήσεσθαι*, et tamquam suum suis lectoribus apposituros scribis; video quo id valeat, et dudum istos homines novi. Me vero nec exterorum furta, nec civium maledicta movent. Neque Te moverunt in Homeri editione: *Οὐ παυδόμεθ' εὖ ποιοῦντες τοὺς βροτοὺς, καὶ*



τὰς χάριτας Μενδὰς συγκαταμνύντες. Itaque nuper Philomathiae librum II, edidi: quem Tibi hac cum epistola reddet Binderus: addita etiam Disputatione Baumhaneri discipuli mei. Τέ, optime virorum, Deus multos porro annos et mihi et tuis et Literis servet. Scr. Leïdae, d. 1. Maji a. MDCCCL.

*Chr. G. Heyniō, Literarum principi,  
D. Wyttenbach S.*

Utinam, praestantissime virorum Heyni, genius meus natale qui temperat astrum, non ita dilatorem et inertem ad scribendum finxisset; non ego in literarum officio erga optimum et indulgentissimum quemque negligentissimus reperirer. Veluti Tu mihi, mi Heyni, ex omnibus doctis hominibus unus superes necessitudine cum benivolentiae tum disciplinae vetterimus; nam et ex admonitione tua per illud quamvis breve meum Gottingense tempus me subinde disciplinae fructum percepisse, grātus memini. Quo magis me piget ac poenitet istius, erga Te talem virum, silentii mei: cujus quamvis possim aliquam probabilem adferre excusationem, malo in benivolentia tua, quam in caussa mea, veniam ad ignoscendum invenire: *Ἀσάμην, οὐδ' αὐτὸς ἀναίνομαι. Ἄλλ' — ἀφ' ἑτέλω ἀρεῶν* quod reliquum nobis simul erit vitae spatium non ita rursus praeterire sinemus, quin manum ei injiciamus, literisque frequentemus, et postremum saltem lucis fructum, mutuumque animi affectum excipiamus. Proxime ad Te scripsi, Ruhnkenio nostro et vivo et valente fruens: qui jam septimam annum a me desideratur, et semper desiderabitur. Adeo neminem habeo cujus in praesentis et amore et doctrina acquiescam, a quo praesente et diligar simul et discam. Utinam Te haberem collegam! Nam qui nunc est,

J. L. est plane ἀλλόκοτος. Is, ante hos viginti annos, per civiles dissensiones, Valckenario suffectus, commendatione Ruhnkenii, postea contra hunc unicum sui honoris ac muneris auctorem ingratus et maledicus, mortuum adeo invidiae telo strinxit, novissime plagii literati in Valckenarianis adversariis commissi, insimulavit sub persona communis nostrum discipuli, scriptoris Lectionum Andocidearum, indulgenter sane habitarum in Ephemeridibus vestris. Ego meum esse judicavi istam in summum viram conjectam suspicionem confutare, leniter tamen et humaniter; et discipuli causa magistro multis modis parcens, tamen ut intelligeretur, τίς ὢν τίνα κατηγόρεῖ. Nam quae hic in me designare insane voluit, ut puerilia contemno; qui quidem ita me Ruhnkenio successisse putet, ut ipse habeat, in quem bilem et κόρον effundat. Mirabile est, ut relinquenda statione Amstelodamensi, accipiendaque Leidensi, complurium in me invidiam maledicentiamque excitaverim. Quos equidem refello silentio et conscientia pietatis erga Ruhnkenium, cujus mortui familia rem suam causamque sine illa mea migratione obtinere illo tempore non poterat.

Sed ad Te redeo, venerande Heyni. Te volebam: de Te ex Te quaerere instituens, nescio quomodo in istam de meis rebus narratiunculam delatus sum. Ecquid igitur recte vales, et res tuas e sententia geris? Nam pro tua quidem animi acquitate, mansuetudine, et rerum humanarum perspicientia, non dubito quin ita feras senectutem, ut haec vere in Te flos animi dicatur. Haec fuit eadem felicitas Ruhnkenii nostri, cujus Tibi Vitam sub ipsum illud editionis tempus misi, nulla tamen addita epistola ad Te scripta: quod me facere volentem multa illius temporis negotia in otii et facultatis opportunitate differre coegerunt:

quae nunc damnum mihi obtigit. Hoc mihi affirmanti credas, me per illud temporis spatium, ad quamvis Tui patriaeque tuae mentionem, vel fando acceptam, vel novis in libris lectam, sollicitudinem suscepisse cum voto pro tua salute, ut saltem publicae Tibi acerbitates privata et domestica prosperitate compensarentur. Nam diuturni hujus et calamitosi bolli, quis tandem erit finis, quae ἀποναιάσις? Interea Tu tamen in Literis viges et flores: de novis tuis scriptis saepe audimus, et vel ipsa vel eorum epitomas legimus; viderem illam, jam in juventute incredibilem, efficaciam Tibi etiam seni integram adesse stupemus. Nam quod nuper Homeri editio tua in quorundam reprehensionem incidit, sano dolui; oportebat tui ratio haberi ut Nestoris, de quo saepe mihi ad Tui cogitationem, in mentem veniebat, ὦ γέρον, ἢ μάλα δὴ σε νέοι τεύρουσι μαχητά. Nec tamen proximum in Te conferebam Σὴ δὲ βίη λέλυται, χαλεπὸν δὲ σε γῆρας ὀπάζει. Senectus tua, ut modo dixi et iterum dico, est *animi flos*, nec desiderat Diomedem, qui Te curru auscipiat: satis Te tuctur et gloria tua, et ante acta vita, et immortalia ad omne aevum Literarum opera et merita. Iuvabit me rursus mentionem tui cum Ruhnkensio conjungere in altera Epistolae meae Criticae editione, quam cogito. Plutarcheum commentarium modo in Britanniam misi. Primo quoque die exhibet Bibliothecae Criticae nostrae Voluminis Tertii Pars Tertia: cujus exemplum cum dissertatione de Panaetio, et si quid aliud nostrum ex novissimo proventu exstat, ad Te mittetur cum primum cognovero, quod sit mittendi certissimum iter, utrum vetus illud per Wilshusam, an aliud novum apertum sit? Hoc me velim quantumcunque doceas, literisque tuis bees. Vale ὦ Νέστορ, μέγα κῦδος Ἀχαιῶν. Scr. Leidae, d. 24. Nov. MDCCCV.

## FRAGMENTUM EPISTOLAE

D. WYTTENBACHII

DE

CLADE URBIS LEIDAE

AD AMICUM QUENDAM SCRIPTAE.

**D**ies erat XII Januarii ultimus feriarum brumalium: instructo ad crastinas scholas auditorio, recipio me in bibliothecam meam ad Plutarchum: libros et adversariorum chartas de more per pulpita sub fenestris explico, pergo studere; pransum abiens omnia ita relinquo, ut mox rediturus. Sedeo ad mensam solus cum nepti: intusitatus sonitus et fragor intonat ingens veluti multorum tormentorum unâ explosorum: vix oculos sustuleram, cum video proximae domus tectum versus nos ruere: patinae, disci, vasa, pocula, fenestrae, dissiliunt sponte in grandinem, qua verberamur, dum surgimus fugimusque in viam: huc vicini item affecti et perculsi proruperant, alii alios rogantes, mirantes, causam ignorantes: quam mox prodebat odor pulveris pyrii et conspectus viciniae inde a centesimo passu ad orientem collapsae ruina quaquaversum late patente. Simul via resonat ejulatu ac lamentatione profugorum ex aedibus quassatis, cum sauciorum, tum aliorum suos, ruina obrutos, plorantium ilisque apud incolumes auxilium quaerentium. Quod publice non ita continuo promi poterat: privatim ex longinquis urbis regionibus petendum erat: in vicinia nemine non laeso, vel suos suaque requirente. Nondum prospexeram ante pedes: video humum stratum et conspersam chartis: agnosco mea adversaria: scilicet bibliotheca in viam publicam spectabat, turboque fulmineus, evulsis fenestris, chartas ex pulpitis sustulerat; inde partim in viam dejecerat, quas re-

cuperavi: partim in subjacentem canalem merserat; partim vento zephyro versus orientem ad sedem ac principium ruinae ferendos tradiderat. Hoc sane magno munere divinae prudentiae celebrare debeo: quod is ventus exitiosam ictus vim in diversam regionem vertebat, ubi statio navis stygiae non totos centum et octoginta passus a mea domo erat; unde factum est, ut illo in tractu longinquiores multae aedes corruerint. Mox in domum regredior, scire cupiens ὅτι μοι ἐν μεγάροις ἀγαθὸν τε καὶ ὄν τε τίθεται: ecce parietes rupti, tectum ablatum, auditorium collapsum, diffractae omnes januae, fenestrae, vasa, quidquid eorum non esset durissimae materiae, incedo per acervos et fragmenta aculeata vitri, testae, ferri, lapidis, ligni; illaesis pedibus, quamvis discalceatus; sic forte eram, quum ad primum casum fugam e domo foras celerarem; omnino per totum hoc tempus melius valui, quam antea. Nam quum propter migrandi difficultatem viginti adhuc dies in quassata domo manerem, quae nonnisi duo cubicula tuta ab instanti ruina haberet, eaque exposita omni injuriae coeli, cumque vento, frigore, nive, pluvia, stillicidio vexaremur; nullam valetudinis partem desideravi; cumque interea frequentes terrores objicerentur propinquorum incendiorum, vicinarum aedium collabentium, fugae ex mea ab aedilibus imperatae, in his aliisque tumultibus animus mihi constitit. Et nunc in hortulo suburbano habitans, ex triplici bonorum genere duo potiora animi et corporis salva agnosco: in rebus externis desidero quosdam libros, adversaria, magnam suppellectilis, vestimenti, instrumenti partem: pecuniae ad centum philippeos: vel ipso casu ac tumultu amissa, vel insidiatorum fraude subrepta: quae omnia duorum potiorum beneficio bonorum aut reparentur facile, aut certo obruantur. —

# INDEX

## RERUM ET VOCABULORUM.

**Ablativi plures cumulati** 263.  
**accentus** in adjectivis gr.  
 compositis mutat significacionem 243. — **accentuum**  
 graecorum ratio non negligenda 294.  
*acquirere* 230 sqq.  
*ad hoc, ad haec, pro praeterea* 241.  
*adhuc pro praeterea* 241 sq. —  
*adhuc in comparativis* 241.  
**adjectiva** in — *ficus* 241.  
**Alembertus** 88.  
**alethophilus** 243.  
*alucinari, ἀλύειν* quid 57.  
*ἀλύειν, alucinari* 57.  
**antitheta** 239.  
*apotheca* 223.  
**Aristaenetus** expl. in Wyt.  
 epist. crit. sup. Juliano  
 scripta 65.  
*articulus* 242.  
**Athenaeum** Amstelodam. 86.  
**Augerus** 273.

### B.

**Bakius, Jan., prof. Leid.** 160.  
 168. — **Ej. lib. de Posidonio** 269.  
**Bangii elogium** Dan. Wyttenbachii patr. 2.  
**Batavia Gallici imperii fit**  
**provincia** 170. — **Bataviae**  
**academiae tres eversae** 177.  
**Batavorum mores** 271. —  
**Batavorum Germanorum-**  
**que mutua invidia** 267.  
**Baumhauerus, discip. Wyt-**  
**tenbachii** 178.  
**Bejotius, Franc.** 88.  
**Bernardus, medic. Leid.** 205.

**Bibliothecae criticae. P. I. II.**  
 92. — **P. III. IV.** 98. —  
**P. V. VI.** 99. — **P. VII.**  
**VIII.** 105. — **P. IX.** 123. —  
**P. X.** 128. — **P. XI.** 150. —  
**P. XII.** 160. — **Ejus epi-**  
**crisis a Mahnio scr.** 211 sq.  
**Bignonus, bibl. reg. Paris.**  
 praef. 87.  
**Binderus** 87.  
**Bipontina typographia a Fran-**  
**cogallis vexata** 126.  
**Blessingius** 277.  
**Boersius, F. G., amicus Wyt-**  
**tenbachii** 190.  
**Borrelius** 272. 277.  
**Boschius, Hier.** 17. 84. 134.  
 286. — **Ejus mors** 176. —  
**Ejus memoria scripta a**  
**Lennepio** 85.  
**Bosius, Lamb.** 118.  
**Brunckius** 125. 273.  
**Burgessius, Thomas** 124.  
**Burmamnus, Sec.** 92.

### C.

**Cador, Dux de, 185. — Ad**  
**eum epistola Wyttenbachii**  
**cum commentariolo vitae**  
**rerumque ipsius** 187.  
**Callimachus Valckenarii** 271.  
**Caperonnertus, Paris.** 87.  
**Catullus** 279. — **Ej. codd.**  
**Guelferb.** 280.  
**Cellarius** 110. 118.  
**Cicero** def. 241. 242. — **Ejus**  
**lib. philosophici quo consi-**  
**lie et institute scripti sint**  
**et cui aetati commendandi**  
**70 - 73. — Ej. libb. de Na-**  
**tura Deorum editio Creu-**

- zeri cum dietatis Wytt-  
bachii 202.  
Ciceroniani 228. 237. 214 sq.  
Coingius, prof. Marburg. 27.  
Crasius 93.  
Crawfordius 143.  
Creuzerus, Fr., Leidam vo-  
catur 164. — Ejus edit.  
Plotini 189. — Ejus edit.  
Cic. de Nat. Deor. c. dict.  
Wyttb. 202.  
Curtii memoria Dan. Wyt-  
tenb. pat. 3.  
Cuvierius, Paris. 476.

## D.

- decessor* 256.  
Derkinderanus 176.  
*dictata* professorum edenda  
252 sq.  
Draco Stratonicensis 284 sq.

## E.

- Eichstaedtius 161.  
Eldikii suspiciones 219.  
*elogium* 242.  
Ernestius repreh. 241. 242. —  
Ejus latinitas 244 sq.  
*etiam* in comparativis 242.  
Eunapius expl. in Wyttb.  
epist. crit. super Juliano  
scripta 65. — Wyttb. in  
eum animadverss. 169.  
Eupolidis dictum: *πειδω* etc.  
224.

## F.

- Falkius, A.R., 201.  
Fichtius 285.  
Foncemagnus 88.  
Fontanes, Comes de, 176. —  
ad eum epist. Wyttb. 179.  
Fonteinus, Pet., Amstel. 81.  
Frisemannus 272. 277. 278.

## G.

- Gattererus 110.  
Geigerus, prof. Marburg. 28.  
Germanorum furta 287.  
Gervinus 278. 279.  
Gottingenses 270. 278.

- Guelferbytani coeli inole-  
mentia 268.  
*γυναικοφιλης*, *γυναικοφι-*  
*λης* 243.

## H.

- Heim, van der, discip. Wyt-  
tenb. 182.  
Heinsius, Nic. 280.  
Hemsterhusii ratio etymolo-  
giae graecae 233 sq.  
Helmstadiensis annal. lit. 276.  
Hermannus, Godofr., 285.  
Herodianus 270.  
Heusdius, Ph. G., discip. Wyt-  
tenb. 146. 149.  
Heusingerus, J. F., 273. 276.  
287.  
Heynius, Ch. G., 64. 67. 76.  
126. 270. 277. 280. — Ej.  
ed. Homeri 290.  
historia qua via et ratione  
tradenda sit 111 sq.  
Hoofdus 277.  
*hordeum* 222.  
*horreum*, i.e. magasin 221 sq.  
Huschkius, J. G., Leidam  
vocatur 163. 284.

## I.

- Jaegerus, Jac., 16.  
indicativus in oratione obli-  
qua 258.  
*inopinatus* 238.  
*instar*, ad *instar* 244 sq.  
interpretatio veterum scri-  
ptorum qua ratione insti-  
tuenda sit 115. 116. 117.  
Iulianus tractatur in ep. crit.  
Wyttb. 64.  
Iureconsultorum latinitas  
235 sq.

## K.

- Kantius 285. — Ejus philo-  
sophia 160.  
Kappeyne van de Koppelle,  
discip. Wyttb. 182.  
Kemperus, Prof. Leid. 191.  
Kluitius, Prof. Leid. 157.  
Kramerus 151.

## L.

- Laar, B. van, discip. Wyttenb. 169.  
*labor et labores* 261 sq.  
 Langerus, bibl. Guelf. praefectus 267.  
 Larcherus 89.  
 latine scribendi exercitationes quomodo instituendae sint 30. 228. — consuetudo decrescens 215 sq.  
 Leida urbs incendio vastatur 153, 54. 291. — acad. transform. Francica 179. — bibliothecae leges 285.  
 Leisnerus 270.  
 Lelyveld, P. van, discip. Wyttenb. 178.  
 Lennepius, Dav. Jac., 85. 283 sq. — memoriam H. Boschii scripsit 164.  
 Leo Judas discip. Th. Wyttenb. 2.  
 Lessingius 267. 281.  
 litterarum humaniorum studium decrescens 214.  
 Lohkovitzius, philosoph. 49.  
 Lorryus, medicus Paris. 88. 89. 90.  
 Luciani cod. Guelferb. 273. *lucrificus* 241.  
 Luzacius, Jo., prof. Leid. 157. 247 sq. 252. 289. — successor ei quaeritur 284. 286.  
 Luzacius, L. C., discip. Wyttenbachii 169.  
 Lydenus, F. G., discip. Wyttenb. 146. 160.

## M.

- magasenum* 222.  
 Mauriti, principis Hassiae, prosodia 24.  
 Meermannus 164.  
 Millotius 110.  
*μῖδος* in compositis 243.  
 Moserus 287.  
*multimodus* 228.  
 Muretus quo consilio legendus 69. — Ejus latinitas 244 sq.  
 Musgravius 125.

## N.

- necopinatus* 238.  
 Netscherus, J. Th., discip. Wyttenb. 168.  
 Noëlius, Paris. 176.  
 nominum recentiorum latina terminatio 264.  
*notatio* 242.

## O.

- omnigenus* 227.  
*omnimodus* 227.  
*ὁμοιοτέλευτα* 240.  
*ὥραια*, fruges 222.  
*ὠρεῖον*, horreum 222.  
 oratt. academicarum ratio circumscripta 94.

## P.

- p* inter *m*, *s*, *t* intrusum 223.  
 Parisinorum fastidium ad libros senioris argum. 103.  
 paronomasia 239.  
*patriophilus* 243.  
 Periclis ratio in causis forensibus tractandis 95.  
*persequi viam* 236 sq.  
 Petavius 118.  
*philalethes* 243.  
 Philomathiae Wyttenbachii L. I. 169. — L. II. 176. — L. III. 179. 204.  
*philopatris*, non *philopatrius* 243.  
*φίλος* in compositis 243.  
 Philosophiae tractandae mathematica ratio, opposita Socraticae 72. — De philosophiae cum elegantioribus literis conjunctione, or. Wyttenbachii 80. — De philosophia, auct. Cicerone, laudatarum artium omnium procreatrix, or. Wyttenbachii 94. — Ionica et Italica 96. 97. — Historiae philosophiae utilitas 96. — Ejusdem divisio in sex aetates 96. — Eandem a civilium rerum historia non esse divellendam 97. — Philos. Germanorum 285 —



De philosophia Kantiana  
epist. Wytenb. 160. —  
philosophorum veterum  
protrepticae oratt. 94.  
Pideritius, prof. Marb. 49.  
piger a Gr. *πυρρός* 192.  
Plato def. 252. — Ejus Phae-  
do, ed. Wytenb. 149.  
Plautus def. 240.  
Plotini ed. Creuzeri 189.  
Plutarchi opp. moralia ed.  
Wytenb. 142. 143. 153.  
250. 275. — De S. N. V.  
ed. Wytenb. 124.  
*prae se ferre* 226.  
*praecepta percepta habere*  
254 sq.  
*praedecessor* 256.  
*praesens pro futuro* 257.  
Probus, commentator Virgilii,  
a Santenio edendus 281.  
*promitto c. infin. praes.* 256 sq.  
*promptuarium* 221 sq.  
*prosaicus* 227 not.

## Q.

*quidam honeste dicitur* 260.

## R.

Randolphus, Episc. Oxon. 126.  
Reiskia 269. 274.  
Remonstrantium schola Am-  
stelodamensis 80.  
*repudiare* 226 sq.  
*revocare ab aliqua re* 257.  
Rowohlius 143.  
Ruhnkenii epist. ad Wytenb.  
66. 74. 81. 88. 106. —  
mors 134. — successor 288.  
— vita auct. Wytenb. 141.  
— dictata 253. — latinitas  
245. — falso insimulatur  
plagii 259 265. 289.

## S.

Sacy, Silv. de 194.  
Salchlius, Eman. 53. 195.  
Salgasius, Claud. 124.  
Sanctocrucius 88. 154. — Ad  
eum epist. Wytenb. nunc  
primum vulgata. ibid. —  
Ejus memoria, auct. Wyt-  
tenb. 192.

*sanguinolentus* 237.  
Santenius 88. 92. — Ejus de-  
liciae poeticae 280. — Ej.  
codd. Ciceronis 281.  
Saxius 146. — Ej. latin. 274.  
Scheidius 283 sq.  
Schellingius 285.  
Schroeckhius 110.  
Schroederus, N. G., prof.  
Groning. 8.  
Schroederus, prof. Marb. 28.  
Schützius, C. G., 276.  
Segaarius 147.  
*sequar* 239.  
*simulare* 226 sq.  
Sleidanus 110.  
Sluiteri lectiones Andocidae  
228. 251. 259. 265.  
Socratis obstetricia docendi  
ratio 82.  
*solida doctrina* 245.  
Spangenberg, prof. Marb. 27.  
Spëusippus 255 sq.  
Straderus 27.  
*superlativus* 254.  
Swindenus 106.

## T.

Temminckius, Matth., Am-  
stelod. 87.  
*tempus c. adjectivo* 237 sq.  
*teneri c. infin.* 232 sq.  
Terentianus Maurus 281.  
Tewaterus 248.  
Theocritus ill. 243.  
Theophrastum editurus erat  
Wytenbachius 225.  
Tymaei Lex. Plat. ed. Ruhn-  
kenii 62.  
Tittmannus, Theol. Lips., in-  
sector Wytenb. 193.  
*titulus* 242.  
Tollius 92. 105. 272. 277.  
Tursellinus 110. 112.  
*tutus* 228 sq.  
*unimodus* 228.

## V.

Valckenaerius, Jan. 168.  
Valckenaerius, L. C. 271. —  
Xenophontem editurus erat  
271. — Ejus epist. ad Wyt-  
tenb. 75. — Ejus mors 106.

Villoisonus 88. 90. 277.

W.

Wagnerus 272. 277.

Wassenaerius 176. — memoria ejus a Wytttenb. celebrata 177.

Wernsdorfii poetae lat. minores 276.

Weselius Scholtenus 105. 195.

Willet, Abr., disc. Wytt. 182.

Wolfius, Christ. philos. 12.

Wytttenbachiae Sympos. 196.

Wytttenbachiorum gens 1.

Wytttenbachius, Dan., pater

Marburgum vocatur 12. —

moritur 98. — Ejus memoria auct. Curtio 3. —

elogium scrips. Bangius 2.

Wytttenbachius, Dan., fil. natus 8. — in scholam Bernensem mittitur 4. —

disciplinae Jaegeri traditur 12. — gr. linguae studium

auspicatur 21. — hebraic. linguam addiscit 23. —

versus lat. facere docetur 24. —

civis fit academ. 26. —

per singula spatia semestria in acad. quid tractaverit 27. 46. 48. 50. 51. —

libri superstitiosi lectione perturbatur 32. — scholas

theologorum frequentare incipit 51. — ad literas

elegantiores redit 55. —

Goettingam abit 64. — studiorum suorum primitias

edit 64. — commercium

literarum cum Ruhnkenio

et Valckenario init 73. —

Leidam migrat 76. — quo

sensu Duumviros Batavos

in prima congressione adspexerit 78. — in scholas

eorum ventitat 79. — Plutarchi libr. de S. N. V.

edendi consil. capit 79. —

Amstelodamum abit Prof. design. Philos. et Litt. in

schola Remonstrantium 80. —

orat. habet de conjun-

ctione philos. cum elegantioribus litt. 80. — Fonteinii, Boschii, aliorum sibi conciliat amicitias 81. — Plutarchi novam edit. molitur 87. — Parisios proficiscitur 87. — Plutarchi codd. bibl. reg. confert 88. — Amstelodamum revertitur 90. — Bibliothecae criticae duas priores partes edit 92. — a Curatoribus Athenaei Amstelodam. repulsam fert et de relinquenda Batavia cogitat 92. 93. — prof. philos. in Athenaeo creatur 94. — orat. inaugur. de philosophia, auctore Cicerone, laudatarum artium omnium procreatrice et quasi parente 94. — bibliothecae crit. P. III. IV. edit 98. — quaestionis publice propositae praemium reportat 98. — bibliothecae crit. P. V. VI. edit 99. — iterum praemio ornatur 103. — bibliothecae crit. P. VII. VIII. edit 105. — prof. Liter. in Athenaeo creatur 105. — Leidensem cathedram repudiat 107. — ratio ejus in tradenda historia 111. — ejus interpretatio veterum scriptorum 115. 116. — bibliothecae cr. P. IX. edit 123. P. X. 128. — morbo affligitur 124. — Plutarchum de S. N. V. edit 124. — Plutarchi moralia perpurigare instituit 127. — Bernam vocatur 128. — Selecta principum gr. historicorum edit. 128. — Leidensem vocationem iterum recusat 131. — Bernam vocatur iterum 132. — Amstelodamo discedit Leidam in locum Ruhnkenii 138. 247 sqq. — or. recitat inaugur. de adolescentia Ruhn-

kenii 139. — Ruhnkenii vitam scripsit 140. — Plutarcheas chartas mittit Oxonium 142. 143. — quos scriptores Plutarchi causa relegit et excerpterit 148. — epist. data ad Heusdium 149. — Plat. Phaedonem edit 149. — Bibliothecae crit. P. XI. edit 150. — Plutarcheos commentarios mittit Oxonium 153. — Leidensis urbis calamit. affligitur 153. — Selectorum princ. Hist. alteram edit. adornat 160. — bibliothecae crit. P. XII. edit 160. — Socius adsciscitur Instituti Regii Amstelod. 167. — Platonicos interpretes pertractat 169. — in Eunapium animadv. inchoat 169. — Philomathiae libr. I. ed. 169. — ad Bakii libr. de Posidonio annot. scrib. 169. — in Plat. Phaedonem annotat. scribit 169. — Philomathiae libr. II. edit. 176. — Ordinis Reunionis in-

signibus decoratur 184. — Plotinum de pulchr. pertractat 189. — Instituti Regii Francici Sodalis cooptatur 194. — aegrotare incip. 195. — Heidelbergam iter facit 198. — Belgici Leonis Ordini adscribitur 199. — neptim suam ex sorore uxorem ducit 202. — Tugrurum fontes adit 203. — Philomathiae libr. III. edit. 204. — apoplexia correptus moritur 205. — Ejus praef. ad praecepta de arte logica 99. — Historia philosophiae 97. — de animorum immortalitate acroases 104. — Ejus latinitas 218.

Wytttenbachius, Thom. praeceptor Zwinglii 1.

Wytttenbachius, Ulmanus 1.

## Z.

Zeunius 270 sq.

Zwinglius ex discip. Thom. Wytttenbachii 1.

# T A B U L A

## RERUM HOC VOLUMINE COMPREHENSARUM.

	Pag.
1) Praefatio editoris. . . . .	v - xvi
2) G. L. Mahnii epistola dedicatoria . . . . .	xvii - xx
3) Ejusdem praefatio. . . . .	xxi - xxv
4) Wytttenbachii vita a Mahnio scripta . . . . .	1 — 210
5) Mahnii epicrisis censurarum bibliothecae criticae Amstelodamensis . . . . .	211 — 266
6) F. A. Eberti praefatio ad epistolas Wytttenbachii et Santenii . . . . .	- 267
7) Wytttenbachii epistolae ad E. Th. Langerum scriptae . . . . .	268 — 279
8) L. Santenii epistola ad eundem gallice scripta	279 — 282
9) Wytttenbachii epistola scripta A. Matthiae	282 — 285
10) Ejusdem epistola scripta ad L. G. Huschkium	286
11) Ejusdem epistolae scriptae ad C. G. Heynium	287 — 290
12) Ejusdem epistolae ad amicum quendam de clade urbis Leidae scriptae fragmentum . . . . .	291 — 292
13) Indices rerum ac vocabulorum . . . . .	293 — 298

## Verlagsbücher von *L. Lucius* in Braunschweig.

- Becker, C. P., theoretisch-prakt. Anleitung zur Gewinnung des Salpeters nach der neuesten, in Frankreich gemachten, und nach eigener Erfahrung, mit besonderer Rücksicht auf die preuss. Staaten. Mit einer Vorrede vom Prof. Hausmann. gr. 8. 1 Thlr. 8 Ggr.
- Ewald, H. A., Dr. Komposition der Genesis, kritisch untersucht. gr. 8. 1 Thlr. 12 Ggr.
- Fredersdorf Promptuarium der Herzogl. Braunschw. Landesverordnungen; fortgesetzt von Küchenthal. 7r Theil. 4. 1 Thlr. 16 Ggr.
- Friedemann, Dr. F. T., praktische Anleitung zur Kenntniss und Verfertigung lateinischer Verse, mit leichten Lestücken für mittlere Gymnasialklassen und als Anhang zu allen lateinischen Sprachlehren. gr. 8. 8 Ggr.
- Giesecke, K. Th., Das griechische Verbum; tabellarisch dargestellt, mit Hinzufügung der nothwendigsten Regeln über die Bildung der einzelnen Formen und steter Verweisung auf die Grammatik von Buttm. und Thiersch. In 8 Tab. Fol. 1 Thlr. 12 Ggr.
- Krüger, Th., Untersuchungen aus dem Gebiete der latein. Sprache. gr. 8. 1s Hft. 9 Ggr. 2s Hft. 1 Thlr. 12 Ggr.
- Lachmann, C. L., Geschichte der Stadt Braunschweig, seit ihrer Entstehung bis 1815. 8. 2 Thlr.
- Luzuriaga, L., Von der Thätigkeit des Bluts und Nervensystems; aus dem Ital. vom Prof. Winkelmann. 8. 5 Ggr.
- Mann, B., Der Schuldschein. 8. 1 Thlr. 12 Ggr.
- Mannsfeld, Dr., über das Wesen der Leukopathie oder des Albinismus; nebst Beschreibung eines in Braunschweig lebenden Albinos. Mit einer illum. Abbildung. 4. 1 Thlr.
- Schmidt, J. H. Dr., Freimüthige Beleuchtung der Wunderkuren durch die Vernunft, oder was hat man von Sympathie, Besprechungen, Gebet und dergleichen Kuren zu halten? gr. 8. 12 Ggr.
- Venturini, C. Dr., Beiträge zur neuesten Geschichte des Protestantismus in Deutschland. 1s Hft. (Des Dr. de Wette einstimmige und doch verworfene Wahl zum Prediger an der St. Katharinen-Kirche zu Braunschw.) gr. 8. 18 Ggr.
- Ziegenbein, J. M. H. Dr., historisch-pädagogische Blicke auf Taubstummen - Unterricht und Taubstummen-Institute. gr. 8. 6 Ggr.

### Nächstens erscheinen:

- Friedemann's, Dr. F. T., kleine poetische griechische Anthologie für mittlere Gymnasialklassen, mit allerlei leichten Lestücken und dem vollständigen 9. 10. 11. Gesänge aus Homers Odyss., nebst einem griechisch-deutschen Wort-Register und einer prakt. Anleitung zur Verfertigung griech. Verse. kl. 4. 8 Ggr.
- Ruhnkenii, D, opuscula. Collegit et epp. aliaque inedd. add. F. T. Friedemann. Tom. I. II. gr. 8.
- Luciani Somnium. Ad fid. cod. Gueff. nondum collati ed. et animadvv. in us. schol. add. Friedemann. gr. 8.











Manne, W. L.  
Vita Danielis Wyttenbachii.  
ed. F. T. Friedemann.

321739

W997  
M21

MAR 16 1938 Binder JUL 20 1938

321739

742

W997

M21

THE UNIVERSITY OF CALIFORNIA LIBRARY

